





明 宋 濂 等撰

華書

中

卷一七六至卷一九三(傳)第 一 四 册

局

元史卷一百七十六

列傳第六十三

曹伯啓

路治中,御史潘昂霄、廉訪使王俁交薦,擢拜西臺御史,改都事。 廉訪僉事闊闊木,[1]以苛刻聞,伯啓糾黜之。 士,伯啓請建祠立學,以表其績,朝議是之。涇陽民誣其尹不法,伯啓覈實,抵民罪。 官,豪民黃甲,恃財殺人,賂佃客誣伏,伯啓讞得其情,遂坐甲殺人罪。遷河南省都事、台州 簿,尉獲盜三十,械徇諸市,伯啓以無左驗,未之信,俄得眞盜,尉以是黜。累遷常州路推 曹伯啓字士開,濟寧碭山人。弱冠,從東平李謙游,篤於問學。 關陝自許衡倡道學,教多 至元中、歷仕爲蘭溪主 四川

僧訟某之罪,何爲久弗治。」衆莫敢對,伯啓從容言曰:「犯在赦前。」丞相雖甚怒,莫之奪也。 延祐元年,陞內臺都事,遷刑部侍郎。 丞相鐵木迭兒專政,一日,召刑曹官屬問曰:「西

列傳第

其人已死,喻其子弟曰:「負官錢,雖死必徵,與其納賂於人,曷若償之於官。 宛 者,卽列上與줲之。出爲眞定路總管,治尙寬簡,民甚安之。 之數,官爲徵之。」諸受賂者皆懼,而潛歸賂於其子,爲鈔五百餘萬緡,民之逋負而 糧,歲數萬石,肆爲欺罔,累贓鉅萬,朝廷遣使督徵,前後受賂,皆反爲之游言,最後伯啓往 單騎往喩新帥,備得其情,止奏坐前帥擅興罪,邊民以安。 用 帥 平尹盜官錢,鐵木迭兒欲併誅守者,伯啓執不可,杖遣之。 代之矣,命伯 啓往詰其事。次沅州,道梗,伯啓恐兵往則彼驚,將致亂,乃遣令史楊鵬, 大同宣慰使法忽魯丁,撲運嶺北 八番帥擅殺,起邊釁, 第條汝父所賂 無可理 朝廷已

運有 言:「揚淸激濁,屬在臺憲,諸被枉赴愬者,實則直之,妄則加論可也。 風紀定制乎。」俄去位。 期,出納有次,船戶、倉吏盜賣漏失者有罰。 五年,遷司農丞,奉旨至江浙議鹽法,罷檢校官,置六倉於浙東、西,設運 歸報,著爲令。 尋拜南臺治書侍 今訟寃一切不問,豈 鹽官, 御史,因

制,伯啓言:「五刑者,刑異五等,今黥杖徒役於千里之外,百無一生還者,是一人身備五刑制,伯啓言:「五刑者,刑異五等,今黥杖徒役於千里之外,百無一生還者,是一人身備五刑 使昭代有殺諫臣之名,帝爲之悚聽。 緩之,近臣激怒上聽,遂誅言者。 伯啓曰:「主上聰明睿斷,是不可以不諍。」 迺劾臺臣緘 英宗立,召拜山北廉訪使,時敕建西山佛宇甚亟,御史觀音(奴)[保]等, 三以歲饑,請 俄拜集賢學士、 御史臺侍御史。 有詔 同刊定大元通

非五刑各底於人也。法當改易。」丞相是之,會伯啓除浙西廉訪使,不果行。

欺上問下,不報,范飲恨死,伯啓具其事,書于太史。眞州知州呂世英以剛直獲罪,伯啓白 其枉,進擢風憲。其好彰善率類此。 中臺,所獎借名士尤多,爲侍讀學士,考試國子,首取呂思誠、姚紱。 泰定初,引年北歸,優游鄕社,陽人賢之,表所居爲曹公里。伯啓性莊肅,奉身淸約,在 雲南僉事范震言宰臣

藁,續集三卷,行世。 子六人,孫十人,皆顯仕。 長子震亨,卒于毗陵,伯啓往拊之,明年二月,卒于毗陵,年七十九。有詩文十卷,號漢泉漫 且八十,尚忘知止之戒乎」。終不起,一時被命者,因相繼去位,天下之士高之。至順三年, 天曆中,起伯啓爲淮東廉訪使、陝西諸道行御史臺中丞,使驛敦遣,伯啓喟然曰:「吾年

李元禮

頌功德,體製溫雅。請諡圜丘,升祔太室,禮文多其所詳定。 太祝,陞博士。定撰世祖聖德神功文武皇帝、昭睿順聖皇后、裕宗文惠明孝皇帝尊諡議,稱 李元禮字庭訓,眞定人。資性莊重,燕居不妄言笑。歷易州、大都路儒學教授,遷太常

|元貞元年, 擢拜監察御史, 彈劾無所回撓。 二年,有旨建五臺山佛寺, 皇太后將臨幸,

元禮上疏曰:

路州縣,供億煩重,男女廢耕織,百物踊貴,民有不聊生者矣。 以裨益聖治萬分之一哉!伏見五臺創建寺宇,土木旣興,工匠夫役,不下數萬,附近數 諫官得言之。今朝廷不設諫官,御史職當言路,卽諫官也,烏可坐視得失而無一言, 古人有言曰:生民之利害,社稷之大計,惟所見聞而不係職司者,獨宰相得行之,

蒼生崇奉祈福,福未獲昭受,而先勞聖體,聖天子曠定省之禮,軫思親之懷,五也。伏 倍,而又勞民傷財,以奉土木,四也。佛本西方聖人,以慈悲方便爲敎,不與物競,雖窮 體,往復暑途數千里,山川險惡,不避風日,輕冒霧露,萬一調養失宜,悔將何及,二也。 孝心,下以慰元元之望。如此,則不祈福而福至矣。 願中路回轅,端居深宮,儉以養德,靜以頤神,上以循先皇后之懿範,次以盡聖天子之 之則,書而不法,將焉用之,三也。夫財不天降,皆出於民,今日支持調度,方之曩時百 今上登寶位以來,遵守祖宗成法,正當兢業持盈之日,上位舉動,必書簡册,以貽萬世 百姓歲計,全仰秋成,扈從經過,千乘萬騎,不無蹂躪,一也。太后春秋已高,親勞聖 天下珍玩奇寶供養,不爲喜,雖無一物爲獻而一心致敬,亦不爲怒。今太后爲國家、爲 伏聞太后親臨五臺,布施金幣,廣資福利,其不可行者有五:時當盛夏,禾稼方茂,

臺臣不敢以聞。

私黨漢 直學士、輕車都尉,追封隴西郡侯。 曰:「御史之言是也。」乃罷萬僧,復元禮職。未幾,改國子司業,以疾卒,贈亞中大夫、翰林 忽木抗言曰:「他御史懼不肯言,惟一御史敢言,誠可賞也。」完澤等以章上聞。 曰:『我非喜建此寺,蓋以先皇帝在時,嘗許爲之,非汝所知也。』」彧與萬僧面質於完澤,不 事不忽木等鞫問,不忽木以國語譯而讀之,完澤曰:「其意正與吾同,往吾嘗以此諫,太后 大德元年,侍御史萬僧與御史中丞崔彧不合,詣架閣庫,取前章封之,入奏曰:「崔 人李御史,爲大言謗佛,不宜建寺。」帝大怒,遣近臣齎其章,敕右丞相完澤、平章政 子端,仕至禮部尚書。 帝沉思良久 中丞

王讀

裕宗,眷遇特異。至元 書省,遂革。二十八年,罷尚書省歸中書,復任吏部郎中。 王壽字仁卿,涿郡新城人。 十九年,授兵部員外郎。 幼穎敏嗜學,長以通國字,爲中書掾。 二十二年,陞吏部郎中。 以壻康里不忽木柄用當道,即自 旣而 二十四年,分 用朝臣薦,入侍 2置尚

元貞二年,出爲燕南 河北道廉訪副使。 大德二年,不忽木爲中執法,復棄官歸。

列

傳第

免去。明年,授大司農丞,不赴。

以保全之,此長久之道也。」 居風憲。天災代有、賑濟以時、無勞聖慮。惟是豪右之家、仍據權要、當罷其職、處之京師、 江南,偏祠嶽鎭海瀆。密旨:去歲風水爲災,百姓艱食,凡所經過,採聽入對。使還,具奏: 授集賢直學士,秩滿,就陞侍讀學士,俄擢御史臺侍御史,論事剴切。六年二月,召壽奉香 「民之利病,繫於官吏善惡,在今宜選公廉材幹、存心愛物者專撫字,剛方正大、深識治體者

從而理也。」九年,參議中書省事。十年,改吏部尙書。 推愛君思治之心,邪正互陳,成敗對舉,庶幾上悟天衷,懲其旣往,知所進退,天下之事,可 伯顏、八都馬辛、阿里等專政,煽惑中禁,幾搖神器。君子小人已試之驗,較然如此。臣願 安童、伯顏等爲丞相,史天澤、劉秉忠、廉希憲、許衡、姚樞等,實左右之,當時稱治比唐貞觀 之盛。迨至阿合馬、郝禎、耿仁、盧世榮、桑哥、忻都等,壞法黷貨,流毒億兆。近者,阿忽台、 之興衰,民之休戚,未有不由相臣之賢否也。世祖初置中書省,以忽魯不花、塔察兒、線眞 初,壽與臺臣奏:「宰相內統百官,外均四海,位尊任重,不可輕假非人。 三代以降,國

失、平章政事、上柱國、薊國公,諡文正。 臥 疾求代。三年夏,遷太子賓客、集賢大學士。秋九月卒,年六十。明年,贈銀青榮祿大 十一年,武宗卽位,首拜御史中丞,未幾,更拜左丞,俄復拜御史中丞。至大二年三月,

王倚

恪, 官職未備, 侍東宮,時倚年弱冠, 爲 人孝友樂易,重然諾,與人交, **遂見信任。有詔皇太子裁決天下事。** 王倚字輔臣, 而湯沐分邑,地廣事繁,當有統屬, 其先東萊人也。 在衆中儀觀獨偉, 不苟合; 父永福, 太保劉秉忠深器重之,卽以充選。 凡時政所急,民瘼所係, 讀書務躬行,不專事章句。世祖選良家子入 金末避地徙燕,爲宛平著姓,富雄閭里。倚 乃拜倚工部尚書,行本位下隨路民匠都 倚知無不言。 倚服勤守 是時,

辭,帝目之良久,謂侍臣曰:「倘,修潔人也,左右皇孫,得人矣。」及行,營幕所在,軍政肅然。 許,力辭再四,方許之。二十六年,皇孫出鎭懷孟,帝爲選老成練達舊臣護之,乃以屬倚,陛 未幾,召還。 以疾辭職,仍給太子家丞祿,以優養之。 倚上言:「不事事而苟竊祿食,臣心誠所未安。」不 至元二十一年,韶立東宮官屬,以倚爲家丞。又置儲用司,掌貨幣出納,令倚兼之。 後

太原郡侯,諡忠肅。 二十八年, 授禮部尙書,以疾辭。 子二人,鵬,異樣總管府總管。 明年卒,年五十三。贈正議大夫、禮部尙書,追封

列傳第六十三 王倚

劉正

窘 令史。 得至元五年李介甫關領課銀文契七紙,適合其數,驗其字畫,皆司庫辛德柔所 而 錠,逮繫倪運使等四人徵之,視本路歲 了,時已富實,交結權貴,莫敢誰何。 四人得釋,正由是知名。 劉 至元 正字清卿,清州人也。 八年 ,罷諸路轉運 轉樞密院令史,辟掾中書。 司, 年十五,知讀書,習更事,初辟制國用使司令史,遷尚書戶部 立局考核逋欠, 正廉得其實,始白尙 入簿籍,實無所負,辭久不決。 正掌其 事。 書捕鞫之,悉得課銀。 大都運 司 正察其冤 負課銀 書也。 遍閱 五. |辛旣伏辜, 百四 | 吏牘 十七七

造給 等 進 四人雜治之,竟置二人于死,正乃移疾還家。 而 命刑部尚書李子忠,與正馳驛往按其事,獄 之,後帝以 十四年,分省 十五年,擢 弗往,後至者 為欺罔,欲詰治。正曰:「軍賞貴速,先造符印而後禀命,豈不可乎!」帝釋之。 左 益怯· 上都,會諸王昔里吉叛,至居庸關,守者告前有警急,使姑退,正曰:「職當 司 都事。 矣。」馳出關,至上都。邊將請黃白金符充戰賞,主者告乏,中書檄工部 時阿合馬當國,與江淮行省阿里伯、崔斌有隙,誣以盜官糧四十 弗 具。 阿合馬復遣北京行省參知 政 事 張澍

十八年,徵爲左司員外郎。 十九年春,阿合馬併中書左右司爲一,遂爲左右司員外郎。 傳第六十三 劉正

列

是從耳。」會日暮,車駕還內,俱械繫于闕東隙地。 政咱喜魯丁等偕至帝前,問曰:「汝等皆黨於阿合馬,能無罪乎。」正曰:「臣未嘗阿附,惟法 三月,阿合馬敗,火魯霍孫爲右丞相,復爲左司員外郎,謁告歸。 踰數日,姦黨多伏誅,復械繫正于拱衞 九月,中書傳旨捕 正,與參

司,火魯霍孫曰:「上嘗謂劉正衣白衣行炭穴十年,可謂廉潔者。」乃免歸

司,參議乃幕長,寢右而舉左,寧無私乎。」正辨折明,事遂釋。 使,正知其不稱,弗與。張遂作飛語搆其事,帝召正詰之曰:「匿金事在右司,爭廕事在左 完澤爲丞相,復擢爲戶部尚書,陞參議。 侍郎、陞戶部尚書。 爭廕不得,誣告其兄匿亡|宋官金。|正知其誣,罪之,仍官其兄。 二十年春,樞密院奏爲經歷,陞參議樞密院事。二十五年,桑哥旣立尙書省,擢爲戶部 嘗舉覈河間鹽運官虧課事,幾陷于罪,乃移疾歸。

二十八年,桑哥敗 尚書省罷,仍參議中書省事。 濟南張同知子求爲 湖南馬宣慰庶子,因 兩淮運

官必重賂省臣,乃得遣,徵收金銀之數,必十加二,而拆閱之數又如之,其送迎饋贐,亦如納 戶口,則詭稱逃亡,甸寨遠者,季秋則遣官領兵往徵,人馬芻糧,往返之費,歲以萬計, 緬,正以爲不可,俄俱被徵,又極言其不可,不從,師果無功。
雲南民歲輸金銀,近中慶城邑 臺中丞。大德元年,改同僉樞密院事,尋出爲雲南行中書省左丞。 三十年,御史臺奏爲侍御史,中書省奏爲吏部尚書,已而復留爲侍御史,遷江南 右丞忙兀突魯迷失 行御史 所差 講征

始至官,儲趴二百七十萬索、白銀百錠,比四年,得趴一千七十萬索、金百錠、銀三千錠 官之數,所遣者又以銅雜銀中納官。 正首疏其弊,給官秤,俾土官身詣官輸納,其弊始革

賞罰,八曰節財用。會行赦战元,集議行之。 左丞,陞右丞。二年,立尚書省,〔三〕懇辭還家。仁宗卽位,召諸老臣入議國事 七年秋,還淸州。八年六月,以左丞行省江西。冬十月,改江浙。 日守成憲,二日重省臺,三日辨邪正,四日貴名爵,五日正官符,六日開言路,七日愼 武宗卽位,召爲 了,正詣 闕言八 中書

決六品以下官。平章忽都不丁、李孟將議行之,正言:「但當擇人,法不可易也。」事遂寢 孟 明察奸邪,臧否時政,可還詰之。」正言:「臺省一家,當同心獻替,擇善而行,豈容分異耶」 旨會議。平章李孟曰:「燮理之責,儒臣獨孟一人,請避賢路。」平章忽都不丁曰:「臺臣不能 延祐六年卒,後贈宣力贊治功臣、光祿大夫、司徒、柱國、趙國公,諡忠宣。 大旱,野無麥穀,種不入土。臺臣言,變理非其人,姦邪蒙蔽,民多寃滯,感傷和氣所致。 政事、議中書省事。 搖首,竟如忽都不丁言。右丞相帖木迭兒傳旨:廉訪司權太重,故按事 仁宗初政,風動天下,正與諸老臣陳贊之力居多。累乞致仕不許,拜榮祿大夫、平章 時議經理河南、潍、浙、江西民田,增茶鹽課額,正極言不可, 失實,自今不許專 弗從。

子康德,官秘書監丞,歷兵、工二部侍郎,出爲安慶路總管,秉仁,以廕爲中書架閣管

謝讓

擇爲吏,補宣慰司令史。國兵取宋,立行中書省於江西,讓以選爲令史,調河間等路都轉運 謝讓字仲和,潁昌人。祖義,有材勇,金貞祐間,爲義軍千戶。 讓幼穎悟好學,及壯,推

鹽司經歷。

困。 **甚薄。讓言:「軍戶旣落籍爲民,當與舊竈戶均役,旣令代役,豈宜復薄其傭,使重** 今顧人,必厚與直,乃聽。」 先是,逃亡戶率令見戶包納其鹽,由是豪强者以計**免,而貧弱**愈 讓令驗物力多寡,比次甲乙以均之。 先是,竈戶在軍籍者,悉除其名,以丁多寡爲額輸鹽,其後多顧舊戶代爲煑鹽, 困乎?自 而顧錢

既款服,詔令讓與俱來,人皆危之,讓恬然若無事者,臺綱以之益振 可爲御史中丞,右司員外郎高昉可任風憲。劾江浙省臣聽詔不恭及不法事, 擢南臺御史,舉湖廣行省平章政事哈剌哈孫答刺罕可爲御史大夫,山東廉訪使陳天祥 帝遣使雜問,

中書省右司都事,遷戶部員外郎。時康勝、雲、豐等州民饑,乞糴鄰郡,憲司懼其販鬻爲利, 大德間,詔立陝西行御史臺,以讓爲都事,凡御史封章及文移,其可否一決于讓。 入爲

閉其糴,事聞于朝。讓設法立禁,閉糴者有罪,三州之民賴以全活者甚衆。

郎中。 遠運,公私便之。 招諭,以攜其黨。 以覊縻之,使不至跳梁可也。若乃舍中國有用之民,爭炎荒不毛之地,非長策也。」因書榜 時廣西兩江岑雄、黃聖許等,屢相讎殺,爲邊患。讓謂:「此曹第可懷柔,不宜力競,寬其法 四年,授宗正府郎中,擢監察御史,遷中書省右司員外郎,出爲湖廣行省左右司郎中。 是歲會計兩淮,僅少三十萬石,讓請以淮鹽三十萬引鬻之,收其價鈔以給軍食,不勞 是時,江淮屯戍軍二十餘萬,親王分鎭揚州,皆以兩淮民稅給之,不足,則漕於湖廣 湖廣宣慰使張國紀建言科江南夏稅,讓極言其非便。遷河南行省左右司

讓先朝舊人,召見賜酒,以示眷注。四年,改刑部尚書。 書侍御史。三年,拜治書侍御史,未上,改同僉樞密院事,尋拜戶部尙書。 因揉諸米中,以給內外工人及宿衞者。讓察其奸,以藁秸易之,奸弊悉除。 至大元年,轉戶部侍郎。時京倉主計吏,以倉廪多罅漏,惟久雨米壞,請覆糠粃其上, 二年,拜西臺治 仁宗在東宮,以

耶。]讓曰:「君賜,不敢違也。」少頃,醉不能立,命扶出之。 翼日,讓謝,帝曰:「老尙書誠不 飲也。」初,尚書省柄臣搆殺留守鄭阿爾思蘭,籍其家,中外寃之,尚書省罷,未有直其寃者。 仁宗卽位,加讓正議大夫,入謝,賜以巵酒,讓痛飮之。帝曰:「人言老尙書不飮,何飮 列 傅 第 六 十 三 算 若 愚

定鈔法,禮部議正禮文,讓皆與焉。刑部有案,讓未署字,而誤用印,吏懼,遂私效讓署。 覺,度無損於事,且憐吏以罪廢,遂視之曰:「吾署也。」其寬厚多類此。讓上言:「古今有天 讓明其事,以所籍貲產給還之。有旨:六部事疑不決者,須讓共議,而後上聞。於是戶部更 乃命中書省纂集典章,以讓精律學,使爲校正官,賜靑鼠裘一襲、侍宴服六襲。 下者,皆有律以輔治。堂堂聖朝,詎可無法以準之,使吏任其情、民罹其毒乎!帝嘉納之。

資稽遠。拜陝西行省參知政事,未幾,拜西臺侍御史,命甫下,詔罷西臺,復立,就拜侍御 以歲月,尙慮失實,豈可律以常法乎」」乃入白于宰相,曰:「尙書言是也。」由是刑曹獨得不 **憲穆。子好古,奉政大夫、覆實司提舉。** 四年十月,卒于官,年六十有六。贈正奉大夫、河南行省參知政事,追封陳留郡公,諡 二年,朝廷以吏多滯事,[四]責曹案不如程者,令下,讓曰:「刑獄,非錢穀、銓選之比,寬

韓若愚

襲。遷留守司都事,尋陞經歷,出知薊州,改中書左司都事。 所燒鈔爲僞鈔,使管庫者誣服。 韓若愚字希賢,保定滿城人。由武衞府史授通惠河道所都事,開河有功,詔賜錦衣一韓若愚字希賢,保定滿城人。由武衞府史授通惠河道所都事,開河有功,詔賜錦衣一 獄旣具,若愚知其冤,覆之,得免死者十餘人。 時監燒昏鈔者欲取能名, 遷刑部郎 概以

中,提舉諸路寶鈔庫,擢吏部郎中。

爲右丞相,以懀愛進退百官,恨若愚不附己,羅織以事,帝知其枉,不聽。拜戶部尙書。 曹鼎新辭職,帝曰:「若效韓若愚廉勤足矣,何用辭爲」,繼命若愚參議中書省事。 **憾誣若愚罪,欲殺之,帝不從,復奏奪其官,除名歸鄕里。** 宣王之囿,方四十里,殺其麋鹿者,如殺人之罪,孟子非之。」衆以爲然,遂輕其刑。 時參政 遷內臺都事,改刑部侍郎,尋擢中書左司郎中。 仁宗卽位,故事,凡潛邸官吏,不次遷轉,若愚以歲月定其資品,遂著爲令。 時議禁民田獵,犯者抵死。|若愚曰:「昔齊 丞相鐵木迭兒復入相,以舊 皇慶元年, 鐵木迭兒 延

西廉使,未行,拜河南省左丞。 珍等,下樞密獄,無敢言其冤,若愚以計奏左丞相倒刺沙爲右大夫,其事遂解。三年,擢浙 改詹事丞。八月,命宣撫江浙,復留爲侍御史。 至治三年,詔雪其冤。泰定元年,命復其官,尋拜刑部尚書,遷湖廣省參知政事,未行, 會文宗平內難,若愚畫策中機,帝嘉之,進資政大夫。 時左丞相倒刺沙擅威福,以事誣侍御亦憐

中書省左丞、上護軍,追封南陽郡公,諡貞肅。 天曆三年,遷淮西江北道廉訪使。 九月,以疾卒,年六十八。贈資德大夫、江浙等處行

趙

選,平允無私,人無不服。擢工部主事,遷中書省檢校官,咸著能名。 補中書省掾,於朝廷典章故實、律令文法,無不練習。 太學,力學如寒士。 趙 師魯字希顏,霸州文安縣人。父趾,祕書少監,贈禮部尙書。師魯爲人風采端莊,在 延祐 初,爲興文署丞。五年,遷將作院照磨。 臨事明敏果斷, 七年,辟爲御史臺掾,後 執政奇之。及典銓

觀燈 令出禁中,命有司張燈山爲樂,師魯上言:「燕安怠惰,肇荒淫之基,奇巧珍玩,發奢侈之端。 烝民,阜萬物,百王不易之禮也。 史大夫傳旨,以嘉忠直。 「事雖微,而縱耳目之欲,則上累日月之明。」疏聞,遽命罷之,賜師魯酒一上尊,且命御 泰定中,拜監察御史。時大禮未舉,師魯言:「天子親祠郊廟,所以通精誠,逆福釐,生 宜鑒成憲,講求故事,對越以格純嘏。」帝嘉納焉。元夕,

官,而執政者爲之地,師魯駁其非,事遂止。遷樞密院都事,改本院經歷。 不咨衆謀者也。」不報。 慮 之於心,咨之於衆,決之於故老大臣,然後斷然行之,渙若汗不可反,未有獨出柄臣之意, 是時,宰相倒刺沙密專命令,不使中外預知,師魯又上言:「古之人君,將有言也,必先 倒刺沙雖剛狠,亦服其敢言。 有朝士年未及致仕,其子請預蔭其 致和初, 陞奉政

列

傅

大夫、參議樞密院事。

未幾,遷中順大夫、刑部侍郎,樞密院復奏爲其院判官。 久之,出爲河間路轉運鹽使,除害 就。服除,復爲樞密判官,持節治四川軍馬,諭上威德,大閱于郊,寬簡有法,士卒懷其 興利,法度修飭,絕巡察之奸,省州縣厨傳贈遺之費,竈戶商人,無不便之,歲課遂大增。 日,又割己俸,率僚吏新孔子廟,命吏往江右製雅樂,聘工師,春秋釋奠,士論稱之。 天曆中,遷樞密院判官,改兵部侍郎。丁父憂,特旨起爲同僉樞密院事,師魯固辭不 恩信 暇

師魯由從官,久典金穀,每鬱鬱不樂,疾篤,棄官歸京師,至元三年九月卒,年五十有 贈嘉議大夫、禮部尙書、天水郡侯,諡文淸。

劉德溫

磨,監建興聖宮,又調承務郎、掌儀署令,未幾,陞奉訓大夫、內宰司丞。奉中旨,徵河南民 擾。 比還,遷中憲大夫、同知大都路都總管府事。 **逋糧**,德溫 遷甄用少監,陞亞中大夫、禮部侍郎,復陞嘉議大夫、同知上都留守司事。 劉德溫字純甫,大興人,起家中書省宣使。 輒平其價,令出鈔以償,民甚便之。復陞朝列大夫、延福司丞,奉旨代祠嶽瀆。 **辇**载之下,供億浩繁,德溫措置有法,民 大德十一年,以年勞,授從仕郞、 省檄和糴 內宰司照 用不

糧,民以價不時得,遞相觀望,德溫下令曰:「糧入價出,吏有敢爲弊者,罪之。」於是糧不踰 大夫、永平路總管。 期 而 集。 轉大司農丞。 耕籍之儀,取具一時,德溫欲考訂典禮,集爲成書,未畢, 俄授通 議

也, 也。 育人材,庶事畢舉。 **吏莫敢治,德溫按得其罪,論** 曰:「流亡始集,而又役之,是重困民也。」遂罷其役,而水亦不復至。 國初,郡守楊 德溫 永平當天曆兵革之餘,野無居民,德溫爲政「一」年,至而戶口增,倉廪實,遂興學校以 請命 有司春秋具牢禮致祭,從之,著爲式,賜 阿台請于朝,日益伯夷曰清惠,叔齊曰仁惠,爲廟以祠之,而祠 歲大旱,禱而雨, 如法, 杖之, 書其過于門, 歲以不歉。 灤、漆二水爲害,有司歲發民築堤。 廟額曰聖淸,士論韙之。 後竟以不道伏誅。 有豪民武 永平,古孤 斷于鄉 禮 猶 里, 未具 德溫 竹國 前

至順 四年卒,年六十九。 贈正議大夫、禮部尙書、上輕車都尉、彭城郡侯,諡淸惠。

尉 遲德誠

兵 「死者,輒涕泣收瘞之,帶孫令佩金符,授雲州 德誠歷官太子 尉 遲德誠字信甫,絳州人。 來更丞。 至大元年,改詹事院都事。 祖天澤,仕金爲庫官,郡王帶孫拔絳州,天澤在俘中,道見 御衣局 人匠 二年,遷家令司丞。仁宗以爲謹恪, 總管。日父鼐 ,仕至潞州 知 州

列 傳 第 六 + 三 鄙 徳 溫 尉 遲 德 誠

帝方食,賜以餕餘,擢工部尚書,未拜,改陝西行臺治書侍御史。 以爲嘉禾,陞家令。四年,選爲河東山西道宣慰司同知,擊姦吏,寬稅斂,上計京師。入見, 常賜酒帛,得侍左右,數薦士,出則未嘗語人。廳事前有粟苗,不種而萌偶出,一莖雙穗,衆

以寬民力,舉賢良以勵忠孝,抑奢侈以厚風俗,及拯鈔法、裁冗官等事。 懷其心,防出入以嚴宮禁,立諫官以遠讒佞,崇科舉以求人材,立常平以備荒年,汰僧道 延祐元年,遷京畿都漕運使。二年,拜遼東道肅政廉訪使,上疏言事,其略曰勞諸王以 未報而卒,年五

秦起宗

洞,奉其親以居,傍窾大洞,匿其里中百人閉之,具牛酒,出待兵,兵入索,惟見其親屬,曰: 秦起宗字元卿,其先上黨人,後徙廣平(深)〔洛〕水縣。〔六〕曾大父當金季兵起,窾山麓爲

「孝士也。」釋之去。,里人曰:「秦父生我。」

省專制更張,起宗持文嚴密無所泄。 一蒙古學,學輒成,辟武衞譯史。 起宗生長兵間,學書無從得紙,父順削柳爲簡,寫以授之;成誦,削去更書。 御史中丞塔察兒愛其才,遷中臺〔譯〕史。「む是時,尚書 年十七,

導德: 議,財賦 仁宗卽位,罷尙書省,轉中書〔譯〕史,[10〕累遷太子家令司典簿官,上言:「東宮官屬,輔 非所治也。」朝廷是之。 遷南臺御史。 建康多水,或實災而有司抑之,或無災

而訴災,起宗微行得實,人以爲神明。

{秦 {議 憲ト 宗, 其後 以正國法。」和尙服辜。 見,跽辨久之,敕令起,起宗不起,會日暮,出,明日,立太子,有赦,起宗又奏:「不罪 上流 其眷注 八番 咱耳竊 之師,親王不可遠去,力止之。 文宗初立, 卷。 師還,無敢擾於道路者。 如 父妾以逃,其父憤死,瀆亂天常,流之嶺南。 此。 命威順王征八番。 拜中臺御史, 劾中丞和尚受人婦人、賤買縣官屋, 不報。 帝曰:「爲御史,當如是矣。」元會,賜只孫服,令得與大宴。 朝議以起宗治蜀,幕府忘其名,曰秦元卿,帝引筆改 是時,獨省襄加台拒命未平,起宗極言武昌重鎭,當備 及王入見,帝謂 曰:「八番之行,非秦元卿,幾爲失計。」 自是盡言無諱,皆見聽用。 起宗從臺官入 和尚,無 又 劾 閩 有獅史 目 起

是官府僚佐有宴集,成 司 供 歲,以老去官。 張甚盛,問其費所從出,小 遷都漕運使,帝召諭 明 年,以兵部尚書致仕,居一歲,卒,諡昭肅 %禮卽 之曰:「漕輸事多廢闕,賴御史治之爾。」出爲撫州路總管,至官 止,因諭 東不敢隱,曰:「借辦於民。」 遂亟使歸之,几席 衆 曰:「我素農家,安儉約,務安靜, 庶使吾民化之。」居 僅給 而 自

子四 人:鈞,銓, |鐸, 鏞。 **鈞**,西臺御史;鏞,延徽寺經歷;銓,都省掾;鐸蚤卒。

校勘記

- 四川 廉訪僉事闊闊木 本書卷一二二按礼兒傳有「授闆閥朮漢中廉訪僉事」。 按廉訪僉事係肅
- 政廉訪司官,陝西漢中道肅政廉訪司曾隸陝西四川 行省。 「木」當係「朮」之訛。

據本書卷二七英宗紀至治元年二月丁巳、

卷二九泰定帝紀至治三年十二月己

未條及卷一二四塔本傳附鎖咬兒哈的迷失傳改。 類編已校。 觀音(奴)[保]

- 尚書省」。 二年立尚書省 按元武宗立尚書省,事在至大二年,此處失書年號。 道光本作「至大二年,復立
- 四八 二年朝廷以吏多滯事 <u>考異云:「案此傳自仁宗卽位以後,不著年號,史脫文也。」</u>
- [五] 德溫爲政(一)年 原空闕,從北監本補。
- , 六 二 以其 楊阿台 祖 稱,當作「揚阿台」。 按本書卷一二四塔本傳,塔本,「人以其好揚人善,稱之曰揚公」。 疑「楊」爲「揚」字之訛。 阿台係塔本孫,如冠
- 〔中〕雲州 北監本作「霍州」。
- 廣平(深)[洛]水縣 據道園類稿卷四三秦起宗神道碑改。 按本書卷五八地理志, 洛水 腹里

へたし 遷中臺〔譯〕史 道園類稿卷四三秦起宗神道碑云:「以通習國語文字入官,由武衞、大都留守

陞太師御史臺、中書省譯史。」據補。

(10) 轉中書(譯)史 見本卷校勘記(公)。

四一一九

元史卷一百七十七

列傳第六十四

張思明

都事。 帝奇之,曰:「斯人可用。」明日,擢爲大都路治中,思明以超遷踰等,固辭,乃改湖廣行省 之,自昏達曙,帝聽忘疲,曰:「讀人吐音,大似侍儀舍人。」右丞對曰:「正由舍人選爲掾。」 年,由侍儀司舍人辟御史臺掾,又辟尚書省掾。 書簿問遺孽。一日,召右丞何榮祖、左丞馬紹,盡輸其贓以入,思明抱牘從,日已昏,命讀 張思明字士瞻,其先獲嘉人,後徙居輝州。 左丞相阿合馬旣死,世祖追咎其奸欺,命尚 思明穎悟過人,讀書日記千言。 至元十九

域 元貞元年,召爲中書省檢校,六曹無滯案,遷戶部主事。 初立海道運糧萬戶府于江浙,受除者憚涉險,不行,思明請升等 大德初,擢左司都事,有獻西

郎中。十一年春,兩浙大饑,首贊發廪賑之。 以優之,因著爲令。五年,轉吏部郎中。九年,改集賢司直。十年,除江浙行中書省左右司

政事。[]] 之榮,遺百世之害。」二年,召爲戶部尚書。延祐元年,進參議中書省事,三年,拜中書參知 授兩浙鹽運使,歲課羨贏,僚屬請上增數,思明曰:「贏縮不常,萬一以增爲額,是我希一己 至大三年,遷兩浙鹽運使,未上,入參議樞密院事,改中書省左司郎中。皇慶元年,再

宣慰使,嶺北戍士多貧者,歲凶,相擬爲變,思明威惠並行,邊境乃安。因疏和林運糧不便 事十一條,帝勞以端硯、上尊。 | 士瞻居工部, 得無快快乎。」對曰:「勤政如初。」帝嘉嘆之, 命授宣政院副使。 五年, 除西京 庫提舉,不與散官。久之,近臣疾其持法峭直,日構讒間,出爲工部尚書,帝問左右曰:「張 四方得窺陛下淺深也。」帝心然其言,而業已許之,曰:「卿可姑與之,後勿爲例。」乃爲萬億 切責之,對曰「選法,天下公器。徑路一開,來者雜遝。故寧違旨獲戾,不忍隳祖宗成憲,使 仁宗卽位,浮屠妙總統有寵,敕中書官其(第)[弟]五品,曰思明執不可。帝大怒,召見

臣 .有撓政者邪?]曰:「無有也。」「然則何爲而辭?]對曰:「臣自揆才薄,恐誤陛下國事,若必 會左丞相哈散辭職,帝不允,其請益堅,帝詰之曰:「朕任卿未專邪。」曰:「非。」曰:「近 列傳第六十四 張思明

欲任 拜思明 臣, 中書參知 願薦一人爲助。」帝問:「爲誰? 朕能從汝。」哈散再拜謝曰:「臣願得張思明。」 政事。 比召至,車駕幸上都,見於道,慰勉之曰:「卿向不負朕注委,故朕用 即日

哈散言,復起汝。」未幾,升左丞。

賊害忠良,思明懼禍及,累表辭,不獲,後竟誣以不支蒙古子女口糧,餓死四百人,遂廢于 旣屬吏,當論法,丞相乃力言之,二人得從輕典。 失,以成珪、李謙亭屬吏,思明白丞相曰:「言事,御史職也,祖宗已來,未嘗殺諫臣。」成、李 家,杜門六年。 監察御史觀音保、瑣咬兒哈的迷失、成珪、李謙亨强諫,帝震怒,殺觀音保、瑣咬兒哈的迷 之何,不可不熟慮也。」衆皆危之,帖木迭兒大悟曰:「非左丞言,幾誤吾事。」帝造壽安山寺, 陵甫畢,新君未立,丞相恣行殺戮,國人皆謂陰有不臣之心。 萬一諸王駙馬疑 帝崩,英宗宅憂,右丞相帖木迭兒用事,日誅大臣不附己者,中外洶洶。 及拜住為左丞相,與帖木迭兒各樹朋黨 思明 而 不至,將奈 諫曰:「山

以中書左丞召,入觀慈仁殿,敷陳累朝任賢使能、治民足國之道,因以衰老辭,帝未允,明 月,是索之枯魚之肆也。 **賑之。 東白:周歲所入,已輸京師,當回咨中書。** 文宗天曆元年,起爲江浙行中書省左丞。 其以下年未輸者,如數與之,有罪,吾當坐。」朝廷韙之。 會陝西大饑,中書撥江浙鹽運司歲課 思明曰:「陜西饑民, **猶** 在涸轍, 二年,復 往復 十萬錠

日, 卽移告去。 重紀至元三年卒, 年七十八。

贈推忠翊治守義功臣,依前中書左丞、上護軍、淸河郡公,諡貞敏。 思明平生不治產,不畜財,收書三萬七千餘卷,尤明於律,與謝仲和、曹鼎新同稱三絕。

吳元珪

符。十七年,從幸上都,受命取御藥於大都萬歲山,元珪乘傳,未盡一晝夜而至,帝奇其速, 法、律令章程,皆得於家庭之所授受。至元十四年,世祖召見,命侍左右,授後衞經歷,佩金 益奇之。 擢樞密都事, 陞經歷。 嘗從同知樞密院事俺伯進西蕃鎧甲, 帝問其制度, 元珪應對詳明, 帝 吳元珪字君璋,廣平人。父鼎,燕南提刑按察副使。元珪簡重,好深沉之思,凡征謀治

者有罰。二十八年、除禮部侍郎、遷左司郎中。三十一年、參議中書省事。 興作,必以聞於樞府。尋陞樞密院判官。奏定萬戶用軍士八人,千戶四人,百戶二人,多役 學校,置屯田,多元珪所論建。二十六年,參議樞密院事。時繕修宮城,尚書省奏役軍士萬 人,留守司主之。一定珪亟陳其不便,乃立武衞,繕理宮城,以留守段天祐兼都指揮使,凡有 初,江南旣定,樞密奏裁定官屬,京師五衞、行省、萬戶府設官有差,均俸祿,給醫藥,設 傳第六十四 吳元珪

列

錄 事 遂 連 ず、將行、 其家, 興 年 生 水旱,五 ,宋之所 大德 養 17,拜江 具籍所交諸 逐 元年,除 則 穀 由 敎 浙 衰 不登 化 行省參知 東部尚書。選曹銓注,多有私其鄉里者,元珪曰:「此風 也。」請謁 行 公貴 ,元珪言:「春秋之義, 而 風 人,而江 俗美。」宰相嘉其言, 政 悉皆謝絕。 事 ်ဝ 浙省臣爲尤甚,惟 初,朱清、張瑄 年 以養民爲本,凡用民力者必書, , 宣撫燕南 土木之工稍爲之息。 以財 元 雄 珪 江 ,劾貪吏若干人。 南 無所污 徧 以 金 六年,僉河南 幣 連 不 遷工部尚 結當路, 蓋民 可 長,川 力息 行 書, 及 黨 則 中 《伏誅, ·書省 河朔 朔 生 養

珪 餰 人 具 屯 兩 財 其 只 田 用,定律令 武 宗 事 稱 孫 即位, 以 海 太四 聞 以 實邊,海都 詔 襲 由 ,謹賞罰, | 僉樞密院 賜 錢贖 之。 建科 之亂 事 帝 舉 ,被俘者衆, 拜樞密副使。 在軍 ,課農桑, 中,卽 汰冗 至是頗 聞 韶 元 元珪 員 珪 有來歸 名,至是,特 易封 二十餘 贈 者 人議 饑 皆 寒不 加 切 政 平章 於 中 能 世 ·書,若惜 政 存, 務 事 者。 至 鬻子 賜 人力,嚴選舉, 初 自 以活。 金 詔 一發軍 百 萬 元

年,戶 年 南 殷富 拜 甘肅 仁宗卽 有 定籍 蓋 行 由 位 省左 多 门韶 田 匿 有定 丞。 元 腴 珪與十六 田 畝 歲 餘 若 有 ,召還,俾宣撫遼陽諸郡,復爲樞密副使, 再 行 動 人議時 搖 檢 ,其害不細。」執 覆 之法 政。 皇慶元年,出拜江浙行省左丞。 當 益 田 其 畝 論 累萬 固 爭 計。」元珪 ,月餘 不 能 日:「江南之 召 見嘉禧殿,帝 止,移疾去。 江淮 漕臣 平, 言:「江 幾 日:一 延 站 四 卿 1 元

先朝舊臣, 宜在舊服。」特加榮祿大夫, 賜鈔五千緡、貂裘二襲。 元珪奏曰:「昔世祖限田四 元元之民,困苦日甚,臣恐變生不測,非國之福,惟陛下少加意焉。」帝曰:「凡爾軍士之田, 並遵舊制。」 百畝,以給軍需,餘田悉貢賦稅。今經理江淮田土,第以增多爲能,加以有司頭會箕斂,俾

司徒。 南等處行省平章政事、柱國,追封趙國公,諡忠簡。三年,復加推誠佐理功臣、光祿大夫、 行之。元珪以年老致仕,至治二年,起商議中書省事。三年卒。泰定元年,贈光祿大夫、河 王近侍,不可干軍政,管軍官吏,不可漁取軍戶,軍官之材者,當遷其職,有司賦役,當務均 ,而軍民不可有所偏,軍官襲職,惟傳嫡嗣,而支庶不可有所亂。 至治元年,英宗卽位,元珪與知樞密院事帖木兒不花上軍民之政十餘事,大抵言: 帝並嘉納,即降旨施

張昇

實錄,陞應奉翰林文字,尋陞修撰,歷興文署令,遷太常博士。 常兒,旣長,力學,工文辭。至元二十九年,用薦者授將仕郎、翰林國史院編修官,預修世祖 張昇字伯高,其先定州人,後徙平州。 昇幼警敏過人,學語時, 輒能辨字音, 應對異於 成宗崩,大臣承中旨,議奉徽

傳第六十四 張昇

列

號,饗宗廟,昇曰:「在故典,凡有事于宗廟,必書嗣皇帝名,今將何書。」議 ※ 滚腰。

俸二 禁書 對 常 論 在 同 難之。 吳 列 曰:「事 禮儀院,卽 月。 懼 武宗 分野。」同 '', 皆引 編, 旁郡移文報吳人侯君遠者言:「歲直壬子六月朔 固 部 刨 且. 位、議 使 類姦軌,然昇備位郡守,爲民父母,今斥誣訴, 除 起,旣而事聞,廷議謂昇脫姦軌,遣使窮問,卒無跡 記 者舉治行爲諸郡 列 里 昇爲判官。 欲召屬 一中大家姓名于上,昇亟呼吏焚其書,曰:「妄言誣民, 躬祀禮,昇據經引 縣爲備禦計,昇曰:「此訛言,久當自息,毋 久之,外補 最。 古,參酌時宜以對, 歷江西行省左右司郎中,除紹 知汝寧府。 民有告寄束書於其家者,踰三年取閱,有 帝嘉納之。 日蝕,其占爲兵寇;歲癸丑, **発窓濫,雖** 可指, 興路總管。 用惑民聽。」 至大 乃詰 且. 重得罪不避。」乃坐奪 再 初,改太常寺爲太 以擅焚 更赦矣, 斥其 書狀,昇 無稽,衆 勿論。」 其應

中 謹 歲 隙,欲內之罪,移平江歲輸 姦, 書省事 於 例 害富 繩 如 初, 吏 此,置弗問。 国家,昇 大德、 、改樞 叉果於 至大 爲證于簿籍,白行省蠲之。 密院判官,尋復中書參議 去民瘼,故人心 間,越大饑,且疫癘,民死者殆半,賦稅鹽課賣里「胥」代納,〔三〕 昇言:「麻非越土所 海運糧布囊三萬,俾紹 悦服。 生,海漕實吳郡事,於越無與。」章上,卒罷之。 歷湖北道廉訪使、江南行臺治書侍御史,召爲參議 前守有 爲江浙行省參知政事者,爭代者祿 興製如 數,民患苦之,不能堪。 更數守 吏並緣爲 米 昇旣 有

昇請發海道糧十八萬石、鈔五萬緡,以賑饑民,且蠲其歲賦,朝廷從之,民得全活者衆。 定二年,拜陝西行省參知 至治二年,又出爲河東道廉訪使,未行,拜治書侍御史。 政 事,加中奉 大夫,尋遷遼東道廉訪使。 明年,出爲淮西道 屬永平大水,民多捐瘠, 廉訪使。 明 泰

年,召拜侍御史。

復起爲集賢侍講學士,文宗眷待之意甚隆。 神 是棄民也。」由是民皆安之。文宗賜尚醞文幣,以賞其功。 御殿 天曆初,出爲山東道廉訪使,時方有警,有司請完城以爲備,昇曰:「民恃吾以生, 事,除河南省左丞,復遷淮西道廉訪使。 昇時年六十有九,上書乞致仕。 踰年,召爲太禧院副 使,兼奉贊 至順二年, 完城

月給祿半, 官,廷試進士,特命昇讀卷,事已,告省先墓。帝賜金織文袍,以寵其歸。 學士、資善大夫、知經筵事召,賜上尊,趣就職,昇以疾辭, 元統元年,順帝卽位,首詔在廷耆艾,訪問治道,昇條上時所宜先者十事。 以終其身。 至正元年卒,年八十一。贈資德大夫、河南等處行中書省左丞, 帝察其不可强,許之。 明年,以 奎 尋兼 尋命本 章閣 經筵 郡 諡 大

臧夢解 陸屋

文憲。

訓大夫、婺州路軍民人匠提舉。未幾,例革其所司,而浙東宣慰司舉夢解才兼儒吏,可試州 臧夢解,慶元人,宋末中進士第,未官而國亡。 至元十三年,從其鄉郡守將內附,授奉

郡,朝廷是之,授息州知州,未行,改知海寧州。

舉夢解才德兼備,宜擢淸要,以展所蘊。而御史臺亦以其廉能,抗章薦之。 有四,田以頃計者,新闢四百四十有三,桑柘楡柳,交蔭境內,而政平訟簡,爲諸州縣最。乃 無私謁,官署蕭然,凡有差役,皆當其貧富,而吏無所預。於是民以戶計者,新增七百六十 時淮東按察副使王慶之,按行至其州,見夢解剛直廉愼,而學有淵奧,自任職以來,門

貪官姦吏,置于法者無慮八十餘人。又平反邕州黃震被誣贓罪,及藤州唐氏婦被誣殺夫 事,烟瘴之地,行部者多不躬至,而廖解咸遍歷焉。遂按問賓州、藤州兩路達魯花赤,與凡 罪,凡兩寃獄 之,舉其名上聞,除同知桂陽路總管府事。三十年,擢奉議大夫、廣西肅政廉訪副使。 具,皆躬至其地,而人給以米,所活四萬五千餘人。江南行臺治書侍御史苟宗道,聞而韙 二十七年,夢解滿去者至是已五年矣。屬江陰饑,江浙行省委夢解賑之。夢解不爲文 故

省憲,夢解按其贓罪,而一道澄淸。六年,遷浙東肅政廉訪副使。 大德元年,遷江西肅政廉訪副使。有臨江路總管李倜,素狡獪,而又附大臣勢,以控持 九年,除廣東肅政廉訪

列

使。 夢解至是,旣老且病,乃納祿退居杭州,以亞中大夫、湖南宣慰副使致仕。 後至元元

年卒

官考三卷、春秋微一卷。夢解嘗自號魯山大夫,士之稱之者,不以官,皆曰魯山先生云。 夢解博學洽聞,爲時名儒,然不少迂腐,而敏於政事,其操守尤爲介特。所著書,有周

免儒役,及舉行

浙西助役法。

年五十卒,賜諡

莊簡。 憲,累遷至湖南肅政廉訪副使,陞浙西廉訪使。所至以黜贓吏、洗寃獄爲己任,且嘗上章奏 也。 之,論議有合,兵遂不涉其境,鄉人義之。伯顏奏授爲同知徽州路總管府事,以廉能擢置臺 自幼以孝友聞。至元間,丞相伯顏以師南下,屋是時年未冠,而志强氣銳,率其鄉人見 同時有陸屋者,與夢解齊名。監察御史鄭鵬南,嘗以二人並薦于朝。屋字仁重,江陰人

陳顥

<u>磐、安藏之門。 磐熟金典章,安藏通諸國語,顥兼習之。 安藏乃薦顥入宿衞,尋爲仁宗潛邸</u> 都元帥,子孫徙淸州,遂爲淸州人。願幼穎悟,日記誦千百言,稍長,游京師,登翰林承旨王 陳顥字仲明,其先居盧龍,有名山者,仕金爲謀克監軍,太祖得之,以爲平陽等路軍民

說書。 於是,仁宗奉母后 出居懷慶,顥 從行,日開 陳 以古聖賢居艱 貞 之道。

喜日 州以就 馬之功,又乏經濟之略, 輒 學 ,亦以全臣愚忠。」帝乃**允**。 取 士、榮祿大夫,仍宿衞禁中,政事無不與聞。科舉之行,顥贊助之力尤多。 聖經 會成宗崩,仁宗 養。 仲 所 載 題固辭,乃以孝伯爲 明 在 大經大法, 列 ,所奏必善事 入定 一旦置之政塗,徒速臣咎。 內難 有切治體者陳之,每見嘉納。 仁宗崩,辭祿家 ,以迎武宗,顥皆預謀。及仁宗卽位,以 矣。」顥以父年老, 州判官。 帝欲 居者十年 用顥 力請歸養清州 臣願 為中 帝嘗坐便殿,羣臣 書平章政事,顥 得朝夕左右, 帝特 推戴 獻替可 命 叩首謝日 舊 入奏事 顥 顥 勳 長 否, 時 特 子 伺帝 孝伯 庶少裨萬 ,望見顥, 拜集賢大 臣 :燕閒, 無 爲 汗 知

大 四 臣 宗皆嘉納焉。 所 一,更 年,致 夫、河南 不忍。」順帝 文宗 事 政,命食全俸于家。 多矣,凡議 即位,復起爲集賢大學士, 江北等處行中書省平章政 元 顯先後居集賢,署薦 統 政事,宜 初 顥扈蹕行幸 極言無隱。」 明年卒,年七十六。 士贖累數百 上都, 上疏勸帝 事 顥 、柱國,追 至龍 頓首謝 大興文治、增國子學弟子員、獨儒之徭役,文 虎臺,帝命造膝前 ,有許之者,顥 封薊 至正 不 敏。 國 + 顥 公一諡文忠。 四 年, 毎 日:「吾寧以謬舉受罰 集議,其言 贈攄 而握 誠 秉 義佐 其手曰:「卿 無不 剴 理 功臣 切, ご蔽賢 累朝 後 至元 光祿 老 誠

願出入禁闥數 列 傅 第 六 + 7 四 年,樂談 陳 顥 人善, 校 勘 記 丽 惡聞人過。 大夫士因其薦拔 以 至 顯列,有終身莫知

卷, 顯必拾而觀之, 苟得其片言善, 卽以置選列, 爲之色喜。 |玄歎曰:「陳公之心, 蓋篤於仁 所自者,是以結知人主,上下無有怨尤。 歐陽玄爲國子祭酒,與顥同考試國子伴讀,每出一

而踰於厚者,眞可使鄙夫寬、薄夫敦矣。」

次子敬伯,至正中仕爲中書參知政事,歷左丞、右丞,二十七年,拜中書平章政事。

校勘記

[1] 三年拜中書參知政事 本證云··「案紀在四年,宰相表同。 此誤。」

[三] 官其(第)[弟]五品 從道光本改。

一〕 責里〔胥〕代納 原空闕,從北監本補。

兀史卷一百七十八

列傳第六十五

梁曾

聞 考及格,授雲南諸路行省都事,佩銀符。 中統四年,以翰林學士承旨王鶚薦,辟中書左三部令史,三轉爲中書省掾。 兩江宣撫司事。 事得復舊。 梁曾字貢父,燕人。祖守正,父德,皆以曾貴,贈安定郡公。 明年,除知南陽府。 南陽在宋末爲邊鄙, 唐、 桑柘未成, 久之, 陸員 外郎。 十五年,轉同 知廣南 西道 左右 鄧二屬州爲襄陽府所奪, 而歲賦絲, 民基苦之, 曾少好學,日記書數千言。 曾按圖經、 會請折輸 至元十年,用累 稽國 布, 制以 民

襲,進兵部尚書,與禮部尚 十七年,朝廷以安南世子陳日烜不就徵,選會使其國。 列 傳 第 六 + Ħ. 梁 !書柴椿偕行。 曾 至安南,語秘不傳。 召見,賜三珠金虎符、貂裘 明年,日烜遣其叔遺愛,奉表 四一三三

便之。

從曾入獻方物。 帝封遺愛爲安南 國 王, 賜幣帛, 遣歸。 二十一年,除會湖南宣 慰 司 副

居三年,以疾去。

還諸陶子奇 等從曾詣闕請罪,幷上萬壽頌、金册表章、方物,而以黃金器幣奇物遺曾爲贐,曾不受,以 往復者三次,具宣布天子威德,而風其君入朝。 雲會門入,曾復執不可,始自陽明門迎詔入。又責日燇親出迎詔,且講新朝尙右 陪臣郊迎,將由日新門入。曾大怒曰:「奉詔不由中門,是我辱君命也。」即回館,旣而 授淮安路總管而行。 南,授吏部尚書,賜三珠金虎符、襲衣、乘馬、弓矢、器幣,以禮部郎中陳孚爲副,十二月,改 二十九年,改淮西宣慰司副使,復以親老辭。 三十年正月,至安南。 其國有三門: 中日陽明,左日日新,右日 世子陳日燇大咸服,三月,令其國相 召至京師,入見內殿,有旨令曾再使安 之禮。 陶子奇 1雲會, 以書 請開

帝命 阿里 于庭,而命曾引所獻象,曾以袖引之,象隨|曾轉,如素馴者,復命引他象,亦然。 於 便殿賜酒饌,留宿禁中,語安南 酌酒,先賜曾,謂親王曰:「汝所辦者汝事,梁曾所辦, 意不然,帝怒曰:「梁曾兩使外國,以口舌息兵戈,爾何敢爾!」是日, 八月,還京師,入見,進所與陳日燇往復議 事,至二鼓方出。 事書。 明日,陶子奇等見詔,陳其 帝大悅,解衣賜之,且令 吾與汝之事,汝勿以爲後也。」復 有親王至自和 坐地 方物象、鸚鵡 帝以曾爲福 上,右丞

曾 也 人,且問曰:「汝亦懼否。」對曰:「雖懼,君命不敢違。」帝稱善。 」尋賜白金一錠、 曾對曰:「安南以黃金器幣奇物遺臣,臣不受,以屬陶子奇矣。」帝曰: 、金幣二;敕中書以使安南三珠金虎符與之。 或讒會受安南賂者,帝以問 仍乘傳之任淮安。 「苟受之, 何不 到官, 可

興學校,厲風俗,河南行省事有疑者,皆委會議之。

省參 符。 以未終制,不赴。 是之,著爲令。 書參議, 知知 尋召還京,辭以母喪未葬,扶柩北歸,至長蘆,有旨賜鈔一百錠,使營葬。 大德元年,除杭州路總管,戶口復者五萬二千四百戶,請禁莫夜鞫囚、游街、酷刑 政 嘗預燕,賜只孫一襲。 事 四 四年,丁內艱。 年,[1]以疾辭歸,敕賜藥物,存問備至。 明年,遷兩浙都轉運鹽使。 先是,丁憂之制未行,曾上言請如禮。 十一年,轉正奉大夫,出爲河南行省參知政事,尋遷湖廣行 又明年,拜雲南行省參知政事,賜三珠金虎 七年,除潭州路 十年,召爲 ,朝廷 總管, 中

汴梁, 卒之前十日,有大星隕于所居,流光燭地,人皆異之。 起 爲 集賢侍講 皇慶 以病不復職, 元年,仁宗以曾前朝舊臣,特授昭文館大學士、資德大夫。 學士。 寓居淮南,杜門不通賓客,惟日 國有大政,必命曾與諸老議之。 以書史自娛。 延祐元年,奉韶代祀中岳等神。 **至治二年卒,年八十一。** 累章乞致仕,不允,復 還至

四一三六

劉敏中

求 與同 知, 劉 豐於 儕 敏 ·各言其志,曰:「自幼至老,相見而無愧色,乃吾志 中字端甫,濟南章丘人。幼卓異不凡,年十三,語其父景石曰:「昔賢足於學而不 功而不自衒, 此後 人所弗逮也。」父奇之。 鄉先生杜仁傑愛其文,亟稱之。 也。」

止 報 事 敏 遂 亦不無過 至元 解 中日「使約無罪而 職 十一年,由中書掾擢 歸其鄉。 也。」出爲燕南肅政廉訪副使,入爲國子司業,遷翰林直學士,兼國子祭酒 旣而 !被劾,吾固不當出,誠有罪耶,則我旣 起為御史臺都 兵部主事,拜監察御史。 事。 時同官王約以言去,敏中杜 權臣桑哥秉政,敏中劾其奸邪,不 爲 同僚,又爲交友,不能諫 門稱疾。 臺 臣 一請 視

門,廣 贀 以 學 法 士,商 錦州 大德· 恩澤,實鈔法,嚴武備,舉封贈。 七年、詔遣宣撫使巡行諸道、敏中出使遼東、山北諸郡、守令恃貴倖暴横者、一 議 雨 水爲災,輒發廪賑之。 中書省事。 上疏陳十事,曰:整朝綱,省庶政,進善良,剔姦蠹,顯公道,杜私 除東平路總管,擢陝西行臺治書侍御史。 成宗崩,姦臣希中旨,贊其邪謀,敏中援 禮 九 力爭之。 年,召爲集 繩

賜 金幣有加。頃之,拜河南行省參知政事,俄改治書侍御史,出爲淮西肅政廉訪使,轉山 武宗卽位,召敏中至上京,庶政多所更定,授集賢學士、皇太子贊善,仍商議 中書省事,

慰使,遂召爲翰林學士承旨。詔公卿集議弭災之道,敏中疏列七事,帝嘉納焉。以疾還鄉里。

時 二十五卷。 事 爲憂,或鬱而 敏 中平生,身不懷幣,口不論錢;義不苟進,進必有所匡救,援據今古,雍容不迫。 延祐五年卒,年七十六。 弗伸、則戚形于色、中夜歎息、至淚濕枕席。 贈光祿大夫、柱國,追封齊國公,諡文簡。 爲文辭,理備辭明,有中藏集 每以

王約

魯火孫 主 經 一史,工文辭,務達國體,時好不以動其心。 事 |王約字彥博,其先汴人,祖通,北徙眞定。 以司徒開府,奏授從仕郎、翰林國史院編修官,兼司徒府掾。旣而辟掾中書,除禮部 至元十三年,翰林學士王磐薦爲從事,丞旨火 約性穎悟,風格不凡。從中丞魏初游,博覽

之,上不從。約 轉御 丞 時 ・史臺都 ,奏誅右丞盧世榮等,故誣以他罪,約上章直佑冤。按治成都鹽運使王鼎不法,罷官除名。 二十四年,拜監察御史,授承務郎。首請建儲,及修史事。時丞相桑哥銜參政郭佑 事 。南臺侍御史程文海入言事,多斥桑哥罪。 以隴西地遠,請立行臺陝西,詔從之。出賑 河間饑民,均覈有方,全活甚衆。 桑哥怒,又以約與之表裏,六奏殺 !為中

列傅第六十五 劉敏中 王約

二十一年,遷中書右司

員外郎。

四月,成宗卽位,言二十二事,曰:實京師,放差稅,開獵

史。 禁,蠲 米續賑之,中書用其言,民獲以甦。 時政記於史舘以備纂錄,立供需府以專供億,皆從而行之。 文,一取信於行省,一責成於六部。 學校,立 奉詔 逋負、賑窮獨,停冗役,禁鷹房,振風憲,除宿蠹,慰遠方,卻貢獻,詢利病,利農民,勵 義 : 賑京畿東道饑民,發米五十萬石,所活五十餘萬人。 **(含) 覈稅戶,重名爵,明賞罰,擇守令,汰官屬,定律令,革** 調兵部郎中,改禮部郎中。 拜翰林直學士、知制誥同 因條疏京東利病十事,請發 請行贈諡之典以旌忠勳,付 ·兩司。 叉請中書去繁 修 或

人,杖三人,黜有官者二人。命故臣洪子藩爲相,俾更弊政,罷非道水驛十三,免耽羅貢非 願 復不悛,奏屬的驗問。約至,宣布明詔,而諭之曰:「天地間至親者父子,至重者君臣。 謜 人 不遺。 產物,東民大喜。還報,稱旨,除太常少卿。 知 奉表自雪,且請子謜還國,其小人黨與,悉聽使者治。」翼目,約逮捕覆按其罪,流二十二 自 高 利,寧肯爲汝家國地耶!<u></u>
匪感泣,謝曰:「臣年耄,聽信儉邪,是以致此,今聞命矣。 麗 王旺年老,傳國子廳,有不安其政者,飛讒離間,及廳朝京師,潛使人賂用 中書令執其首惡,繫刑部,其黨 事者,留 彼小

死者七十二人,釋無罪者八十六人,平反吳得誠冤,嫁良家入倡女十人,杖流元旦帶刀闌入 尋認 約同宗正、御史讞獄京師,約辭職在淸廟,帝不允。乃閱諸獄,決二百六十六人,當

殿庭者 八十人。 因議鬭毆殺人者宜減死一等,著爲令。 又以浙民於行省、 南臺互訟不決,

命約 訊之。 約至杭,二十日而 理,省、臺無異辭。 特拜 刑部 尙書, 以錄前 功

台潛謀爲變, **免都城煤炭之徵,皆從之。** 曰:「兄之奴,即弟之奴, 弟諫不聽,即上馬馳 石 富 ··, 因 [寧庫失金,約疑番直宿衞者盜之,未幾,果得實,庫官吏獲免。 大德十一年,仁宗至自懷州 **N** 而 濕 命刑曹按責其狀。 約謂 去, 必積氣所蒸, 況殺之有故。」立釋之。 兄遣奴挾弓矢追之,弟發矢斃其奴,兄訴囚其弟,獄當死。 約曰:「在法,謀逆不必搒掠, 肅清宮禁,以平章賽典赤、 驗且堪用, 釋守者罪。 遷禮部尙書,請定丁憂之制,申旌表之恩, 宗王兄弟二人守邊,兄陰 安西王阿難答, 竟當伏誅。」由是結知仁宗 監察御史言通州 與左丞相阿忽 倉米三萬 有異志 約慮囚

急。 遂 乃訟家 今日耶 歸柴氏 約 京民王氏,仕江南而殁,有遗腹子,其女育之,年十六,乃訴其姊匿貲若干, 產 视其牘曰:「無父之子,育之成人,且不絕王氏祀,姊之恩居多。 改前 應後者。 ,韶約詰之。 議 Mi 斥之。 約問曰:「汝出家,旣分承汝師衣鉢,又何爲得柴氏業乎。」僧不能答, 柴氏初無子,命張氏子後,旣得己子,張出爲僧,柴之子又歿,僧 誠利其貲,寧育之至 有司 責之

至大二年正月,上武宗尊號,及册皇后,凡典禮儀注,約悉總之如制。 仁宗在東宮、雅

列

傅

辭意懇切,仁宗嘉納焉。 曰:「安西以何罪誅? 今復之,何以懲將來」議遂寢。明年,進太子副詹事。約抗章諫節飲, 王封於秦,旣以謀逆誅,國除,版賦入詹事院。至是,大臣奏請封其子,復國,仁宗以問。》約 知 約名,思用以自輔,擢太子詹事丞。 從幸五臺山,約諫不可久留,卽日還上京。初,安西

薛居敬上言陝西分地五事,因被命往理之,約不爲署行,語之曰:「太子,潛龍也。當勿用 祠于杭,皆從之。 之時,爲飛龍之事可乎。」遂止。薦翰林學士李謙爲太子少傅,請立故丞相淮安忠武王伯顏 京師六七千里,使人父子兄弟相離,有司承風動擾,豈美事耶」」仁宗止之,稱善再三。家令 聞之,奈何。」完澤色慚曰:「實慮不及此。」又命福建取繡工童男女六人。 約言曰:「福建去 又命取安西兵器,給宿衞士。約謂詹事完澤曰:「詹事移文數千里取兵器,人必驚疑。主上 之。|約屛人語曰:「左衞率府,舊制有之,今置右府何爲。諸公宜深思之,不可累儲宮也。」 爲,天子事,不敢爲。」仁宗悟,竟罷議。同列復傳命增立右衞率府,取河南蒙古軍萬人統 使耶。]|約日:「詹事,東宮官也,預樞密事可乎。] |仁宗復召問|約,對曰:「皇太子事,不敢不 承制立左衞率府,統侍衞軍萬人,同列欲署軍官,約持不可,衆難之曰:「東宮非樞密

仁宗以詹事院諸事循軌,大喜,面賜犀帶,力辭,又賜江南所取書籍,亦辭。仁宗常字

惟彦 爲來!仁宗遽止之。 而 不 博 名, 與 諭羣臣曰:「事未經王彥博議者,勿啓。」又謂中丞朶肣曰:「在詹事而 (汝二人耳。」一日,仁宗西園 又欲觀俳戲,事已集 觀角觝戲,有旨取繒帛賜之。 而 約至,即命罷去,其見敬禮如 約 入, 遙見 此 不求賜 問 曰:「汝 予者, 何

大怒,特拜河南行省右丞。 曰:「正名定分,當御大內。」太保入奏,遂卽位於大明殿。 四年三月,仁宗正位宸極,欲用陰陽家言,卽位 約陛辭,帝賜巵酒及弓矢。 光天殿, 中書奏約陝西行省參知政事,帝 即東宮也。 約言於太保曲

修官。 萬錠, 天下。 第歲終諸事 期檄郡縣,釐 歲詔罷 先是,至大間尚書省用建言者,冒獻河、汴官民地爲無主,奏立田糧府,歲輸數萬石,是 必致 南陽 之,竄 上供不給,乃下諸州,凡至大、至元 孛朮 不集,責亦匪輕。」丞相上憐吉台贊之曰:「善。」遣使白中書,省臣大悅,遂編行 正如 建言 魯翀 詔。 人於海外,命河南行省復其舊業,行省方並緣爲奸, 以書謁约, 會認 更銅錢銀鈔法,且令天下稅, 大奇之,卽署爲郡學正。 鈔相半,衆 盡收至大鈔。 以方韶命爲言,約曰:「吾豈不 旣又薦之中書,擢翰林國史院編 田猶未給。 約度河南歲用鈔七 約至,立 知,

特拜集賢 皇慶 〈大學 改 元元元 土 Ħ, 推 恩三世,贈諡樹碑。 韶中書省曰:「汴省王右丞可卽召之。」約以三月一日至,召見,慰勞, |約首奏:「河南行省丞相ト 憐吉台 ,勳閥舊臣,不宜

列

俳

쓁

六

+

五

王約

議李源、左司員外郎曹元用,皆除擢有差。辯奏故左丞竇履有遺腹子棄外,宜收養歸宗,爲 士姚登孫、應奉翰林文字揭傒斯、成都儒士楊靜,請起復中山知府致仕輔惟良、前尚書參 久外。」召至,封河南王。 約又建議行封贈、禁服色、興科舉。 皆著爲令甲。 上疏薦國子博

强,可堪大任也。」是夕,知院駙馬塔失帖木兒宿衞,帝戒之曰:「彥博非汝友,宜師事之。」 之。冠州民有兄訐其弟厭詛者,讞之,則曰:「我求嗣也。」索授時曆驗其日良信,乃立縱之 **衞輝,有歐母置獄者,其母泣訴,言老妾惟此一息,死則一門絕矣。|約原其情,杖一百而遣** 延祐二年,丞相帖木迭兒專政,奏遣大臣分道奉使宣撫,命約巡行燕南山東道。|約至 拜樞密副使,視事,明日召見賜酒,帝謂左右曰:「人言彥博老病,朕今見之,精力尙

也,不如守祖宗舊制。」丞相稱善,奏罷議不行。 對曰:「高麗去京師四千里,地瘠民貧,夷俗雜尙,非中原比,萬一 令,名曰大元通制,頒行天下。 朝廷議罷征東省,立三韓省,制式如他省,詔下中書雜議,約 <u>拜住一新政務,尊禮老臣,傳詔起</u>約,復拜集賢大學士,商議中書省事,以其祿居家,每日 一至中書省議事,至治之政,多所參酌。又嘗奉詔與中書省官,及他舊臣,條定國初以來律 至治元年,英宗卽位,帖木迭兒復相,約辭職不出。二年,以年七十致仕。三年,丞相 高麗人聞之,圖公像歸,祠而事之,曰:「不 梗化,疲力治之, 非幸事

絕國配者,王公也。」泰定元年,奉詔廷策天下士,第八刺、張益等八十五人,始增乙科員額

至一十五人。

矜式。 奠,敕中書省以下賻贈有差。 **肴饍,事之如父;歲時朔望,攜子姓至先塋,展拜懷戀,謹時祭及五祀,動稽古禮,邦** 粹,謙抑自持,後進謁見,必加禮貌,俸祿所入,布散姻族,外及貧士,從父居貧,月奉錢米 天曆元年,文宗踐祚,約入賀,賜宴大明殿,帝勞問甚歡。時年七十有七,平居襟度和 至順四年二月己酉卒,年八十二,皇太后聞之嗟悼,以尙醞二尊,遣徽政院臣臨弔致 是月庚申,葬城西岡子原。 人以爲 餽

約平生著作,有史論三十卷、高麗志四卷、潛丘藁三十卷,行於世。 子思誠,奉議大夫、

秘書監著作郎。

王結

王結字儀伯,易州定興人。祖逖勤,以質子軍從太祖西征,娶阿魯渾氏,自西域徙戍秦

隴,又徙中山,家焉。

措之事業,見之文章,皆悉有所本。 結 生而 聰穎,讀書數行俱下,終身不忘。嘗從太史董朴受經,深於性命道德之蘊,故其 憲使王仁見之,曰:「公輔器也。」年二十餘,游京師,上執

列傳第六十五 王結

銓衡, 純正,皆治國之大經大法,宰相不能盡用之。 政書,陳時政八事,曰:立經筵以養君德,行仁政以結民心,育英材以備貢舉,擇守令以正 敬賢士以厲名節,革冗官以正職制,辨章程以定民志,務農桑以厚民生。其言剴切

宗優納之。 中大夫。 嘉納焉。 時仁宗在潛邸,或薦結充宿衞,乃集歷代君臣行事善惡可爲鑒戒者,日陳于前,仁宗 武宗即位,以仁宗爲皇太子。大德十一年,命置東宮官屬,以結爲典牧太監,階太 近侍以俳優進,結言:「昔唐莊宗好此,卒致禍敗,殿下方育德春宮,視聽宜謹。」仁

有黃河故道,而會通堤遏其下流,夏月潦水,壞民麥禾。結疏爲斗門以泄之,民獲耕治 登于書,俾朝夕閱習之。屬邑(臣)[鉅]鹿沙河有唐魏徵、宋璟墓,曰乃祠二公于學,表其言 論風旨,以厲多士。遷揚州,又遷寧國,以從弟紳僉江東廉訪司事,辭不赴。改東昌路,境 仁宗卽位,遷集賢直學士。出爲順德路總管,敎民務農興學、孝親弟長、戢奸禁暴,悉

幾,除吏部尚書,薦名士宋本、韓鏞等十餘人。 (下) 除惡不可猶豫,猶豫恐生它變,服用不可奢僭,奢僭則害及于身。」丞相是其言。未 至治二年,參議中書省事。時拜柱爲丞相,結言:「爲相之道,當正己以正君,正君以正 列傳第六十五 王結

歲 帝有 徵 烈 餘 荐 風 之異。 ,拜遼陽 所 臻 泰定元 ",宜修 感悟。 結 年 行省參 政事,以 中宮聞之,亦召結等進講,結以 春,廷試 昌言于朝曰:「今朝廷 知政 弭天變。」是歲,詔結 進士,以結 事 0 遼東大水,穀價翔 充 君子小 讀卷官。 知經筵 人混淆 故事 遷集賢侍讀學士、中 湧,結 一。扈從 刑 辭。 請于 政不明, 上都。 明年, 朝, 除浙西 結援引 官賞 發粟數萬 奉 、太濫, 大夫, 廉 古訓 訪使, 石 故陰陽 會有 證 , 以 時 中途以 賑饑民。 月食、地震、 政之失,冀 錯 謬。 疾還 咎

拜

刑

部

尙

書。

讀 或 變,失皇太子寶 太子 事 致 學 入謝光 士,丁 人于死,而籍其妻孥貲產者,結 位,於是遣 天曆元年, 內艱 天殿,以親老辭,帝 不起。 大臣奉寶北迓。 文宗 更鑄新 即位,拜陝西行省參知 寶 近侍請 曰:「忠孝 近侍有 復 視 論之。 舊 求除拜賞賚者,結曰:「俟天子至議 能 製宜 兩 全 政事,改同知儲 近侍益怒,譖詆 加 亭! 大,結 是時迎立 曰:「此寶當傳儲嗣,不敢 慶司事。 明宗于朔方,明宗 日甚,遂罷 二年,拜 政。 之。 叉命爲 命文宗 中 踰 初, 書參 舊 集賢 制 上 都之 知 也 居 皇 政

災,結 起 巖 元 言僧尼褻瀆 歐陽玄 統 元 年, 修 復除浙 泰定、 當 坐罪。 天曆 西廉 訪 兩朝 左 使, 丞相疾革, 實錄。 未行,召拜翰林學士、資善大夫、知制誥同修 拜 中 家人請釋重囚禳之, 書左丞。 中 宫 命僧 結極 尼於慈 陳 其 福 殿 不 可。 作 佛 或 先時,有罪 事 史, 與 而 殿

士之廉 過 ,北人則徙 聽還其 耻,不可 郷,因 廣海 以不養也。」聞者謂其得體。 著爲令。 ,南人則徙遼東,去家萬里,往往道死。 職官坐罪者,多從 重科,結曰:「古者,刑不上大夫,今貪墨雖多,然 至元元年,詔復入翰林,養疾不能應詔。 結請更其法,移鄉者止千里外,改

IE

月二十八日卒,年六十有二。

家,曰:「正人亡矣。」四年五月,詔贈資政大夫、河南江北等處行中書省右丞、護軍,追封太 以 原郡公,諡文忠。 爲名言。 結立言制行,皆法古人,故相張珪曰:「王結,非聖賢之書不讀,非仁義之言不談。」識者 晚邃於易,著易說一卷,臨川吳澄讀而善之。 有詩文十五卷行于世。 及卒,公卿唁于朝,士大夫弔于

宋 術

李 行省員外郎,持詔徙江華島居民於平壤。 而 澶 畔 北 歸 宋 壁行 ,屏居 六年 简字弘道, 潞州長子人, 金兵部員外郎元吉之孫。 ,高麗權臣林衍廢其國王,而 中書省事於濟南,至元五 河 內者 ,十有五年。 趙璧經略 一年,大兵守襄陽,壁行元帥府事,衜皆從焉,軍事多所 立其弟溫,詔遣國王頭輦哥暨壁將兵討之,以衜爲 復命,慰勞良厚,仍賜衣段,授河南路總管府判 河南,聞其名,禮聘之。 简善記誦, 年十七, 避地襄陽, 已 中統三年,擢翰 林修撰。

官,不赴。

接,多所錫賚。二十三年卒,有程山集十卷行于世。 詳雅,大愜睿旨,自是數蒙召問,侍講經幄,開諭爲多。 地當署郡邑守令,皆命衝銓舉。 十三年,入爲太常少卿,屬省官制行,兼領籍田署事。 二十年,初立詹事院,首命順爲太子賓客。 十八年,除秘書監。 十六年,太子以耆德召見,應對 十九年,江 每燕見,優賜容 西 分

張伯淳

儒學教授,遷浙東道按察司 軍,尋舉進士,監臨安府都稅院,陞觀察推官,除太學錄,入本朝。至元二十三年,授杭州路 張伯淳字師道,杭州崇德人。少舉童子科,以父任銓受迪功郎、淮陰尉,改揚州司戶參 知事

其 帝問冗官、風憲、鹽筴、楮幣,皆當時大議,所對悉稱旨,命至政事堂,將重用之,固辭,遂授 翰 情。 林直 二十八年,擢爲福建廉訪司知事。 |學士,進階奉訓大夫,謁告以歸。 大德四年,卽家拜翰林侍講學士。 歲餘,有薦伯淳於帝前者,遣使召問。 明年, 授慶元路總管府治中,行省檄按疑獄衢、秀,皆得 造朝,扈從上都。 又明年卒。 明年, 有文集若干 入見,

卷藏于家。

校勘記

[1] 四年 按上文有「大德十一年」,下文有「皇慶元年」,此處當作「至大四年」。 蒙史已校。

[] (E) [鉅] 鹿 道光本與滋溪文藁卷二三王結行狀合,從改。

兀史卷一百七十九

列傳第六十六

賀勝

年十六,入宿衞,凝重寡言,世祖甚器重之,大臣有密奏,輒屛左右,獨留勝,許聽之;出則參 乘輿,入則侍帷幄,非休沐,不得至家。 賀勝,仁傑子也,字貞卿,一字舉安,小字伯顏,以小字行。嘗從許衡學,通經傳大義。

當象前,後至者斷靷縱象,乘輿乃安。勝退,創甚,帝親撫之,遣尙醫、尙食視護。 身溫之。 士,領太史院事,詔賜一品服。 合戰,還侍帝側,矢交帳前,勝立侍不動。乃顏旣敗,帝還都,乘輿夜行,足苦寒,勝解衣,以 至元二十四年,乃顏叛,帝親征,勝直武帳中,雖親王不得輒至。 勝傳旨飭諸將,詰旦 帝一日獵還,勝參乘,伶人蒙采毳作獅子舞以迎駕,輿象驚,奔逸不可制,勝投身 盧世榮、桑哥秉政,勢焰熏灼,勝父仁傑,留守上都,不肯爲 拜集賢學

傅第六十六 賀勝

列

之下,桑哥欲陰中之,累數十奏,帝皆不聽。

屬完澤。」遂相完澤,而以勝參知政事。三十年,僉樞密院事,遷大都護。 至元二十八年,桑哥敗,罷尙書省,政歸中書。帝問誰可相者,勝對曰:「天下公論,皆

指揮使。旣至,通商賈,抑豪縱,出納有法,裁量有度,供億不匱,民賴以安。諸權貴子弟奴 有暴橫驕縱者,悉繩以法。 大德九年,勝父仁傑請老,以勝代爲上都留守,兼本路都總管、開平府尹、虎賁親軍都

「祖宗以上都之民付卿父子,欲安之也。卿能如此,朕復何憂,卿其視事。」民德之,爲立祠 曲强娶高氏婦。 勝白帝,斥之,高氏以全。歲大饑,輒發倉廩賑民,乃自劾待罪。帝報曰: 队護足矣。」 賜小車,出入禁闥。 上都西門外。帝聞之,復命工寫其像以賜,俾傳示子孫。未幾,以足疾請老,不許,曰:「卿 同三司、上柱國。奉聖州民高氏,籍虎賁,以貲雄鄉里,身死子幼。有達官利其財,使其部 至大三年,進光祿大夫、左丞相,行上都留守,兼本路總管府達魯花赤。 尋又加開府儀

引爾子,幷下之獄。丞相鐵木迭兒受其賂六萬緡,終不爲直。勝素惡鐵木迭兒貧暴,居同 巷,不與往來。聞弼事,以語御史中丞楊朶兒只。楊朶兒只以語監察御史玉龍帖木兒、徐 初,開平人張翔,家富。剛死,其奴索錢民家,弗得,毆負錢者至死。 有治其獄者, 教奴

德功臣、太傅、開府儀同三司、上柱國,追封秦國公,諡惠愍。至正三年,加贈推忠亮節同德 敬, 幷殺之。 勝死之日, 百姓爭持紙錢, 哭于屍傍甚哀。 泰定初, 詔雪其寃, 贈推忠宣力保 出據相位,乃執楊朶兒只及中書平章政事蕭拜住,同日戮于市。 兒走匿太后宮中,太后爲言,僅奪其印綬而罷之。及英宗卽位,在諒闇中,鐵木迭兒遂復 **遂劾奏丞相,逮治其左右,得所賂事實以聞。帝亦素惡鐵木迭兒,欲誅之。** 且復誣勝乘賜車迎詔,不 鐵木迭

司事。孫均,太子詹事。 子二人:惟一,開府儀同三司、中書左丞相、監修國史,惟賢,太中大夫、同知上都留守

翊戴功臣、太師、開府儀同三司、上柱國,追封涇陽王,改諡忠宣。

楊朶見只「示花」二

邸, 侍側、雖休沐、不至家、衆敬憚之。會兄卒、涕泣不勝哀,<u>仁宗</u>憐之,存問優厚。事寡嫂有禮, 宗嘉賴焉,親解所服帶以賜。旣佐定內難,仁宗居東宮,論功以爲太中大夫、家令丞,日夕 師,與右丞相哈剌哈孫定議,迎武宗于北藩。仁宗還京師,朶兒只譏察禁衞,密致警備,仁 甚見倚重。大德丁未,從遷懷孟。仁宗聞朝廷有變,將北還,命朶兒只與李孟先之京 楊朶兒只,河西寧夏人。少孤,與其兄皆幼,卽知自立,語言儀度如成人。事仁宗于藩

列

待 可任大事 ·兄子不異己子,家人化之。進正奉大夫、延慶使。 ,然剛直寡合"」武宗顧視之,曰:「然。」 武宗聞其賢,召見之,仁宗曰:「此人誠

之,拜 使,御史請遷爲臺官,帝以宣徽膳用,素不會計,特以委之,未之許也。 言,特誅其尤者,民大悅服。帝他日與中書平章李孟論元從人材,孟以朶兒只爲第一,帝然 用之,昔之道也。 議罷之。 仁宗始總大政,執誤國者,將盡按誅之,朶兒只曰:「爲政而尚殺,非帝王治也。」帝咸其 禮部尚書。 朵兒只曰:「法有便否,不當視立法之人爲廢置。 銀鈔固當廢,銅錢與楮幣相 國無棄寶,民無失利,錢未可遽廢也。」言雖不盡用,時論是之。 初,尚書省改作至大銀鈔,視中統一當其二十五,又鑄銅爲至大錢,至是 遷宣徽副 權 而

言,拜朶兒只爲侍御史。帝宴閒時,羣臣侍坐者,或言笑踰度,帝見其正色,爲之改容,有犯 法者,雖貴幸無所容貸。怨者因共譖之,帝知之深,譖不得行。拜資德大夫、御史中丞。中 使斡來不稱職,權臣匿其奸,冀不問,朶兒只劾而杖之,斡來愧死。 書平章 只言于帝曰:「誅告者,失刑,違諫者,失誼。 世無諍臣久矣,張珪,眞中丞也。」帝喜,竟用珪 有言近臣受賄者,帝怒其非所當言,將誅之,時張珪爲御史中丞,叩頭諫,不聽。 朶兒 政事張閻以妻病、謁告歸江南、奪民河渡地、朶兒只以失大體,劾罷之。江東、西奉

御 .史納璘言事忤旨,帝怒叵測,朶兒只救之,一日至八九奏,曰:「臣非愛納璘,誠不願

直也,朕安得用之。」對曰:「直由太宗,太宗不聽,徵雖直,將焉用之」,帝笑曰:「卿意在納璘 戒,不肯復言矣。」帝不允。後數日,帝讀貞觀政要, 朶兒只侍側,帝顧謂曰:「魏徵古之遺 璘。 朶兒只又言曰:「以御史宰京邑,無不可者。但以言事而得左遷,恐後之來者, 用是爲 陛下有殺御史之名。」帝曰:「爲卿,宥之,可左遷爲昌平令。」昌平,畿內劇縣,欲以是困納

耶?當赦之,以成爾直名也。」

之,何以風厲僥倖者」遷中政院使。未幾,復爲中丞,遷集賢大學士,爲權臣鐵木迭兒所害 無罪。 重,苟言之,當可得也,朶兒只曰:「家世寒微,幸際遇至此,已懼弗稱,尙敢求多乎!且我爲 學士、榮祿大夫,以獎其直言。時位一品者,多乘閒邀王爵、贈先世。或謂朶兒只眷倚方 而死,年四十二。 有上書論朝政闕失,面觸宰相,宰相怒,將取旨殺之。朶兒只曰:「詔書云:言雖不當, 今若此,何以示信天下!果誅之,臣亦負其職矣。」帝悟,釋之。於是特加昭文館大

史中丞蕭拜住拜中書右丞,又拜平章政事,稍牽制之。 得罪斥罷,更自結徽政近臣,復再入相,恃勢貪虐,兇穢愈甚,中外切齒,羣臣不知所爲。 御 初,武宗崩,皇太后在興聖宮,鐵木迭兒爲丞相,踰月,仁宗卽位,因遂相之。 居兩歲,

朵兒只自侍御史拜御史中丞, 慨然以糾正其罪爲己任。 上都富民張弼殺人緊獄,鐵木

列

誠 門,責以違旨意者,對曰:「待罪御史,奉行祖宗法,必得罪人,非敢違太后旨也。」帝仁孝,恐 其 曰:「非臣職事,臣不敢與聞。所念者,鐵木迭兒雖去君側,反得爲東宮師傅,在太子左右, 兒只廉得 迭兒使大奴脅留守賀伯顏出之,及强以他奸利事,不能得。一日,坐都堂,盛怒,以官事召 恐售其奸,則禍有不可勝言者。」 發其私罪二十餘事。 留守,將罪之,留守昌言:「大奴所干非法,不敢從,他實無罪。」鐵木迭兒語詘,得解去。 朶 出太后意,不忍重傷咈之,但罷其相位,而遷朶兒只爲集賢學士,帝猶數以臺事問之,對 大奴同惡數人,鐵木迭兒終不能得,朶兒只持之急。徽政近臣以太后旨,召朶兒只至宮 其所受酮贓鉅萬萬,大奴猶數千,使御史徐元素按得實,入奏。 帝震怒,有詔逮問,鐵木迭兒逃匿,帝爲不御酒數日,以待決獄,盡誅 而御史亦輦眞,又

其 卽 政 微。 ·斬汝,以謝天下。果違太后旨,汝豈有今日耶!」鐵木迭兒又引同時爲御史者二人,證成 使失里門、御史大夫禿忒哈雜問之, 責以前違太后旨之罪。 朶兒只曰:「中丞之職,恨不 未幾,稱旨執朶兒只載諸國門之外,與蕭拜住俱見殺。 仁宗崩,英宗猶在東宮,鐵木迭兒復相,乃宣太后旨,召蕭拜住、杂兒只至徽政院,與徽 梁兒只顧二人唾之曰:「汝等嘗得備風憲,乃爲是犬彘事耶」」坐者皆慚俯首,卽起入 是日,風沙晦冥,都人恟懼,道

路相視以目。

英宗卽位,詔書遂加以誣罔大臣之罪,鐵木迭兒權勢旣成,毫髮之怨,無不報者,太后

祿大夫、司徒、上柱國、夏國公,諡襄愍。 朶兒只死時,權臣欲奪其妻劉氏與人,劉氏剪髮毀 楊等冤,何可不亟昭雪也」丞相善之,遂請於帝,詔昭雪其冤,特贈思順佐理功臣、金紫光 言,會議廷中,集賢大學士張珪、中書參議回回,皆稱蕭、楊等死甚冤,是致不雨。聞者失 色,言終不得達。及珪拜平章,卽告丞相拜住曰:「賞罰不當,枉抑不伸,不可以爲治。若蕭 驚悔,而帝亦覺其所譖毁者皆先帝舊臣,未及論治,而鐵木迭兒以病死。會有天災,求直

容以自誓,乃免。子不花。

其力,何創痕之淺,反不入膚耶一。遂得其情,平反出之。河東民饑,先捐己貲以脹,請未得 按部民,有殺子以誣怨者,獄成,不花讞之,曰:「以十歲兒,受十一創,且彼以斧殺怨,必盡 命,卽發公廪繼之,民遂賴不死。 林直學士,力辭。後遭家難,益自勵節爲學,以蔭補武備司提點,轉愈河東廉訪司事。 不花,幼有才氣,能以禮自持,好讀書,善書。初,仁宗聞而召之,應對稱旨,欲以爲翰 嘗出

|花獨率衆出禦,呼西人諭之曰:「民者,祖宗艱難所致,國家大事,何與於民。汝等旣昧逆順, 天曆初,文宗入繼大統,除通政院判,將行,值陝西諸軍拒詔,郡邑守吏,率民逃之。不

順二年,贈嘉議大夫、禮部尚書,以褒其忠。 吾縱爲 叉欲殘此無辜,吾有爲民死爾,不汝從也。」陣潰,遂見殺,二僕亦見執,曰:「吾主旣爲國死, 人奴,今苟得生,他日何以見吾主於地下,不若死從吾主。」欲起殺讐,讐要斬之。至

蕭拜住

剌帖木兒,少事裕宗於東宮,典宿衞,仕爲檀州知州。 至元十一年,從丞相伯顏平宋。還,授湖北提刑按察使。追封順國公,諡武定。 水栅未下,自除誘湯河川人叛去,老瓦追之不克,死焉。醜奴子青山, 諡忠毅。弟老瓦,始以楊城漁寨來降,爲醜奴弟充質子,多立戰功,襲檀州節度使。言安以 奴驛送竹箭弓弩弦各一萬,擢檀順昌平萬戶,仍管打捕鷹房人匠。卒于官,後追封順國公, <u>冀等州,及昌平紅螺、平頂諸寨,又兩敗金兵於邦君甸,授檀州軍民元帅。太祖方西征,</u>醜 逐開關, 遺使納降。

太祖命醜奴襲招燈必舍, 追及平、灤, 降之。因攻取平、灤、檀、順、深、 歲庚午,國兵南下,金將招燈必舍遁,醜奴於暮夜,潛領兵三千人力戰,不克,矢中其胸, 蕭拜住,契丹石抹氏也。曾祖醜奴,有膂力,善騎射,識見明敏,仕金爲古北口屯戍千 追封順國公、諡康惠 中統元年襲萬戶。 青山子哈

拜住,乃哈剌帖木兒之子也。嘗從成宗北征,特授檀州知州,入爲禮部郎中,擢同知大

「有蕭知府,餘不知也。」復過神祠,有數老人焚香羅拜,遣問之曰:「汝輩何所禱。」合辭對 曰:「蕭知府奔喪還,欲速其來,是以禱也。」帝意遂釋。 都路總管府事,出知中山府,以憂去官。屬仁宗過中山,有同官者,譖於近侍曰:「知(州)[府] 去官, (三) 實憚迎候煩勞耳。」帝頜之,適行田野間,見老嫗,問之曰:「府中官孰賢。」嫗對曰:

授銀青榮祿大夫、崇祥院使。 御 史中丞。皇慶元年,遷陝西行中書省右丞。延祐三年,進中書平章政事,除典瑞院使,超 武宗卽位,起復爲中書左司郎中,出爲河間路總管,召爲右衞率使,遷戶部尚書,遂拜

楊朶兒只及鐵木迭兒傳。泰定間,贈守正佐治功臣、太保、儀同三司、柱國,追封薊國公,諡 等事,遂請依皇太后旨,幷前御史中丞楊朶兒只皆殺之。帝曰:「人命至重,刑殺非輕,不宜 倉卒。二人罪狀未明,當白太后,使詳讞之,若果無冤,誅之未晚。」 竟殺之,並籍其家,語見 英宗卽位之十有九日,右丞相鐵木迭兒怨拜住在省中牽制其所爲,又發其姦贓、專制 拜住之死,有吳仲者,潛守其尸,三日不去,竟收葬之。

校勘記

一〕〔不花〕 據本書原目錄補。

列傳第六十六 藍拜住 校勘記

[1] 知(州)[府] 從道光本改。按前後文有「出知中山府」、「蕭知府」。 〔二〕言安 「言安」,史無其地,蒙史改作「信安」,疑是。

兀史卷一百八十

列傳第六十七

耶律希亮

朝,皆不從,則棄其妻子,挺身來歸。 詣行在所。已而鑄扈從南伐,希亮亦在行。明年,憲宗崩于蜀,希亮將輜重北歸陝右 未浹旬,已能賦詩。歲丙辰,憲宗召鑄還和林,希亮獨留燕。歲戊午,憲宗在六盤山,希亮 儒書,儒生俱在中土,願攜諸子,至燕受業。」憲宗從之,乃命希亮師事北平趙衍,時方九歲, 南之涼樓,曰禿忽思,六皇后遂以其地名之。憲宗嘗遺鑄覈錢糧于燕,鑄曰:「臣先世皆讀 又明年,爲中統元年,世祖卽位,阿里不哥反,遣使召主將渾都海。 耶律希亮字明甫,楚材之孫,鑄之子也。初,六皇后命以赤帖吉氏歸鑄,生希亮於和林 旣而渾都海知鑄去,怒,遣百騎追之不及。乃使百人 鑄說渾都海等入

列傳第六十七 耶律希亮

監視希亮母子,迫脅使從行,自靈武過應吉里城,至西涼甘州。

阿里不哥遣大將阿藍答兒

謂 者宜知之。」渾都海怒,詬曰:「我焉得知之,其父今亡命東見皇帝矣!」希亮曰:「若然,則 自 不 和 林帥 知」阿藍答兒熟視渾都海曰:「此言深有意焉。」詩希亮甚急,希亮曰:「使吾知之,亦從 師至焉支山,希亮見之。 阿藍答兒問:「而父安在。」一一清亮曰:「不知,與吾父同任事 何

而

去,安得獨留!」阿藍答兒以爲實,免其監涖。

宗潛邸湯沐之邑也。 花 是冬,涉雪踰天山,至北庭都護府。 曰:「我受恩於汝父,此圖報之秋也。」及抵沙州北川,希亮與兄弟徒步負任,不火食者數日。 北 與鑄 黑水 旣 有婚姻之好,又哈剌不花在蜀時,嘗疾病,鑄召醫視之,遺以酒食,因釋希亮縛,謂 東沙陀中。 而 阿藍答兒、渾都海爲大兵所殺,其殘卒北走,衆推哈刺不花爲帥。希亮潛匿甘州 殿兵已過十餘里,有尋馬者適至,老婢漏言,衆奄至,驅至肅州。 二年,至昌八里城。夏,踰馬納思河,抵棄密里城,乃定 哈剌不

忽只 果。冬,至于火孛之地。三年,定宗幼子大名王閔其不能歸,遺以幣帛鞍馬,乃從大名王至 及阿魯忽二王,還至葉密里城。王遺以耳環,其二珠大如榛,實價直千金,欲穿其耳使帶 |希亮辭曰:「不敢因是以傷父母之遺體也。 兒之地。會宗王阿魯忽至,誅阿里不哥所用鎭守之人唆羅海,欲附世祖。 時六皇后之妹主后位,與宗王火忽皆欲東覲。希亮母密知其事,攜希亮入見,已而事不 且無功受賞,於禮尤不可。」王又解金束帶 復從大名王

遺之,且曰:「繫此,於遺體宜無傷。」五月,又爲阿里不哥兵所驅,西行千五百里,至孛劣撒 之,盡殲其衆。 二王乃函其頭, 遣使報捷。十月, 至于亦思寬之地。四年, 至可失哈里城。 里,至也里虔城,而哈剌不花之兵奄至,希亮又從二王興師,還至不剌城,與哈剌不花戰,敗 后妃輜重皆留于此,希亮母及兄弟亦在焉。希亮單騎從行二百餘里,至出布兒城。又百 里之地。六月,又西至換扎孫之地。又從至不剌城。又西行六百里,至徹徹里澤剌之山,

速古兒〔赤〕、必闍赤。[1]至元八年,授奉訓大夫、符寶郎。 召希亮,馳驛赴闕。六月,由苦先城至哈剌火州,出伊州,涉大漠以還。八月,入覲世祖于 上都之大安閣,備陳邊事,及覊旅困苦之狀。世祖憐之,賜鈔千錠、金帶一、幣帛三十,命爲 先是,鑄嘗言于世祖:「臣之妻子皆在北邊。」至是,世祖遣不華出至二王所,因以璽書

四月,阿里不哥兵復至,希亮又從征,至渾八升城。時希亮母從后避暑於阿體八升山。

諸怯薛歹以故爭取平陽布。苟截其長者,與他郡等,則無所爭,而以其所截者,爲髹漆宮 晚。」世祖然之。十三年,太府監令史盧贄言於監官:「各路所貢布長三丈,唯平陽加一丈, 等皆云可伐。希亮奏曰:「宋與遼、金攻戰且三百年,干戈甫定,人得息肩,俟數年,與師未 殿器皿之用,甚便。」監官從之。適左右以其事聞,帝以詰監官,監官倉皇莫知所以對,歸罪 十二年,旣平宋,日世祖命希亮問諸降將,日本可伐否。夏貴、呂文煥、范文虎、陳奕

列

傅第六十七

耶律希亮

竟釋贄,而召御史大夫塔察兒等讓之曰:「此事,言官當言而不言,向微禿忽思,不誤誅此人 於贄,帝命斬之。希亮遇諸塗,贄以寃告。希亮命少緩,具以實入奏。有旨令董文用讞之。

都,諭旨中書。 奏曰:「近奉旨:漢人盜鈔六文者殺。 以是囚多。」帝驚問:「孰傳此語。」省臣曰:「此旨實 畢,董文用問大都近事。〔三〕希亮曰:「囹圄多囚耳。」世祖方欹枕而臥,忽寤,問其故。希亮 乃罪脫兒察。 希亮因奏曰:「令旣出矣,必明其錯誤,以安民心。」帝善其言,卽命希亮至大 脫兒察所傳。」脫兒察曰:「陛下在南坡,以語蒙古兒童。」帝曰:「前言戲耳,曷嘗著爲令式? 十四年,轉嘉議大夫、禮部尚書,尋遷吏部尚書。帝駐蹕察納兒台之地,希亮至,奏對

宗訪求先朝舊臣,特除翰林學士承旨、資善大夫,尋改授翰林學士承旨、知制誥兼修國史。 之士多從之游。|泰定四年卒,年八十一。 |希亮以職在史官,乃類次世祖嘉言善行以進,英宗取其書,置禁中。 久之, 閑居京師,四方 十七年,希亮以跋涉西土,足病痿攣,謝事而去,退居燥陽者,二十餘年。至大二年,武

朔漠之人,咸相聚來觀,歎曰:「此中土之禮也。」雖疾病,不廢書史,或中夜起坐,取燭 希亮性至孝,困厄遐方,家貲散亡已盡,僅藏祖考畫像,四時就穹廬陳列致奠,盡誠盡

以 書。 所著詩文及從軍紀行錄三十卷,目之曰 **愫軒集**。 贈推忠輔義守正功臣、 資善大夫、

集賢 學 土 上 一護軍 追 封 漆水郡 公,諡忠嘉

趙 世延

太祖 馬 文州 魁公死之。 征伐, 吐 趙世延字子敬, 蕃 萬戶 有功,爲蒙古漢 達魯花赤 祖按 竺邇,幼 其先雍古族 軍 孤 征 行 ,鞠於外大父 人,居雲中北 大元 帥 鎭 朮 蜀,因家成都。 要甲 邊。 調 曾祖 爲趙家, 盟公, **父黑梓,以門功襲父元** 爲 因 金羣牧使,太祖 氏 爲 趙 ; 驍 勇 治善騎 得其所牧 帥 射, 職 從

兼

哥不 年 嚴 延 世 官 政。 獨 延 轉 幸 法。 會省臣 世 澧掠 奉 逸。 延 至元 議 中 天 賣 大夫,出 奉旨 以軍 二十一 丞 資秀發,喜讀 良民之禁,部 趙 討之, 按 國 僉江 平陽 輔,桑哥黨也,抑不以聞 年,授承 蠻兵 南 那監 (書) 究心儒者體用 內 湖 事郎、 大潰 漫然。 北 也先忽都 道 肅 雲南諸路 卽請降。 政 廉 贓 訪 鉅 之學。 萬,鞫 司 ,更以告桑哥。 提刑按 二十六年, 事 左司 〈察司 敦儒 弱冠,世祖召見,俾入樞密院御史臺肄習 郎 學 判官,時 擢 中 ', 立 監 於是五 董 仲威 察御史, 義倉,撤淫祠 年 三十 人 殺 者, 人獄 與 ·有四。 司 悉爲 ,皆明允。 修澧陽縣 列 其 五 烏蒙蠻

會

叛 人劾丞 所 擠 壞隄, 一十九 而 相

世

桑

列

牘。 先發廪以賑,朝廷設不允,世延當傾家財若身以償。」省臺從之,所活者衆。 治書侍御史。 ,俄改中書左司 世延旣至,不三月,剖決殆盡。陝民饑,省臺議,請于朝賑之,世 元年,除江南 十年,除安西路總管。 都事。 行御史臺都事,丁內艱,不赴。 臺臣奏,仍爲都事 安西,故京兆省臺所治, 中臺。六年,由山東肅政廉訪副使改江 大德元年,復除 號稱 會府, 延曰:「救荒如救火,願 前官,三年,移 前政壅滯者三千 中臺都 南 行

省臣,藉使盡得其地, 陞中奉大夫、陝西行臺侍御史。 者多害人,且軍官或抑良爲奴,世延皆除其弊,而正其罪。 聞之,章再上,事卒罷 邊寄,兵宜 至大元年,除紹興路總管,改四川肅政廉訪使。 及是,右丞阿忽台當繼行,世延言:「蠻夷事,在羈縻,而重煩天討,致軍旅亡失,誅戮 一止,勿用。」事聞,樞密院臣以爲用兵國家大事,不宜以一人之言爲興輟。 何補於國。今窮兵黷武,實傷聖治。 先是,八百媳婦爲邊患,右丞劉深往討之,兵敗而還, 蒙古軍士,科差繁重,而軍士就戍往來 朝廷第當選重臣知治體者 又修都江堰,民尤便之。 四年, 与付以 坐罪

中書參 人 多 政用 皇慶二年,拜江浙行省參知 一知政事,居中書二十月,遷御史中丞。 儒者。 趙世延其 人也。」帝曰:「世延 政事,尋召還,拜侍御史。 誠 有旨省臣自平章以下,率送之官。 미 用,然雍古氏 延祐 非漢 元年,省臣奏:「比奉詔 人,其署宜居 其禮前所 右。」遂拜

乞補外,拜四川行省平章政事。 **士承旨,兼御史中丞,世延固辭,乃解中丞。 五年,進光祿大夫、昭文館學士,守大都留守,** 爲中丞。三年,世延劾奏權臣太師、右丞相帖木迭兒罪惡十有三,詔奪其官職。尋陞翰林學 無有,由是爲權臣所忌,乃用皇太后旨,出世延爲雲南行省右丞。 世延議即重慶路立屯田,物色江津、巴縣閑田七百八十三 陛辭,帝特命仍還御史臺

頃,摘軍千二百人墾之,歲得粟萬一千七百石。

歲。 之曰:「此朕意耳。」未幾,帖木迭兒死,事乃釋。世延出居於金陵。 所尊禮,而帖木迭兒妄入其罪,數請誅之,此殆報私怨耳,殷豈能從之。」侍臣皆叩頭 住屢言世延亡辜,得旨出獄,就舍以養疾。先是,帝獵北涼亭,顧謂侍臣曰:「趙世延,先帝 曹,逼令自裁,世延不爲動,居囚再歲。胥益兒哈呼自以所訴涉誣欺,亡去。中書左丞 京師,俾其黨煅煉使成獄。會有旨,事經赦原,勿復問。帖木迭兒更以它事白帝,繫之刑 誣告世延罪,逮世延置對,至夔路,遇赦。 帖木迭兒在上京,聞世延出獄,索省牘視之,怒曰:「此左丞相罔上所爲也。」事聞,帝語 明年,仁宗崩,帖木迭兒復居相位,銳意報復,屬其黨何志道,誘世延從弟胥益兒哈呼 世延以疾抵荆門、留就醫。帖木迭兒遣使督追至 相拜 稱萬

御史中丞,又遷中書右丞。明年,有旨趙世延頃為權姦所誣,中書宜徧移天下,昭雪其非 泰定元年,召還朝,除集賢大學士。明年,出爲江南行臺御史中丞。 四年, 入朝, 復爲

列傳

同

知

樞

密院事

辜,仍加翰林學 士承旨、光祿大夫。 經筵開,兼知經筵事,選揀勸講者, 皆一 時名流。 叉加

事,明 以御 冬,世 中丞 幾,求退之言,後勿 纂修皇朝經世 定策,迎之于江陵,懷王即位,是爲文宗。 而 懷 史中丞兼翰林學士承旨,以疾乞歸田里,詔不允。 泰定 ,行次濟州,三月,改集賢大學士,六月,又加<u>奎章閣大學士,八月,拜中書平章政事</u>。 王久居民間,備嘗艱險,民必歸之,天位不可久虛,不 延 日 至京, 卽 帝崩,燕鐵木兒與宗王大臣議: 行,養疾於金陵之茅山。 大典,世延屢奏:「臣衰老,乞解中書政務,專意纂修。」帝曰:「老臣 固辭不允, 《復陳。」四月,仍加翰林學士承旨,封魯國公。 秋,以疾,移文中書致其 詔以世延年高多疾,許乘 詔徵還朝,不能行,二年,改封涼國 武宗二子周王、懷王,於法當立,周王遠在朔漠, 當是時,世延贊畫之功爲多。 小車入內。 天曆二年正月,復除江南行臺御 如先迎懷王,以從民望。 至順 元年,詔世延與虞集等 公。 文宗卽位,世延仍 如 八月,即 卿者無 史

佐 運 翊 政 元統 事 亮功臣、太保、金紫光祿大夫、上柱國,追封 魯國 二年,詔賜世延錢凡四萬緡。 公。 明年五 月,至成都, 至元 + -改元,仍除奎章閣大學士、翰林學士承旨、中書 月卒,享年七十有七。 魯國公,諡 文忠。 至正 二年,贈世忠執法

世 延歷事凡九朝,敭歷省臺五十餘年,負經濟之資,而將之以忠義,守之以淸介,飾之

以文學,凡軍國利病,生民休戚,知無不言,而於儒者名教,尤拳拳焉。爲文章,波瀾浩瀚,

一根於理。嘗較定律令,彙次風憲宏綱,行于世。

曆初 ,囊加台據蜀叛,死于難,特贈推忠秉義效節功臣、資善大夫、中書右丞、上護軍,追封 五子,達者三人:野峻台,黃州路總管,次月魯,江浙行省理問官,伯忽,夔州路總管,天

孔思晦

蜀郡公,諡忠愍。

母 爲學未嘗懈,遠近爭聘爲子弟師。大德中,游京師,祭酒耶律有尚欲薦之,以母老,辭而歸。 長,授業於導江張甕,講求義理,於詞章之習,薄而弗爲。家貧,躬耕以爲養,雖劇寒暑,而 臥疾,躬進藥餌,衣不解帶。居喪,勺水不入口者五 孔 思晦字明道,孔子五十四世孫也。資質端重,而性簡默,童丱時,讀書已識大義。及 日。

思晦嫡長且賢,宜襲封爵,奉祠事。狀上政府,事未決。仁宗在位,雅崇尙儒道, 能 孔子之裔今幾世,襲爵爲誰。」廷臣具對曰:「未定。」帝親取孔氏譜牒按之,曰:「以嫡應襲 守 ·職,而思晦以儉約自將,敎養有法,比代去,學者皆不忍舍之。於是孔氏族人相與議: 至大中,舉茂才,爲范陽儒學教諭。延祐初,調寧陽學。 先是,兩縣校官率以廪薄不 一日,問:

封者, 思晦 也,復奚疑!」特授中議大夫,襲封衍聖公,月俸百緡,加至五百緡,賜 四品印。

晦復其 必愼。 聖父啓聖王,聖母王夫人。 思書院舊有營運錢萬緡,貸於民取子錢,以供祭祀,久之,民不輸子錢,幷負其本,思晦皆理 明 而 復之。 新之,祭器禮服,悉加整飭。 泰定三年,山東廉訪副使王鵬南言:「襲爵上公,而階止四品,於格 升嘉議大夫。 田,且請置尼山書院,以列于學官,朝廷從之。三氏學舊有田三千畝,占于豪民,子 初,廟燬于兵,後雖茍完,而角樓圍牆未備,思晦竭力營度,以復其舊。 聖父舊封齊國公,思晦言于朝曰:「宣聖封王,而父爵猶公,願加褒崇。」乃詔加封 至順二年,改賜三品印。思晦以宗祀責重,恒懼弗勝,每遇祭祀,必敬 又以尼山乃毓聖之地,故有廟,已毁,民冒耕祭田且 弗稱,且失尊崇意。」 金絲堂壞,又 百年,思

日, 族 晦 人,稽典故斥之,旣又重刻宗譜于石,而孔氏族裔益明矣。元統元年卒,年六十七。卒之 以爲:「不早辨則眞爲久益不可明,彼與我不共戴天,乃列于族,與共拜殿庭,可乎。」遂會 有鶴百餘翔其屋上,又見神光自東南落其舍北。 五 季 ,時,孔末之後方盛,欲以僞滅眞,害宣聖子孫幾盡,至是,其裔復欲冒稱宣聖後。思 至正中,朝廷加贈其官,而賜諡曰

子 日克堅,襲封衍聖公,階嘉議大夫,旣而進通奉大夫。 至正十五年,召爲同知太常禮

校勘記

[一] 速古兒[赤] 據危太樸續集卷二 |耶律希亮神道碑補。 按本書卷九九兵志, 掌內府尙供衣服者

日速古兒赤。蒙史已校。

[二] 十二年旣平宋 按元減宋在至元十三年。道光本改「十二年」作「十三年」。

(三) 令董文用讞之至董文用問大都近事 按本書卷九世祖紀至元十四年七月壬辰條及卷一四八董

俊傳附蓋文忠傳、「董文用」皆作「董文忠」、道光本改「用」爲「忠」。

列傳第六十七 校勘記

元史卷一百八十一

列傳第六十八

元明善

東使者薦爲安豐、建康兩學正。 穎悟絕,出讀書,過目輒記,諸經皆有師法,而尤深於春秋。弱冠游吳中,已名能文章。衙 元明善字復初,大名淸河人。其先蓋拓跋魏之裔,居淸河者,至明善四世矣。 明善資

于籍者,有司喜,欲滋蔓爲利,明善請火其籍以滅跡,二郡遂安。 王者之師,恭行天罰,小醜陸梁,戮其渠魁可爾,民何辜焉。旣又得賊所書讚、|吉民丁十萬 全活者百三十人。一月,將佐白:「宜多戮俘獲,及尸一切死者,以張軍聲。」明善固爭,以爲 丞,又辟爲省掾。 會<u>贛州</u>賊劉貴反,明善從<u>士</u>選將兵討之,擒賊三百人,明善議緩詿誤,得 辟掾行樞密院。時董士選僉院事,待之若賓友,不敢以曹屬御之。及士選陞江西左

坐免,久之,有爲辨白其事者,乃復掾省曹。 其直。後瑄敗,江浙行省籍其家,得金穀之簿,書「米三十斛送元復初」,不言以酬馬直,明善 (朱)[張]瑄爲其省參政,[1]明善有馬,駿而瘠,瑄假爲從騎,久益壯,瑄愛之,致米三十斛酬 陞掾南行臺。未幾,授樞密院照磨。轉中書左曹掾,掾曹無留事。始,明善在江西時,

之。書成,每奏一篇,帝必稱善,曰:「二帝三王之道,非卿莫聞也。」興聖太后旣受尊號,廷 臣請因肆赦,明善曰:「數赦,非善人之福,宥過可也。」 學士。詔節尚書經文,譯其關政要者以進。明善舉宋忠臣子集賢直學士文陞同譯潤,許 仁宗居東宮,首擢爲太子文學。及卽位,改翰林待制。與修成宗、順宗實錄,陞翰林直

以鈔萬二千錠分給之,曰:「擅命獲罪,所不辭也。」還,修武宗實錄,又陞翰林侍講學士,預 科舉、服色等事。 奉旨出賬山東、河南饑,時彭城、下邳諸州連數十驛,民餓馬斃,而官無文書賑貸,明善

讀,議廣廟制,陞翰林學士,修仁宗實錄。英宗親祼太室,禮官進祝册,請署御名,命明善代 擢參議中書省事,旋復入翰林爲侍讀,歲中拜湖廣行省參知政事。又召入集賢爲侍 改禮部尚書,正孔氏宗法,以宣聖五十(五)[四]世孫思晦襲封衍聖公, 日事上,制 延祐二年,始會試天下進士,明善首充考試官,及廷試,又爲讀卷官,所取士後多爲名

署者三,眷遇之隆,當時莫並焉。 至治二年,卒于位。 泰定間,贈資善大夫、河南行省左丞,

追封淸河郡公,諡曰文敏。

明善早以文章自豪,出入秦、漢間,晚益精詣,有文集行世。

將 如 飲,乃舉 還,復初宜更送我。」集還,明善送至二十里外,士選下馬入邸舍中,爲席,出橐中肴,酌酒同 下。 雷 漢 復初 「霆之震驚,鬼神之靈變」然後可,非性情之正也。」二人初相得甚驩,至京師,乃復不能相 以 復 董士選之自中臺行省江浙也,二人者俱送出都門外, 士選曰:「伯生以教導爲職, 當早 來先儒 初在江 論 與伯生,他日必皆光顯,然恐不免爲人構間。 初 酒屬明善曰:「土選以功臣子,出入臺省,無補國家,惟求得佳士數人,爲朝 他日,今隙已開矣。 摧折。 所嘗盡心者,考之殊未博。」集亦言:「凡爲文辭,得所欲言而止,必如明善云『若 西、金陵,每與虞集劇論,以相切劘。 今爲我飲此酒,愼勿如是。」 明善受巵酒,跪而 請公再賜一巵,明善終身不敢忘公言!乃再飲而 明善言:「集治諸經,惟朱子所定者耳,自 復初中原人也, 仕必當道, 伯 調之。 起立,言曰:「誠如公 別 生南· 廷用之,

其文,問 彈,吾 眞人吳全節,與明善交尤密,嘗求明善作文。 何如,集曰:「公能從集言,去百有餘字,則可傳矣。」明善卽泚筆屬集, 所欲知。 成季爲我治具,招伯生來觀之,若已入石,則無及矣。」明日,集至,明善出 旣成,明善謂全節曰:「伯生見吾文,必有 凡删

列

傅

字,而文益 精當。 明善大喜,乃驩 好 如 初。 集毎見明經之士,亦以明善之言告之。

明善一子,晦,蔭受峽州路同知,早卒。

虞集 弟槃 范梈

而假寐,夢一道士至前,牙兵啓曰:「南嶽眞人來見。」旣覺,聞甥館得男,心頗異之。 酒文仲女。 家,教授於諸生中,得孛朮魯翀、歐陽玄而稱許之,以翰林院編修官致仕。娶楊氏,國子祭 澄爲友,澄稱其文清而醇。 義,蜀人師尊之。 了翁,成都范仲黼、李心傳輩,講學蜀東門外,得程、朱氏微旨,著易詩書論語說,以發 虞集字伯生,宋丞相允文五世孫也。 咸淳間,文仲守衡,以汲從,未有子,爲禱於南岳。集之將生,文仲晨起,衣冠坐 祖臣,知連州,亦以文學知名。父汲,黃岡尉。宋亡,僑居臨川崇仁,與吳 嘗再至京師,贖族人被俘者十餘口以歸,由是家益貧。 曾祖剛簡,爲利州路提刑,有治績。 嘗與臨 晚稍 明 111 其 起 魏

<u></u>
近傳、歐蘇文,聞輒成誦。 比還長沙,就外傳,始得刻本,則已盡讀諸經,通其大義矣。 受業家庭,出則以契家子從吳澄遊,授受具有源委。 世以春秋名家,而族弟參知政事棟,明於性理 集三歲卽知讀書,歲乙亥,汲挈家趨嶺外,干戈中無書册可攜,楊氏口授論語、孟子、左 之學,楊氏在室,卽盡通其說,故集與弟燦,皆 文仲

左 丞董士選自江西除南行臺中丞,延集家塾。大德初,始至京師。以大臣薦,授大都

曰:「國學,禮義之所出也,此而不治,何以爲教」」仁宗在東宮,傳旨論集,勿竟其事,集以劉 祭殿上,有劉生者,被酒失禮俎豆間,集言諸監,請削其籍。 其 ,退,每挾策趨門下卒業,他館生多相率詣集請益。 學教 (授,雖以訓迪爲職,而益自充廣,不少暇佚。除國子助敎, 卽以師道自任, 諸生時 丁內艱,服除,再爲助敎,除博士。 大臣有爲劉生謝者,集持不可,

生

失禮狀上之,移詹事院,竟黜劉生,仁宗更以集爲賢。

後成 業,皆欲有所更張,以副帝意,集力贊其說。 古今因革治亂之由,拜住歎息,益信儒者有用 未幾,除太常博士,丞相拜住方爲其院使,問從集問禮器祭義甚悉,集爲言先王制作,以及 大成殿新賜登歌樂,其師世居江南,樂生皆河北田里之人,情性不相能,集親敎之,然 復請設司樂一人掌之,以俟考正。仁宗卽位,責成監學,拜臺臣爲祭酒,除吳澄司 有爲異論以沮之者,澄投檄去,集亦以病免。

官,猥以資格授,强加之諸生之上,而名之曰師爾,有司弗信之,生徒弗信之,於學校無益 也。 乃上議曰:「師道立則善人多,學校者, 士之所受敎, 以至於成德達材者也。 如此而望師道之立,可乎。下州小邑之士,無所見聞,父兄所以導其子弟,初無必爲學 朝 廷方以科舉取士,說者謂治平可力致,集獨以謂當治其源。 遷集賢修撰,因會議學 今天下學

列

妄爲奇論者,衆所敬服,而非鄉愿之徒者,延致之日,諷誦其書,使學者習之,入耳著心,以 問之實意,師友之游從,亦莫辨其邪正,然則所謂賢材者,非自天降地出,安有可望之理 者皆用矣,惟虞伯生未顯擢爾。」會晏駕,不及用。 正其本,則他日亦當有所發也。其次則取鄉貢至京師罷歸者,其議論文藝,猶足以聳動其 庶乎有所觀感也。其次則求夫操履近正,而不爲詭異駭俗者,確守先儒經義師說,而不敢 哉!爲今之計,莫若使守令求經明行修成德者,身師尊之,至誠懇惻以求之,其德化之及, 人,非若泛泛莫知根柢者矣。」六年,除翰林待制,兼國史院編修官,仁宗嘗對左右歎曰:「儒

持是說,故所取每稱得人。 其高者取之,不必先有主意,若先定主意,則求賢之心狹,而差自此始矣。」後再爲考官,率 欲使學者專門擅業,如近代五經學究之固陋也。聖經深遠,非一人之見可盡,試藝之文,推 初,考試禮部,言於同列曰:「國家科目之法,諸經傳注各有所主者,將以一道德、同風俗,非 之於蜀,不見,求之江西,又不見,集方省墓吳中,使至,受命趨朝,則拜住不及見矣。泰定 英宗卽位,拜住爲相,頗超用賢俊,時集以憂還江南,拜住不知也。乃言於上,遣使求

王結,執經以從。自是歲嘗在行,經筵之制,取經史中切於心德治道者,用國語、漢文兩進 泰定初,除國子司業,遷秘書少監。天子幸上都,以講臣多高年,命集與集賢侍讀學士 列傳第六十八 處集

舒疲民;

逐富民得官之志,而獲其用;

江海游食盜賊之類,皆有所歸。」

議定于中,

說者以爲 民欲得官者,合其衆分授以地,官定其畔以爲限,能以萬夫耕者,授以萬夫之田,爲萬夫之 得以傳子孫,如軍官之法。則東面民兵數萬,可以近衞京師,外禦島夷,遠寬東南海運,以 之高下,定額於朝廷,以次漸征之,五年,有積蓄,命以官,就所儲給以祿,十年,佩之符印, 長,千夫、百夫亦如之,察其惰者而易之。一年,勿征也,二年,勿征也,三年,視其成,以地 北 爲實,竭民力以航不測,非所以寬遠人而因地利也。與同列進曰:「京師之東,瀕海數千里, 及一,則未嘗不退而竊歎焉。拜翰林直學士,俄兼國子祭酒,嘗因講罷,論京師恃東南運糧 讀,潤譯之際,息夫陳聖學者未易於盡其要,指時務者尤難於極其情,每選一時精於其學者 爲之,猶數日乃成一篇,集爲反覆古今名物之辨以通之,然後得以無忤,其辭之所達,萬不 極 有此制,則執事者必以賄成,而不可爲矣。事遂寢。其後海口萬戶之設,大略宗之。 遼海,南濱青、齊,萑葦之場也,海潮日至,淤爲沃壤,用浙人之法,築堤捍水爲田,聽富

籍而 急於近效,則怨讟興焉。 郡自便,帝曰:「爾材何不堪,顧今未可去爾。」除奎章閣侍書學士。時關中大饑,民枕 死,有方數百里無孑遺者,帝問集何以救關中,對曰:「承平日久,人情宴安,有志之士, 文宗在潛邸,已知集名,旣卽位,命集仍兼經筵。嘗以先世墳墓在吳、越者,歲久湮沒, 不幸大菑之餘,正君子爲治作新之機也,若遣一二有仁術、知民事

以報朝廷者。」左右有曰:「虞伯生欲以此去爾。」遂罷其議。有敕諸兼職不過三,免國子 畎畝,薄征斂,招其傷殘老弱,漸以其力治之,則遠去而來歸者漸至,春耕秋斂,皆有所助, 者,稍寬其禁令,使得有所爲,隨郡縣擇可用之人,因舊民所在,定城郭,修閭里,治溝洫,限 將見出於空虛之野矣。」帝稱善。因進曰:「幸假臣一郡,試以此法行之,三五年間,必有 一二歲間,勿征勿徭,封域旣正,友望相濟,四面而至者,均齊方一,截然有法,則三代之民,

者多,乃與大學士忽都魯都兒迷失等進曰:「陛下出獨見,建奎章閣,覽書籍,置學士員,以 以「勸親親,體羣臣,同一風俗,協和萬邦」爲問,帝不用。集以入侍燕閒,無益時政,且娼嫉 其於致理之道,生而知之,朕早歲跋涉難阻,視我祖宗,旣乏生知之明,於國家治體,豈能周 備顧問。臣等備員,殊無補報,竊恐有累聖德,乞容臣等辭職。」帝曰:「昔我祖宗,睿智聰明, 故立奎章閣,置學士員,以祖宗明訓、古昔治亂得失,日陳於前,卿等其悉所學,以輔朕 若軍國機務,自有省院臺任之,非卿等責也。其勿復辭。」 時宗藩睽隔,功臣汰侈,政教未立,帝將策士於廷,集被命爲讀卷官,乃擬制策以進,首

集言:「禮部尚書馬祖常,多聞舊章,國子司業楊宗瑞,素有曆象地理記問度數之學,可 有旨采輯本朝典故,做唐、宋會要,修經世大典,命集與中書平章政事趙世延, 同任總

舉治書侍御史馬祖常自代,不報。 以國書脫卜赤顏增修太祖以來事蹟,承旨塔失海牙曰:「脫卜赤顏非可令外人傳者。」遂皆 百司所具事蹟參訂。翰林院臣言於帝曰:「實錄,法不得傳於外,則事蹟亦不當示人。」又請 舍人王士點,俱有見聞,可助撰錄。庶幾是書早成。」帝以嘗命修遼、金、宋三史,未見成績, 共領典,翰林修撰謝端、應奉蘇天爵、太常李好文、國子助教陳旅、前詹事院照磨宋褧、通事 · 大典令閣學士專率其屬爲之。 俄世延歸,集專領其事,再閱歲,書乃成,凡八百帙。 旣上進,以目疾丐解職,不允,乃 旣而以累朝故事有未備者,請以翰林國史院修祖宗實錄時

不樂。 未嘗少變。一日,命集草制封乳日夫爲營都王,使貴近阿(營)〔榮〕、(巙巙)[巎巎]傳旨。〔三〕 以間之。旣不效,則相與摘集文辭,指爲譏訕,賴天子察知有自,故不能中傷,然集遇其人, 有感悟,承顧問及古今政治得失,尤委曲盡言,或隨事規諫,出不語人,諫或不入,歸家悒悒 典册咸出其手,故重聽其去。集每承詔有所述作,必以帝王之道、治忽之故,從容諷切,冀 醫。」帝怒曰:「一虞伯生,汝輩不容耶」帝方嚮用文學,以集弘才博識,無施不宜,一時大 二人者,素忌集,繆言制封營國公,集具藁,俄丞相自榻前來索制詞甚急,集以藁進,丞相愕 御史中丞趙世安乘間為集請曰:「虞伯生久居京師,甚貧,又病目,幸假一外任,便 家人見其然,不敢問其故也。時世家子孫以才名進用者衆,患其知遇日隆,每思有

然問 .故,集知爲所給,卽請易藁以進,終不自言,二人者愧之。 其雅量類如此。

才,然 帖穆爾太子,用至大故事,召諸老臣赴上都議政,集在召列。祖常使人告之曰:「御史有言。」 集署,集固拒之,祖常不樂而罷。文宗崩,集在告,欲謀南還,弗果。 所喜,祖常爲御史中丞,伯璲游其門,祖常亟稱之,欲集爲薦引,集不可,曰:「是子雖小有 於 乃謝病歸臨川 經者,文雖善,不與也。雖以此二者忤物速謗,終不爲動。光人龔伯璲,以才俊爲馬祖常 論 [非遠器,亦恐不得令終。」]祖常猶未以爲然。一日,邀集過其家,設宴,酒半,出薦牘求 薦 人材,必先器識,心所未善,不爲牢籠以沾譽,評議文章,不折之於至當不止,其詭 幼君崩,大臣將立妥歡

知人。 篤 宗在日,素謂太子非其子,黜之江南,驛召翰林學士承旨阿隣帖木兒、奎章閣大學士忽都魯 體之人,御史亦不敢斥言其事,意在諷集速去而已。 爾實書其事于脫卜赤顏,又召集使書詔,播告中外。 初,文宗在上都,將立其子阿刺忒納答刺爲皇太子,乃以妥歡帖穆爾太子乳母夫言,明 伯璲後以用事敗,殺其身,世乃服集 時省臺諸臣,皆文宗素所信用、同功

錫 動舊、侍臣。 元 一統二年,遣使賜上尊酒、金織文錦二,召還禁林,疾作不能行,屢有敕,即 有以舊詔爲言者,帝不懌曰:「此我家事,豈由彼書生耶」至正八年五月己 家撰文,褒

未,以病卒,年七十有七。官自將仕郎,十二轉爲通奉大夫。贈江西行中書省參知政事、護

軍,封仁壽郡公。

未嘗有所附麗,集議中書,正言讜論,多見容受,屢以片言解疑誤,出人於濱死,亦不以爲 妹,具有恩意。山林之士知古學者,必折節下之,接後進,雖少且賤,如敵己。 孤, 無異己子。兄乐,以筦庫輸賦京師,虧數千緡,盡力營貸代償之,無難色。 張珪、趙世延尤敬禮之,有所疑必咨焉。 集孝友,方二親以故家令德,中遭亂亡,僑寓下邑,左右承順無違。 弟槃,早卒,敎育其 當權門赫奕, 撫庶弟,嫁孤

嘗苟作。南昌富民有伍眞父者,貲產甲一方,娶諸王女爲妻,充本位下郡總管。旣卒,其子 之入,還以爲賓客費,雖空乏弗恤也。 屬豐城士甘慤求集文銘父墓,奉中統鈔五百錠準禮物,集不許,慇愧歎而去。 其束脩羔雁 家素貧,歸老後食指益衆,登門之士相望於道,好事爭起邸舍以待之。然碑板之文,未

太原元好問中州集遺意,別爲南州集以表章之,以病目而止。平生爲文萬篇,藁存者十二 曆乾淳風烈。嘗以江左先賢甚衆,其人皆未易知,其學皆未易言,後生晚進知者鮮矣,欲取 早歲與弟樂同闢書舍爲二室,左室書陶淵明詩於壁,題曰陶庵,右室書邵堯夫詩,題曰 集學雖博洽,而究極本原,研精探微,心解神契,其經緯彌綸之妙,一寓諸文,藹然慶

列

邵庵,故世稱邵庵先生。

世。 國學諸生若蘇天爵、 子四人,安民,以廕歷官知吉州路安福州。游其門見稱許者,莆田陳旅,旅亦有文行 王守誠輩,終身不名他師,皆當世稱名卿者。其交游尤厚者,曰

槃字仲常,延祐五年第進士,授吉安永豐丞。丁父憂。除湘鄉州判官,頗稱癖古。

富民殺人,使隸己者坐之,上下皆阿從,槃獨不署,殺人者卒不免死,而坐者得以不冤

絡內外,果將爲變者,同僚皆不敢出視,曰:「君自爲之。」「槃乃斷巫幷其黨如法,一時吏民始 槃皆赴救,至達晝夜,告者數十,寢食盡廢,縣長吏以下皆迎巫至家,厚禮之。又曰:「將有 服儒者爲政若此。秩滿,除嘉魚縣尹,槃已卒。 至,鞫之,無敢施鞭箠者,槃謂卒曰:「此將爲大亂,安有神乎」」急治之,盡得黨與數十人,羅 大水,且兵至。」州大家皆盡室逃,燦得劫火卒一人,訊之,盡得巫黨所爲,坐捕盜司,召巫 有巫至其州,稱神降,告其人曰:「某方火。」卽火。又曰:「明日某方火。」民以火告者,

已歎其有識。詩、書、春秋皆有論著,而春秋乃其家學,故尤善。讀吳澄所解諸經義,輒得 槃幼時,嘗讀柳子厚非國語,以爲國語誠可非,而柳子之說亦非也,著非非國語,

其旨趣所在,澄亟稱之。

疑似之間不能深知,而欲竊究夫性命之原、死生之故,其不折而歸之者寡矣。 僧在坐,輒不入竟去,其爲人方正有如此,雖集亦嚴憚之。 兄崽,接方外士,必扣擊其說,嘗以爲聖人之敎不明,爲學者無所底止,苟於吾道異端 然不幸年不及艾而 卒。 槃不然,聞諸

節,竭力以養親,出則假陰陽之技,以給旅食,耽詩工文,用力精深,人罕知者。 穎 異,所誦讀,輒記憶,雖癯然淸寒若不勝衣,於流俗中克自樹立,無苟賤意。 范梈字亭父,一字德機,清江人。家貧,早孤,母熊氏守志不他適,長而敎之。 居 則 梈天資 固窮守

御 官。 理 史臺 冤滯甚衆。 篇述其弊,廉訪使取以上聞,皆罷遣之,其弊遂革。 秩滿,御史臺擢海南海北道廉訪司照磨,巡歷遐僻,不憚風波瘴癘,所至興學教民, 年三十六,始客京師,卽有聲諸公間,中丞董士選延之家塾。 又改擢 遷江西湖東,長吏素稱嚴明,於僚屬中獨敬異之。 福建閩海道知事。閩俗素污,文繡局取 良家子爲繡工,無別尤甚,梈作歌詩 以朝臣薦,爲翰林院編修 選充翰林(供)[應]奉。[四] 雪

年 十月,亦以疾卒,年五十九。 未幾,移疾歸故里。 天曆二年,授湖南嶺 所著詩文多傳於世。 北道廉訪司經歷,以養親辭。 是歲,母喪。

列傳第六十八 處集

明

「若亭父,可謂特立獨行之士矣。」爲文志其墓,以東漢諸君子擬之。 身廉 正,居官不可干以私,疏食飲水,泊如也。 吳澄以道學自任,少許可,

揭傒斯

懈,父子自爲師友,由是貫通百氏,早有文名。 以從妹。 人,見之驚曰:「他日翰苑名流也。」程鉅夫、盧擊,先後爲湖南憲長, [E] 咸器重之,鉅夫因妻 揭傒斯字曼碩,龍興富州人。父來成,宋鄉貢進士。傒斯幼貧,讀書尤刻苦,晝夜不少 大德間,稍出游湘、漢, 湖南帥趙洪, 雅 號 知

閑習,集賢學士王約謂:「與傒斯談治道,大起人意,授之以政,當無施不可。」 班照到傳,嘆曰:「是方可名史筆,若他人,直謄吏牘爾。」 升應奉翰林文字, 子助敎,復留爲應奉。 延祐初,鉅夫、擊列薦于朝,特授翰林國史院編修官。 時平章李孟監修國史,讀其 南歸省母,旋復召還。傒斯凡三入翰林,朝廷之事,臺閣 仍兼編修, 之儀, 所撰 遷 國

政要策以示臺臣,曰:「此股授經郎揭曼碩所進也。」其見親重如 對稱旨,恒以 字呼之而 不名。 毎中書奏用儒 臣,必問曰:「其材何如揭曼碩。」問出所上太平 此。

,

首擢爲授經郎,以敎勳戚大臣子孫。

文宗時幸閣中,有所咨訪,奏

天曆初,開奎章閣

以 責民之受役於官者代輸,民多以是破產。 獻,歲課自四 富州 ·地不產金,官府惑於姦民之言,爲募淘金戶三百,而以其人總之,散往他郡, 兩累增至四十九兩。 其人旣死,而三百戶所存 中書因傒斯言,遂蠲其征,民賴以甦,富州 無什一,又貧不聊生,有 人至今 采金 司遂

踰累月。 先是,儒學官赴吏部銓者,必移集賢,考較其所業,集賢下國子監,監下博士,東文淹稽,動 久,命賜以諸王所服表裏各一,躬自辯識以授之,遷翰林待制,陞集賢學士,階中 丞,參檢校書籍事,且屢稱其純實,欲進用之,會文宗崩而止。 與修經世大典, 傒斯請更其法,以事付本院屬官,人甚便之。 文宗取其所撰憲典讀之, 顧謂近臣曰:「此豈非唐律乎」,特授藝文監 元統初, 韶對 便殿, 順 慰諭良

數也。 其言往往 同 天子親擢爲奎章閣供奉學士,乃卽日就道,未至,改翰林直學士,及開經筵,再陞侍講 知經筵 奉旨祠北嶽 經筵無專官,曰領曰知,多宰執大臣,故微辭奧義,必屬傒斯(討)[訂]定而後進,[云] 事,以對品進階中奉大夫。 寓獻替之誠,務以裨益治道。 、濟瀆、南鎭,便道西還,時秦王伯顏當國,屢促其還,傒斯引 時新格超陞不越二等,獨傒斯進四等, 天子嘉其忠懇,數出金織文段以賜。 轉 疾固辭。 九階, 學士、 蓋異

至正三年,年七十,致其事而去,詔遣使追及于漷南。 尋復奉上尊諭旨,還撰明宗

列

傳

第六

+

八

揭傒斯

時,而 舊 恨 大 。神 臣 銅錢,以救 不 ,文成,賜楮幣萬緡、白金五十兩,中宮賜白金亦如之。 面 用之於 然,何益之有!丞相 諭 册 行,傒斯曰:「使揭傒斯有一得之獻,諸公用其言而 鈔法之弊。」執 周密庶務之後,則無失材廢事之患矣。」一日,集議朝堂,傒斯抗言:「當 政言不可,傒斯持之益力,丞相雖稱其不 因問:「方今政治何先。」傒斯曰:「儲材爲先,養之於位望未隆之 求去,不許,命丞相脫脫及執政 天下蒙其利,雖 阿,而 竟莫行 死于 其言 1兼行新 ,此,何 也。

六年,制 宴史局,以傒斯 成 公;至於物論 必 以 問 文章 金、宋二 心 術 詔 爲 修 而 不 贈護軍,追封豫章郡公,諡曰文安。 本 遼、金、宋三史,傒斯 不 史。 也。」且與僚屬言:「欲求作史之法,須求作史之意。古人作史,雖 知史事者,不可與,有學問文章知史事而心術不正者,不可與。用 之不齊,必反覆辨論,以求歸於至當而後 何以示懲勸」」由是毅然以筆削自任,凡政事 故,改宴日,使者以聞,帝爲嗟悼,賜楮幣萬緡,仍給驛舟,護送其 傒斯留宿史館,朝夕不敢休,因得寒疾,七日卒。 與爲總裁官,丞相問:「修史以何爲本?」曰:「用人爲本,有學 有勳 爵 而 追。 無官階者,有司 四年,遼史成,有旨獎諭 得失,人材賢否,一律以是非之 時方有使者至自上京,錫 失之也。 小善必錄,小惡 人之道,又當 喪歸江 ,仍督早

親 未嘗享是也。」故平生清儉,至老不渝。 傒斯 少 處窮約,事親菽水粗 具而 必得 其歡 友于兄弟,終始無間言。 心,暨有祿入,衣食稍踰 立朝雖居散地,而急於 於前,輒愀然曰:「吾

整,語簡而當,詩尤清婉麗密,善楷書、行、草。朝廷大典册,及元勳茂德當得銘辭者,必以 薦士,揚人之善惟恐不及,而聞東之貪墨病民者,則尤不曲爲之揜覆也。 殊方絕域,咸慕其名,得其文者,莫不以爲榮云。 爲文章,敍事嚴

美元 「柳貫」「中」 「吳萊」「公

黃溍字晉卿,婺州義烏人。母童氏,夢大星墜于懷,乃有娠,歷二十四月始生**溍**。 溍生

而俊異,比成童,授以書詩,不一月成誦。迨長,以文名於四方。

寃。 有後母 決,潛爲之疏剔,以其獄上,論之如本條,免死者十餘人。 戶隸漕司及財賦府者,亦謂各有所憑,橫暴尤甚。潛皆痛繩以法,吏以利害白,弗顧 惡少年名在盜籍者,而謀爲劫奪,未行,邑大姓執之,圖中賞格,初無獲財左驗,事久不 中延祐二年進士第,授台州寧海丞。 與僧通而耽殺其父者,反誣民所爲,獄將成,潛變衣冠陰察之,具知其姦僞,卒直其 縣地濒鹽場,亭戶恃其不統於有司,肆毒害民,編 也。民

偽鈔鈎結黨與、脅攘人財,官若吏聽其謀,挾往新昌、天台、寧海、東陽諸縣,株連所及數百 于官,而責足于民。 遷兩浙都轉運鹽使司石堰西場監運,改諸暨州判官。 有餘,則總其事者私焉。潛撙節浮蠹,以餘錢還民,驩呼而去。奸民以 巡海官舸,例以三載一新 費出

列

傳

錢 盜 家,民受禍至慘。 唐 宜傅重 縣 獄 議,持偽文書來者又非州民,俱械還錢唐,誣者自明。 ,游民賂獄吏私縱之,假署文牒,發其來爲向導,逮捕二十餘家。潛訪得其情,以正 郡府下潛鞫治,潛一問,皆引伏,官吏除名,同謀者各杖遣之。 有盜繫於

位 師 合東 道 自尊,輕納 入 坐 爲 而 應奉翰林文字、同知制誥,兼國史院編修官,轉國子博士,視弟子如朋交,未始以 西向,學官或議分置於左右,同列不敢爭,潛獨面折之,事乃 人拜,而來學者滋益恭,業成而仕,皆有聞于世。 時欲增設禮殿配位 此。 四,配

夫、江西等處行中書省參知政事、護軍,追封江夏郡公,諡曰文獻。 爲前官。 事 講 俄 者三十有二,帝嘉其忠,數出金織紋段賜之。陞侍講學士、知制誥同修國史、同 以 階自 秘 出 書 爲 **外之**, 將仕郎 少監致仕,未幾,落致仕,除翰林直學士、知制誥同修國史。 江浙等處儒學提舉。潛年始六十七,不俟引年,亟上納祿侍親之請,絕江徑歸。 始得謝南還,優游田里間,凡七年,卒於繡湖之私第,年八十一。 七轉至中奉大夫。 游上章求歸,不俟報而行,帝聞之,**遣使者追還京師**,復 尋兼經筵官,執經進 贈 中奉大 知經筵

或弦急霆震,若未易涯涘,一旋踵間,煦如陽春。 附,足不 晋 天資介特,在州縣唯以清白爲治,月俸弗給,每鬻產以佐其費。 登鉅公勢人之門,君子稱其淸風高節,如冰壺玉尺,纖塵 潛之學,博極天下之書,而約之於至精,剖 虚弗污。 及升朝行,挺立無所 然剛中少容,觸物

可犯。 切,俯仰雍容,不大聲色,譬之澄湖不波,一碧萬頃,魚鼈蛟龍,潛伏不動,而淵然之光,自不 析經史疑難,及古今因革制度名物之屬,旁引曲證,多先儒所未發。 所著書,有日損齋藁三十三卷、義烏志七卷、筆記一卷。同郡柳貫、吳萊皆浦陽 文辭布置謹嚴,援據精

卷、金石竹帛遺文十卷。年七十三卒。 集、豫章揭傒斯齊名,人號爲儒林四傑。所著書,有文集四十卷、字系二卷、近思錄廣輯三 容,涵肆演迤,人多傳誦之。始用察舉爲江山縣儒學教諭,仕至翰林待制。 老,好學不倦。 貫字道傳,器局凝定,端嚴若神。 凡六經、百氏、兵刑、律曆、數術、方技、異敎外書,靡所不通。作文沉鬱春 嘗受性理之學於蘭溪金履祥,必見諸躬行,自幼至 與溍及臨 JII 虞

經目,輒成誦,嘗往族父家,日易漢書一帙以去,族父迫扣之,萊琅然而誦,不遺一字,三 | 萊字立夫,集賢大學士直方之子也,輩行稍後於貫、潛。 天資絕人,七歲能屬文,凡書

易他編,皆如之,衆驚以爲神。

秋世變圖二卷、春秋傳授譜一卷、古職方錄八卷、孟子弟子列傳二卷、楚漢正聲二卷、樂府 延祐七年,以春秋舉上禮部,不利,退居深裊山中,益窮諸書奧旨,著尚書標說六卷、春

列傳第六十八 黃溍

類編一 百卷、唐律删要三十卷、文集六十卷。 他如詩傳科條、春秋經說、胡氏傳證誤,

脫藁。

亂。」聞者服之。

度所縛,舉眼之頃,千變萬化,坐作進退擊刺,一時俱起,及其欲止,什伍各還其隊,元不曾 | 萊尤喜論文,嘗云:「作文如用兵,兵法有正、有奇,正是法度,要部伍分明,奇是不爲法

史薦,調長薌書院山長,未上,卒,年僅四十有四,君子惜之。 人所作,實非今世之士也。 **|貫平生極愼許與,每稱萊爲絕世之才。|潛晚年謂人曰:「萊之文,嶄絕雄深,類溱、漢間** 吾縱操觚一世,又安敢及之哉!」其爲前輩所推許如 私諡曰淵穎先生。 此。 | | | | | | | | |

校勘記

(朱)[張]瑄 從道光本改。 按朱清、張瑄同開海運、此處誤「張」爲「朱」。

五十(五) [四] 世孫思晦 道光本與本書卷一八〇孔思晦傳及元文類卷六七馬祖常元明善神道

碑合、從改。

四校勘記二〕。

阿(營)[榮](變變)[變變] 「營」字誤,從道光本改。按本書卷一四三有阿樂傳。「巎巎」,見卷三 記

奉而無「供奉」。

万五 樸集卷二程鉅夫神道碑銘所載同。黃金華集卷二六揭傒斯神道碑云程鉅夫、盧擊「前後持湖北 程鉅夫盧摯先後爲湖南憲長 本書卷一七二程鉅夫傳有「遷江南湖北道肅政廉訪使」,與危太

使者節」。疑此處「南」爲「北」字之誤。

[八](計)[訂]定而後進 從北監本改。黃金華集卷二六揭溪斯神道碑作「訂」。

[八] [吳萊] 據本書體例補。

〔柳貫〕

據本書原目錄補。

万<u>人</u>卷一百八十二

列傳第六十九

張起巖

府事,生東昌錄事判官鐸,鐸生四川行省儒學副提舉範,範生起巖。初,其母丘氏有娠,見 歸於太祖,始終能效忠節,迪與其子福,實先後羽翼之。福仕爲濟南路軍民鎭撫兵鈴轄,權 家濟南。當金之季,張榮據有章丘、鄒平、濟陽、長山、辛市、蒲臺、新城、淄州之地,歲丙戌, 張起巖字夢臣。其先章丘人,五季避地禹城。高祖迪,以元帥右監軍權濟南府事,徙

選,除同知登州事,特旨改集賢修撰,轉國子博士,升國子監丞,進翰林待制,兼國史院編修 允,其民相率曰:「若得張敎諭爲眞縣尹,吾屬何患焉。」政成,遷安丘。中延祐乙卯進士,首 幼從其父學,年弱冠,以察舉爲福山縣學教諭, 值縣官捕蝗,移攝縣事,久之,聽斷明 長蛇數丈入榻下,已忽不見,乃驚而誕起巖。

按劾 官。 事。 禮 中書右 何謂 相 部 倒 尚書。 且世 丁內艱 法 百官、論列 刺 司 祖宗耶」章三上,不報。 沙 員 皇建臺閣,廣言路,維持治體,陛下卽位詔旨,動法祖宗。 疾其摧 外郎,進左司郎中,兼經筵官,拜太子右贊善。丁外艱,服除,改燕王府司馬,拜 ,服除選爲監察御史。 朝政,職使然 辱 同 列, 悉誣臺臣罔上,欲置之重辟。 也。 起巖廷爭愈急,帝感悟,事乃得釋,猶皆坐罷 今以奉職獲戾,風紀解體,正直結舌,忠良寒心,殊非盛世 中書參政楊廷玉以墨敗,臺臣奉旨就廟堂逮之下 起巖以新除留臺,抗章論 今臺臣坐譴,公論杜塞, **免還鄉里**。 曰:臺 吏。 遷 丞 臣

未立,人情危疑,不亟誅此人,以杜奸謀,慮妨大計。」 言部使者謀不軌,按問皆虛,法司謂:「唐律,告叛者不反坐。」起巖奮謂同列 中所 學士、知制 書方列坐銓選,起巖薦一 親。 文宗親郊,起巖充大禮使,導帝陟降,步武有節,衣前後襜如,陪位百官,望之如古圖 帝甚嘉之,賜賚優渥。 語兼修國史, 修三朝實錄, 士可用,丞相不悅,起巖卽攝 轉參議中書省事。 加 同 知經筵事 寧宗崩,燕南俄起大獄,有妄男子上變, 趣有司具獄,都 衣而起,丞相以爲忤己。 人肅然,大事尋定。 曰:「方今嗣君 遷翰林侍講 中

江南行臺侍御史,召入中臺,爲侍御史。 御史臺奏除浙西 廉訪使,不允。 已而 轉燕南廉訪使。 擢陝西行臺侍 海史。 搏擊豪强,不少容貸,貧民賴以吐 將行,復留爲侍講 學 士。 拜

逐息 氣。 (性里) [里怯] 滹沱 陞 江 河 南 水 不 爲 行 花,(三 眞定 臺御史 害,起巖 中 爲臺臣 ·丞, 論封河神爲侯爵,而移文責之,復修其 所糾,去位。 拜翰林學士 一承旨、 未幾 再 知制 入 相 誥 諷 兼修 詞 或 臣言臺章之非, 史、 、隄防, 知經 筵 瀹 事。 其湮欝, 起巖執 右 丞 水 相 別 患

聞者 出之。 俄拜 御史中 丞,論事 ·剴直 一,無所顧忌,與 上官多不合。

雅 典故,宋 巧理 詔 致 修 自足。 儒 遼、 道學源 金、宋三史,復命入 史成,年始六十有 委,尤多究心, 翰林 史官有露才自是者, 五,遂上疏乞骸骨以 爲承旨, 充總裁官, 歸 毎 後 立言未當, 積階至榮祿 四年卒。 起巖 大夫。 諡 日 據 [文穆 理 起巖熟於 鼠 定深 金源 厚 醇

背 舉 性 剛 孝友 親 不不 鄉 屹 族 起巖 受 沸克 若 人 小 面 籠絡, 泰山 處 葬者二 如紫瓊,美髯方頤,而 窮 一不可 約, 如 十餘喪, 歐 下 回 陽修, 帷教 奪。 授, 且 或時 名聞 買田 躬 眉 四 面 致米 以給其祭。 裔 折 目清揚 人,面頸發赤,不少恕, 百 安南修貢,其陪臣 里外 可觀,望 , 凡獲俸賜, 以養父母 而 知 爲雅量君子。 無弟 必與故 . 致其世子之辭,必 廟堂憚之。 如石 人賓客共之。 ,敎之宦學,無不 及其臨政 識者謂其 候起巖 卒之日,廩 決議,意所 外 備 起居。 和 至。 中

孫降生於 先 是,至元乙 儒 州 酉三月乙亥, 是夜, 起巖 亦 太史奏文昌星明, 生。 其後皇孫踐祚,是爲仁宗,始詔設科 文運將興。 時世祖 行 幸上京 取 ~,明 及廷試, Ħ 丙子, 起

無餘

粟

家

無餘

財

列

{集 巖 各若 逐 爲第 干卷,藏于家。 論者 以 為非偶 子二人:琳、琛。 然也。 起巖博學有文,善篆、隸,有華峯漫藁、華峯類藁、金陵

歐陽玄

洛諸儒 下 異 瀏 見,命賦 日 、筆輒成章,每試庠序,輒占高等。 記 陽 日當以文章冠世,廊廟之器也。」言訖 數千言,卽知屬文。 歐陽玄字原功,其先家廬陵,與文忠公修同所自出。 源 (梅花詩,立成十首,晚歸,增至百首,見者駭異之。 年十四, 益從宋故老習爲詞章 幼岐嶷,母李氏,親授孝經、論語、小學諸書,八歲能成誦, 委,尤爲淹貫 十歲,有黃冠師注目視玄,謂貫之曰:「是兒神氣凝遠,目光射 弱冠,下帷數年,人莫見其面,經史百家,靡不研究,伊、 而去,亟追與語,已失所之。 至曾大父新,始遷居瀏陽,故玄爲 部使者行縣,玄以諸生 始從鄉先 生張 貫之學,

蠻獠雜| 從良。 太平路蕪湖 延祐 居, 貢賦 元 撫字稍乖, 微發 縣 年,詔設科取士,玄以尚書與貢。明年,賜進士出身,授岳州路平江 尹 及時, 縣多疑獄,久不決,玄察其情,皆爲平翻。 輒弄兵犯順。 民樂趨事, 教化大行, 飛蝗 玄至踰月, 赤水、 獨不 入境。 太清兩洞聚衆相攻殺, 豪 改武 右不法 岡 縣 虐其 尹 驅 縣控 官曹相顧失 州 奴, 同 制 玄斷之 知 溪 洞 調

之,情有弗堪,乃發憤就死耳。 名,棄兵仗,羅拜馬首曰:「我曹非不畏法,緣訴某事於縣,縣官不爲直, 反以徭役橫斂掊克 色,計無從出。 玄卽日單騎從二人,徑抵其地諭之。 不意煩我淸廉官自來。」玄喻以禍福,歸爲理其訟,獠 至則死傷滿道,戰鬪未已。 僚人熟玄

院,又置藝文監隸焉,皆選淸望官居之。文宗親署玄爲藝文少監,奉詔纂修經世大典,陞太 監、檢校書籍事 儲、肆赦之文,皆經撰述。 領印攝院事,日直內廷,參決機務,凡遠近調發,制詔書檄。 召爲國子博士,陞國子監丞。 復條時政數十事,實封以聞,多推行之。明年, 致和元年,遷翰林待制,兼國史院編修官。 旣而改元天曆,郊廟、建后、立 初置奎章閣學士 時當兵興,玄

者, 拜翰林學士, 都議事,陞侍講學士,復兼國子祭酒。重紀至元五年,足患風痹,乞南歸以便醫藥,帝不允。 士,以疾未行 集議 元統元年,改僉太常禮儀院事,拜翰林直學士,編修四朝實錄,俄兼國子祭酒,召赴中 廷中,玄極言無隱,科目之復,沮者尤衆,玄尤力爭之。未幾南歸,復起爲翰林學 未幾, 懇辭去位,帝復不允,**免其行朝賀禮。**至正改元,更張朝政,事有不便

詔修遼、金、宋三史,召爲總裁官,發凡舉例,俾論撰者有所據依, 史官中有悻悻露才、

列

傳

不獲 入奏, 給俸賜 乃上休致之請,作南山 筆。 論 議 命 不 五 上稱 公者 年 以 奉敕 終 帝 快 其身。 者 以 玄 定 再 玄 不 國 = 歷仕 以 一律,尋乞致仕, 將行,帝復降旨 口 隱居,優游 已而 |累朝 舌爭 ,俟其 了,且有修三史功,諭旨 乞致仕,帝復不允。御史臺奏除福建廉訪使,行 呈藁,援筆竄定之,統系自正。 陳情 山水之間 不允,仍前 懇切,乃特 翰林 有終焉之志。 丞相,超授爵秩 授 學士承旨,進階光祿 湖廣行 中 復拜翰林學 書省右丞 至於 ,逐擬拜翰林學士承旨。及 論 大夫 一致仕 士承 贊、表、奏,皆玄 次浙 一, 賜 旨 西 玄 白 疾疾 屢力 玉束帶、 復作, 屬

教里 府。 不 能 之寓 用。 玄 + 久 四 十 舍 病,不能 年 年 七年春,乞致仕,以 汝潁 八 + 步 盜起,蔓延南北 履, 五. 丞相 中書以聞,帝賜賻甚厚,贈崇仁昭德推忠守正 傳旨,肩輿至延春閣 中 州 原道梗,欲由 、縣幾無完城。 蜀還鄉, F 玄獻招 ·,實異數也。 帝復 捕之策 不允。 是歲十二月戊戌, 千 時將. ·餘言, 功臣、大司徒、柱國 大赦 整整 天下, 可 行, 卒於 宣 當 赴 崇 時 內

追封楚國公,諡曰文。

虛 兩 任 歲 成 知 均,而 貢 玄 舉 性 海內名山 度 ·及讀卷官,凡宗廟 兩 雍容、 爲祭酒,六入翰林, 大川, 一含弘縝密,處己 釋、 朝廷雄文大册、播告萬 老之宮,王公貴人墓隧之碑,得玄文辭以爲榮。 而三拜承旨。 一儉約,爲政廉 平,歷官四十餘年,在朝之日 修實 方制 錄、大典、三史,皆 誥, 多出 玄手。 1大製 金繒 作。 片言隻字,流 ,殆四之三。 上尊之賜 屢主文衡, 幾 傳 無

達老後, 人 間 成成 復先玄卒。 知寶 重。 文章道德,卓然名世。 有 圭齋文集若干卷傳于世 羽儀斯文, 贊衞治具, 與有 功焉 这無子,以

許 有壬

避,棄孩 {碑, 村疃,唯 未上,辟山北 而 釋 文近 其 許 罪,州遂 有 製滿 給 千言, 壬 信牌,令執 字 廉 道 可用,其先世 大治 訪 上,有壬 一覽輒 司 書 里役者 吏。 背 獨 誦 率弓箭手,閉 無遺。 擢 居 呼 延祐 潁 之,民安而 ,後徙湯陰。 二年進士第, 年二十,暢師 城 門 事 以守, 集。 有壬 文薦 授同 右 一幼穎 卒獲 族貪虐者懲之, 入 知 翰 悟,讀 無虞。 遼州 林 不 事。 書 州 報,授開寧路 會關 有 目 寃獄 追逮 五行,嘗閱衡州淨居院 中 有警, 雖有成案, 不許胥隸 學 鄰 正 州 陸 皆平 聽民 足 一教授, 跡 翻 至 出

悉擒 行 無全膚,迄莫 日 部 至 廣 治 百 六年己未,除 餘 以 東 法, 人 以貪 部 能 好 一墨 劾 償 謙 內 肅 恐 Щ 罷 北廉 其 然 有 壬 有 廉 訪 覆 弊 訪 視 ,痛鞭之。 副 司 使哈只 經歷。 之,率眞物也, 蔡行。 至治元年,遷吏部主事。 人畏罪,率剔真 至江西、 遂釋之。 會 、爲僞, 凡勢官豪民,人畏之如虎狼者,有 廉 訪 以 使苗好 迎 二年,轉江南行 其 意。 謙監焚昏 筦庫 鈔, 吏 臺監察御史, 而 檢視 下, 榜 鈔

者

列 傳 第 六 + 九 許 有 壬

奪爵 定帝 守庸 用 子 正 領 子 收 立 五, 瑣 百 官印 帝 南 發 及 召 先 日 而 多從 上都 經 拜 武 訓 與 日 四 歷 監 贴 備 導 聞 JII 有 深爾 察御 二日 木 廢 行 御 大逆,乞賜 壬 选見諸 淡弛,宜 省平章政事趙 . 史大夫紐澤先還京師, 知 只班 ·史、〔三年〕八月,英宗暴崩於南坡,<<! 事急 遴選長官,**宜先培養**,三日 加 子 一,卽往 修飭 典刑。 監察御 ', 宜 ,六曰賊臣妻妾,宜禁勢官徵索,七曰 籍沒以 世延,受禍 告御史中丞董守庸, 史郭 其兄弟勿 《懲惡; 也先忽都, 有 尤慘 令出 壬 九日考驗經費,以減民賦,十日撙節 卽 「皆請」 通籍宫禁,宜別 入宮禁。 袖 阿附鐵失 疏上之。 守庸謂 雪寃復職。」繼 中 賊臣鐵失遣使者 書平章政 之罪以俟。 及帝 宮禁事 貴 至,復 賤; 上正 前赦權以 事 非子 四 十月 王毅、右 上章言:「帖木 日 一始十 所當 自 欲 Ŀ 謹兵權 事 止 鐵失伏 問。 京 變,宜 浮蠹 丞高 至,封府庫, 日 有壬 一以舒 一,横 再認 輔 选兒 誅 宜 削 卽 翼 之 國 罹 以 兼 太 泰 疏

起巖 若 發 日 糧 日 子言 惟德行之擇,其名固佳,恐皆厚貌深情,專意外飾,或懵不能識丁矣。」議久不決。三年 議 四 泰 十萬 定 ,欲廢之,而 固 元 善 年, **斛濟之,民賴** 其 初 如 立 以 虧 層事院,選爲中議,改 推擇德行 或 以活 何 一有壬 者甚 :為務。 衆。 日三不 有壬折之曰:「積 國 學舊法,每以 然。民,本也,不虧民,顧豈 中書左司員外郎。 分雖未 積 分次 京畿饑,有壬請賑 盡善,然可 第貢 以出官, 唇 國 得博學能文之士, 邪 一卒白 執 之。 政用 於 監丞張 同 逐相 列 讓

訴於馬首,有壬曰:「盜賊方熾,求疵太甚,緩急何以使人!但經部使者覆覈者,皆予官。」俄 六月,陞右司郎中,其事遂行,已而復寢。 移左司郎 中,每遇公議,有壬屢爭事得失,汛掃積滯,幾無留牘。都事宋本退語人曰:「此貞 獲盜例有賞,論者多疑其爲,有淹四十餘年者,羣

觀、開元間議事也。」明年,丁父憂。

推而遠之,乃反輕矣,豈所謂尊之者邪!,弗之聽。 有壬曰:「皇上於皇太后,母子也,若加太皇太后,則爲孫矣,非禮也。」衆弗之從,有壬曰: 有壬捕而遣之。九月,拜中書參知政事、知經筵事。帝詔羣臣議上皇太后尊號爲太皇太后, 「今制,封贈祖父母,降於父母一等,蓋推恩之法,近重而遠輕,今尊皇太后爲太皇太后,是 **任詢究弊端,立法** 元統元年,復以參議召,明年甲戌,拜治書侍御史,轉奎章閣學士院侍書學士,仍治臺 會福達魯花赤完卜,藉丞相勢,宿衞東宮,其行頗淫穢,御史劾之,完卜藏御史大夫家, 天曆三年,擢 而 兩淮都轉運鹽司使。 通融之,國課遂登。 先是,鹽法壞,廷議非有壬不能集事,故有是命。 至順二年二月,召參議中書省事,未幾,以丁母憂 有

曰:「此欲何爲耶。」意漢官諱言反,將以罪中之。 强 起之,拜侍御史。 中書平章政事徹理帖木兒挾私憾,奏罷進士科,有壬廷爭甚苦不能奪,遂稱疾在告,帝 會汝寧棒胡反,大臣有忌漢官者,取賊所造旗幟及偽宣敕,班 有壬曰:「此曹建年號,稱李老君太子,部 地 上,問

列

署 士卒,以敵官軍,其反狀甚明,尚何言」」其語遂塞。 廷議欲行古劓法, 立行樞密院,禁漢

人、南人勿學蒙古、畏吾兒字書,有壬皆爭止之。

年,囊 參 脫 由 脫 下,甚有不同,徒勞民費財耳。」不聽,後卒如有壬言。 知 是忌者 主之甚力,有壬曰:「渾河之水,湍悍易決,而足以爲害,淤淺易塞,而 一詔, 政 重 加慶善八及孛羅帖木兒獻議,開 紀 事 益 至元初,長蘆韓公溥因家藏 冗職當沙汰, 錢糧當裁節, 明年 甚。 ,改元至正,有壬極論帝當 有壬度不可留,遂歸彰德,已而 兵器,遂起大獄,株連臺若省,多以贓敗,獨無有壬名, 西山 如此 . 金 親 之類,不一而足。 口導渾河, 祠太廟,母后虛 南遊湘、漢間。 踰京城, 位,徽政院當罷, 人皆韙之。 至元六年,召入中書, 達通州 不可行舟"况地勢 轉中 以通 漕運。 改元 書 左 丞 命 丞相 相當

旨召 辭,誣 御 爲翰林學士,旣上,又辭。 廷 史答蘭不花銜有壬,時短長之,奏劾甚力,事尋白。 賜 仍 額設官, 先是,有壬之父熙載仕長沙日,設義學,訓諸 | 衊有壬,幷其二弟有儀、有孚,有壬遂 知經筵事。 以爲育才之地。 明年夏,授御史中丞,賜白玉 監察御史累章辨其誣。 南臺 |監察御史||木八剌沙,緣睚 稱病歸 生。 東帶及御衣一襲,未幾,復以病歸。 俄拜 四年,改江浙行省左丞,辭。 旣歿,而諸生思之,爲立東岡書院,朝 浙 西廉 眦 訪使,未 怨,言書院不當立,幷搆浮 上,復以翰林學士承 六年,召

敬禮之。一日入見,方臂鷙禽以爲樂,遽呼左右屛去。十七年,以老病,力乞致其事,久之 之,果語塞不能對。轉集賢大學士,兼太子左諭德,階至光祿大夫,有壬前朝舊德,太子頗 多不載。有僧名開,自高郵來,言張士誠乞降,衆幸事且成,皆大喜,有壬獨疑其妄,呼僧詰 有壬力言朝廷務行姑息之政,賞重罰輕,故將士貪掠子女玉帛而無鬪志,遂倡招降之策,言 從容集事,若平時然。十五年,遷集賢大學士,尋改樞密副使,復拜中書左丞。時以言爲諱, 年,起拜河南行省左丞,朝廷遣將出征,環河南境,連營以百數,一切芻餉,皆仰給之,有壬 十二年,盜起河南,聲越河朔間,有壬畫備禦之策十五條,以授郡將,民藉以安。

則淵靚深實,蓋深許之也。所著有至正集若干卷。諡曰文忠。子一人,曰楨。 害,君子多之。有壬善筆札,工辭章,歐陽玄序其文,謂其雄渾閎雋,湧如層瀾,迫而求之, 恣睢之時,稍忤意,輒誅竄隨之,有壬絕不爲巧避計,事有不便,明辨力諍,不知有死生利 有
任歷事
七朝,
垂五十年,
遇國家大事,
無不盡言,
皆一根至理,
而曲盡 人情。 當權臣

始得請,給俸賜以終其身。二十四年九月二十一日卒,年七十八。

宋本

宋本字誠夫,大都人。 自幼穎拔異羣兒,旣成童,聚經史窮日夜讀之,句探字索,必通

文,辭必己出,峻潔刻厲,多微辭。 嘗從父禎官江陵,江陵王奎文,明性命義理之學,本往質所得,造詣日深。 年四十,始還燕。 善爲古

察御 苟安,兼旬不至中堂,壅滯機務,乞戒飭臣僚,自非入宿衞日,必詣所署治事。」皆不報 乞早正天討。」國制,範黃金爲太廟神主,仁宗室盜竟竊去,本言:「在法,民間失盜,捕之違 期不獲猶治罪,太常失典守,及在京應捕官,皆當罷去。」又言:「中書宰執,日趨禁中,固寵 .史,首言:「逆賊鐵失等雖伏誅,其黨樞密副使阿散,身親弑逆,以告變得不死,竄嶺南, 踰 至治元年,策天下士于廷,本爲第一人,賜進士及第,授翰林修撰。泰定元年春,除監 月,調 《國子監丞。夏,風烈地震,有旨集百官雜議弭災之道。時宿衞士自北方來者,

軍 左 民憤天怨,災異之見,職此之由。」辭氣激奮,衆皆聳聽。冬,移兵部員外郎。二年,轉中書 適 中,適民間朱甲妻女車過邸門,千戶悅之,幷從者奪以入,朱泣訴於中書,旭滅傑庇不問。本 復 ·娶妾,逗撓軍期,宜亟置諸法,況可官邪!」王色沮,乃不敢言。 在 司都事。 與議,本復抗言:「鐵失餘黨未誅,仁廟神主盜未得,桓州盜未治,朱甲寃未伸,刑政失度, 遺歸,乃百十爲羣,剽劫殺人桓州道中。旣逮捕,旭滅傑奏釋之。蒙古千戶使京師,宿邸 |道納妾,留不進,兵敗歸,樞密副使王卜鄰吉台言:「|李平徭有功,當遷官。」|本言:「|李棄 會議招撫溪洞民,故將李牢山之子嘗假兵部尚書,從諸王帥兵征欝林州徭民,

異石名曰瓓者來獻,其估鉅萬,或未酬其直;諸嘗有過,爲司憲褫官,或有出其門下者。三 旭 滅傑死,左丞相倒刺沙當國得君,與平章政事烏伯都刺,皆西域人,西域富賈以其國

者官,世祖成憲也,今上卽位,累詔法世祖,今擢用之,是廢成憲而反汗前詔也,後復有邪佞 曰:「今警災異,而畏獻物未酬直者憤怨,此有司細故,形諸王言,必貽笑天下。 孛地震赦天下,仍命中書酬累朝所獻諸物之直,擢用自<u>英廟至今爲憲臺奪官者,本讀竟,</u>白 年冬,烏伯都刺自禁中出,至政事堂,集宰執僚佐,命左司員外郎胡彝以詔藁示本,乃以星 司憲褫有罪

贓穢者,將治之邪。置不問邪。」宰執聞本言,相視嘆息罷去。明日,宣詔竟,

本遂稱疾

自承務郎十轉至太中大夫。 夏,轉集賢直學士,兼國子祭酒,兼經筵如故。是年冬十一月二十五日卒,年五十四。階官 官,冬,拜陝西行臺治書侍御史,不拜,復留爲奎章閣學士院承制學士,仍兼經筵官。 循故事,行朝賀禮,本言:「宜上表興聖宮,廢大明殿朝賀。」衆是而從之。 元統元年,兼經筵 河東廉訪副使,將行,擢禮部尙書。三年冬,寧宗崩,順帝未至,皇太后在興聖宮,正旦,議 章閣,置藝文監,檢校書籍,超大監。至順元年,進奎章閣學士院供奉學士。二年冬,出爲 四年春,遷禮部郎中。天曆元年冬,陞吏部侍郎。二年,改禮部侍郎。是年,文宗開奎

門生故吏及國子諸生,未嘗有一雜賓,時人榮之。 善,稱道不少置,尤以植立斯文自任。知貢舉,取進士滿百人額,爲讀卷官,增第一甲爲三 年,歷仕通顯,猶僦屋以居。及卒,非賻贈幾不能給棺斂,執紼者近二千人,皆縉紳大夫、 人。父官南中,貧,賣宅以去,居官淸愼自持,饘粥至不給。 本性高抗不屈,持論堅正,制行純白,不可干以私,而篤朋友之義,堅若金鐵,人有片 本所著有至治集四十卷,行于世。 本未弱冠,聚徒以養親,殆二十

察御史,於朝廷政事,多所建明。其文學與本齊名,人稱之曰二宋云。 弟褧,字顯夫,登泰定元年進士第,授校書郎,累官至翰林直學士,諡文淸。

謝端

詩,十歲能作賦。 負,少所許可,以所爲文际端,端一讀,卽能指擿其用意所在、(樞)[燧]歎獎不已,語人:「後 名,時號謝宋。 一十年,若謝端者,豈易得哉!」用薦者署校官,不報。 謝端字敬德,蜀之遂寧人。宋末,蜀士多避兵江陵,因家焉。 。<u>史杠宣慰荆南,數加延禮,薦之姚(樞)[燧],[記(樞)[燧]方以文章</u>大名自 弱冠,與尚書宋本同師,明性理,爲古文,又同教授江陵城中,以文學齊 端幼穎異,五六歲能吟

郎、潭州路同知湘陰州事。歲滿,入爲國子博士,遷太常博士。 主、坐罷去。端、禮官、非典守、不當坐、亦不辨。尋除翰林修撰、陞待制,以選爲國子司業, 科舉法行,就試河南行省,中其舉,以內艱不會試。延祐五年,乃擢進士乙科。 盜入太廟,失第八室黃金 授承 事

逐為翰林直學士,階太中大夫。

明宗、寧宗三朝實錄,及累朝功臣列傳,時稱其有史才。 久,至順、元統以來,國家崇號,慈極升祔先朝,加封宣聖考妣,制册多出其手。預修文宗、 滯訟,皆諉端讞,端剖決如流,績譽籍然。其文章嚴謹有法,寧約近瘠,無奢滋駁。居翰林 端善爲政,筮仕湘陰,猾吏束手,不敢舞文法,豪民無賴者遠避去。 部使者行部, 旁郡

端。」亡何,文宗崩,竟不及用端。端又與趙郡蘇天爵同著正統論,辨**金、宋正統甚悉,世多** 傳之。至元六年卒,年六十二。元世獨士以文名者,曰虞集,而謝端其次云 初,文宗建奎章閣,蒐羅中外才俊置其中,嘗語阿榮曰:「當今文學之士,朕惟未識謝

校勘記

[一]別(法里)[里法]不花 類編已校。 據本書卷一四〇別兒怯不花傳、卷一三九阿魯圖傳所見「別兒怯不花

勘記

9]

[I] C三年]八月英宗暴崩於南坡 從道光本補。 原脫,致誤爲至治二年八月。

[]] 姚(樞)[燧] 考異云:「案姚樞當爲姚燧之譌。樞本不以文章自負,且樞卒於至元十七年。是時 謝端甫生兩歲,無緣得見樞也。後讀蘇天爵所撰神道碑,正作文公燧。」考異是,今據滋溪文稿

卷一三謝端神道碑銘改。下同。

元史卷一百八十三

列傳第七十

王守誠

史。 進。 書成, 擢參議中書省事。 元年, 試禮部第一, 廷對賜同進士出身, 授祕書郞。 **愈山東廉訪司事。** 轉藝林庫使, 王守誠字君實,太原陽曲人。氣字和粹,性好學,從鄧文原、虞集游,文辭日進。 與著經世大典。 改戶部員外郎、中書右司郎中。拜禮部尚書。 調燕南廉訪使。 拜陝西行臺監察御史。 遷太常博士,續編太常集禮若干卷以 除奎章閣鑒書博士。 與修遼、金、宋三史, 拜監察御 泰定

使蘇伯延行賄於平章某,瘐死獄中。至是,伯延親屬有愬。]]] ,首薦雲南都元帥述律鐸爾直有文武材。 至正五年,帝遣使宣撫四方,除守誠河南行省參知政事,與大都留守答爾麻失里使四 初,四川廉訪使某與行省平章某不相 會茶鹽轉運司官亦訟廉訪使累 能,誣宣

竄之,餘皆斥去

受金,廉訪使倉皇去官, 至揚州死。 副使而下,皆以 事罷。 憲史四 奏差一人, 籍其家而

中帛 吏 誣之,乃議文德罪,比不卽捕强盜 旗,書曰 重慶銅梁縣尹張文德,出遇少年執兵刃,疑爲盜,擒執之, 南朝趙王。 賊黨聞之,遂焚劫雙山 例 加 四等。 遇赦免, 文德捕殺百餘 **猶擬杖一百。** 果拒敵。 人。 重慶府官以私 守誠至,爲直 文德斬其首, 其 怨 得懷 使縣 事 o

遙,俸給之薄,何以自 吐實,爲之平反。 他 如以贓罪誣 州縣官多取職田者,累十 人,動至數千緡,與夫小民田 養。 請以戶絕及屯田之荒者,召人耕種,收其入以 ·有四 婚之訟, 人,悉釐正之。 殆百十計, 因疏言:「仕於蜀者, 守誠皆辨析詳識 增祿 秩 地 解 一解路 窮

皆采 劉氏 文集若干卷。 歿于 以上聞 宜賓縣尹楊 京 成之, 師 聞 濟亨欲於 喪亟歸,遂遘疾,以至正九年正月卒,年五十有四。 風采聳動天下, 蟠龍 Щ 建憲宗神御殿 論功居諸道最。 儒學提舉謝晉賢請復文翁石室 進資政 大夫、河南行省左丞。 帝賜鈔萬緡、諡 爲 未 書院 文昭 上,母

王思誠

王思誠字致道 一、兖州嵫陽人。 天資過人,七歲, 從師授孝經、論語,即能成誦 家 本業

用游,學大進。 農,其祖 佑,詬家 中至治元 人曰:「兒大不教力田,反教為迂儒邪!」思誠愈自力 年進士第,授管州判官,召爲國子助教,改翰林國史院編修官。 弟解。 後從汶陽 曹元 葬

陞應奉翰林文字,再轉爲

待制

被災之家,死者給葬具,庶幾可以召陰陽之和,消水旱之變,此應天以實不以文也。」 之冤而已,豈不感傷和 年大旱,往歲伯顏專擅威福,讎殺不辜,郯王之獄,燕鐵木兒宗黨死者,不可勝數,非直一婦 無雪,方春首月蝗生,黃河水溢。蓋不雨者,陽之亢,水涌者,陰之盛也。嘗聞 至正元年,遷奉議大夫、國子司業。二年,拜監察御史,上疏言:「京畿去年秋 氣邪!宜雪其罪。敕有司行禱 百神,陳牲幣, 祭河伯、發卒塞其缺, 婦銜寃,三 不 ·雨,冬

有 百九十艘,壩夫累歲逃亡,十損四五,而運糧之數,十增八九,船止六十八艘,戶止七百 河,設壩夫戶八千三百七十有七,車戶五千七十,出車三百九十輛, 船戶九百五十,出 死獄中,獄吏妄報其病月日用藥次第。請定瘐死多寡罪,著爲令。」又言:「至元十六年,開壩 不至死,乃拘囚至於饑死,不若加杖而使速死之愈也。況州縣俱無囚糧,輕重囚不決者,多 給衣與食,天曆以來,水壞金冶,因罷其給,齧草飲水,死者三十餘人,瀕死者又數人。 一,車之存者二百六十七輛,戶之存者二千七百五十有五,晝夜奔馳, 行部至檀州,首言:「采金鐵冶提舉司,設司獄,掌囚之應徒配者,釱趾以春金鑛,舊嘗 猶不能給,壩夫戶 夫罪 船

列

傳第

島 仙 於 遁 巡尉弓 廣), 請立 劉 鶴 等處打 () 禁鎭 家港口,以捕盜爲名,實不出海,以 於二月終旬 者 成江 以簽補 兵與提 一千八百三十有二,一夫日運四百餘石,肩背成瘡,顦顇如鬼, 法嚴禁之。」又言:「初開 捕 民 海諸口 鷹房府, (與梢水爲婚, 有能 ,使勞佚相資。」又言:「

| 一東,密邇京師,此歲 調 捕 、入海、庶幾海道寧息。」朝廷多是其 ,以詰海 流官,· 打捕戶尚玉等一萬三千二百二十五 會鄰境以討之,賊南則 商還者,審非 捕 海道,置 賊者, 寇賊, 致寇賊猖獗,宜卽萊州洋等處分兵守之,不令泊船 以船畀之, 海 仙鶴哨船 始令泊船。 會于北,賊西則會于東,及與賊 議 獲賊首者,賞以官。 四十餘艘,往來警邏 戶,阿難答百 下年糧船開洋之前,造將 (饑饉、(郡)[羣]盜縱橫,[] 姓劉德元等二千三百 甚可哀也。 仍移 今弊船十數,止 江 浙 會,望風 河南、湖 河南行 土 一乘海 先

宿 死 監 :約者,疑之,衆以爲盜告,不從,脅以白刃,驅之前,至一民家,衆皆入,獨留戶外,遂潛奔 疑 裙 某 州 芝麻 也 以下二十三人,皆罪之。 松 而]。」以裙示失主,主曰:「非吾物。」其黨詞屈,遂釋之。 州 問之,曰:「昏暮三人投宿,將詣集場,約同行,未夜半,趣行,至一冢間, ,某追及,刺之幾死,賊以是圖 官 吏 誣 構良民以取賂,愬于臺者四十人,選思誠鞫問,思誠密以他事入松州境,執 還至三河縣,一囚愬不已,俾其黨異處,使之言, 復讎,今弓手欲捕獲功之數,適中賊計。 豐潤縣一囚,年最 見數 囚曰:「賊向 少,械繫瀕 其贓,實某 人 (如有

赴縣,未及報而被收。」思誠遂正有司罪,少年獲免。

之,河中攤磧百有餘里,嶕石錯出,路窮,舍騎徒行,攀藤葛以進,衆憊喘汗弗敢言,凡三十 問思誠先知之故,曰:「衣弊衣,乘駿馬,非詐而何」」陝西行臺言:「欲疏鑿黃河三門,立水陸 里,度其不可,乃作詩歷敍其險,執政采之,遂寢其議 命,思誠怒曰:「吾屬自欺,何以責人!何以待朝廷!諸君少留,吾當躬詣其地。」衆惶恐從 站以達於關陝。」移牘思誠,會陝西、河南省憲臣及郡縣長吏視之,皆畏險阻,欲以虛辭復 吏。」未幾,果有愬于道側者,問曰:「得無訴監縣敚汝馬乎?」其人曰:「然。」監縣抵罪。 出愈河南山西道肅政廉訪司事, 行部武鄉縣, 監縣來迓, 思誠私語 皮屬曰:「此 必贓 吏屬

甫醰, 用 夾堤于外,亘十餘里,命瀕河民及弓手,列置草舍於上,擊木以防盜決。 部侍郎,監燒燕南昏鈔,忽心悸弗寧,已而母病,事畢,馳還京師侍疾,及丁內憂,扶櫬南歸。 立堂下,黜其首爲鬨者五人,罰而降齋者七十人,勤者升,惰者黜,於是更相勉勵。 大稔。 召修遼、金、宋三史,調秘書監丞。會國子監諸生相 朝廷行內外通調法,選郡縣守令,起思誠太中大夫、河間路總管。 鐵燈干,真定境也,召其邑吏,責而懲之,遂集民丁作堤,晝夜督工,期月而塞,復築 乃募民運碎甓,治郭外行道,高五尺,廣倍之,往來者無泥塗之病。 率爲鬨,復命爲司業,思誠召諸生 是年,民獲耕藝,歲 磁河 水 南皮民父祖, 頻溢,決鐵 超陞兵

列

穗 嘗 里 能 原僚 瀕 也 償 御 屬 河 思 加 欲 誠 間 種 尊 連請 上 柳 福 進 輸 思思 鄉,博士 于朝除之。 課於官 誠 曰:「吾嘗 毛萇舊居 名日 郡庭生嘉禾三本, 恶 柳課,後河決,柳俱沒,官猶徵之,凡十餘年,其子 也,皆請建書院,設 人行異政,沽美名。」乃 一本九 Щ 莖,一 長員。 此。 本十六莖, 所轄景州廣 召拜 禮部 尙書 本十 川鎭 漢董 三莖,莖五六 孫 益貧,不 一仲舒之

書,知 辭 便 內 帝 計 以 郡 **德意,莫不**感泣,緘 老 捕 徵 貢 病 二年 舉 六日 ,不允,力疾 ,升集賢侍 以固根本,三日汰 一帝以一 復 倚 四方民頗失業,命名臣 郭縣,以正 八戒行 講學 進二麥、豌 土 一,兼 冗兵, 紀 洞,七 國 豆,帝嘉之,賜上尊 以省 子祭酒。 日 糧運,四 設常選,以 巡行勸課,思誠 應詔 日改禄秩, 言事: 起淹滯。 召還, 至 日 河間 以養官廉,五 置 尋出 行 遷 及 省 國 為陝西行 山東諸路, 丞 子 祖,以 · 祭酒, 日 罷 專方 臺治書侍 俄 召集 行 復 兵馬 面 爲 父 _; 三 目 禮 老, 御 部 以以 寬 尙 宣

郡 日:: 及 之藩 帖 省 院官 吾 木 十 籬 兵 兒 七 兩 弱 於安西王月魯 年 河 春 省相 南 日 了, 紅 名將, 賊 夕 巾陷 望,互爲唇齒,陝西危,則河南豈能獨安乎。」察罕帖木兒新復 火失守, 商 i 帖木 素畏之,宜 列 咎將安歸 ·兒邸, 奪七盤,進據藍 」乃移 遣使求援,此 衆 洶 懼 書祭罕帖木 無言, 田縣,距奉元一舍, 上策也。」成 思誠 日 見曰:「河南 陝西 將嫉客兵軋己,論 重 思誠 爲京 地,天下 會豫 師之庭戶,陝 之重 王 一阿剌 久 輕緊焉。 (不決) 陝州 龙 西 納 思 失里 實 內 誠 察

列傳第七十 王思誠

從之。 罕帖木兒擅調,遣人問之,思誠亟請於朝, 效, **犒軍于鳳** 分守北門,其屬聞事急,欲圖苟免,思誠從容諭之曰:「吾受國重寄, 大喜,曰:「先生眞有爲國爲民之心,吾寧負越境擅發之罪。」遂提輕兵五千,倍道來援,思誠 死之可也。 凰山,還定守禦九事,夜宿臺中,未嘗解衣。 自古皆有死, 在遲與速耳。」衆乃安。 宜命察罕帖木兒專守關陝,仍令便宜行事,詔 旣而援兵破賊,河南總兵官果以察 同官潛送妻子過渭北, 安定一方, 思誠止之, 期戮力報

所繁豈輕耶」事遂寢。 庫。 行,始知之,思誠曰:「若是,則上下之分安在」」凡上章,必拆視,不可行者,以臺印封置架閣 劾不出,諸御史謁而謝之。初,監察御史有封事,自中丞以下,惟署紙尾,莫敢問其由, 之, 曰:「嘻!古者, 罪人不孥, 况其母乎!吾不忍以子而繫其母。」令釋之, 不從, 思誠因自 俄起五省餘丁軍,思誠爭曰:「關中方用兵,困於供給,民多愁怨,復有是役,萬一爲變, 行 樞密院掾史田甲,受賂事覺,匿豫邸,監察御史捕之急,幷繫其母,思誠過市中,見 事

十七年,召拜通議大夫、國子祭酒,時臥疾,聞命卽起,至劇邑,疾復作。十月,卒于旅

舍,年六十有七。諡獻肅。

李好文

錄,三年,書成,凡五十卷,三名曰太常集禮。 不成也。 具,博士不過循故事應答而已。往年有韶爲集禮,而乃令各省及各郡縣置局纂修,宜其久 以木爲之,金玉祭器,宜貯之別室。」又言:「祖宗建國以來,七八十年,每遇大禮,皆臨 史院編修官、國子助教。。泰定四年,除太常博士。 李好文字惟中,大名之東明人。登至治元年進士第,授大名路濬州判官。 禮樂自朝廷出,郡縣何有哉!」白長院者,選僚屬數人,仍請出架閣文牘,以資採 會盜竊太廟神主,好文言:「在禮,神 入爲翰林國 時 主當 取

浙東兩道廉訪司事 殺人,甚於用刃,況因有所求而殺之,其情爲尤重。」乃置之死,河東爲之震肅。 久乎'」立出之。王傅撒都刺,以足蹋人而死,衆皆曰:「殺人非刃,當杖之。」好文曰:「怙勢 河東,有李拜拜者,殺人,而行兇之仗不明,凡十四年不決,好文曰:「豈有不決之獄如是其 「年號襲舊,於古未聞,襲其名而不蹈其實,未見其益。」因言時弊不如至元者十餘事。 遷國子博士。丁內憂,服闋,起爲國子監丞,拜監察御史。時復以至元紀元,好文言: 錄囚

六年,帝親享太室,召僉太常禮儀院事。 至正元年,除國子祭酒,改陝西行臺治書侍御 豈正大之體乎!]率御史力辨武等之枉,幷言奉使不法者十餘事。 當問民疾苦、黜陟邪正,今行省以下,至於郡縣,未聞舉劾一人,獨風憲之司, 西行 除治書侍御史,仍與史事,俄除參議中書省事,視事十日,以史故,仍爲治書。 事兀馬兒、王武事,文博死,兀馬兒誣服,武不屈,以輕侮抵罪。 必命好文攝禮儀使。 問曰:「兄拜弟可乎。」好文與博士劉聞對曰:「爲人後者,爲之子也。」帝遂拜。 史,遷河東道廉訪使。 臺治書侍御史,時臺臣皆缺,好文獨署臺事。 四年,除江南行臺治書侍御史,未行,改禮部尙書,與修遼、金、宋史, 三年,郊祀,召爲同知太常禮儀院事,帝之親祀也,至寧宗室,遣 西蜀奉使,以私憾摭拾廉訪 好文曰:「奉使代 六年,除翰林侍講學士, 無 由是每 使曾文博、愈 已而 天子行 一発者,此 復除陝 親祀,

年漸 模,則不足以輔成德性。 於道,聖賢之道存於經,而傳經期於明道,出治在於爲學,關係至重,要在得 翰林學士兼諭德。好文力辭,上書宰相曰:「三代聖王,莫不以敎世子爲先務,蓋帝王之治本 長、開端本堂、命皇太子入學,以右丞相脫脫、大司徒雅不花知端本堂事、而 九年,出參湖廣行省政事,改湖北道廉訪使,尋召爲太常禮儀院使。 而 好文天資本下,人望素輕,草野之習,而久與性成,章句之學,而寖以 自非學臻閩奧,則不足以啓迪聰明。宜求道德之鴻儒,仰成 於是帝以皇太子 人。自非德 事廢,驟膺重 命好文以 或 家之 堪 範

兼國子祭酒,又遷改集賢侍講學士,仍兼祭酒。

列

傅

第

託 見,做眞德秀大學衍義之例,爲書十一卷,名曰端本堂經訓要義,奉表以進,詔付端本堂,令 孟子、中庸。」乃摘其要略,釋以經義,又取史傳,及先儒論說,有關治體 嘉歎之,而 太子習焉。 う負 荷誠難。 不允其辭。 必 別加選掄,庶幾國家有得人之助,而好文兒妨賢之譏。」丞相 好文言:「欲求二帝三王之道,必由於孔氏,其書則孝經 而協經旨者,加以所 、大學、論語、 以其書聞,帝

當戒者爲書,名曰大寶龜鑑。 學,如 金、宋,歷代授受,國祚久速,治亂興廢爲書,曰大寶錄。又取前代帝王是非善惡之所當法 孝友,如舜、文王及唐玄宗友愛之類,三曰恭儉, 好文又集歷代帝王故事,總百有六篇:一曰聖慧,如漢孝昭、後漢明帝幼敏之類;二曰 殷宗緝學,及陳、隋諸君不善學之類。 皆錄以進焉。 久之, 陸翰林學士承旨, 階榮祿大夫。 以爲太子問安餘暇之助。 如漢文帝却千里馬、 罷露臺之類;四 又取古史,自三 一皇迄 日 聖

矣。」 諸書,參以貞觀政要、大學行義等篇,果能 政事,仍以翰林學士承旨一品祿終其身。 皇太子深敬禮而嘉納之。 十六年,復上書皇太子,其言曰:「臣之所言,卽前日所進經典之大意也,殿下宜以 後屢引年乞致仕,辭至再三,遂拜光祿大夫、河南行省平章 一一推而 行之,則萬幾之政、太平之治,不 所進 難 致

字 **尤魯孙** 子遠附

以女妻之。 肆,翰林學士承旨姚燧,以書抵與曰:「燧見人多矣,學問文章,無足與子翬比倫者。」於是喇 學行爲州里所敬。嘗夜夢大鳥止其所居,翼覆軒外,舉家驚異,出視之,冲天而去。 爲學益力,乃自順陽復往江西,從新喩蕭克翁學。 家自隨,生翀贛江舟中,釜鳴者三,人以爲異。翀稍長,卽勤學,父歿,家事漸落,翀不恤,而 征 ,因家鄧之順陽,以功封南陽郡侯。父居謙,用翀貴,封南陽郡公。初,居謙辟掾江西,以 **孛术魯翀字子翬,其先隆安人。 翀始名思溫,字伯和,克翁爲易今名字,以夢故。後復從京兆蕭興游,其學益宏以** 金泰和間,定女直姓氏,屬望廣平。 克翁,宋參政燧之四世孫也,隱居 祖德,從憲宗南 明日, 不仕,

薦。 帝嘉納之。 御史,賑濟吐蕃,多所建白。 巡按遼陽, 至大四年,授翰林國史院編修官。延祐二年,擢河東道廉訪司經歷,遷陝西行臺監察 大德十一年,用薦者,授襄陽縣儒學教諭,陞汴梁路儒學正。會修世皇實錄,燧首以翀 尋劾奏中書參議元明善,帝初怒,不納,明日,乃命改明善他官,而傳旨慰諭翀。 有旨給以弓矢環刀。 五年,拜監察御史。時英皇未出閣,翀言:「宜擇正人以輔導。」 後因爲定制。 還往淮東覈憲司官聲跡, 淮東憲臣,

列

相鐵木迭兒專事刑戮,以復私憾,翀因避去。 屈 旨凡以吏進者,例降二等,從七品以上不得用。|翀言:「科舉未立,人才多以吏進,若一概 刑,多置獄具,翀曰:「國家所以立風紀,蓋將肅淸天下,初不尙刑也。」取其獄具焚之。 時有 抑,恐未足盡天下持平之議。請吏進者,宜止於五品。」許之,因著爲令。除右司都事,時

耳。 童碑所,因獻駐蹕頌,皆稱旨,命坐,賜飮尚尊。從幸上京,次龍虎臺,拜住命翀傳旨中書, 聖胃者、翀白丞相曰:「此輩皆脅從,非同情者。」乃悉加銓敍。帝方獵柳林,駐故東平王安 |翀對曰:「宰相固不敢當,然所學,宰相事也。 夫爲宰相者,必福德才量四者皆備,乃足當 **翀領之,行數步,還曰:「命翀傳否。」]拜住歎曰:「真謹飭人也。」問謂翀曰:「爾可作宰相否。」** 往 (外郎,奉旨預修大元通制,書成,翀爲之序。 日,宜早至也。」翀强爲起。會國子監隸中書,俾翀兼領之。 |拜住大悅,以酒觴||翀曰:「非公,不聞此言。」迎駕至行在所,||翀入見,帝賜之坐。 陞右司 頃之,擢翰林修撰,又改左司都事。於是拜住爲左相,使人勞翀曰:「今規模已定,不同 先是,陝西有變,府縣之官多

務爲之一新。三年,擢燕南河北道廉訪使,〔三晉州達魯花赤有罪就逮,而奉使宣撫以印帖 曰:「世祖立國,成憲具在,愼守足矣。譬若乘舟,非一人之力所能運也。」翀乃開壅除弊,省 泰定元年,遷國子司業。明年,出爲河南行省左右司郎中。丞相曰:「吾得賢佐矣。」翀

徵之,欲緩其事,翀發其姦,奉使因遁去。入僉太常禮儀院事, 宜增設都監員,內外嚴置扃鎖,晝巡夜警,永爲定制。」從之。又纂修太常集禮,書成而未 **盗竊太廟神主,翀言:「各室**

上,有旨命翀兼經筵官。

帝命藏之奎章閣。擢陝西漢中道廉訪使,會立太禧院,除僉太禧宗禋院,兼祗承神御殿事, 碑文,稱旨,帝曰:「候朕還大都,當還汝潤筆貲也。」 如。」對曰:「與衆人同。」又問:「談論如何。」曰:「翀所談,義理之言也。」從幸上都,嘗奉敕撰 乘馬,從水道來,是以緩耳。」太禧臣日聚禁中,以便顧問,帝嘗問阿榮曰:「魯子暈飲食何 韶遣使趣之還。迎駕至龍虎臺,帝問:「子肇來何緩。」太禧院使阿榮對曰:「翀體豐肥,不任 言。及文宗親祀天地、社稷、宗廟,翀爲禮儀使,詳記行禮節文於笏,遇至尊不敢直書,必識 以兩圈,帝偶取笏視,曰:「此爲皇帝字乎。」因大笑,以笏還翀。竣事,上天曆大慶詩三章, 俟明宗,翀極言::「大兄遠在朔漠,北兵有阻,神器不可久虛,宜攝位以俟其至。」文宗納其 命翀與平章政事溫迪罕等十人,商論大事,日夕備顧問,宿直東廡下。文宗虛大位以 文宗之入也,大臣問以典故,翀所建白近漢文故事,衆皆是之。文宗嘗字呼子暈而不

遷集賢直學士,兼國子祭酒。諸生素已望翀,至是,私相歡賀。翀以古者敎育有業,退 舊制、弟子員初入學,以羊贄、所貳之品與羊等。剛曰:「與其魘口腹,孰若爲吾黨

列傳

第七十

李 北 魯 翀

天下儒 俯伏 及釋 燥 濕 進觴 褐者 寒暑之虞乎!」命撙集之,得錢二萬緡有奇,作屋四區,以居學者。 人師也。 一、帝師 , 翀至,皆使就試而官之。 不爲動,惟翀舉觴立進曰:「帝師,釋迦之徒,天下僧人師也。 請各不爲禮。」帝師笑而起,舉觴卒飲,衆爲之慄然。 帝師至京 師,有旨朝臣 一品以下,皆乘白馬郊 諸生積分,有六年未 余,孔子之徒, 迎。 大臣

者,其妻以田盡入于僧寺,其子訟之,翀召其妻詰之曰:「汝爲人妻,不以資產遺其子, 乎」皇太后以爲宜從翀言, 頻行 何面目 國 政。 文宗 翀曰:「今上以聖子神孫, 見汝夫於地下」卒反其 | 翀 以 崩,皇太后聽政,命別不花、塔失海牙、阿兒思蘭、馬祖常、 大位不可久虚,請嗣君卽位,早正宸極,以幸天下。 議乃定。 田 入繼 大統,當新 遷禮部尙書, 天下耳目。 階中憲大夫。 今不赦, 豈可收怨於新 帝旣 有大官妻無子 史顯夫及翀六人,商論 卽位,大臣以爲赦不 而 造之君 妾 他日 有 子 日

公,諡文靖。 以疾辭,不上。 元 統 二年,除江浙行省參知政事。 至元四年卒,年六十。 贈通奉 逾年,以遷葬故歸鄉里。 大夫、陝西行省參知政事、護軍, 明年,召爲翰林侍講學士, 追封南陽郡

文章簡奧典雅,深合古法。 翀 狀貌魁梧,不妄言笑。 用是天下學者,仰爲表儀。 其爲學一本於性命道德,而記問宏博,異言僻語,無不 其居國學者久,論者謂自許衡之後, 淹貫。

能 以師道自任者,惟耶律有尚及翀而已。 有文集六十卷。

哭大駡,不從,乃見殺。 財曰:「我魯參政冢婦、縣令嫡妻、夫死不貮、肯從汝狗彘以生乎!」賊醜其言、將辱之、雷號 財募丁壯,得千餘人,與賊拒戰,俄而賊大至,遠被害死。 子遠,字朋道,以翀廕調秘書郎,轉襄陽縣尹,須次居南陽。 舉家皆被害。 遠妻雷爲賊所執,賊欲妻之,乃詆 **賊起**,遠以忠義自奮,傾

李泂

南。 擢 葬,辭而 文章負大名,一見其文,深歎異之,力薦于朝,授翰林國史院編修官。 , 監修國史長史,歷祕書監著作郎、太常禮儀院經歷。 久之, 辟中書掾, 非其志也。 李泂字溉之,滕州人。 歸。 生有異質,始從學,卽穎悟强記。作爲文辭,如宿習者。 及考除集賢院都事,轉太常博士。 泰定初,除翰林待制,以親喪未克 拜住爲丞相,聞泂名, 未幾,以親老,就養江 姚燧以

稱旨,超遷翰林直學士,俄特授奎章閣承制學士。 天曆初,復以待制召,於是文宗方開奎章閣,延天下知名士充學士員,洞數進見,奏對 泂旣爲帝所知遇,乃著書曰 輔治篇以進,

列

傳第七

也,吾其可以不預 文宗嘉納之。 朝廷 **」**力疾同修,書成,旣進奏,旋謁告以歸。 有 大議,必使與焉。 會詔修經世大典,泂方臥疾, 復除翰林直 即强起,日:「此大制作 一學士,遺使召之,竟

以

疾不

能起

王屋 若紛 面,文宗嘗敕虞集製文以記之。 望 一之者疑 錯 有文集四十卷。 泂骨骼淸峻,神情開朗,秀眉疏髯,目瑩如 少室諸 而 爲 有條理,意之所至,臻極神妙。 神仙 山,留連久乃去,人莫測其意也。 中人也。 其 爲 文章,奮筆揮灑 洞尤善書,自篆、隸、草、眞皆精詣,爲世所珍愛。 洞每以李太白自 僑居濟南, (電,顏面如冰玉,而唇如渥丹然) ,迅飛疾 公動,汨 「儗,當世亦以是許之。 有湖山花竹之勝,作亭曰天心水 汩 滔 滔,思 態疊出 嘗游 縦横 峨 卒年五十 冠 褒衣, 匡廬、 冷變,

蘇天爵

順元年 T 有 內 惠 外 政 蘇 ·艱、服 **〕預修武宗實錄。** 時 天爵字伯修, 稱能 除,調 吏。 功德使司照磨。 天爵 眞定 二年,陞修撰,擢 由國子 人也。 學生公試,名在第 **父志道,歷官嶺北行中書省** 泰定元年,改翰林 江南行臺監察御史。 國 釋褐, 「史院典籍官,陞應奉翰林文字。 左右司郎中, 授從 仕 郎、 大都路 和林 大饑, 薊州 剕 |至

明 年 日 慮 憲 囚 于 司 歲 湖 北。 兩 至, 湖北 不言 地 何 僻遠, 也 ? 音 民 獠 日 所 雑 前 此 居, 慮 天爵冒 囚 者 應 瘴 毒, 故 事 偏 耳。 歷 其 今聞 地。 御 囚 史至, 有言冤狀

與 氏 甲 疑 妄 一此 之,沈斧水中 民 刑 者 仗 也 家 妻 獄 文甲無子, 故不 事 _; 不 縱 溝 二年半耳, 得,訴 遂 天爵 存,今已八年,未有不腐者。」召譚 中 得不言。」天爵爲之太息。 復置于 語東 更往索、果得髑 甲 ·, 而 ·妻與 理 育其甥 曰:「此 且 ÍЦ 漬 不 乙通 常 殺 其 德民 雷乙, 乃 人,何 衣 而 疑 跡 は髏,然! 獄 盧甲、莫乙、汪丙 殺 以衣 故在 後 沈 其 乃 夫。 屍 不 污 生 毎事 與 M. ? 止三年。」俱釋之。 事覺,乙具 兩 (仗皆 乙不 子,而 必 詰之,則 究 又何以知 無 能 رياء 有 明 同 出 ,雖盛暑, 服, 而 誣 出 乙, 單 傭 未 服 斧 部 ک 譚 俊 擊 在 死 誣 丽 使 時 證 之 者 猶 其明於詳讞,大抵 水 兩 甲 夜篝 死, ,目已瞽,其言曾見 功 子 會見一屍,水漂 中 誤 行 墮 以三年之疑 斷 賣 燈 叉 水 其首棄 其 茶, 污治 死, 居 文 卽 甲弟 去 書 草 舟中 殺 獄 此 去。 無倦 間 之爲 釋 人 類 取 處甚 之。 屍 。(江)[沅]陵 斧, 屍 僧者, 爵 與 水 近, 天爵 並 仗 漂 當受 斮 欲 何 棄 私 殺

兼 所 劾 經 五. 筵參贊 上,自 者 入 爲 五. 監察御 人,所 人 官。 君 薦 至 後 史, 舉 于 至元 道改 者 朝 百 廷 全章 有 政 年 令 九 ·, 由 閣 人。 稽 刑部 授經 古禮文 明 郎。 郎 年,預修文宗實 中,改御史臺都事。 閭 元統 閻 继 元 隱, 年,復 **鎌** 其 拜 關 遷翰林待 監察 乎大體 三年,遷禮 御史,在官 、繋乎得 制 部 尋 侍 四 除 失者 閱 郎 中 書 月,章 右 知 五 無 司 疏 都 凡四 出

列

傳

第

淮 臺治書侍御史,復爲吏部尙書,陞參議中書省事。 天子圖治之意甚切,天爵知無不言,言無顧忌,夙夜謀畫,須髮盡白。 東道肅 政廉訪使、憲綱大振,一道肅然。 入爲樞密院判官。 是時,朝廷更立宰相,庶務多所弛張,而 明年,改吏部尚書,拜陝西行

賦,居天下十七,事務最煩劇,天爵條分目別,細鉅不遺。 察其誣,乃復起爲湖北道宣慰使、浙東道廉訪使,俱未行。拜江浙行省參知政事。江浙財 糾劾者九百四十有九人,都人有包、韓之譽,然以忤時相意,竟坐不稱職罷歸。 使,尋召還集賢,充京畿奉使宣撫,究民所疾苦,察吏之姦貪,其興除者七百八十有三事,其 子祭酒。天爵自以起自諸生,進爲師長,端己悉心,以範學者。 至正二年,拜湖廣行省參知政事,遷陝西行臺侍御史。四年,召爲集賢侍講學士,兼國 ,明年,出爲山東道肅政廉訪 七年,天子

然以憂深病積,遂卒于軍中。年五十九。 政 方,所辦課爲鈔八十萬錠,及期而足。十二年,妖寇自淮右蔓延及江東,詔仍江浙行省參知 事,總兵于饒、信,所克復者,一路六縣。其方略之密,節制之嚴,雖老帥宿將不能過之。 九年,召爲大都路都總管,以疾歸。 俄復起爲兩浙都轉運使,時鹽法弊甚,天爵拯治有

於序事,平易溫厚,成一家言,而詩尤得古法,有詩藁七卷、文藁三十卷。於是中原前輩,凋 天爵爲學,博而 知要,長於紀載,嘗著國朝名臣事略十五卷、文類七十卷。 其爲文,長

河原委,未及脫藁云。 其所居,稱之爲滋溪先生。 謝殆盡,天톍獨身任一代文獻之寄,討論講辯,雖老不倦。 其他所著文,有松廳章疏五卷、春風亭筆記二卷,遼金紀年、黃 晚歲,復以釋經爲己任。學者因

校勘記

[1](郡)[羣]盗縱橫 從北監本改。

凡五十卷 錢大昕補元史藝文志作「五十一卷」,並列類目卷數,爲卷凡五十一。 道光本補「一」

字。

廉訪使 滋溪文稿卷八孛朮魯翀神道碑銘作「廉訪副使」。新元史補「副」字,疑是。

(五) [沅] 陵 據黃金華集卷一五蘇御史治獄記改。 按本書卷六三地理志 沅陵縣為辰州路屬

縣,與蘇御史治獄記「辰之沅陵」符。

元史卷一百八十四

列傳第七十一

王都中

年,宋主納土,乃以全閩八郡圖籍來,入觀世祖於上京,降金虎符,授中奉大夫、刑部尙書、 福建道宣慰使,兼提刑按察使,尋除參知政事,行省江西。俄以爲國信使,宣諭日本,至其 王都中字元愈,福之福寧州人。父積翁,仕宋爲寶章閣學士、福建制置使。至元十三

境,遇害于海上。

綮,皆腭胎不敢欺。 夫、平江路總管府治中,時年甫十七。僚吏見其年少,頗易視之。都中遇事剖析,動中肯 給驛券,俾南還,賜平江田八千畝、宅一區。已而世祖追念其父功不置,特授都中少中大 都中生三歲,卽以恩授從仕郎、南劍路順昌縣尹。七歲,從其母葉訴闕下,世祖閔焉, 崑山有詭易官田者,事覺,而八年不決,都中爲披故牘,洞見底裏,其人

列傳第七十一 王都中

乃無所 乃伏率。 逃 罪。 吳江 學舍久壞不治,而郡守缺,都中曰:「聖人之道,人所共由,何獨守得爲乎。」乃 有違拒 、禮殿、 有 司 築堤護田之令而 歸過於衆 人者,都中詢 知其故,皆置不 問, 其

首募大家合錢,新其

其情。 爲監者六,惟江淮所鑄錢號最精 饑,民賴以全活者數十萬。 涉其境。 秩滿,除浙東道宣慰副使。 獄具,縣長東而 都中捕繫之, 下,皆以贓敗。 痛繩以法。 武宗詔更鈔法,行銅錢,以都中爲通才,除江淮泉貨監。 金華有毆殺人者,吏受財,以爲病死。 遷荆湖北道宣慰副使,適歲侵, 餘姚 有豪民張甲,居海濱,爲不法,擅制一 都中躬履山 都中摘屬 谷, 方,更無敢 東覆按,得 以 凡天下 拯其

人,奉使宣撫移 民覃乙死,無子,惟一小妻, 瑟之屬,使其民識先王禮樂之器,延宿儒敎學其中,以義理開曉之,俗爲之變。 以恩,懾之以威,乃皆悅服。 改郴州路總管,郴居楚上流,谿洞徭獠往來民間,憚其强猾,莫敢與相貿易,都中 其獄 ,諉之都中窮治, 及其贅壻, 郴民染於蠻俗,喜鬭爭,都中乃大治學舍,作箋豆簠簋、笙磬琴 悉得其情,而正其罪。 妻誣其壻拜屍成婚, 藏隱 州長 玉杯夜明珠, 吏 而 下, 計其臟至十 株 鄰州茶陵富 連 八 百餘 . 煦之

遷 饒州路總管。 年饑、米價翔踊、都中以官倉之米、定其價爲三等、言於行省、 以爲須 萬五千餘緡,人以爲

神明

民亦相與言曰:「公爲我輩減米價,公果得罪,我輩當鬻妻子以代公償。」時宰聞之乃罷 加十倍,都中責之,一以詔書從事。父老或以兩岐之麥、六穗之禾爲獻,都中曰:「此聖主之 歲貢金,而金戶貧富不常,都中考得其實,乃更定之。包銀之法,戶不過二兩, 曰:「饒去|杭幾二千里,比議定往還,非半月不可。 人七日不食則死,安能忍死以待乎」,其 糶以下等價,民乃可得食,未報。 又於下等價減十之二,使民就糴。 時宰怒其專擅, 而 州縣徵之 都中 郡

中曰:「爲臣子者,使皆避謫,何以集事。」乃請于行省,徧歷三十四場,驗其物力高下以損益 又改浙東道宣慰使都元帥。 之。役旣平,而課亦足,公私便之。 服闋,除兩浙都轉運鹽使,未上,擢海北海南道肅政廉訪使。 乃如前除鹽亭竈戶,三年一比附推排,世祖舊制也。 擢福建閩海道肅政廉訪使,俄遷福建道宣慰使都元帥 任事者恐斂怨,久不舉行。 中書省臣奏國計莫重於

都

嘉瑞,非臣下所敢當。」遂以聞于朝。

以內憂去郡,民生爲立祠。

行省參知政事,中道以疾作南歸。 降金虎符。 鹽使,仍贈襲衣法酒。 天曆初,被省檄,整點七路軍馬,境內晏然。 元統初,朝廷以兩准鹽法久壞,詔命都中以正奉大夫、行戶部尚書、兩淮 都中既至,參酌前所行於 於是天子閔其老,詔卽其家拜江浙行省參知政事。 兩浙者,次第施行之,鹽法遂修。 徙廣東道宣慰使都元帥,三易鎭,皆佩元 尋拜 都 :轉運 至正 河南

列

元年卒。贈昭文館大學士,諡清獻。

所趨嚮。 不增一疃,不易一椽,廪祿悉以給族姻之貧者,人尤以是多之。 政事之名聞天下,而位登省憲者,惟|都中|而已。又其清白之操,得於家傳,所賜田宅之外, 都中歷仕四十餘年,所至政譽輒暴著,而治郡之績,雖古循吏無以尙之。 中年,尤致力於根本之學,自號日本齋。 有詩集三卷。 幼留京師,及拜許衡,即知 當世南人以

王克敬

偉,異日必令器也。」大寧朔土,習尙少文,而克敬獨孜孜爲儒者事。 王克敬字叔能,大寧人。幼奇穎,嘗戲道旁,丞相完澤見之,謂左右曰:「是兒資貌秀

吳人從軍征 有軍士懷恩德來歸而不之納邪!脫有釁,吾當坐。」事聞,朝廷嘉之。番陽大饑,總管王都 州,以內外艱不上。除江浙行省左右司都事。 之,克敬察其言不實,中道數爲開陳禍福,俊悔,將對簿,竟仰藥以死。 者懼外夷情叵測,必嚴兵自衞,如待大敵。 旣仕,累遷<u>江</u>浙行省照磨,尋陞檢校。<u>徽州民汪俊上變,誣富人反,省臣遣</u>克敬往驗 日本陷於倭者,至是從至中國,訴於克敬,願還本鄉,或恐爲禍階。 克敬至,悉去之,撫以恩意,皆帖然無敢譁。 延祐四年,往四明監倭人互市。先是,往監 調奉議大夫、知順 克敬曰:「豈

|中出廪粟賑之,行省欲罪其擅發,克敬曰:「潘陽距此千里,比待命,民且死,彼爲仁,而吾

屬顧爲不仁乎」都中因得免。

牢盆之役,其重者尤害民,當免其它役。」議定以聞,悉從之。 克敬首言:「江南包銀,民貧有不能輸者,有司以責之役戶,甚無謂也,當罷之。」兩浙煎鹽戶 罪重「一卒陞之。治書侍御史張伯高曰:「往者,監選以滅駁爲能,今王御史乃論增品級,可 爲世道賀矣。」尋遷左司都事。時英宗厲精圖治,丞相拜住請更前政不便者,會議中書堂, 曰:「法,答四十七以上不陞,今不至是。」吏曰:「責輕罪重。」曰:「失出在刑部, 銓曹安知其 拜監察御史,用故事監吏部選,有履歷當陞者,吏故抑之。問故,吏曰:「有過。」克敬

以風水爲解,有司不聽。克敬曰:「某貨出某國,地有遠近,貨有輕重,冒重險,出萬死,舍近 從,因歎曰:「使我爲運使,當令越民少蘇矣。」行省檄克敬抽分舶貨,拗蕃者例籍其貨,商人 而 趨遠,棄重而取輕,豈人情邪!」具以上聞,衆不能奪,商人德之。 泰定初,出爲紹興路總管,郡中計口受鹽,民困於誅求,乃上言乞減鹽五千引。運司弗

以 一婦人至,怒曰:「豈有逮婦人千百里外,與吏卒雜處者,污敎甚矣!自今毋得逮婦人。」 擢江西道廉訪司副使,轉兩浙鹽運司使,首減紹興民食鹽五千引。 溫州遠犯私鹽者,

列傳第七十一 王克敬

建

議著爲令。

若是, 者 師,省臣從之。 术 明 果輸 信 可 復 罪。 擢湖南 漕 **今蹈萬死**, 而 道廉訪使,調海道都漕運萬戶。 南 還,行省欲 完所漕 坐罪督運者,勒其還趨直沽。 而還, 豈得已哉!」乃請令其計石數,附次年所漕**舟達**京 是歲,當天曆之變, 克敬以謂:「脫其常年 海漕舟有後至直沽 而 往返

F 尙 書侍御史,又遷淮東廉訪使,以正綱紀 少 日 軍還,賜錢若干,英后入觀,賜錢若干。 議 一是 ·, 平 雲 南 書,乘傳至 且. 用財宜有道,大長公主供饋素優, 召爲參議中書省事。 罪狀 不周 省獨先受賞,是不均也。 也。」宰相 不明而輕罪大臣,何以白天下。 淮安,墜馬,居吳中養疾 以聞,帝 有以飛語中大臣者,下其事,克敬持古八議之法,謂勳貴可以不 可其議。 英后遠還,徒御衆多,非大錫賚,恩意不能洽,今賜 拜 爲己任,不縱貪墨,不阿宗戚,聲譽益著。 今賜錢出無名,不當也。 克敬乞覆奏,宰相怒曰:「參議 中奉大夫、參知政事,行省遼陽。 宰相傳旨大長公主爲皇外姑,賜錢若干,平雲南 自諸軍征討以來,賞 乃敢格詔命邪 俄除江南行 入為 二克敬 (格未 東部 臺治 物

鮮

克敬曰「匹夫妄獻米,徼名爵以榮一身,今身死家破,又已奪其爵,不可使一郡之人均受其 石 獻 京 元 師者 統 初 了, 其 起爲江浙行省參知 人旣死, 子孫 貧 且行乞,有 政事,請罷富民承佃江淮田,從之。 司 仍歲徵,弗足則雜置松江 松江大姓,有歲漕米萬 田 賦中,令民包納。

列傳第七十一 任速哥

事不認眞,豈盡忠之道乎。」故其歷官所至,俱有政績可紀,時稱名卿。 亦如之。 者,亦將拘法坐視邪!」乃調兵往捕之,軍行給糧有差。 謂不可忽天變而毒疲民。嶺海徭賊竊發,朝廷調戍兵之在行省者往討之, 缺,故事,漢人不得與軍政,衆莫知所爲,克敬抗言:「行省任方面之寄,假令萬一有重於此 無功德而 害,國用寧乏此耶」具論発之。江浙大旱,諸民田滅租,唯長寧寺田不滅,遂移牘中書,以 視事五月,請老,年甫五十九。謂人曰:「穴趾而峻墉,必危,再實之木,必傷其根。 忝富貴,何以異此?故常懷止足之分也。」 又曰:「世俗喜言勿認真,此非名言。 臨 事聞于朝,即令江西、湖廣二省給糧 會提調 軍馬官

十一 克敬喜讀書,其有所得者,輒抄爲書。又有所著詩文奏議傳于世。 贈中奉大夫、陝西等處行省參知政事,追封梁郡公,諡文肅。 元統三年卒,年六

子時,以文學顯,歷仕中書參知政事,至左丞,以翰林學士承旨致仕。

任速哥

其賢,薦于朝。英宗召見,與語奇之。 所在,必亟爲之,有古俠士風。 任速哥,渤海人。自幼事父母以孝稱。性倜儻,尤峭直,疏財而尙氣,不尙勢利。 而家居恂恂,儒者不能過。 由是出入禁闥,待以心腹,將擇重職處之。 初襲父官,爲右衞千戶。 未幾,鐵 公卿以 義之

失 與 倒 刺沙搆謀,英宗 遇弑,遂引去。 自是不復出仕,居常扼腕,或醉歸,慟哭過市,時人目

以爲狂,莫知其意也。

之。 於 逆,何患不克。 計,則先 夕 居 痛 是燕帖木 朔 冬,乃告以 方, 心而 泰定中, 帝之讎 難 不 以達意。 兒 能報者 倒 許之。 況 所謀,燕帖木兒初聞之矍然。 可雪 刺沙 公 ¹,以未 也。」速速深然之。 國家世臣,與國同休戚, 次子懷王,人望所 用 事,天變數見。 有善策也。 今吾思之,武宗有子二人,長子周王, 歸,而近在金陵,易於傳命。 時燕帖木兒方僉樞密院 速哥乃密與平章政事速速謀曰:「先帝之讎,孤 今國難不恤,他日有先我而謀者,禍必 因徐說之曰:「天下之事,惟順 事,實握兵柄, 若能 同 正統 逆兩塗,以 心 推戴 二人深結 所屬, 以以 及 臣朝 然遠 順討 圖大 納

功乎 統一逐 之變,不 諸 與 關 速 速從 []文宗慰勉之,乃拜命。 致 卽 召文 和 能 皇帝位 燕帖 元 勇效 武 年,懷王 百僚集闕下,諭以 木 ,是爲文宗。 一死,以 見奉 自金陵遷江陵,俄而泰定帝崩,倒剌沙踰月不立君,物情洶洶,速哥乃 豫王令,率諸豪傑,乘 報國 士之知。 論功行賞, 而其他賞賚,一無所受。 翊戴大義, 今日 擢 速哥 :之舉,皆諸將相之力,在臣未足贖罪,又曷敢言 時奮義,以八月四 遣使迎 爲禮部尚書,速哥辭曰 懷王於江陵。 專遷長寧寺卿,繼出爲<u>安豐路總管</u> 日_, 執 懷王 居守省臣, 至京師, 「臣曩備宿衞,南 羣臣 發兵 寒居庸 請 正 坡 大

往 又入爲壽福府總管,又爲都水使者。 ·遜謝,終無所言,君子尤以是多之。 居官恂恂,無幾微自伐之意。 人或詢以翊戴之事,往

陳思謙

訂 年四十矣。 之前。」詔從之。 鳳二司,請併入宣徽,以淸禮部之選。 詳究,尤深於邵子皇極 陳 思謙字景讓,其家世見祖祐傳中。 召見興聖宫。 而二司隸禮部 經世書。 明年二月,授典寶監經歷。 如故。 文宗天曆初 其官屬不當與文武臣並列朝會,宜置百官之後、大樂 思謙少孤,警敏好學,凡名物度數、綱紀本末, 政,收攬賢能,丞相高昌王亦都護 + 月,改禮部主事,首言"「敎坊、儀 舉 思謙 "", 時 考

之子,告海 從之。 徙, 正 綱 及來歸,皆無地可耕,思謙言一聽民倍直贖之, 紀,五日審銓衡,六日勵孝行,七日 至 順 監察御史李擴行部甘肅, 元年,拜西行臺監察御史,建明八事:一曰正君道,二曰結人心,三曰崇禮讓,四 延都掠其財。 擴聽之,以酷法抑其父。 金州民劉海延都, , 新民力, 八曰修軍政。 思謙劾擴逆父子之天,壞朝廷之法,遂抵 使富者收棄入之利,貧者獲已棄之業。 其男元元, 先是,關陝大饑,民多鬻 自稱流民王延祿, 非海 延 產流

|擴罪。

業,而傳祚萬世者乎!臣愚以興亡懇懇言者,誠以皇上有元之聖主,今日乃皇上盛時圖治 代、漢、唐所未有也。民有千金之產,猶謹守之,以爲先人所營,况君臨天下,承祖宗艱難之 千餘年,天下一統者,六百餘年而已。我朝開國,百有餘年,混一六十餘年,土宇人民,三 重,下有四海烝民之生,前有祖宗垂創之艱,後有子孫長久之計。中論秦、漢以來,上下三 之機、茲不可失也。」又言:「戶部賜田、諸怯薛支請、海青獅豹肉食,及局院工糧,好事布施, 牛羊之富,又足以給國用,非小補也。」又言:「銓衡之弊,入仕之門太多,黜陟之法太簡,州 無殷實之戶,接濟則無羨餘之財,倘有征行,必括民間之馬,苟能修馬政,亦其一助也。方 無益不急之費,以備軍國之用,苟能三分損一以惠民,夫豈小哉」,又言:「軍站消乏,簽補則 下,各舉所知,得才則受賞,失實則受罰。三曰,古者刺史入爲三公,郎官出宰百里,蓋使外 不急者,從實滅幷,其外有選法者,幷入中書。二日,宜參酌古制,設辟舉之科,令三品以 郡 統領十監,專治馬政,幷畜牛羊,數年之後,馬實蕃盛,或給軍以收兵威,或給站以優民力, 今西越流沙,北際沙漠,東及遼海,地氣高寒,水甘草美,無非牧養之地,宜設置羣牧使司, 切泛支,以至元三十年以前較之,動增數十倍。至順經費,缺二百三十九萬餘錠。宜節 之任太淹,朝省之除太速,欲設三策,以救四弊。一曰,至元三十年以後增設衙門,冗濫 明 《年二月,遷太禧宗禋院都事。 九月,拜監察御史,首陳四事,言:「上有宗廟社稷之

除。」帝可其奏,命中書議行之。 職 績 職 者任 識朝廷治體,內官知民間利病。今後歷縣尹有能聲善政者受郎官御史,歷郡守有奇才異 績 修非出 患使尚書,其餘各驗資品通遷,在內者不得三考連任京官,在外者須歷兩任,乃遷內 .類、守不敗官者,則循以年勞,處以常調。 凡朝缺官員,須二十月之上,方許遷

祖宗立臺憲之意。繼此事有當言者,無隱。」賜縑綺旌之。未幾,遷右司都事。 遂著於令。有韶起報嚴寺。

思謙曰:「兵荒之餘,當罷土木,以紓民力。」帝嘉之曰:「此正得 時 有官居喪者,往往奪情起復,思謙言:「三年之喪,謂之達禮,自非金革,不可從權。」

廉訪 失推明。」遂令法曹議,著爲定制。 無異,是視人與牛馬等也,法應加重。因奸殺夫,所奸妻妾同罪,律有明文,今止坐所犯,似 死罪,而故殺從而加〔功〕之人,〔1〕與鬭而殺人者,例杖一百七下,得不死,與私宰牛馬之罪 副使,至潍未期月,引疾歸。六月,召爲中書省員外郎,上言:「强盜但傷事主者,皆得 元統二年五月,轉兵部郎中。十一月,改御史臺都事。 重紀至元元年五月,出爲淮西道

刑部尚書,改湖南廉訪使。八年,遷淮東宣慰司都元帥。九年,遷浙西廉訪使、湖廣行中書 思 一議力言于執政、當竭府庫以賑貧民、分兵鎭撫中夏、以防後患。 五年、參議中書省事。 至正元年,轉兵部侍郎。俄丁內艱,服除,召爲右司郎中。歲凶,盜賊蠭起,剽掠州邑,

列

省參知政事,辭。

所致,今國家有難,汝當身先士卒,以圖報效,庶無負朝廷也。」 <u>咸其言,從之。其姪立本爲屯田萬戶,召語曰:「吾祖宗以忠義傳家,汝之職,乃我先人力戰</u> 卒用之。」王曰:「非奉詔,不敢調。」思謙言:「非常之變,理宜從權,擅發之罪,思謙坐之。」王 集,分道並進,遂禽渠賊,廬州平。旣而潁寇將渡淮,又言于王曰:「潁寇東侵,亟調芍陂屯 惟王圖之。」王曰:「此吾責也,但鞍馬器械未備,何能禦敵。」思謙括官民馬,置兵甲,不日而 一句,豈得坐視!思謙願與王戮力殄滅。且王府屬怯薛人等,數亦不少,必有能摧鋒陷陣者, 已不可撲滅矣。言于宣讓王帖木兒不花曰:「承平日久,民不知兵,王以帝室之胄,鎭撫淮 十一年,改淮西廉訪使。 廬州盜起,思謙亟命廬州路總管杭州不花領弓兵捕之,而賊

明日卒。贈宣猷秉憲佐治功臣、翰林學士承旨、榮祿大夫、柱國,追封魯國公,諡通敏。 十,上章乞老,不允,特旨進一品,授榮祿大夫,仍御史中丞。入謝,咸疾,及命下,强拜受命, 尋召入,爲集賢侍講學士,修定國律。十二年,拜治書侍御史。明年,陞中丞,年近七

牌 元 善

韓元善字大雅,汴梁之太康人。唐檢校司空贈司徒充,以宣武軍節度使兼統義成軍,

列傳第七十一 韓元善 崔敬

留鎭 監 生,積 汴,子孫遂爲太康韓氏。 分 中程 ,釋褐,除新 州 判官,累 **父克昌**, 擢 至大間仕爲監察御史,以論事有名聲。 江南行 臺 監察御 史, 歷中 書 左司 郎 中、 元善由國子 吏 部 侍郎

吏部

尚書、

僉樞

密院

事

給 元善 廉 飽餉 訪 及 使。 至正 參 九年 知 三年,拜 政 年,御史大夫也先帖木兒總兵討汝寧,元善至衞 事 召拜 韓鏞皆漢人, 中書參 中 書左丞、同 知 政事。 使退避, 知經筵事。 五年,遷 勿與 大司農卿,尋出爲江南行御史臺中丞、燕南肅 俱, + 由是遂 年,丞相 與右丞 脫脫奏事 輝,以 玉 樞虎兒吐 污病卒。 內廷, 華 以 同 事 分省彰德以 關 兵機 政 而

塾 置 一, 延 田 百畝爲義 元善 名士,以敎族 義 陳 性純 法,不 莊,以周貧族。 正,明達政體 価郷上官, 人子弟云。 國是所在,倚之以 ,數歷臺閣三十餘年,遂躋丞轄,以文學治才,羽翼廟謨,論議之 至正交鈔初行,賜近臣各三百錠,元善復以買田六百畝 爲 重。 嘗以謁告侍親居家,效范文正公遺規, 爲義

崔敬

初 辟御史臺察院 崔 敬 字伯恭,大寧之惠州 書吏,歷刑部 令史、徽政院掾史,遂陞中書掾。 通 刑 名法律之學。 淮東、 山南廉訪 至元 五 司,皆辟 年,用累考及格,授 書 吏。

刑部主事。

武宗 得 族 此 州 生 疏 叔 后、太子,以全母子之情,盡骨肉之義,天意回,人心悅,則宗社幸甚!」不報。 其 播 他變,關係 困阨者,爲之教養,不使失所。況皇上貴爲天子,富有四海,子育黎元,當使一夫一婦無不 母 "以陛下之心爲 ,而皇弟燕帖古思,文宗子也,又放之高麗。 六年, 湿,天理人情,有所不忍。 有 所,今乃以同氣之人,置之度外,適足貽笑邊邦,取辱外國。 視明、文二帝,皆親子也,陛下與太子,皆嫡孫也。以武皇之心爲心,則皆子孫 階禍之罪,亦削洪名。 遷 非輕。 樞 !密院都事,拜監察御史。 心,未免有彼此之論。臣請以世俗喻之:常人有百金之產,尙置 興言至此,良爲寒心!臣願殺身以贖太子之罪,望陛下遣近臣迎歸太 盡孝正名,斯亦足矣。惟念皇弟燕帖古思太子,年方在 明皇當上賓之日,太子在襁褓之間,尙未有知,義當矜憫。蓋 時旣毀文宗廟主,削文宗后皇太后之號,徙東安 敬上疏,略曰:「文皇獲不軌之愆,已徹 況蠻夷之心,不可測度,倘 一義田,宗 ,固無親 一幼,罹 廟祀;

耳朶思,乃先 以 親 爲常 記之禮,雖動植無知,罔不歡悅,而國家多故,天道變更,臣備員風紀,以言爲職,願大駕 又上疏,諫天子巡幸上都,宜御內殿。其略曰:「世祖以上都爲淸暑之地,車駕行幸,歲 ,閣有大安,殿有鴻禧、睿思,所以保養聖躬,適起居之宜,存畏敬之心也。今失剌斡 (皇所以備宴游,非常時臨御之所。 今陛下方以孝治天下,屢降德音,祗行宗廟

還大內,居深宮,嚴宿衞,與宰臣謀治道。 萬機之暇,則命經筵進講,究古今盛衰之由,緝熙

聖學,乃宗社之福也。」

功,又將何以爲賜乎!乞追回所賜,以示恩不可濫,庶允公論。」 北,蝗飛蔽天,正當聖主恤民之日。近侍之臣,不知慮此,奏禀承請,殆無虛日,甚至以府庫 百年所積之寶物,遍賜僕御閽寺之流、乳稚童孩之子,帑藏或空。萬一國有大事,人有大 天物,爲後世慮至遠也。今山東大饑,燕南亢旱,海潮爲災,天文示儆,地道失寧,京畿南 時 ·帝數以歷代珍寶分賜近侍,做又上疏曰:「臣聞世皇時,大臣有功,所賜不過槃革,重

濁也。 楚之下,不敢不誣服耳。」敬詢知始謀者,乃大同王濁,十餘年事不泄,而有司誤以李秀爲王 相 識,敬疑而讞之。秀曰:「吾以訓童子爲業,居村落間,有司至秀舍,謂秀爲僞造鈔者,捶 是年,出愈山北廉訪司事,按部全寧。獄有李秀,以坐造偽鈔,連數十人,而皆與秀不 移文至大同,果得王濁爲眞造僞鈔者。

西行省左右司郎中,入爲諸路實鈔提舉,改工部侍郎。 至 正初,遷河南,又遷江東。所至抑豪强,惠下窮,洗寃滯,興學勸農,百廢具舉。除江

工萬人,不三月告成,咸服其能。除刑部侍郎,遷中書左司郎中。 十一年,遷同知大都路總管府事。直沽河淤數年,中書省委敬浚治之,給鈔數萬錠,募

列傳第七十一 崔敬

處大逆,敬詳憲府以 十二年, 歷兵部尙書,爲樞密院判官。 私相 害, 致有是變,殺 人者自有 十四年,遷刑部尙書。 典章 一,得坐一 廣東府憲讎 大逆非 謀反, 殺,以沙加班 則 |不科

得

坐

家。

敬立論

全重

而

就輕,朝廷咸以爲然。

歲 使,朝廷給以鈔十萬錠,散於有司,招致居民、軍士,立營屯種,歲收得百萬斛,以給 餘,其法 五年,復爲樞密院判官,尋拜參知政事,行省河南,復爲兵部尚書,兼濟寧軍民屯田 并井。 邊防,居

乃請行 供給 萬 理 生王恪等,願請往,敬以便宜授以官,俾之行,至鄆城,見李秉彝、田豐等, 政 我軍 豐 事 諸軍 俺普,分省陵州。 强且 用以給 與秉彝皆悔過自新。 ·有七年,召爲大司農少卿,遂拜中書參知政事。 納粟補官之令,中書以 勝,彼將敗而 事 軍 無不集。 費、民獲少蘇。 陵州 降,如得仗義之士,直抵其巢穴而招安之, 丞相以其能上聞,賜之上尊,仍命其 Щ 乃南 其言聞,韶從之。 東郡邑之復,敬之策居多。 北要衝,無城郭 河北 ,而居民散處,敬兼領兵、刑、戶、工 燕南 盜據齊魯,敬與平章政事答蘭 敬以軍馬供給浩繁,而 士民踵躡 便宜行事。 亦方 而至,積粟百 面之幸也。」有國 敬 諭 與俺普 以 逆順 萬 民 密議 四 石、綺段 力日疲, 禍 部 参知

十八年,除山東行樞密院副使,俄遷江浙行省左丞。卒,年六十七。 贈資善大夫,江浙

校勘記

[1] 而故殺從而加[功]之人 從道光本補。按本書卷一〇五刑法志有「諸殺人,從而加功,無故殺

之情者,會赦仍釋之」。加功,謂助人犯罪。

列

傳

第七十一

元史卷一百八十五

列傳第七十二

呂思誠

生,目有神光,見者異之。及長,從蕭嘝學治經。已而入國子學爲陪堂生,試國子伴讀,中 父也。母馮氏,夢一丈夫,烏巾、白襴衫、紅鞓束帶,趨而揖曰:「我文昌星也。」及寤,思誠 仲堪生時敏,時敏生釗,爲千夫長,死國事。釗生德成,德成生允,卒平定知州致仕,思誠 呂思誠字仲實,平定州人。六世祖宗禮,金進士,遼州司戶。宗禮生仲堪,亦舉進士。

力。民石安兒等,流離積年,至是,聞風復業。印識文簿,界社長藏之,季月報縣,不孝弟、 均其徭役;刻孔子象,令社學祀事,每歲春行田,樹畜勤敏者,賞以農器,人爭趨事, 地無遺 擢泰定元年進士第,授同知遼州事,未赴。丁內艱。改景州蓨縣尹。差民戶爲三等, 其選。

列

傳第

骨 存 逐 酒 互 同 力 後得 不 名 道 爨。 肉 來 學 江 人 職 事 以 士,雨 見,愬 召召 官價 都 田 生 李之兄: 養之。 鎭民 業 相 戶 其 董 者 亦 共 主 思 亟 仲 張復,叔 弟 弟 隨 與 以 誠 悉 舒 天旱,道 還民。 至,遂有 相 匿 之約,終彝 書 盡 加 謂 羊 之, 祛 ・,思 母孀居,且瞽 其 日三 罰 翟彝 弊。 土 年。 誠叱之退。 其 持 我等終不 、輸作。 身粟三十石,仍代之輸,彝得爲良民。 青蛇, 自其 天曆 縣 多 大父因 兵 日盧. 淫 丐 胥吏至 敢見尹矣。」各具酒食相 興,豫貸 一祠,動 王青兄弟四人,友愛彌 食以活,恐思誠聞之,即 師谷小青 河南 一社者,何 以 鈔 百餘計,刑 亂, 於富民,令下 謂 被掠 人用 龍 爲 也,禱 飲 牲 人奴, 食若干 以 造軍 篤,思 切 祭者 之卽 責 日 歲納 器,事 - , 多者 迎養。 無虚 悔前 誠至 他 雨 T 日 皆先集、民 其 思誠 粟以 責 日 過 買 思誠 一,析 家 羊 償 思誠 以其 発作 其 憐其貧,令爲媒 取 劉 居三十年 直 悉命毁之,唯 酒 智 惑人,殺蛇, 用 勸 社 豪猾 思 不 酬 民 誠 擾 ·,復 |李 敷 者 知 于 同 彝

長 貢 無敢 擢 翰 林 或 史院 思 誠 在 檢 閱 末 官 僚 獨 俄陞 跪 編修。 閣 下 爭 文宗在 日 或 奎章閣 史紀 當代人君 有旨 取 善惡,自古天 或 皮閱 之,左右 子 無 异) 、觀閱 以 往 院院

事

涿

寢。

朝 政 尋擢 章上,留 或 子 監 中不 丞, 下, 陞 司 思誠納印綬 業,拜 監 察 殿 御 前 史。 遂出愈廣西 與斡 玉 倫 徒等劾中 廉訪司 事 書 平 巡行 章 政 那縣 事 徹 一土官 里 帖 有于 木 兒 元 變 帥 亂

者 ,恃勢魚肉人,恐事 覺,陰遣其子迓思誠於道, 思誠縛之, 悉發其陰私,痛懲其罪 道

震肅。

爲天子耳目,不爲臺臣鷹犬也。」不聽。 浙西。 達識帖睦邇時爲南臺御史大夫,與江浙省臣有隙,嗾思誠 已而聞行省平章左吉貪墨,浙民多怨之,思誠 劾之, 思 誠

史, 兒曰:「姑徐之。」思誠趣入奏,鞏卜班罷。 試讀卷官。 事,及事敗,詿誤者三十餘人,將置於法,思誠言於朝,皆釋之。 道官不盡 生抗疏留之,不可。 無他,遷河東廉訪使。 爲副使,御史臺留爲侍御史。會平章政事鞏卜班不法,監察御史劾之,御史大夫 人多嫉之,遂以言罷。起爲右司郎中,拜刑部尙書。 其罪,流之海南 加榮祿 復召爲國子司業,遷中書左司員外郞。 職, 改禮部尙書,御史臺奏爲治書侍御史,總裁遼、金、宋三史,升侍御史,樞密院 大 夫,總裁后妃、功臣傳,會粹六條政類,帝賜玉帶,眷顧 罷之。 道中授湖北廉訪使,入拜中書參知政事,陞左丞,轉御史中丞。 再任左丞、知經筵事,提調國子監, 未幾,召爲集賢侍講學士,兼國子祭酒,出爲湖廣行省參知 大夫銜思誠,將謀擠之,思誠卽謁告,朝廷 **盗殺河南省臣,以爲檄呼廉訪使段輔** 科舉復行,與僉書樞密院事 兼翰林學士承旨、 陞左司 彌篤。 郎中。 又為 知制 思誠素剛 樞密副使 也先帖木 韓鏞 誥 政事 知思誠 劾奏清 兼 修國 爲 御

仍 知 經筵 事 , 復 爲 中 書 左 丞。 御史大夫納麟, 誣參政孔思立受財事, 或 欲 連 中思誠, 納聯

曰:「呂左丞素有廉聲,難以及之。」遂止。

正錢 謂 矣。 哲篤 帖 汝 更 反滋 立 爲 我 法 不 孝 鲖 母 貫 木兒獨曰:「呂祭酒之言亦有是者, 有二 通 乎 多 且至 ,下料爲子 文省權 文 日 爲子者乎。」 拜 中統 工厂至元 古今, 爾 集 一字策 欲 偰 元 賢 鈔、至元 鈔 哲篤 學士 況 鲖 道聽 日 誣 7, 猶故 鈔多 錢 祖宗之成憲,其可 世皇,是汝 ,譬之蒙 仍 曰:「錢鈔 行 而 爲,故更之爾。」思誠 鈔 座 千文爲 戚 不得 塗說 兼國子 、一交鈔 一咸笑。 也,家之童奴且識之,交鈔 古人 母 兼 與 何足行 ·祭酒。 行不 分爲五 以漢 思誠 ,銅錢 世皇爭高下也。 行 何 得 輕改哉。」偰 哉。」 人子爲後, 叉曰: 如 項,慮下民 爲子,命 吏部 _? 但不當在廟堂上大聲厲色爾。」已而監察御 偰 思 丞相 曰:「至元 尙 錢鈔 哲 誠 . 書偰哲篤、左司都事武祺等,建言 日:「錢 脫脫 廷臣 篤 哲篤 皆 用 且自 忿 知之,藏其 人類 集議 見 法, 日) 猶新 鈔非偽, 曰:「祖宗法 鈔 思誠言直,頗 世 見 也, 兼 皇以 我等策旣 爲 思誠 戚 行 實 尚終爲 輕輕 來, 也, 人為偽 致, 而 曰:「中統、至元 諸帝 棄 重不 弊,亦可 雖 不可行,公有 《其虚 以 漢 狐 亦 爾。 倫, 皆 虚 人之子,豈 疑 敢不親, 諡 恐恐 換實 未 何者 改矣。」 交鈔 日 決。 不 孝, 也。 利 爲 岩出 人未 更鈔 何策? 自 母,何 思 有故 御史大夫 於 改 有 今歷代錢 誠 國 其 識 史承 法,以 母 日「汝 家 亦 紙 成 思誠 也 者 子 也。 爲 爲 憲 爲 望 也先 格幣 其 父 偽 至 偰 輩 者 料 風 미 偽 而

乎。」自是無敢復至。曾未數日,召還,復爲中書左丞。思誠去二日,城復陷。移光祿大夫、 明部伍,先謀自守,徐議出征。苗軍暴橫,侵辱省憲,思誠正色叱之曰:「若等能殺呂左丞 旨,効思誠狂妄,奪其誥命幷所賜玉帶,復左遷湖廣行省左丞,遣太醫院宣使秦初卽其家 大司農。俄得疾,以至正十七年三月十七日卒,年六十有五。 大會軍民官吏告之曰:「賊去,示吾弱也,規將復來。」於是申號令,戒職事,修器械,葺城郭, 城。」遂行,諸將不獲已,隨其後,竟不煩轉鬭而入。詢其故,賊倉卒無備,盡驚走。思誠乃 迫遣之。 丞,今年呂思誠爲湖廣左丞,世事至此,足下得無動心乎。」 思誠氣字凝定,素以勁拔聞,不爲勢利所屈。三爲祭酒,一法許衡之舊,諸生從化,後 抵武昌城下,語諸將曰:「賊據城與諸君相持經久,必不知吾爲此來,出其不意,可以入 初窘辱之,不遺餘力,思誠不爲動。 貽書參議龔伯遂曰:「去年許可用爲河南左

漢通紀若干卷。諡忠肅。 多爲名士。 嘗病古註疏太繁,魏了翁删之太簡,將約其中以成書,不果。有文集若干卷、兩

汪澤民

汪澤民字叔志,徽之婺源州人,宋端明殿學士藻之七世孫也。[1]少警悟,家貧力學,旣

第,授承 婦 長, 而 便養,不允。 以 事 逐 奸 集 通諸 事 事 勠 郞 經 成 南歸 同 延祐 而澤民至,察知其枉,爲 知岳 奉 母之官。 初,以春秋 州路平江州事。 州民 中鄉貢,上禮部,下第,授寧國路儒學 李氏,以貲雄,其弟死,妻誓 以 直之。 母年八十,上書 會朝 廷徴 願奪所授官一等或 江南 包銀,府檄澤民 不他適,兄利其 Ė 二等。 五 財 分辨,民 年,遂登進士 嗾 得 近 族 不擾 地 人 誣 以

梁楫 能 出 郡 之, 白 同 復 尋 澤民 僚畏杂兒赤,托故不視 事 遷 檄澤民 連 南 廣 IE 安路總管府推官。 東廉 一色與辨,御史沮 讞 之, 訪副 獄立具,人服 使劉珍,三坐繫者二百餘 事,澤民獨捕甲,繫之獄。 **. 作,夜竟去,乃卒罪王甲。** 鎭守萬戶朶兒赤,持官府短長,郡吏王甲,毆傷屬縣長官,訴 其 明。 人,省府官凡六委官鞫問,皆顧 朵兒赤賂巡按御史,受甲家 潮州府判官錢珍,以奸淫 忌 事 人訴,欲 殺 淹 推官 延弗

召 僧 久 絕往 不 勝 問之,乃其 遷 考掠,乃誣服,三經審錄,詞無異,結案待報。 來,一日,邀廣飲,廣弟子急欲 信 州 路總管府推官。 《弟子刀也,一訊吐實,卽械之而 丁母憂,服除,授平江路總管府推官。 得師財, 且苦其箠楚,潛往它僧所 出他僧,人驚 澤民 取行凶刀視之,刀上有 以 為神 有僧淨廣,與他 殺之,明 H :鐵工 訴官,它 僧 一姓名, 有域,

調 濟寧路兖州知州,孔子後衍聖公襲封職三品,澤民建議,以謂宜陞其品秩,以示褒崇

以嘉議大夫、禮部尚書致仕。旣歸田里,與門生故人相往返嬉游,超然若忘世者。 老尊賢之地,先生何爲遽去,願少留,以副上意。」澤民曰:「以布衣叨榮三品,志願足矣。」遂 書成,遷集賢直學士,階大中大夫。 未兩月,即移書告老,大學士和尚曰:「集賢、翰林,實養 宣聖之意,廷議從之。至正三年,朝廷修遼、金、宋史,召澤民赴闕,除國子司業,與修史。

夫、江浙行中書省左丞,追封譙國郡公,諡文節。 兵。旣而寇益衆,城陷,澤民爲所執,使之降,大駡不屈,遂遇害,年七十。事聞,贈資善大 雖無官守,故受國厚恩,臨危愛死,非臣子節。」留不去,凡戰鬭籌畫,多澤民參決之,累敗賊 日就之詢守禦計,城得無虞。明年,長槍軍瑣南班等叛,來寇城,或勸澤民去,澤民曰:「我 十五年,蘄黃賊陷徽州,時澤民居宣州。已而賊來犯宣州,江東廉訪使道童雅重澤民,

干文傳

入官,而力教其子以文易武,故雷龍兩舉進士,宋亡,不及仕。及生文傳,乃名今名以期之。 <u>干文傳字壽道,平江人。祖宗顯,宋承信郎。父雷龍,鄉貢進士。宗顯之先世以武弁</u>

書院山長。仁宗詔舉進士,文傳首登延祐二年乙科,授同知昌國州事,累遷長洲、烏程兩縣 文傳少嗜學,十歲能屬文,未冠,已有聲譽,用舉者爲吳及金壇兩縣學教諭、饒州慈湖

尹,陞婺源知州,又知吳江州。

以牧此民 獷 久乃自屈 不易治 文傳 服。 ·至有剽掠海中若化外然者,亦爲之變俗。 `,可坐視而弗之救乎。」乃亟為陳理,上官莫能奪,民賴以免。 長於治劇,所至俱有善政。 鹽場官方倚轉運司勢,虐使州民,家業破蕩,文傳語同列曰:「吾屬受天子命, 自其始至昌國,卽能柔之以恩信,於是海島之民,雖頑 初,長官强愎自恣,文傳推誠 以待之,

上 凡 海 民 長洲 田百畝,令以三畝入官,爲受役者之助。文傳旣專任其縣事,而行省又以無錫州及華亭、 兩縣之事諉焉。 爲文傳鄕邑,文傳徙榻公署,無事未嘗輒出,而親舊莫敢通私謁。 文傳諭豪家大姓,以腴田來歸,而中人之家,自是不病於役 會創行助役法,

從之。 不死。 妾,殺 之卽飲,王遂伏辜。丹徒縣民有二弟共殺其姊者,獄久不決,浙西廉訪司俾文傳鞫之,旣得 其情,其母乞貸二子命,爲終養計,文傳謂二人所承有輕重,以首從論,則爲首者當 其 兒焚之。 文傳令妾抱兒乳之,兒啼不就乳,妾之父母吐實,乃呼鄰婦至,兒見之,躍 在烏程,有富民張甲之妻王,無子,張納一妾於外,生子,未晬,王誘妾以兒來,尋逐 文傳聞而發其事,得死兒餘骨,王厚賄妾之父母,買鄰家兒爲妾所生,兒初 入其懷,乳 死,司官

|婺源之俗,男女婚聘後,富則渝其約,有育其女至老死不嫁者,親喪,貧則不舉,有停其

列傳第七十二 韓鏞

婦,江 凛, 上 歸之。 知之,利其賄 爲諸州 柩累數世不葬者。 旣客死,張走數千里,返其柩以葬,前妻之子困苦之,旣而殺之,瘞其屍 世居婺源,故業爲豪民所占,子孫訴于有司,莫能直,文傳諭其民以理,不 縣最。 復募好義者,卽其故宅基建祠,俾朱氏世守焉。 不問,文傳乃發其事,而論如法。 韓鏞時愈浙西廉訪司事,作烏程謠以紀其績,論者謂其有古循 文傳下車,即召其耆老,使以禮訓告之,閱三月而婚喪俱畢。 文傳涖官,其所設施多此類,故其治行 有富民江丙,出游京師,娶娼 吏之風。 山谷間 煩窮 宋大儒朱 女張 治 往往往 官司 而 悉 爲

傳集賢待制。 至正 三年,召赴 亡何,以嘉議大夫、禮部尚書致仕。卒,年七十八。 一闕,丞詔預修朱史,書成,賞賚優渥, 仍有旨四品以下各進一官。 爲文 擢|文

務雅正,不事浮藻,其於政事爲尤長云。 文傳 氣貌充偉,識度凝遠,喜接引後進,考試江浙、江西鄉闈,所取士後多知名。

韓鏞

者常 事 韓鏞 十之九。 泰定 字伯高,濟南人。延祐 匹 「年,轉 帝 乃 國子 欲 以中書參議傅巖起爲吏部尚書,鏞上言:「吏部掌天下銓衡,巖起從吏 博士,俄拜 五 監察御史。 |年中進士第,授將仕郎、翰林國史院編修官,尋遷集賢都 當時由 進士入官者僅百之一,由 更致 位 顯 要

入官,烏足盡知天下賢才。 況尚書秩三品,巖起累官四品耳,於法亦不得陞。」制 可其奏。

最,所至郡縣,爲之肅然。 天 曆 元年,除愈浙西廉訪司事,擊姦暴,黜貪墨,而特舉烏程縣尹干文傳治行 二年,轉江浙財赋副總管。 至順元年,除國子司業, 尋遷南行臺 爲諸縣

治

書侍御史。

時 所 順 帝 初,歷僉宣徽及樞密院事。 事者誣劾其贓私,乃罷去。 至正二年,除翰林侍講學士,旣而拜侍御史,以剛介爲 五年,臺臣辨其誣,遂復起參議 中書省 事

特署 使笞行省臣及諸郡長吏。 于朝,其出 泊,僚屬亦皆化之。 與 經師,旦望 皆毁之。 之尤至,將爲盜,必卜之。 之講討經義, 鏞 七 姓名,授饒州路總管。 年,朝廷愼選守令, 人初大駭,已而皆嘆服。 .使于饒者,鏞延 一必幅 巾深衣以謁先聖, 由是人人自力於學,而饒之以科第進者,視他 先是,朝使至外郡者,官府奉之甚侈,一不厭其所欲,卽 獨鏞無預。 見郡舍中,供以糲飯, 鳙至,即撤其祠宇,沉土偶人于江。 參知政事魏中立言于帝:「當今必欲得賢守令,無加鏞者。」帝乃 饒之爲俗尚鬼,有覺山廟者,自昔爲妖以 月必考訂課試,以示勸勵。 鏞 知民可教,俾俊秀入學宮,求宿儒學行 (鏞治政、雖細事、其詳密多類此。 退皆無有後言。 每治政之暇,必延 郡爲多。 凡境內淫祠 其後有旨以織幣脆薄,遣 一禍福 |鏞居官廨, 銜 俱尊者,列為五 有 人,為盜賊者事 之,往往騰謗 不 見其師生, 合祀典者, 自奉澹

脱罷,用事者悉誅,而鱅又獨免禍。乃遷西行臺中丞,歿于官。 |鏞有言,不見聽。人或以鏞優於治郡,而執政非其所長,遂出爲甘肅行省參知政事。及脫 十年,拜中書參知政事。十一年,丞相脫脫在位,而龔伯遂輩方用事,朝廷悉議更張,

李稷

李稷字孟豳,滕州人。稷幼穎敏,八歲能記誦經史。從其父官袁州,師夏鎭,又從官鉛

山,師方回孫。鎭、回孫皆名進士,長於春秋,稷兼得其傳。

賑之,民獲以蘇。游民尚安兒,飲博亡賴,稷疑其爲非,督弓兵擒之,果盜鄰村王甲家財,與 其黨五人俱伏辜。調海陵縣丞,亦有能聲。入爲翰林國史院編修官,擢御史臺照磨。

泰定四年,中進士第,授淇州判官。淇當要衝,稷至,能理其劇。歲大饑,告于朝堂以

臺,付史館,以備纂修之實。」承天護聖寺火,有旨更作,乃上言:「水旱相仍,公私俱乏,不宜 龍卜于征東。又言:「御史封事,須至御前開拆,以防壅蔽之患。言事官須優加擢用,以開 諫諍之路。殿中侍御史、給事中、起居注,須任端人直士,書百司奏請,及帝所可否,月達省 私,侵撓朝政,擅作威福,交通時相,請謁公行,爲國基禍,乞加竄逐,以正邦刑。章上,流高 至正初,出爲江南行臺監察御史,遷都事,又入爲監察御史。劾奏閹宦高龍卜恃賴恩

省選。 宜爲佐貳。」帝悉可其奏。遷中書左司都事,又四遷爲戶部尚書 妄興大役。」 茶鹽鐵課,責備長吏,動受刑譴,何以臨民,宜分委佐貳。 議遂寢。 會朝廷方注意守令,因言:「下縣尹多從吏部銓注,或非其才, 投下達魯花赤,蠹政害民, 宜併歸

亡,此政一行,是驅民爲盜也。」相臣是之。尋參議中書省事,俄遷治書侍御史。 十一年,廷議以中原租稅不實,將履畝起稅,稷詣都堂言曰:「方今妖寇竊發, 民庶流

善大夫、御史中丞,尋特加榮祿大夫。 使,遂除樞密副使。 以葬,敕賜碑樹焉。 十二年,從丞相脫脫出師征徐州,徐旣平,謁告歸滕州,遷會祖父以下十七喪, 旣而召爲詹事丞,除侍御史,俄遷中書參知政事。 帝躬祀郊廟、攝太常少卿、尋復爲侍御史,又爲中書參知政事, 皇太子受册,攝 俄陞資 序昭穆 大

大都路總管,無大興府尹 得疾,上章致仕,還京師。 國,追封齊國公,諡 至正十九年,丁母憂,兩起復,爲陝西行省左丞、樞密副使,乞終制,不起。服闋,命爲 文穆。 、,除副詹事。 卒,年六十一。贈推忠贊理正憲功臣、集賢大學士、榮祿 二十四年,出爲陝西行臺中丞,未行,改山東 廉 大夫、柱 訪使。

中丞任擇善、陳思謙旣沒,皆撫其遺孤,人以是多之。 稷為 人孝友恭儉,廉愼忠勤,處家嚴而有則,與人交,一以誠恪,尤篤於鄕黨朋友之誼。 出入臺省者二十年, 始卒無疵,爲時

蓋苗

蓋苗字耘夫,大名元城人。幼聰敏好學,善記誦,及弱冠,游學四方,藝業大進。

令民糴粟倉下,十月初,倉劵已至,省民力什之五。 部使者將責知州,苗曰:「官栗,實苗所貰,今民饑不能償,苗請代還。」使者乃已其責。 稅糧,歲輸館陶倉,距單五百餘里,載馱擔負,民甚苦之,春猶未足,是秋,館陶大熟,苗先期 悟,凡被災者,咸獲賑焉。有官粟五百石陳腐,以借諸民,期秋熟還官,及秋,郡責償甚急, 下,出糠餅以示曰:「濟寧民率食此,況不得此食者尤多,豈可坐視不救乎!」因泣下,時宰大 上,部使者未報,不可決。」苗曰:「設使者有問,請身任其責。」知州乃勉從之,使者果閱牘 歲饑,白郡府,未有以應,會他邑亦以告,郡府遣苗至戶部以請,戶部難之,苗伏中書堂 延祐五年,登進士第,授濟寧路單州判官。 州多繫囚,苗請疏決之,知州以爲囚數已 單州 而

備不虞,簡兵卒以壯國勢,全功臣以隆大體,惜官爵以清銓選,考實行以抑奔競, 杜姦欺,計利害以孚民情,去民賊以崇禮節。 辟御史臺掾,除山東廉訪司經歷,歷禮部主事,擢江南行臺監察御史。 皆切於時務,公論韙之。 建言嚴武備以 明賞罰以

列傳第七十二 蓋苗

佛 業 繕 便 武 役 之役 爲 中 寺,又 之時 教 興 苗 天 い。豈其 (南陽) 上封 曆 ,今尊佛氏 居民 廢民居,使之家破產蕩 初 事 禮哉? 趸 困 文宗 日 税三年,既不務此, 於供給,幸 三臣 而 詔 害生民,無乃違 書奏,御史大夫果觅督役。 以建康潛邸爲佛寺,務窮壯麗,毀民居七十餘 聞 使民以 前 獲 覩 時,使臣 ,豈聖人御天下之道 今日之運,百姓跂足舉首,以望非常之恩。 而隆 其方便之教乎? 以 重 禮 一佛氏, ,自古未 何 乎? 以滿 臺 有不 臣 昔漢高帝與於豐、沛、爲 斯民之望哉 由 職 專糾察,表正 斯 道 而 致隆 家, 9 且佛以 平者。 仍以 百 司 御 今奪農 慈悲爲 ,今乃委以 陛 史大 復 下 兩 大督 時 龍 縣,光 心,方 以 潛 修 創 建 其

院 淮 恐 懼 逐 都 東 寢。 事 廉 修省,何暇逸游,以臨 入 爲 訪 監察御史。 中 司 書 事 機苗 以聞,帝曰:「仍留 行 文宗幸 視 河道,還言:「河口淤塞,今苟不治,後日必爲中原大患。」 不測之淵 護 國仁王寺,泛舟玉泉,苗進曰:「今頻年不登,邊隅不靖,政當 蓋御史,朕欲聞 一乎。」帝嘉納之,賜以對衣 其讜言也。」以丁外艱 上尊,即 去,觅喪,除太禧宗禋 日還宮。 臺 都 臣 水難之, 擬苗 僉

當 几 年,起爲左司都事,在左司僅十八日,凡決數百事。 苗訊 至正 治之,豪民咸自 初,三 用 薦者知亳州 引 服 ,修學宮,完州廨。 苗 日...日 爾等罪甚重 有豪强占民田 然 1 吾觀皆有改過意。」 內憂,宰相惜其去,重賻之。 爲己業,民五十餘 遂 從 輕議 人訴於

謂所居地有金礦,掘地及泉而後止,猾吏爲奸利,莫敢誰何。 舊稱 也。」大夫不悅而起,其晚,邀至私第以謝,人兩賢之。 產金 正二年,起爲戶部郎中,俄擢御史臺都事,御史大夫欲以故人居言路,苗曰:「非其才 「,朝廷建一府六所綜其事,民歲買金以輸官,至是六十年矣, 民有忤其官長意,**輒** 出爲山東廉訪副使。 苗建言罷之。 益都、淄、萊地

徵苗所得職田,苗曰:「年荒民困,吾無以救,尙忍征斂以肥己耶」輒命已之,同僚皆無敢 取 康廉訪使,民饑爲盜,所在羣聚,乃上救荒弭盜十二事,劾宣慰使骫骳不法者。 有司援例欲 曰:「肆赦復殺,在法所無,御史獨宜劾苗,其敢累朝廷之寬仁乎」」卒用苗議,罷之。 出爲 家,已有詔除首罪外,餘從原宥。 召參議中書省事 三年,入爲戶部侍郎。四年,由都水監遷刑部尚書。初,盜殺河南省憲官,延坐五百餘 至是,宰臣追復欲盡誅戮,苗堅持不可,御史趣具獄,苗

Щ

若任郡寄,必擇賢才而後可。」議遂寢。又欲以鈔萬貫與角觝者,苗曰:「諸處告饑,不蒙賑 郡長官,俾以養貧,苗議曰:「郡長所以牧民,豈養貧之地哉。果有不能自存,賜之錢可也。 史,尋拜中書參知政事、同知經筵事。大臣以兩京馳道狹隘,奏毀民田廬廣之,已遣使督有 司治之矣,苗執曰:「馳道創自至元初,何今日獨爲隘乎」」力辯,乃罷。又欲宿衞士悉出爲 五年,出爲陝西行臺侍御史,遷陝西行省參知政事。六年,復入爲治書侍御史,陞侍御

列傳

文獻 骸 端,請以 奏旨 文法,遂使恩澤不以時及,有匱 臺 君 臣 恤 骨 至樞 命奉 御 一, 力 待罪 史中 趣赴任,苗异疾就道,至鎭,卽上言:「西土諸 還 戲何 機 使 糧 鄕 執政,中書之事 即行 丞,然宰臣怒苗終不解,比至,卽除甘肅行省左丞,時苗已致仕歸田 者, 一鈔兼 里。 功,獲此重賞乎。」又,僉四川廉訪司事家人違例收職田,奉使宣撫,直坐其主,宰 欲 遣,苗請付法司詳議,勿使 給 明 其 年卒,年五十八。 , 則 相助 軍民咸利 也, ,皆當與聞,今宰相言若此,不退何俟。」將引去,而 迺每事! 矣。」朝廷從之。 乏之憂,大非隆親厚本之意。」又言:「甘肅每歲中糧 相抗, 贈攄誠贊治功臣、 憲司 何耶? 以爲 遷陝西行御史臺中丞,到 今後有公務, 王,爲國藩 口實。 中 書左丞、 於是時 屏,賜 毋白參政。」 苗敷 相 上護 **齊雖** 顧謂僚佐 軍, 有常制 官數日 追封 適有旨 里矣。 日:日 而 曰:「猥 魏 卽 有 拜 所以引蓋 國 一、姦 江 時 司 公,諡 牽於 疏 以非 鄭 宰 南 乞 復 行

雖 經剉 苗 折 學術淳正,性孝友,喜施與,置義田以贍宗族。 ·; 無 少 回 撓,有古遺直之風焉。 平居恂恂謙謹,及至遇事,張目敢言,

校勘記

宋端 明殿學士藻之七世孫也 考異云: 「宋景濂撰澤民神道碑敍其里居世系甚悉」 史稱藻七 記.

劉珍 道光本作「劉安仁」,與本書卷三〇泰定帝紀泰定四年三月丙午條及宋學士集卷三汪澤

民神道碑銘合。

[] 至正初 下文有「至元」、「至正」、此誤。道光本改作「後至元元年」。

元史卷一百八十六

列傳第七十三

張楨

等,城中大擾,慎暮夜縋城出,得免。 植 污楨 `,剛介士也,豈汝曹所當議耶!」郎中虎者禿謁而謝之,乃起。 以黯昧事,左右司官聽之,楨因移疾不出,滯案俱積。平章政事月魯帖木兒怒曰:「張 張楨字約中,汴人。幼刻苦讀書,登元統元年進士第,授彰德路錄事,辟河南行省掾 范孟爲亂,矯殺月魯帖木兒 **祁之兄訟于官**,且

LT,為其小婦所譖,虐死,其鬼憑七歲女詣縣訴楨,備言死狀, 尸見瘞舍後, 楨率吏卒卽其 執 之,盡得其罪狀,里中受其抑者,咸來訴焉,乃杖 踰年,除高郵縣尹,門無私謁。縣民張提領,尚任俠,武斷鄉曲。一日,至縣有所囑,楨 列 而徙之,人以爲快。 守城千戶狗兒 妻崔

所,發土得尸,拘狗兒及小婦,鞫之,皆伏辜,人以爲神明焉。

不聽。 異迭見,盜賊蜂起,海寇敢於要君,閩帥敢於玩寇,若不振舉,恐有唐末藩鎭噬臍之禍。」 伏門誅,而其(妻)子兄弟尙仕于朝, [1] 宜急誅竄。別兒怯不花阿附權姦,亦宜遠貶。今災 也里牙、月魯不花、皆陛下不共戴天之讎,伯顏賊殺宗室嘉王、郯王一十二口,稽之古法,當 累除中政院判官,至正八年,拜監察御史,劾太尉阿乞刺欺罔之罪,并言:「明里董阿、

費,畏天恤人。而陛下乃安焉處之,如天下太平無事時,此所謂根本之禍也。」至若不愼調 之好,燕安鴆毒之戒,皆宜痛撤勇改。有不盡者,亦宜防微杜漸,而禁於未然,黜宮女,節浮 今日墜亡之易,於是而修實德,則可以答天意,推至誠,則可以回人心。凡土木之勞,聲色 矣,是陛下警省之時,戰兢惕厲之日也。陛下宜臥薪嘗膽,奮發悔過,思祖宗創業之難,而 安逸之禍,略曰:「臣伏見陛下以盛年入纂大統,履艱難而登大寶,因循治安,不預防慮,寬 度,不資羣策,不明賞罰,不擇將帥,所謂征討之禍四也。 其言不明賞罰之禍,略曰:「臣伏 仁恭儉,漸不如初。今天下可謂多事矣,海內可謂不寧矣,天道可謂變常矣,民情可謂難保 解權綱,三日事安逸,四曰杜言路,五曰離人心,六曰濫刑獄,所謂根本之禍六也。 其言事 及毛貴陷山東,上疏陳十禍,根本之禍有六,征討之禍有四,歷數其弊一日輕大臣,二 傅 第 七 + = 張 楨

列

白蓮, 不乏, 名 窮 餉 登 爲 無懲 依 見 之扼 家 之欲 封 荒 也。 不竭 ", 其 調 不 戒 兵六年,初無紀律之法,又 墟 以 餹 偃 性 Ė 腕,有志 今天 哉。 所 佛 使 餉 情不 河南 師三 也。 法 經 天雨 不 下 其爲自 誘衆 提 之處, 竭,今寇敵 四 堂堂 殺 者爲 縣 封 粟,地湧 人矣,陛下泰 丽 ,終飾威權,以 而 天朝,不 啓亂階,亦已危矣。 邀 鷄犬一 之痛 手 已。 功求賞 餘 金, 已至之境,固不忍言,未至之處,尤可寒 里,郡縣星 心,此征 兩淮之北 空,貨財 思 朝 則 靖 然 夕存 無激 同 兵抗 亂,而 不 討 Ó 大河 理 亡且 俱 泛禍 羅棋 是以 勸之宜, 近,視 而 盡。 反 陛 不能保, 也 爲 布 之南,所在 有覆軍 日 下事 及其 其 階 吾將以是求 ,歲輸錢穀 將帥因敗爲 疏 亂 所 佛 面 奏,不 其 向, ·之將, 況以 求 諛游 福 禍 蕭 駸 駸 省。 飯 數 至慘,其毒 地(力)[方]有限之費, 條。 說, 福 殘民之將 百 功, 口 一福何 僧消禍,以 權 夫有 萬 反 畏, 臣 指虚 計 以克復 . 惡 自 其 土有 心 至深,其 其託 勢不 而 怯 而 爲 今所 至哉 天 受賞。 實, 如 人 懦 至 演節 有 直 之將 此 存者, 大小 關 於亡吾社 財 而 繋 然 潁 Ξ 而 望軍旅 今克復之地 貪婪之將, 相 至 禁屠宰, 上 後可 封丘 而 謾, 大,有 之寇,始結 供將 稷 不乏,餽 望軍 一、延津 上下 燼 皆 識 帥 悉 者 吾 虚 旅 曾 相 無

木兒 脫 木 駐 兒、治書侍 干 兵洛陽, 一年,除 而 御 毛 史 僉 貴 奴 Щ 據 奴 南 Щ 弄 道 東,勢逼京畿,二將玩寇不進,方以爭晉 權 肅 誤 政 國 廉 一之罪, 訪司 事 叉不報 T, 至 則 劾 中 方 書參. 是時, 知 孛羅 政 事 也先 帖 冀爲 木 兒駐 不 花、 事 兵大同 樞 搆 密院 兵相 察罕帖 副 攻, 使 脫 互

或

矣。」卽辭去,居河中安邑山谷間,結茅僅容膝,有訪之者,不復言時事,但對之流涕而已。 走,而乃迂回退懾,枉道延安以西,繞曲數千里,遲遲而行,使兩軍日夜仇殺,黎庶肝腦塗 苟懷自安之計,無憂國致身之忠。 朝廷將使二家釋憾,協心討賊,此國之大事,謂宜風馳電 地,實此三人之所致也,宜急殛之,以救時危」。亦不報。|核乃慨然嘆曰:「天下事不可爲 負, 朝廷乃遣也先不花、脫脫木兒、奴奴往解之,旣受命,不前進。楨又言其「貪懦庸鄙,

臓之於趙,寇、賈之於漢乎。京師一殘,假有不逞之徒,崛起草澤,借名義,尊君父,倡其說 不君其君,唐肅宗流播之中,忧於邪謀,遂成靈武之篡。千載之下,雖有智辯百出,不能爲 忠之道也。 分志奪,國家之事,能不爲閤下憂乎!志曰『不備不虞,不可以爲師』,僕之惓惓爲言者,獻 於天下,閣下將何以處之乎!守京師者,能聚不能散,禦外侮者,能進不能退,紛紛籍籍,神 國,湘漢荆楚川蜀,淫名僭號,幸我有變,利我多虞。 閣下國之右族,三世二王,得不思廉、 「今燕趙齊魯之境,大河內外,長淮南北,悉爲丘墟,關陝之區, 所存無幾, 江左日思荐食上 廓帖木兒將輔皇太子入討孛羅帖木兒, 遣使傳皇太子旨, 賜以上尊, 且訪時事, 楨復書曰: 二:衞出公據國,至於不父其父,趙有沙丘之變,其臣成、兌平之,不可謂無功,而後至於 二十四年,孛羅帖木兒犯闕,皇太子出居冀寧,奏除贊善,又除翰林學士,皆不起。擴 然爲言大要有三:保君父,一也,扶社稷,二也,衞生靈,三也。 請以近似者陳其

乎? 納 來之使,達其上下之情,得其情,則得其策矣。 覺悟之心, E 其說,是用事克有成。 者如寄,青宮在下者如寄,生民之憂,國家之憂也,可不深思而熟計之哉」」擴廓帖木兒深 閤 嗚呼!是豈可以不鑒之乎!然吾聞之,天之所廢不驟也,驟其得志,肆其寵樂,使忘其 下覽觀焉,謀出於萬全,則善矣。 非安之也,厚其毒而降之罰也。 後三年,卒。 詢之輿議,急則其變不測,徐則其釁必起,通其往 天遂其欲,民厭其汰,而鬼神弗福也。 孔子曰:『君君,臣臣,父父,子子。』今九重在 其能

歸赐

之,暘獨 Щ 無 東 師傳,而精敏過人。登至順元年進士第,授同知潁州事,鉏奸擊强,人不敢以年少易之。 鹽 歸暘字彥溫,汴梁人。將生,其母楊氏夢朝日出東山上,有輕雲來掩之,故名暘。 司遣奏差至潁,恃勢爲不法,暘執以下獄。時州縣奉鹽司甚謹,頤指氣使,輒奔走 不爲屈。 轉大都路儒學提舉,未上。

守黄河口,陽力拒 丞劫烈、廉訪使完者不花、總管撒里麻,召官屬及去位者,署而用之,以段輔 至元五年十一月,杞縣人范孟謀不軌,詐爲詔使,至河南省中,殺平章月魯帖木兒、左 一不從,賊怒,繫於獄,衆叵測所爲,陽無懼色。 已而 賊敗,污賊者皆獲罪, 爲左丞,使暘北

汴上,親旣歿,家食久之。 臺 暘 臣奏曰:「此 日:日 獨 発。 歸 暘 同 畄 里有吳炳者,嘗以翰林待制徵,不起。 角 卽 河南抗賊者也。」帝曰:「好事卿宜數爲之。」賜以上尊。 ,吳炳無光。」陽自此名譽赫然。 明年,轉國子博士, 賊呼炳司卯酉曆,炳 拜 監察御史, 不敢辭。 已而 辭官歸, 時人爲之 及 入謝, 養親

殺,有 請 司 事 不 ,改宣文閣 至 爲 司 正 動。 以蒲察山 五. 年,除僉河南廉訪司事,〔三〕行部西京,以法繩趙王府官屬之貪暴者,王三遣使 宣寧縣有殺 監 見當之,陽察其誣,蹤跡得其殺 書博士,兼經筵譯文官。 人者,蔓引數十人,一讞得其情,盡釋之。 人者,山兒遂不死。 沁州民郭仲玉,爲 六年,轉僉淮 東 廉訪 人所

遭 何 夷,所謂 人 數,悉給貧民。 歸 有言:鞭雖長,不及馬腹。 ,稍賑之耳。」丞相悟而止。 相 抗 足矣。」卒從暘言。 七 年,遷右 乃 獲 爾 虚 邪!然其策果將焉出。」陽曰:「其酋長可授宣撫, 名 司 而受實禍也。」與左丞呂思誠抗辨甚力,丞相太平笑曰:「歸都事善戆 陽曰:「宰相當以廣濟天下爲心,皮服能幾何,而欲給之邪! 都事。 京師苦寒,有丐訴丞相馬前,丞相索皮服予之,仍覈在官 順江酋長樂孫求內附,請立宣撫司,及置郡縣一十三處,陽 使郡縣果設,有事不救,則孤來附之意,救之,則罷中 雲南死可伐叛,詔以元帥述律遵道往喻之,未幾,命平章政事 勿責 、其貢賦,使者賜 莫若 所 國 以 錄 藏 曰:「古 而 金帛, 如 皮服 事外 寒饑

恩 播 其 卒,其子 豊 亦 命 都 楊 法 有兄弟 ,必能自效,所謂 意 元 渾將兵討之,事久無功。二人上疏紛紜,中書欲罪述律,陽曰:「彼事 帥 乎? 沙的, 軍 而 以討 沮 況一 一其詩。 方為 芝, 諭 中 之而 非所以孝治天下也。」遂從之。 以 ·書掾,請奔喪,丞相以 夷 暘 討之, 狄攻夷狄,中 曰:「易軍 彼將 ·而將 何 國之利 所 不諳敎令,恐不 沙的 適從, 也。」帝不 有兄弟,不許,暘 然亦 廣海 非使 搖賊 能 從,後竟無功。 決 者之罪 勝。 入寇,詔 曰:「孝者,人子之同情,以 若命楊就統其衆,彼悅於 也。」 朶兒只(丹)[班]將 湖廣 未白,而 行省左丞沙 專罪 思 班

沒,而 時 京 月, 楮 水 朝 戦 幣 師 遷參議樞密院 延方 請 五. 八 朶兒只(丹)[班] 是驅之死 降 百 年,陞 暘 萬錠易 事 姑息, 左司 日三 地耳。 級實 員外郎。 國珍已敗我王師 卒從 事 內藏 被執,將 其請. 宜募海濱之民習水 時方國 陽復持 中書用暘 ,後果屢叛, 珍未附, 罪之,陽 一、叉拘 不可 言, 曰:「富商 曰:「將之失利,其罪固 韶江浙行 我 如 損 、場言。 利者擒之。」旣 王臣,力屈 河 間 餘 大賈, 省參 遷御史臺 鹽五 而來,非 知政事朶兒只(丹)[班]討之, 盡易 萬 而 引以 都 或 其鈔於私 珍遣 眞 事 當,然所部皆北方步騎 裕民。 ,俄復 降 也。 人從杂兒只 家 楮幣壅不行, 參議樞密院事,十一 必討之以令四方。」 小 民 (丹) [班]走 何 利 廷議 哉 不 軍 皆 出

九年 Ė 月 轉 河 西 廉訪使,未上,改禮部尚書。 會開端本堂,皇太子就學,召暘爲贊善。

列

傅

月

一、陞樞

密院判官

以次列 業,入相之詔,當命詞臣視草,今屬筆於陽,恐累丞相之賢也。」期頤曰:「若帝命爲之,奈 十二年,除刑部尚書,十五年,再除刑部尚書,凡三遷,皆以疾辭。 何。」陽曰:「事理非順,亦當固辭。」期頤知不可屈,乃已。 書參議趙期頤、員外郎李稷謁暘私第, 以疾辭,帝遣左司郎中趙璉賜白金文綺,不受。初,陽在上都時,脫脫自甘州還,且入相,中 未幾,遷翰林直學士、同修國史,仍兼前職。 '坐',虚其中座',以待至尊臨幸',不然',則師道不立矣。」 時衆言人人殊, 卒從陽議。 致脫脫之命,屬草詔,陽辭曰:「丞相將爲伊、周事 陽言:「師傅當與皇太子東西相向授書,其屬亦 十年正月,遷四川行省參知政事, 俄

起之,居數月,復還夏縣。 徙蔚州,又徙宣德,皆間關避兵,尋抵大同,及關陝小寧,來居解之夏縣。 能用。十一月,以集賢學士、資德大夫致仕,給半俸終身,辭不受。明年,乞骸骨,僑居以州, |故,陽上三策:一曰振紀綱,二曰選將材,三曰審形勢。 十七年,授集賢學士,兼國子祭酒,使者迫之,陽輿疾至京師,臥于南城不起。 二十七年卒,年六十三。 亹亹數千言,時以爲老生常談,不 皇太子出冀寧,强 時海內

陳祖仁王遜志

陳祖仁字子山,汴人也。 其父安國,仕爲常州晉陵尹。 祖仁性嗜學,早從師南方,有

林待 士 制 ,賜進士及第,授翰林修撰、同知制誥,兼國史院編修官。 至 出 正元年,科舉復行,祖仁以春秋中河南鄉貢。明年會試,在前列,及對策大廷, [僉山東肅政廉訪司事,擢監察御史,復出爲山北肅政廉訪司副使,召 歷太廟署令、太常博士,遷 拜翰林直學 逐魁 翰

士,陞侍講學士,除參議中書省事

其耕 以 陛 然不思今日所當興復,乃有大於此者。 **亟**圖 都宮闕,創自先帝,修於累朝,自經兵火,焚燬殆盡,所不忍言,此陛下所爲日夜痛心,所 民心,緩急失宜,舉措未當,雖以此道持盈守成,猶或致亂, 而 多難之時,孰不欲奮發有爲,成不世之功,以光復祖宗之業。 違 下亦安忍 策英雄,親正人,遠邪佞,以圖謀治道。 耨 天道,失人心,或致大業之隳廢,則夫天下者,亦祖宗之天下,生民者,亦祖宗之生民, 興復者也。 一十年五月,帝欲修上都宮闕,工役大興,祖仁上疏,其略曰:「自古人君,不幸遇艱虞 ?,而荒其田畝,何異扼其吭而奪之食,以速其斃乎!陛下追惟祖宗宮闕, 而輕(重)[棄]之乎![吾] 然今四海未靖,瘡痍未瘳,倉庫告虛, 願陛下以生養民力爲本,以恢復天下爲務,信賞必罰, 假令上都宮闕未復,固無妨於陛下之寢處,使因是 夫如是,則承平之觀,不日咸復,詎 財用將竭,乃欲驅疲民以供大役,廢 而況欲撥亂世反之正乎! 荷或 上不奉於天道,下不 止上都宮闕 念茲在茲, 夫上 順於 宜

列

而已乎!疏奏,帝嘉納之。

獨殿下未知耳。 之姦邪,當時知之,獨德宗不知爾。今此二人,亦皆姦邪,舉朝知之,在野知之,天下 者,止緣不見其姦。 也」。祖仁乃復上疏言:「御史所劾,得於田野之間,殿下所詢,不出宮牆之外,所以全此二人 昔裕宗爲皇太子,兼中書令、樞密使,凡軍國重事合奏聞者,乃許上聞,非獨我今日 史大夫老的沙諭 使諫臣結舌,凶人肆志,豈惟君父徒擁虛器,而天下蒼生,亦將奚望!」疏上,皇太子怒,令御 殿下職分,止於監國撫軍、問安視膳而已,此外予奪賞罰之權,自在君父,今方毓德春宮,而 諫者,祖宗之所建立,以二竪之微,而於天下之重、臺諫之言,一切不卹,獨不念祖宗乎!且 斥御史,詰責臺臣,使姦臣蠹政之情,不得達於君父,則亦過矣。夫天下者,祖宗之天下,臺 經 非御史之私言,乃天下之公論,臺臣審問尤悉,故以上啓。 今殿下未賜詳察, 輒加 外結丞相搠思監,驕恣不法,監察御史傅公讓上章暴其過,忤皇太子意,左遷吐蕃宣慰司 歷。 二十三年十二月,拜治書侍御史。 它御史連章論諫,皆外除。 且裕宗旣領軍國重事,理宜先閱其綱。 祖仁,以謂「臺臣所言雖是,但橐驩等俱無是事,御史糾言不實,已與美除 昔唐德宗云『人言盧杞姦邪, 朕殊不覺』。 使德宗早覺, 杞安得相, 是杞 祖仁上疏皇太子言:「御史糾劾橐驩、不花姦邪等事,此 時宦者資正使朴不花與宣政使橐驩,內恃皇太子, 若至臺諫封章, 自是御前開拆,假 沮抑, 擯 知之, 如是

傳第七十三 陳祖仁

列

於是 禍,以 者去. 女 不令其 賞不 祖仁 吏卒: 奏,則 可 阻 使必皆經由東宮,君父或有差失,諫臣 託 上矣,御· 全 臺 一,而 復 於 明 皆辭閑。 ,來者言 待 傷 臣 之所 以 上 其 史不 後 有 其父心,不使聞 友 書 自老的 辭退爲名,成其姦計,使海內皆知陛下信賞 世 以還祖宗[之舊]。[於]若猶優柔 朱毅,即 致 天 正 宜斥矣,斥其 ,言者無窮,而美除 子曰:「 也。 於是皇太子以其事聞,朴不花、橐驩 人同 沙 以下皆左遷,而 且 罪。」書奏,天子大怒, 日 祖宗以 晶 就 區二竪,猶不能除,況於 奏, 道 人而美其除, 則陷父於惡 天下傳之陛下,今乃壞亂不可救藥,雖 有限,殿下又安所處。」祖仁疏旣再上,卽 祖仁出為甘肅行省 ",殿下 有言,太子將使之聞奏乎,不使之聞奏乎? 不知御史所言,爲天下 不 而 斷,則 是時侍 將安所 大者 臣 乃皆辭退。而 御史李國 必罰 寧有 處 1 1参知 願陛下俯從臺諫之言,擯 餓 自 如 、政事。 死 二人始, 知 鳳 于 國家 此 亦 天子令老的 家,誓不 說, 時天極 上疏, 日 乎, 則 則 天運使然, 將 今日 爲 寒,衣單 言此二 與 士孰 辭 一身官爵乎? 之 沙諭旨祖仁等, 職,而 糾劾之章,不 同 不 人 朝 效力,天下 斥此二人, 亦陛 御史下 牽 必當斥, 使之 聯 下刑 及 聞 斥 至 宜

甚,而 密副 使, 明 祖仁 年 累 七月 性 上 疏 剛 字羅 直 言 軍 遇 政 帖 事 利 木 與 害 兒 诗 一, 不 入 宰 中 報 論議數不 書爲 解 丞相 職 合,乃超授其階榮祿大夫, 除 除翰林學士,遂拜 祖仁山北 道 肅 政 中 廉 書 參 訪使,召 而 知 政 仍還翰 事 拜 國子 是 林爲 時天下 祭酒 學士, 一遷樞 亂 尋 已

遷太常禮儀院使。

襲,必就擒獲,其餘彼中見調一應軍馬,令其倍道東行,勤王赴難,與也速等聲勢相援,仍遣 諸官,亦宜以公天下爲心,審時制宜。今擴廓帖木兒黨與離散,豈能復振,若止分撥一軍逼 掣,調 重臣,分道宣諭催督,庶幾得宜。如復膠於前說,動以言者爲擴廓帖木兒游說,而鉗天下之 兒 肘腋,勢將竊持國柄,故宜先於致討,則南軍遠而輕,而擴廓帖木兒近而重也。 其輕重强弱,遠近先後,不宜膠於一偏,狃於故轍。前日南軍僻在一方,而擴廓帖木兒近在 而 全齊,不踰月而逼畿甸,朝廷雖命丞相也速出師,軍馬數少,勢力孤危,而中原諸軍,左牽右 以 ,不幸猝有意外之變,朝廷亦不得聞,而天下之事去矣。」書上,不報。 勢已窮蹙,而南軍突至,勢將不利於宗社,故宜先於救難,則擴廓帖木兒弱而輕,南軍近 ,備之。<u>祖仁乃與翰林學士承旨王時、待制黃哻、編修黃肅,</u>伏闕上書言:「近者南軍侵陷 重 也。 度失宜,京城四面,茫無屏蔽,宗社安危,正在今日。臣愚等以爲馭天下之勢,當論 陛下寬仁涵育,皇太子賢明英斷,當此之時,宜審其輕重强弱,改弦更張,而撫軍 七年,大明兵已取山東,而朝廷方疑擴廓帖木兒有不臣之心,專立撫軍院,總兵馬 今擴廓帖木

終爲南軍之所忌。設使其有悖逆之心,朝廷以忠臣待之,其心愧沮,將何所施。 十二月,祖仁又上書皇太子,言::「近日降詔,削河南軍馬之權,雖所當然,然此項軍馬, 世多稱傳之。

濟於事!故今不復避忌,惟以宗社存亡爲重,奉疏以聞。」疏上,亦不 幸 厲使行,猶恐遲晚,豈可使數萬之師,棄置於一方。當此危急之秋,宗社存亡,僅在旦夕,不 乎戰,則資其掎角之勢,以言乎守,則望其勤王之師,以言乎遷,則假其藩衞之力。極力勉 其心曲,是其 皆知之而不敢言者,誠恐誣以受財游說罪名,無所昭雪也。 見,遽以此名加之,彼若甘心以就此名,其害有不可言者。 一日有唐玄宗倉卒之出,則是以祖宗百年之宗社,朝廷委而棄之,此時雖欲碎首殺身,何 心未絕於朝廷,以待朝廷之開悟。當今爲朝廷計者,不過戰、守、遷三事。以言 朝廷苟善用之,豈無所助,然人 況聞擴廓帖木兒屢上書疏, 報 明

門,爲亂軍所害,時年五十五 之,還守太廟以竢命。 主,從皇太子北行。 二十八年秋,大明兵進壓近郊,有旨命祖仁及同僉太常禮儀院事王遜志等載 祖仁等乃奏曰:「天子有大事出,則載主以行,從皇太子,非禮也。」帝然 俄而天子北奔,祖仁守神主,不果從。八月二日,京城破,將出健德 太 廟 神

精,自天文、地理、律曆、兵乘、術數、百家之說,皆通其要。 祖仁一 目眇,貌寢,身短瘠,而語音淸亮,議論偉然,負氣剛正,似不可犯者。 爲文簡質,而詩(靖)[淸]麗)[刊 其學博而

拜 行 監 臺 察 監 王 逐志 察御 御 字文敏 史, 劾詹事 累遷僉漢中、 ,惲之曾孫也。 不蘭奚、平章 河西、山 宜童皆逆臣 以廕授侍儀司通事 北 三道 肅 子孫 政 廉 訪 當屏諸遐裔。 舍人,歷隰州 司 事 入 爲工 部 除太府 判官、 員外郎,遷 大寧縣 少 一點, 禮 尹 出 褶 部郎中, 爲 陝西 江 西

寬 義 耶 大,不惟 ___ 因 京 城不守, 戒其子 不死,且 公卿 百 仍 爭出降, 汝謹 與官,盍出詣官自言狀。」 繼吾宗。」卽自投井中死。 遜志獨 家居,衣冠 遜志 而坐。 | 艴然斥之曰: 「君旣自不忠,又誘 其友中政院判官王翼來告曰:「新朝 人為不

廉

訪

副

使,召僉太常禮

儀院事

成遵

第,來 然 不 廢 學問。 成遵字 尹 四書、五經,吾 穰,遵乃書所 誼 二十能 叔,南陽穰 文章 作數十篇 師 也。 縣 時郡中 人也。 文 見之。 無 逾於史、漢、韓、柳。 先輩無治進士業者,遵欲 幼敏悟,讀書 惠撫卷大喜,語 日記數千百言。 之曰:「以 晶 显 科 爲,以不合程式 舉之作,何難哉。」會楊惠 此 年十五,喪父。 取 科第,如 爲 拾 患。 芥耳。 家 貧勤 日 初 憤 登

以 語于奎章閣侍書學士虞集,集亟欲見之,旅令以己馬俾遵馳詣集, 至 順 辛 未,至京師 ,受春秋業於夏鎭,遂入成均 爲國子生。 時 陳 旅 集方有目 爲 助教, 疾 喜其文,數 見遵來,

列傳第七十三 成選

改元,中進士第,授將仕郎、翰林國史院編修官。 迫而 視之,曰:「適觀生文,今見生貌,公輔器也。 吾老矣,恐不及見,生當自愛重也。」元統 明年,預修泰定、明宗、文宗三朝實錄。 後

至元四年,升應奉翰林文字。五年,辟御史臺掾。

命 察四 天子 員 事 也。」特賜 四 《外郞,出爲陜西行省員外郞,以母病辭歸。 ,言時務四事:一 中書速議以行。 日 體覆 宜愼. 事 至正 起居,節嗜慾,以保養聖躬,聖躬安則宗社安矣。言甚迫切,帝改容稱善。 改元,擢太常博士。 上尊旌其忠。 廉訪聲蹟不實,賢否混淆。帝皆嘉納之,諭臺臣曰:「遵所言甚善,皆世 曰差遣臺臣,越職問事,二曰左遷御史,杜塞言路,三曰御史不思盡言,循 是歲,言事幷舉劾凡七十餘事,皆指訐時弊,執政者惡之。 曰法祖宗,二曰節財用,三曰抑奔競,四曰明激勸。 遵又言江浙火災當賬卹,及劾火魯忽赤不法十事,皆從之。 明年,轉中書檢校,尋拜監察御史。扈從至上京,上封事,言 五年,丁母憂。 奏入,帝稱 三年,自刑部 祖風 敍求進; 善久之, 叉言臺 紀 復上封 舊規

人,貪懦者二十一人,奏之。 、年,擢 僉淮 東肅政廉 訪司事,改禮部郎中,奉使山東、淮北察守令賢否,得循良者九 九人者,賜上尊幣帛,仍加顯擢,其二十一 人悉黜之。

官吏,凡被案劾 年、改刑 **贓私,雖父母死,不許歸葬,須竟其獄,庶惡人不獲幸免。** 部郞中,尋遷御史臺都事。 時臺臣有嫉贓吏多以父母之憂免者,建 遵曰:「惡人固可 論 今後

怒,然與 人 倫 孰 重。 且 國 .家以孝治天下,寧失罪人千百,不可使天下有無親之吏。」御 史大

夫是其言。陞戶部侍郎。

茅 魯言:「必 其 所告,有 重, 禿 將 鄆城 各當其 魯行 何 十 年, 以 司 、濟寧皆爲巨浸。 疏 爲治。 視 議 罪,未幾,無遺事。 遷 河、議 南 輸 中 河,塞北 栗例,無有過不與之文,遵曰:「 必奪 書右司 其疏塞之方以聞 '其敕,還其粟,著爲令,乃可。」 省臣從之。 河,使復故道。 郎中。 或言當築堤以遏水勢,或言必疏南 時 時刑部獄按久而不決者積數百,遵與其僚分閱之,共議其輕 有令輸 役不 栗補官, 大興,害不能已。」 賣官鬻爵,已非 有匿 其姦罪而 河故道以殺水勢,而 廷議莫能決。 盛典,況又賣官與姦淫之人, 除 入粟得七品雜流者 工 一部尚 書。 功 先是,河 命遵偕 漕 爲 運 使買 決白 怨家

魯之言, 能 於 砜 之淺深 入。 此 可之議。」遵曰:「腕可斷,議不可易也。」由是遂出爲大都河間等處都轉運鹽使。 地 十 一、恐後 明 及 遍 日,執 年春,自 遵 閱 興 史籍 日 政者謂遵曰:「修河之役,丞相 之憂,又有 秃魯至,力陳 濟寧、曹、濮、汴梁、大名,行數千里,掘井以量地形之高下,測岸以究水勢 ,博采輿論,以謂河之故 重 |於河患者。|脫脫怒曰:「汝謂民將反耶'」自辰至 不可,且 曰:「濟寧、曹、鄆, 《道,不可得復,其議有八。 意已定,且有人任其責矣, 連歲饑饉,民不聊 而 丞 公其毋 生 相 ,若聚二十 脫脫,已先 酉 多言, 辨論 初, 幸爲 萬 入賈 終 汝、 不 人

列傳第七十三 成選

汴 二郡多富商 ,運司賴之,是時,汝寧盜起,侵汴境,朝廷調兵往討, 括船運糧, 以故 舟楫

通,商販遂絕。遵隨事處宜,國課皆集。

省中府中,惟遵一人,乃遠斥候,蹇城門,籍民爲兵,得五千餘 船,截兵境,且戰 以爲防禦之備甚至,號令嚴肅,賞罰明當。 上下,皆劇盜 十四年,調 阻 一絕,米直翔湧,民心遑遑。 武昌路總管。 且行,糴粟於太平、中興,民賴以全活者 武昌自十二年為沔寇所殘 遵言於省臣,假軍 賊船往來江中,終不敢近岸,城賴以 衆。 燬,民死於兵疫者十六七,而 人,設萬夫長 會省臣 儲鈔萬錠, 出師, 募勇敢之士, 遵攝 四,配守四門,所 省事,於是 具戈

北之民 者,視河南之民,猶得保其室家故也。 之民稍安者,以天塹黃河爲之障,賊兵雖至,不能飛渡, 之揮涕,乃以入奏。 郡縣,上下視若常事。 十五年,擢江南行臺治書侍御史,召拜參議中書省事。 復何所恃乎? 帝詔卽遣使罪守河 河北民心一搖、國 遵率左右司僚佐,持其贖詣丞相言曰:「今天下州縣 |勢將 將 今賊北渡河 帥 ,而守禦自是亦 如之何 而 」語未畢, 官軍 所以剝膚椎髓以供軍 不禦, 時河南之賊,數渡河 頗 嚴 哽咽 是大河之險 不能言,) 喪亂過半 宰相已下皆爲 已不 儲 而北,焚掠 能守, 而 無深 - 河北 河 怨

一一平章之職 先 是,湖廣 亞 倪賊,質威順王之子, 宰 相 也。 承平之時,雖德望漢人,抑而不與,今叛逆之賊,挾勢要求,輕以 而遣 人請降, 求爲 湖廣行省平章, 朝臣 一欲許 者半,遵

韙 其 論。 羽執 緩之」,衆莫曉其意,及遵拜執政,喜曰:「大政事今可決矣。」 與之,如綱紀 太公,欲烹之以挾高祖,高祖乃以分羹答之,奈何今以王子之故,廢天下大計 除治書侍御史,俄復入中書爲參知政事。 何」或 曰:「王子,世皇嫡孫也,不許,是棄之與賊,非親 離 省僅六日,丞相 親之道也。」遵曰:「項 每決大議,則曰「姑 乎!衆皆 小

之黨 蕭 中 深 外寃之。 庸等六人皆受贓,皇太子命御史臺、大宗正府等官雜問之,鍛鍊使成獄,遵等竟皆杖死, 孤。 銜之,欲去之而 七年,升中書左丞,階資善大夫,分省彰德。 十九年,用 二十四年,御史臺臣辯明遵等皆誣枉,詔復給還其所授宣敕。 :未有以發,以爲遵及參知政事趙中,皆太平黨也,遵、中兩 事者承望風旨,嗾寶坻縣尹鄧守禮弟鄧子初等,誣遵與參政 是時,太平在相位,以事忤皇太子,皇太 人 趙中 去,則 、参議 太平

曹鑑

曹 鑑字克明,宛平人。 穎悟過人,舉止異常兒,旣冠,南遊, 具通 五經 大義。

辟 爲 掾 大 德 史。 五 Ţ 年,用 內 ,類,復起,補掾史,除興文署。 翰 林 侍講學士郝 | 彬薦, 爲鎭江淮海 命 伴送安南使者,沿途問難倡 書院山長。 十 一年,南行 和,應答如響, 臺中 廉恒

使者歎服,以爲中國有人。

縦, 數 月 妄 而 至治二年, 爲 事 成福, 集,纖豪 僚屬多畏避, 授江浙行省左右司員外郎。 無擾。 泰定七年,日還湖廣行省左右司員 鑑遇事徇理輒行, 明年, 獨不爲 奉旨括釋氏白雲宗田, 回撓。 外郎。 湖北廉訪司舉鑑宜居風 時丞相忽刺歹怙勢恣 稽檢有方, 不

年,以中大夫陞禮部尙書,俄處疾而卒,年六十五。 度數、名物,罔不周知。 而 詭 天曆元年,調江浙財賦府副總管。 因集議明宗皇后祔廟事,援禮據經,辯析詳明, 元統二年,陞同僉太常禮儀院,鑑習典故,達今古,凡禮樂、 屬淮、浙大水,民以菑告,鑑損其賦什六七, 追封譙郡侯、諡文穆。 君子多之。至元元 勢家因

紀,不報。

唯蓄書數千卷,皆鑑手較定。 鑑 天性純孝,親族貧乏者,周卹恐後。 鑑為詩賦,尙騷、雅,作文法西漢,每篇成,學者爭相傳誦。 歷官三十餘年,僦屋以居。歿之日,家無餘貲, 有

文集若干卷藏于家。

其子歸之。 薬 劑 ,命取視之,乃有黃金三兩雜其中,鑑驚歎曰:「淵伯以我爲何如人也」別伯已歿,鑑呼 鑑任湖廣員外時,有故掾顧淵伯,以辰砂一包餽鑑,鑑漫爾置篋笥中。 其廉愼不欺如此。 半載後,因欲合

張翥

杭,又從仇遠先生學。 存 翻 而薄游維揚,居久之,學者及門甚衆 家安仁,江東大儒也,其學傳於陸 然改曰:「大人勿憂,今請易業矣。」乃謝客,閉門讀書, 張翥 翥 少時,負其才雋,豪放不羈,好蹴踘,喜音樂,不以家業屑其意,其父以 字仲舉,晉寧人。其父爲吏,從征 遠於詩最高,翥學之,盡得其音律之奧,於是翥遂以詩文知 九淵氏,翥從之游,道德性命之說,多所研究。 江南,調饒州安仁縣典史,又爲杭州鈔 晝夜不暫輟,因受業於李存先生 爲憂。 庫 名一時。 未幾,留 翥 副 使。 日

淮東 陸禮 辯之際,雜以談笑, 崖岸,不徒以師道自尊,用是學者樂 儀院判官,又遷翰林,歷直學士、侍講學 ,會朝廷修遼、金、宋三史,起爲翰林國史院編修官。 至元末, 同郡 傅巖起居中書,薦翥隱逸。 無不 厭 其所 得 而 後 親炙之。 已 士, 有以經義請問者,必歷 至正初,召爲國子助教,分教上都生。 乃以侍讀兼祭酒。 史成,歷應 | 翥 奉、修撰,遷太常博士, 舉衆說, 於誘掖 爲之折衷, 後 進,絕去 尋退居 論

語不出何耶。」。讚對曰:「諸人之議,皆是也。 奉旨詣中書,集議時政, 衆 論 蜂 起,翥獨默然。 但事 丞相搠思監 ,勢有緩急, 施行有先後, 曰:「張先 生平日好論 在丞相 所決

耳。」搠思監善之。明日,除集賢學士,俄以翰林學士承旨致仕,階榮祿大夫。

林學士承旨致仕,給全俸終其身。二十八年三月卒,年八十二。 帖木兒雖知之,亦不以爲怨也。及孛羅帖木兒旣誅,詔乃以翥爲河南行省平章政事,仍翰 左右或勸之,翥曰:「吾臂可斷,筆不能操也。」 天子知其意不可奪,乃命他學士爲之。 孛羅帖木兒之入京師也,命翥草詔,削奪擴廓帖木兒官爵,且發兵討之,**翥毅然不從**。 孛羅

以來死節死事之人爲書,日忠義錄,識者韙之。 翥平日善諧謔,出談吐語,輒令人失笑,一座盡傾,入其室,藹然春風中也。所爲詩文甚多。 無丈夫子。及死,國遂亡,以故其遺藁不傳。其傳者,有律詩、樂府,僅三卷。|翥嘗集兵興 矣,蓋吾未嘗搆思,特任意屬筆而已。」它日,翰林學士沙剌班示以所爲文,請易置數字,苦 思者移時,終不就。沙剌班曰:「先生於文,豈猶未化耶,何思之苦也。」,翥因相視大笑。蓋 |翥長於詩,其近體、長短句尤工。文不如詩,而每以文自負。常語人曰:「吾於文已化

校勘記

- 而其(妻)子兄弟尙仕于朝 據本書卷四一順帝紀至正八年是歲條删。
- (三) 況以地(カ)[方]有限之費 從北監本改。

記

= 除魚河南廉訪司事 按下文所見西京、趙王府、宣寧縣、沁州皆爲河東山西道所轄,疑「河南

係「河東」之誤。

杂兒只(丹)[班] 據本書卷四一順帝紀至正八年是歲條、卷一四三泰不華傳及明史卷一二三

方國珍傳改。下同。 類編已校。「杂兒只班」藏語、義爲「金剛吉祥」。

陛下亦安忍而輕(重)〔棄〕之乎 從北監本改。

而有以還祖宗〔之舊〕 據本書卷二〇四於不花傳補。

ハベコ

しよし 而詩(靖)(清)麗 從北監本改。

泰定七年 按泰定僅四年,考異云:「七字誤。」

元史卷一百八十七

列傳第七十四

烏古孫良楨

行,解去。 故事,以明人臣大義。并劾御史中丞胡居祐奸邪,皆罷之,中外震懾。陞都事,猶以言不盡 平判官,拜陝西行臺監察御史,劾遼陽行省左丞相達識帖睦邇賣國不忠,援漢高帝斬丁公 「律,徒者不杖,今杖而又徒,非恤刑意,宜加徒滅杖。」遂定爲令。移泉州,益以能稱。 ·內艱,服除,調<u>婺州武義縣尹,有惠政。改漳州路推官,獄有疑者,悉平</u>反之。上言: 烏古孫良楨字幹卿,世次見父澤傳。資器絕人,好讀書。至治二年,蔭補江陰州判官, 轉延

大壞,元氣傷夷。 復起爲監察御史,良楨以帝方覽萬幾,不可不求賢自輔,於是連疏:「天曆數年問紀綱 天祐聖明,入膺大統,而西宮秉政,奸臣弄權,畜憾十有餘年。 天威一怒,

列

傅

險佞 宦者罕失嬖妾殺其妻,糜其肉飼犬,上疏乞正 衡,從祀 俗、均賦 從禮制 皆出於天而不可變,議法之吏,乃言國人不 國 國 世 臣 經筵 陰 人、諸國 人者,不若漢 願 無 晦 側 疆 招 多 開 目 之福 以以 領 明 延 孔子 役、 一、以正 儒 以 成 人不必守綱常也。 重審 臣 也。」又以國俗父死則妻其從母,兄弟死 職 廟庭。」皆不報。 列聖未遑之典, 若許衡者數人,置於禁密,常以唐、虞、三代之道,啓沃宸 事 、南人之厚也。 大名,以章 理 臣, 、汰冗官、選守令、出奉使、均公田 數日一進講,不渝 大孝,此誠兢兢業業而天永命之秋,其術在 明萬世不易之道。」又言:「隱士 御史臺作新風 名曰優之,實則陷之,外若尊之, 請下禮官有司及右科進士在朝者會議,自天子至於庶人,皆 數刻已罷 拘 憲,復疏其所當行者,以舉賢才爲綱 |重刑,幷論宦寺結廷臣 此例,諸國人各從本俗。是漢、南 一, 而 則收其妻,父母死無憂制,遂言:「綱常 「爲目 | 暬御 ,指擿剴 小臣, 劉因, 內實侮之,推其本心所以待 恒侍 切 道學經術 ()雖觸 撓政爲害, 左右,何益 乎敬身修 衷, 忌諱,亦不 日新其 可 人當守綱常, 德 比許文正 "; 而 可汰黜之。 於 德, 而 盛德哉。 以 已。 顧也。 厚風 實萬 今

年 廉 ·, 陞郎 訪 至 司 副 正 中 使。 四年,召爲 ,尋遷廣東道 上官 刑部 日 肅政廉 解歸。 員外郎 訪使,未行,還爲郎中,遷 六年,授平江路 ,轉御 史臺 都事。 總管,不拜。 五年,改中 福建道 ·書左 八年,復召 肅 政廉訪 司都事 爲 ,出爲 使, 右 司 中道召還, 員 江 東道 外 郎 肅 九 政

議中書省事,兼經筵官。十一年,拜治書侍御史,陞中書參知政事、同知經筵事。

|植言:「平賊在收人心,以回天意,多殺非道也。」乃赦以安之。 子遠小人之道,皇太子嘉納焉。當時盜賊鑑起,帝聞,惡之,下詔分討,必盡誅而後已。良 駕幸上都,始册皇太子。立詹事院,驛召爲副詹事,每直端本堂,則進正心誠意之說、親君 如志。會軍餉不給,請與右丞悟良哈台主屯田,歲入二十萬石。東宮久未建,懇懇爲言,車 十三年,陞左丞,兼大司農卿,仍同知經筵事。時中書參用非人,事多異同,不得一一

六年,進階榮祿大夫,賜玉帶一。 問,詞連良楨,簿對無所驗。卽日還中書左丞,命分省彰德,主調軍食,居半歲,還中書。十 旣平六合,垂克高郵,會詔罷脫脫兵柄,遂有上變告伯璲等勸脫脫勒兵北向者,下其事逮 據高郵、六合,太師脫脫奉詔,總諸王軍南征,而良楨洎參議龔伯璦、刑部主事廬山等從之。 十四年,遷淮南行省左丞。初,泰州賊張士誠旣降復叛,殺淮南行省參知政事趙璉,進

誣知宜興州張復通賊之罪,中書將籍其孥,吏抱案請署。良楨曰:「手可斷,案不可署。」同 十七年,除大司農。明年,陞右丞,兼大司農,辭,不允。論罷陷賊延坐之令。有惡少年

列變色,卒不署。

良楨自左曹登政府,多所建白。 罷福建、山東食鹽,浙東、西長生牛租,瀕海被災圍田

書成 病瘠,數謁告,病益侵,遂卒。 稅,民皆德之。 而罷。 家居 嘗論 輒訓諸子曰:「吾無過人者,惟待 至正格輕重不倫,吏得並緣爲奸,舉明律者數 自號約齋。 有詩文奏議凡若干卷,藏于家。 人以 誠, 人亦 以誠遇我,汝宜志之。」晚歲 人,參酌古今,重定律書,

賈魯

燕南 貢。 主事、未上。 Щ 魯居喪服闋,起爲太醫院都 泰定初,恩授東平路儒學教授,辟憲史,歷行省掾,除潞城縣尹 賈魯字友恒,河東高平人。 東道 奉使宣撫幕官,考績居最,遷中書省檢校官。 上言:「十八河倉,近歲淪沒官糧 一日,覺心悸,尋得父書,筆勢顫縮,即辭歸,比至家,父已有風 幼負志節,旣長,謀略過人。 事。 會韶修遼、金、宋三史,召魯爲宋史局官。 延祐、 〉,選丞相 至治間,兩以明 疾,未幾卒 東曹掾, 書成,選魯 經 擢 戶部 領 鄉

所可否。 發。」書累數萬言,切中其弊。 百三十萬斛,其弊由富民兼幷,貧民流亡,宜合先正經界,然事體重大,非處置盡善,不 陞臺都事 一遷山北 廉訪副使,復召爲工部郎中,言考工一十 俄拜監察御史,首言御史有封事,宜專達聖聰,不宜臺臣先有 九 事 可 輕

驗,仍督大臣訪求治河方略,特命魯行都水監。 至正 四年,河決白茅堤,又決金堤,並河郡邑,民居昏墊,壯者流 魯循行河道,考察地形,往復數千里,備得 離 帝甚患之,遣 使體

濬運河,七日臨淸運糧萬戶府當隸漕司,八日宣忠船戶付本司節制。事未盡行。旣而河水 漕戶,三曰接連委官,四曰通州總治豫定委官,五曰船戶困於壩夫,海運壞於壩戶,六曰疏 行,使復故道,其功數倍。會遷右司郎中,議未及竟。其在右司,言時政二十一事,皆見舉 要害,爲圖上進二策:其一,議修築北堤,以制橫潰,則用工省,其一,議疏塞並舉,挽河東 一侵安山,淪入運河,延袤濟南、河間,將隳兩漕司鹽場,實妨國計。 調都漕運使,復以漕事二十事言之,朝廷取其八事:一日京畿和糴,二日優恤漕司舊領

魯功,超拜榮祿大夫、集賢大學士,賞賚金帛,敕翰林丞旨歐陽玄製河平碑,以旌脫脫勞績, 成十有八翼軍二萬供役,一切從事大小軍民官,咸禀節度,便宜興繕。是月鳩工,七月鑿河 具載魯功,且宣付史館,幷贈魯先臣三世。 帝遣使報祭河伯,召魯還京師,魯以河平圖獻。帝適覽臺臣奏疏,請褒脫脫治河之績,次論 成,八月決水故河,九月舟楫通,十一月諸埽諸堤成,水土工畢,河復故道。事見河渠志。 使,進秩二品,授以銀章,領河南、北諸路軍民,發汴梁、大名十有三路民一十五萬,廬州等 辭,丞相曰:「此事非子不可。」乃入奏,大稱帝旨。十一年四月,命魯以工部尚書、總治河防 魯昌言:「河必當治。」復以前二策進,丞相取其後策,與魯定議,且以其事屬魯。魯固 九年,太傅、右丞相脫脫復相,論及河決,思拯民艱,以塞詔旨,乃集廷臣羣議,言人人

高 却 今日已、午時 可 平,有旨賜交鈔 藥不肯汗,竟卒于軍中,年五十七。十三年五月壬午也。 察兒督戰,魯誓師 尋 拜 中書左丞,從脫脫平徐州,脫脫旣旋師,命魯追餘黨, 取 城 五 池 百錠以給葬事 ,然後食。」魯上馬麾進,抵城下, 曰:「吾奉旨統 0 八衞漢軍,頓兵于濠七日矣。[1] 子稹。 忽頭 、眩下馬,且戒兵馬弗散,病 月可察兒躬爲治喪,選士護柩還 分攻濠州, 爾諸 將同 同總兵官平章月 心協力, 愈亟 必以

逸魯曾

官, 持 重 辟御 不不 逯魯曾字 能 史臺 與 人周 豫, ·善止,修武人。 性剛介,通經術,中天曆二年進士第,<三 授翰林國史院編修 ,旋,御史以人情劾之,非公論。」由是皆知其直 掌機密。 監察御史劾中丞史顯夫簡傲,魯會開實封於大夫前 日一中 丞素

后,明宗、文宗二母后,固爲妾也。 太后旨 眞 哥 除 無子 太常博士。 立者,明宗母乎? 以文宗之母唐兀氏可以 不立其主。」時伯顏爲右丞相,以爲明宗之母亦乞列氏,可以配享。 武宗 廟, 文宗母乎。」對曰:「眞哥皇后在武宗朝,已膺 未立 配 今以無子之故,不爲立主,以妾后爲正宮,是爲臣 享。 后主配享, 伯顏問魯曾曰:「先朝旣以眞哥皇后無子, 集羣臣廷議之。 魯曾抗言:「先朝以武宗皇 玉册,則 徽 爲 m 不 政 一廢先 爲 院 立 傳

列 傳 第 七 + 四 逡 畬 曾

於軍

Ĩ 爲 以 君 明 配 后 之后,爲子而追封先父之妾,於禮不可。 之母 享先王,爲萬世笑,豈可復蹈 而 配 譽。 爲后,是亦二后也,豈不可乎。」 皇上爲大元天子,不法堯、舜,而法唐太宗邪。〕衆服其議,而伯 其失乎。」集賢 魯曾曰:「 且燕王垂即位,追廢其母后,而立其生母爲后, 大學 堯之母爲帝嚳庶妃,堯立爲帝,未聞 土陳顥 · 素嫉魯曾,出曰:「唐 顏韙之, 太宗 遂以 册曹 册 以

御 ,餘皆伯顏之黨,朝廷肅然。 史, 復 哈剌完者、月魯不花院使,呂 拜監察御史,劾答失海牙、阿吉剌太尉,鞏卜班右丞,兀突蠻刑部尚書,吉當普監察 1思誠郎 中 - , 皆黜之。八人之中,惟思誠少過,亦變 証 宗選

法

眞哥

皇后

配焉。

除 之。 有罪, 僉 除 Щ 除 止坐其 刑 北 樞密院都事,上言:「前伯顏 道 部員外 肅 、身,不 政 郎, 廉 一訪司 得籍其妻女。 悉辨正 事 了、入爲 横罹 禮部 伯顏 郯王 專殺大臣,其黨利其妻女,巧誣以罪。 郎 所 |爲伯顏搆陷,妻女流離,當雪其無辜, 中。 遷宗正府郎 中, 出為遼陽行省左 今大小官及諸人 給復子孫。」從 右司 郎中,

大 夫 至 淮南宣慰使,領征 IE. 十二年,丞相脫脫討徐州 討 事 ·, 遣其募鹽丁五千人從征。 賊,以官軍不習水土,募瀕海鹽丁爲軍,乃超遷魯曾資善 徐州 平,繼使領所部 軍討淮 東 卒

貢師泰

貢 師泰字泰甫,寧國之宣城人。父奎,以文學名家,延祐、至治間,官京師,爲集賢直學

士,卒,諡文靖。

徽 州 路歙 師 泰 縣 早肄業國子學爲諸生。 丞, 江浙行省辟爲掾,尋以土著,自劾去。 泰定四年,釋褐出身,授從仕郎、太和州 大臣 一有以 其名聞者,擢 判官。 應奉翰林文 丁外艱 一、改

字。 T 內艱,服闋,除紹興路總管府推官,郡有疑獄,悉爲詳讞而剖決之。

史旣 有 誣服, 死 Щ 陰白洋港有 人。 高亦就 有徐乙者,怪其無物 逮。 大船飄近岸,史甲二十人,適取鹵 師泰密詢之,則 丽 有死 里中沈丁載物抵杭 人,稱爲史等所劫。 「海濱,見其無主,因取 而 史傭作富民高丙家,事遂連高。 回, 漁者張網海 其篙櫓,而船中 中,因 盜 網 中

魚 爲 漁者所殺,史實未嘗殺 人奪物,高亦 弗 知情,其冤皆白。

游

徼徐裕,以巡鹽爲名,肆暴村落間。

水 ,走告縣曰:「我獲私 鹽犯 人,畏罪赴水死矣。」官驗視,以有傷,疑之。 遂以疑 獄 師 泰

日,

遇諸暨商,奪其所齎錢,撲殺之,投尸於

追詢覆按之,具得裕所以殺人狀,復俾待報。

餘姚孫國寶,以求盜,獲姚甲造偽鈔,受財而釋之,執高乙、 魯丙赴有司,誣以同造偽。

亦 識 高 就 嘗 也 法 爲 師 姚 其於 行 泰 疑 用,實非自造,孫旣舍姚,因 冤獄 高等覆造不 詳讞之明多 合,以孫詰 類此。 之,辭屈 以故郡民自以不 加罪 於 丽 高, 情 見。 加 魯與孫 冤,治行 卽 釋魯 有 隙,故幷 而 爲諸 加 高 郡 以本罪,姚遂處死 第 連之,魯與 o 高 未嘗 孫 相

始復 子司 業,擢 舊制,於是南 考滿,復 禮 部 入翰 郎 林爲應奉,預修后妃、功臣列傳,事畢,遷宣文閣授 士復得居省臺,自師泰始,時論 中,再遷東部,拜監察御史。 自世祖以後,省臺之職, 以 爲得 人。 經 鄓, 南 人斥不用, 歴 翰 林待 制、 及是, 國

之,然莫能有所 則歷究其病原,驗其富貧,而均其徭役,數十郡之民, 百萬石,以給京 至 IE 十四年,[三]除吏部侍郎。 中 師。 傷 也。 遷兵部侍郎。 會朝廷欲仍和糴 朝廷以京師至 時江淮兵起, 浙 西, 因除 上都, 京師食不足, 師 賴以 泰 驛戶 都 稍 水庸 凋 蘇。 弊, 師泰 田 豪貴 使。 命 奉命 師 以其 泰 和 巡視 不利於己, 糴于 整飭之。 浙 一,得糧 深嫉 至

印 江 江 綬棄: 缺守, 十五年,庸 抵 城遁 城 廷議 下,攻圍 ,匿海濱者久 難 田 其 司 甚急。 人, 罷,擢 師泰 之。 明 江 又以選爲 年春,守將弗能支,斬 西廉訪 副 平江 使, 路 未行 總管。 遷 關遁去,師泰領 福 其年冬, 建 廉訪 使,居亡何,除 甫 視 事 義 ٠, 兵出 張 土 戦 誠 禮 自高 部 力不 尙 書。 郵 敵 淧 亦 衆 時 渡 平

士 誠 旣 納 降、江浙 行 省丞相 達 識 帖睦邇,以便宜授師泰 兩浙都 轉運 鹽使。 至則 剔 其 積

通其利源,大課 以集,國用資之。 丞相復承制除師泰江浙行省參知 政 事

萬 石, 一十年, 朝廷 和稱焉。 回朝 廷除戶部尚書,俾分部閩中,以閩 二十二年,召爲祕書卿,行至杭之海寧,得 鹽易糧,由海 疾 而 道 卒。 轉運 給京 師,凡爲糧數

進, 士之賢,不問識不 師 泰性 倜 爣 ,狀貌偉然,旣以文字知名,而於政事尤長,所至績效輒暴著。 ·識,即加推轂,以故士譽翕然咸歸之。 有詩文若干卷行于世。 尤喜接引後

周伯琦

管府事 宗, 縣 主簿,三轉爲 以爲 周 伯 翰林待制。 伯琦 琦字伯溫,饒州人。父應極,至大間,仁宗爲皇太子,召見,獻皇元頌,爲言于武 自幼從宦,游京師,入國學,爲上舍生,積分及高等。 翰林修撰 後為 皇太子說書,日侍英邸。 仁宗即位,遷集賢待制,終池州 去,以蔭授將仕 路同 郎、南 知 總

隆 弟, 王 一義之所書顯亭序、智永所書行文,刻石閣中。 毎進講,輒 至 帝嘗呼其字伯溫而 正 元 年 ,改奎章閣爲宣文閣、藝文監爲崇文監,伯琦爲宣文閣授經郎,敎戚里大臣子 稱旨,且 日被 不名。 顧問。 會御史奏風憲宜用近臣,特命僉廣東廉訪司事。 帝以伯琦工書法,命篆「宣文閣寶」,仍題 自是 累轉官,皆宣文、崇文之間, 扁宣文閣,及摹 而 八年,召 眷 過益

入爲翰林待制,預修后妃、功臣列傳,累陞直學士。

皆南士之望,一時榮之。 御史劉希曾等十人共劾奏之。 十二年,有旨令南士皆得居省臺。除伯琦兵部侍郎,遂與貢師泰同擢監察御史。 時御史大夫也先帖木兒以大軍南討,而失律喪師, 伯琦乃刻希曾等越分干譽,希曾等皆坐左遷,補郡判官,由 陝西 行臺監 兩 察

是不爲公論所與。

使。長槍鎖南班陷寧國,伯琦與僚佐倉皇出見之,尋遁走至杭州。除兵部尚書,未行,改浙西 肅政廉訪使。 十三年,遷崇文太監,兼經筵官,代祀天妃。丁內艱。十四年,起復爲江東肅政廉訪 江南行臺監察御史余觀,糾言伯琦失陷寧國,宜正其罪。

十七年,江浙行省丞相達識帖睦爾承制假伯琦 參知政事,招諭平江張士誠

行, 拜資 士 一誠旣降, 政大夫、 江南行臺監察御史亦辯釋伯琦罪, 江浙行省左丞。於是留平江者十餘年。 除同知太常禮儀院 士誠旣滅, 伯琦 事 乃得 士誠留之,未 歸鄱陽,

尋卒。

草擅名當時。 伯 語儀觀溫雅,粹然如玉,雖遭時多艱,而善於自保。 嘗著六書正譌、說文字原二書,又有詩文藁若干卷。 博學工文章,而尤以篆、隸、眞、

吳當

吳當字伯尚,燈之孫也。當幼承祖訓,以穎悟篤實稱。長精通經史百家言,侍其祖至

京 ,補國子生。 久之,澄旣捐舘,四方學子從澄遊者,悉就當卒業焉

明年 察御史,尋復爲國子司業。明年,遷禮部郎中。又明年,除翰林直學士。 生皆樂從之。 ,陞監丞。 至正 |五年,以父|文蔭,授萬億四庫照磨,未上,用薦者改國子助敎。 勤講解,嚴肄習,諸 會韶修遼、金、宋三史,當預編纂。 十年,陞司業。 明年,遷翰林待制。 書成,除翰林修撰。 又明年, 改禮部員外郎。 七年, 遷國子博士。 十三年,擢監

擒 朝 江 兵,與黃昭夾攻撫州,勦殺首寇胡志學,進兵復崇仁、宜黃。 **殄李三。** 《廷兵力不給,旣受命至江南,卽召募民兵,由浙入閩。 至江 .西 庸 時 江南兵起且五年,大臣有薦當世居江西,習知江西民俗,且其才可任政事者,詔特授 政廉訪使,偕江西行省參政火你赤、兵部尚書黃昭,招捕江西諸郡,便宜行事。 道路旣通,乃進攻南豐,渠兇鄭天瑞遁,鄭原自刎死。十六年,調檢校章迪率本 於是建、撫兩郡悉定。 |西境建昌界,招安新城孫塔,

總兵,則搆爲飛語,謂當與黃昭皆與寇通。 是時,參知政事朶歹總兵撫、建,積年無功。 有旨解二人兵柄,除當撫州路總管,昭臨江路總 因忌當屢捷,功在己上,又以爲南人不宜

管, 上命不可違也。」而 並供億平章火你赤軍。 火你赤又上章言:「二人者,難任牧民。」尋有旨當與昭皆罷總管,除名。 火你赤殺當從事官范淳及章迪,將士皆憤怒不平,當渝之曰:

狀,乃始知其誣,詔拜當中奉大夫、江西行省參知政事,昭湖廣行省參知政事。 居廬陵吉水之谷坪。 友諒遣人辟之,當臥床不食,以死自誓,乃舁床載之舟,送江州,拘留一年,終不爲屈。 陳友諒已陷江西諸郡。火你赤棄城遁,當乃戴黃冠,著道士服,杜門不出,日以著書爲事 由海道未達京師,而朶歹、火你赤等公牘乃先至,故朝廷責當、昭,皆左遷。 十八年,火你赤自瑞州還龍興,當、昭皆隨軍不敢去。先是,當與昭平賊功狀, 逾年,以疾卒,年六十五。所著書,有周禮纂言及學言藁。 及得當、昭功 命未下,而 自廣東 遂隱

校勘記

頓兵于濠七日矣 三年春 ,賈魯死,圍解」。 按明史卷一太祖紀,至正十二年冬「元將賈魯圍濠,太祖與子興力拒之。十 明史卷一二二郭子興傳云「元師圍濠州」、「城守五閱 月」。 此云頓兵七

日,當有誤。錢謙益國初羣雄事略「七日」作「七月」。

中天曆二年進士第 年 非 科舉之歲。 本證云「二當作三」。 按本書卷三四文宗紀至順元年三月戊午條及卷八一選舉志科目,天曆二

列

傅

第

七十四

吳

當

校勘記

四三〇〇

至正十四年 按玩齋集卷首朱錢玩齋先生紀年錄及揭汯貢師泰神道碑銘,「十四年」當作「十

二年」。新元史已校。

[四] 二十年 按玩齋集卷七娛親堂記、卷八祭程以文及卷首錢用壬玩齋集序、

朱錢玩齋先生紀年

錄、揭汯貢師泰神道碑銘、「二十年」當作「十九年」。類編已校。

元史卷一百八十八

列傳第七十五

董博香 弟昂霄

廉訪司知事,除涇陽縣尹。入爲戶部主事,陞員外郎,拜監察御史。又出僉遼東肅政廉訪 獲,五年不決,人皆以爲憤。 摶霄知之,以言于貞, 卽以尸諸市中, 天乃大雨。 授四川肅政 縣,有李謀兒累殺商賈于道,爲賊十五年,至百餘事。事覺,獄已具,賄賂有司,謂徒黨未盡 司事,歷江西行省左右司郎中,遷浙東宣慰副使。其歷官所至,往往理寃獄,革弊政,才譽 董摶霄字孟起,磁州人。由國子生辟陝西行臺掾。時天大旱,從侍御史郭貞讞獄華陰

破之。時朱皐、固始賊復猖獗,軍少不足以分討。有大山民寨及芍陂屯田軍,摶霄皆獎勞 至正十一年,除濟寧路總管,奉旨從江浙平章教化征進安豐,兵至合肥定林站,遇賊大

列

傅第七十五

蓝搏将

益著稱于時。

者 渡 徠 而 五 磵 約 朝 者千二百家, 束 揚 遂 爲 之, 復安豐 其 言 所 於 遂 敗。 衆 得 日 因 障 摶 悉 蔽 賊 霄 知 朱 其 E 功 皐 敗。」 麾騎 虚 0 實。 我 諸 士 軍 別 夜 軍 屯朱家寺, 皆渡, 縛浮橋 渡淺 灘 於 鼓 襲 淝 賊 賊 而 水 至, 擊之。 後 旣 追 渡,賊 賊 殺 賊 回 之。 東 大 始覺。 南 敗 乃遣 亟 向 進 追 與 賊 土 騎 殺 衆 程 之, 數 士 明 迎 萬 相 仲 敵 據 藉 往 摶 磵 以 諭 南 死 霄 賊 者 忽 我 中 躍 軍 招 馬 渡

里

杭 陷 清 爲 摶 劍 而 杭 霄 諸 備 城 河 顧 坊 亦 宜 諸 將 州 十 二 受代 賊 將 亦 急攻之。 難 年,有旨 敎 賊 迎 日 化 敵 其行 去 奔 諸君 接 至 問 待 0 摶霄 鹽橋, 今欲退保湖 命 寺, 荷 摶霄 摶霄 計 或 塞 摶霄 厚 Œ 攻濠 摶 其 色日 恩,而 菛 霄 塵壯 州 日 州 而 焚 臨難 _: ,又命移軍 設 士 江 之, 賊 一突前 浙 使 皆野 茍 賊 賊皆死 相 趸, • 君 乘 人 斬 援 銳 方 今相 殺 見杭 直 江 面 逐 數 南。 趨 旣 君 復 級 京 城 陷 在 杭 , 於 子 口 遂 是, 而 州 渡 賊 女玉 則 諸 敢 江 江南 今可 E 軍 一至湖 有慢 帛 相 而 取 繼 非 餘 不 令者斬 杭 平 州 夾擊之, 而 可 德 爲 不 日 武 清縣, 取 矣。 所 康 _ 0 L__ 誰 有 計 德 凡 敎 任 功 七戰 而 必 淸 化 决 其 徽、 縱 次 猶 咎 慾 第以 豫 饒 追 遂 未決, 復 殺 進 賊 不 暇 至 兵 拔 已

欲 除 殘去暴,所 徽 饒 賊 復 不 自 敢辭 昱 嶺 關 若假 寇 於 潛, 以 重爵 行 省 則不敢受。」 功 假 摶 霄 爲 卽 參 日 知 引 政 兵 事 至 , 臨安新 俾 復提 兵 溪 行計之。 一是爲 入杭 摶 霄 要路 必

旗動,礮卽發。」已而旗動,礮發,兵乃盡出,斬首數千級,遂復千秋關。 曰:「賊以我爲怯,必少懈, 同其有間,則麾所執旗。」又伏兵城外,皆授以火礮,復約曰:「見 至,焚倚郭廬舍。摶霄按軍不動,左右請出兵,摶霄曰:「未也。」遣人執白旗登山望賊,約 昌化縣及昱嶺關,降賊將潘大奫二千人。賊又有犯千秋關者,摶霄還軍守於潛,而賊兵大 分兵守之而始進,兵至叫口及虎檻,遇賊,皆大破之,追殺至於潛,遂復其縣治。旣又克復

萬級,擒千餘人。獲道士,焚其妖書而斬之。遂平徽州。 去,而引賊帥來降。明日,進兵廣德,克之。有蘄賊與饒、池諸賊,復犯徽州。賊中有道士, 思持火投入室內,拔劍語衆曰:「元帥命我來活汝,汝復何議」」已而火起,焚其寨,叱賊黨散 梅元來降,且言復有帥十一人欲降者,卽遣偏將余思忠至賊寨諭之。 賊皆入暗室潛議,思 賊將以其徒來降者數百人。旣數日,賊復來窺獨松。摶霄卽以兵守苦嶺及黃沙嶺。賊帥 分爲三軍:一出獨松,一出百丈,一出幽嶺。然後會兵擣賊巢,遂乘勝復安吉,七戰而克之, 能作十二里霧。摶霄以兵擊之,已而妖霧開豁,諸伏兵皆起,襲賊兵後,賊大潰亂,斬首數 未幾,賊復攻獨松、百丈、幽嶺三關,摶霄乃先以兵守多溪。多溪,三關要路也。旣又

在大縱、德勝兩湖間,凡十有二,悉勦平之。卽其地築芙蓉寨,賊入,輒迷故道,盡殺之,自 列 傳 七 十五 董 摶 霄

十四年,除水軍都萬戶。俄陞樞密院判官,從丞相脫脫征高郵,分戍鹽城、興化。賊巢

是不復敢犯。 賊恃習水,渡淮北據安東州。 **摶霄招善水戰者五百人,與賊戰安東之大湖,**

大敗之,遂復安東。

以騎 嘉其功,陞同僉淮南行樞密院事。 摶霄建議于朝曰: 賊大敗。 方暑雨,湖水溢,諸營皆避去,而摶霄獨守孤城,賊環繞數十里攻之。 回軍屯北沙,糧且絕,與賊死戰,凡七晝夜。賊敗走,奪賊船七十餘,乃得渡淮,保泗州。 士由四門突出賊後,約曰:「旗一廳卽還。」旣而旗動,騎士還,步卒自城中出,夾擊之, 十六年,勦平北沙、廟灣、沙浦等寨。 尋進兵泗州,不利。 然賊寨猶阻西行之路,乃結陣而往,翊以奇兵,轉戰數十合,軍始得至海寧。 賊乘勝東下,斷我軍糧道, 。摶霄坐城上,遣偏將 時

往來,遇賊則幷力野戰,無事則屯種而食。然後進有援,退有守,此善戰者所以常爲不 急務。爲今日計,莫若於黃河上下,幷瀕淮海之地,及南自沭陽,北抵沂、莒、贛楡諸 縣,布連珠營,每三十里設一總寨,就三十里中又設一小寨,使斥堠烽燧相望,而巡邏 淮安爲南北襟喉、江淮要衝之地,其地一失,兩淮皆未易復也。 則救援淮安,誠爲 州

撫,權令軍人搬運。 境,不通舟楫,軍糧惟可陸運,而凡瀕淮海之地, 其陸運之方,每人行十步,三十六人可行一里,三百六十人可行一 人民屢經盜賊, 宜加存

可勝,以待敵之可勝也。

列傳第七十五 董摶雲

米不著地,排列成行,日行五百回,計路二十八里,輕行一十四里,重行一十四里,日可 十里,三千六百人可行一百里。 每人負米四斗,以夾布囊盛之,用印封識,人不息肩,

每運給米一升,可供二萬人。此百里一日運糧之術也。

運米二百石。

行樞密院判官。未幾,有旨命摶霄守河間之長蘆。 尊、金帶、楮幣、名馬以勞之。有疾其功者,譖於總兵太尉紐的該,令摶霄依前詔,從卜蘭奚 急,摶霄乃提兵援濟南。 同征益都。 賊衆悉無遺者。於是齊南始寧。 黎明,乃默開東門,放兵出賊後。 賊復約泰安之黨,踰南山來襲濟南。 騎挑之,賊衆悉來鬭,騎兵少卻,至磵上,伏兵起,遂合戰,城中兵又大出,大破之。 所依歸者,宜設置軍民防禦司,擇軍官材堪牧守者,使居其職,而籍其民,以屯故地。 十七年,毛貴陷益都、般陽等路,有旨命摶霄從知樞密院事卜蘭奚討之。而濟南又告 於是練兵積穀,且耕且戰,內全山東完固之邦,外禦淮海出沒之寇,而後恢復可圖也。 又江淮流移之民,并安東、海寧、沭陽、贛榆等州縣俱廢,其民壯者旣爲軍,老弱無 **摶霄卽出濟南城,屬老且病,請以其弟昂霄代領其衆,朝廷從之。** 賊衆自南山來攻濟南,望之兩山皆赤。摶霄按兵城中,先以數十 旣旦,城上兵皆下,大開南門合擊之,賊敗走。復追殺之, 詔就陞淮南行樞密院副使,兼山東宣慰使都元帥,仍賜上 摶霄列兵城上,弗爲動。賊夜攻南門,獨以矢石禦之。 授昂霄淮南 而般陽

追 事、柱國,追封魏國公,諡忠定。 白氣衝天。 賊衆突至摶霄前,捽而問曰:「汝爲誰。」摶霄曰:「我董老爺也。」衆刺殺之, 諸將謂摶霄曰:「賊至當如何。」摶霄曰:「我受命至此,當以死報國耳。」因拔劍督兵以戰,而 皮 封隴西郡侯、諡忠毅。 縣 之魏家莊 年,摶霄以兵北行,且曰:「我去,濟南必不可保。」旣而濟南果陷。 是日,昂霄亦死之。 ,適有使者奉詔拜摶霄河南行省右丞,甫拜命,毛貴兵已至,而營壘猶未完。 昂霄贈推誠孝節功臣、嘉議大夫、禮部尚書、上輕車都尉, 事聞,贈宣忠守正保節功臣、榮祿大夫、河南行省平章政 無血,惟見其有 摶霄方駐兵南

當時用之不能盡其才,君子惜之。 摶霄早以儒生起家,輒爲能吏,會天下大亂,乃復以武功自奮,其才略有大過人者,而

劉哈剌不花

劉 哈剌不花,其先江西人。倜儻好義,不事家產,有古俠士風。居燕趙有年,遂爲探馬

赤軍戶。

書陳十事,其七言兵機及攻守方略。 至正十二年,潁、亳盜起,朝廷以泰不花爲河南行省平章政事,總兵討之。 泰不花大喜,即辟爲掾史。 未幾,奏除左右司都事 哈剌不花上

列傳第七十五 劉哈刺不花

精銳 不花 大掠 中牟 事]]] 罰 泰 總 渡 不 花 河, 大 輜 斷 日 皆 哈剌 兵 以 重 賊 樂爲之用, 未知其所 賊旣 哈刺 而 歸 面 路, 回 不 哈剌不 花軍 不 捷,兵必再至 哈剌 覆之必 花嘗 向。 於 而 花功名與之相埓 汴梁 |為探| 不花伏軍 料 哈剌 矣。」 敵 馬 南 成 一,我不 不花 於是領軍 赤, 彭 敗 兀 子 日:一 所 有 起, 可不 岡 膂 向 賊 徐行。 是必襲答失 無 力,善騎射, 往援。」遂整 有自長葛來者言 失。 大 敗, 是時 天 盡俘 未 俾統 八都魯營 明, 兵 答失八都魯軍 獲 而 之。 伏 前 前 ,總兵官已爲賊所敗,次中牟。 軍 八翼軍 當是 其歸 耳。 旣 時, 而 路。 我行 , 潰于長葛,收集散 有使馳 爲 答失八 已緩, 先鋒將。 賊果襲答失]報:夜 都魯雖 不 及事 明 四 號 .鼓,賊 八都魯營, 以 す, 不 令, 卒, 平 若 哈 復 信 從 洧 刺 賞 屯

遷都 遷 與之 逼畿 河 南 戰 十七 關 甸 于 陜 行 柳林 衆議 年, 省平章政 樞密 $\dot{\Box}$ 副 大 紛 使 山 捷。 然, 達 事 東 以卒。 毛貴 獨 或 貴 左 珍 衆 戦 率 丞 悉潰 相 死 其 太平 賊 退,走 衆, 京 執 師 據 不 人 由 濟南 可。 心 河 間 大 京 哈剌 駭。 趨直沾, 師 不 在 逐安,哈刺 花時 廷 之臣 遂犯 爲 同 漷 或勸 州 知 不 花 樞 之功 密院 乘輿 至棗林。 北 居 事 多。 ,奉詔以兵拒 巡 以 已 哈刺 避 而 之, 略 不 柳 花後 或

敏,泰不 初 ,哈剌 花深 委任 不 花 之,言. 與信州 無 人倪晦 不 從 m 字 哈刺 孟 晣 不 同 花 或 事 有 泰 所 不 論 花 爲掾 白 多沮 史。 不行, 晦 涉 書史, 由 是 心 精 銜 文 泰 墨, 不 機 識 及

泰 不花 事敗 走詣 哈剌 不 花求援,而哈剌不花不能曲爲保全,乃縛泰不花送京師,致之死

地,君子以是少之。

王英

王英字邦傑,益都人。 性剛果, 有大節, 膂力絕人, 善騎射。 襲父職,爲莒州翼千戶。

父子皆善用雙刀,人號之曰刀王。

其渠帥劉 至元二十九年,江西行樞密院命帥師南雄,討賊丘大老。]把東, 獲九十餘 人。 元貞 元 年,從左 |丞董士選討大山賊劉貴, 賊六百餘人突至,英與戰,殺 擒之。 二年,討泳

新、安福二州賊,餘黨皆息。

坑, 數, 擒賊蔡五九。 積屍盈 延祐 二年,寧都賊起,行省命英率各萬戶軍討之。 野, 水爲 又追賊至上虎嶂,遇賊三千餘人,盡殲之。 不流。 行省平章李世安, 遣英迓江浙平章張閭所領軍 賊勢甚張,英屢戰皆勝,斬獲不 於閩境, 至木麻 可勝

至順 元年,授懷遠大將軍、同知海北海南道宣慰使司事。 至治元年,以大臣薦,授忠武校尉、益都淄萊萬 二年,行省命英招捕桂陽州賊張思進等二千人。 戶府副千戶。 英至, 布以威信, 天曆元年,授宣武 皆相 率請降。 將軍 元統

列傳第七十五 王英 石抹宜孫

州,劉虎仔起潮州,詔命江西行省右丞燕帖木兒討之。 至元三年,萬安軍賊吳汝期等作亂,聚衆三千人。 方賊 英至,賊皆就擒。 起時,英已致仕,平章 未幾,李志甫起漳 政 事 伯

里謂 曰:「國 僚佐曰:「是雖鼠竊狗偷,非刀王行不可。 家 有 事,吾雖老,其可坐視乎!」據鞍橫槊,精神飛動,馳赴焉。 其人雖投老,必可以義激。」乃使迎致之。 及賊平,英功居多 0

遂卒。 祝畢, 享之。 栗,餓死芹泉,有夷、齊之風,爲臣之清者也。」芹泉,谷名,英所居也。 至 尸遂起,觀者莫不驚異。 今老: 毛貴 正 中,毛貴陷益都,英時年九十有六,乃謂其子弘曰:「我世受國恩,美官厚祿,備嘗 聞之,使具棺衾以葬。將斂,舉其尸不動, 矣,縱不 能 事 ,戎馬以報天子,尙忍食異姓之粟以求生乎!」水漿不入口者數日, 山東宣慰使普顏不花及憲司,請卹典于朝,有曰:「不食寇 焚香祝曰:「公子弘請公歸葬先塋。」

石抹宜孫 邁里古思

學本 也先 叉移 於經 鎭婺、處 之曾 石 抹 一術,而 孫 宜孫字申之。 日 兩州。 繼 兼 祖,字伯善,襲父職,爲沿海 通名 馭 軍嚴肅,平寧都寇,有戰功,且明達政事,講究鹽策,多 法、縱橫、 其先遼之迪烈糺人。五世祖曰也先,事太祖爲御史大夫,自有傳。 天文、地理、術數、方技、釋老之說,見稱薦紳間。 上副萬戶。 初以沿 海軍分鎭台州,皇慶元 合時宜。 宜孫其 年, 爲

子也。

副萬 戶,守處州。 宜 孫 性 警敏 ,嗜學問,於書務博覽,而 及弟 長 卽 讓 其 職還 之,退居台州 長於詩歌。 嘗借 嫡 弟厚孫廕, 襲父 職, 爲沿 海 上

處州 宜 至正十一 孫復奉省檄往討 復檄宜孫以 年 一方國 兵平之。 艺。 [珍起 海 至 以 則築處州 Ė, 功 江浙 陞浙 行省檄宜孫守 城 東宣慰 為為 禦敵 副 使, 計 溫 分 州, 府 于 台州 宜孫卽起任其事。 頃 之, 處之屬 其年閩 縣 Щ 寇 寇犯 並

深、 時 卽 親 基 處。 下 遣 經 已多故 等謀,或擣 葉琛 食祿 略 胡 叉以 十七 十八年十二月,大明 使 深等將民兵數萬 章溢 而 所 年,江 李 江 不事 國 浙 在守將各自 以 參謀 鳳 儒學副提 其事 浙 兵,或誘以 至浙東 行省左丞 其 ,是無君 軍 舉 往赴援 事 1為計 兵取 承制拜宜孫 計,未幾, 劉 相達識 處為 也; 基爲其院經歷, 蘭 相保守。 而 溪, 母 郡 親 在 鐵 , 山 皆殲 且 難 江 睦 率 逼婺, 浙 精 谷聯 而 於是浙東 邇 殄無遺 行 銳 不 承 省參 絡,盜 赴, 爲 制 而 蕭 之殿。 陸宜孫 宜 Щ 是無 類 知 則 孫母實在 賊 縣 宜孫 政 尹蘇 憑 親 事。階 尋陞 兵 行樞 據 也。 至婺, 在 友龍 險阻 同 處州 密院判官, 婺城 中 無君 僉 奉 與 「,輒 爲 行 邁 大 大夫 照磨, 無親 樞 竊發,不易 里古思 明 宜 密院 兵 孫 總制 甫 尙 泣 而 事 接,即 在紹 日 可 宜 處州, 立 至 孫 當是 義莫 天 興 治 叉 敗績 辟 地 爲 分院 之之時, 宜 間 稱 重 郡 而 於 首 孫 治 人 還 君 天 胡 用

列傳第七十五 石抹宜孫 校勘記

耳 復 爲。 」既還,至 明 年,大 嘆 一處州 明兵入處州,宜孫將數十騎走福建境上,欲圖報復,而所至人心已散, 處之慶元縣,爲亂兵所害。 吾所 守者也。 今吾勢 事 已窮, 聞,朝廷贈推誠宣力效節 無所 於 往 不 如 還處州 功臣、 境 集賢大學士、榮 死亦為 處州 事 不 鬼 可

祿

大夫、上柱

國,追封越國

公,諡忠愍。

思 主 擒 將楊完 斬 邁 數 里古思者,寧夏人也,字善卿。 者 人 在 ,苗軍乃懼,不敢復至其境。 杭,縱其 軍 ·鈔掠,莫敢誰 何,民甚苦之。 至正十四年進 邁里古思名聲逐大振 士,授紹興路錄事 俄 有 至紹興城 中强 司達魯花赤。 奪人馬者,邁 里古 苗 軍

晏 廉 掠 婺之 訪 然,民愛之如 司 會 永 經 江 南 歷,仍留 康 東陽 行臺 父母。 移治紹興,檄邁里古思爲行 邁 紹興,以兵衛臺治。 里古思提兵往擊之,與石抹 江浙省臣乃承 制 時浙東、西 授行 樞 臺鎭撫, 密院判官 郡 宜 縣 孫 乃大募民兵, 約 多 殘 期夾攻其巢穴,山 分院 破, 治紹興。 獨 邁 爲守禦計。 里 古思保障紹 . 賊以 平。 處州 興, 擢 Щ 境內 賊 江 焚 東

其 舟 可乎!欲 以運 會方 糧 國珍遣 一而 率 兵往問罪。 御 兵侵據紹興屬縣,邁 史大夫拜住 先遣部將黃中 哥, 與 或 里古思 珍素通賄賂 取 上虞 日三 國珍 ,中還,請 情好甚厚,憤邁 本 海 益 賊,今旣降,爲 兵。 是時 里 古思擅 朝 延方 大官,而 舉兵, 倚 重 復 國珍,資 恐且 來害吾 生

事 了,卽使人召邁里古思至其私第,與計事,至則命左右以鐵鎚撾死之,斷其頭,擲厠溷中。

城中民聞之,不問男女老幼,無不慟哭者。

誠, 置潮州,而邁里古思之寃始白。 帥臣,幾致激變,不法不忠,莫斯爲甚。 士誠乃遣其將以兵守紹興。 拜住哥尋遷行宣政院使,監察御史眞童糾言:「拜住哥陰害 黃中乃率其衆復讎,盡殺拜住哥家人及臺府官員掾史,獨留拜住哥不殺,以告于張士 宜稽諸彝典,置于嚴刑。」於是詔削拜住哥官職,安

校勘記

十七年 道光本改作「十八年」,與本書卷四五順帝紀至正十八年三月庚戌、 乙卯條及卷一四

〇太平傳合。

元史卷一百八十九

列傳第七十六

儒學一

儒 之爲學一也, 前代史傳,皆以儒學之士,分而爲二,以經藝顓門者爲儒林,以文章名家者爲文苑。 六經者斯道之所在, 而文則所以載夫道者也。 故經非文則無以發 明其旨 然

趣;而文不本於六藝,又鳥足謂之文哉。 由是而言、經藝文章、不可分而爲二也明矣。

彬焉衆矣。 元興百年, 上自朝廷內外名宦之臣, 下及山林布衣之士, 以通經能文顯著當世者, 今皆不復爲之分別,而采取其尤卓然成名、可以輔敎傳後者,合而錄之,爲[[彬

學,傳。

趙復字仁甫,德安人也。 太宗乙未歲,命太子闊出帥師伐宋,德安以嘗逆戰,其民數十

程 際 傳 恐 掛 其 、朱所著 則 緒百 俘 皆俘戮 籍者, 自 見復 裁 世 · 隨 諸經 留 輒 E 無遺。 被被 帳 吾 脫 傳 髮 中 之 而 註 北 徒跳,仰 共 以 時 楊惟· 宿 歸 盡錄 必 復 可 旣覺,月色皓 中行中書省軍 天 在 以 無他。」復强從之。 付 而 其 樞 中。 號,欲投水 樞 然,惟 與之言,信奇士,以 前,姚樞奉韶卽 而 未入。 寢 先是 衣 在,遽馳 南南 樞 北 曉 軍中求儒、道、釋、 道 以 九族 馬 絕,載籍不 徒 周號 死無 俱 残,不 積 益:「汝存,則 屍 相 間 欲 通 北,因 醫、),至是,復 無 有 ۲ 子 也 與 士 樞 孫 以 或 凡 行 訣 所 及 儒 可 記 以 水 樞 生

其 嚮 者, 條 餘 喈 天 日 書而 慕 立 卷 列 其 共 五 干 清請 、學,乃 宋, 極 自 後 復 尊信之。 十 後 孔 吾父 復 至 求 有 講 子、顔、孟所 與 別 燕, 福謀 端 三人 授其 母 著伊 用 國 學子從者百餘人。 北 作 建 力之方備矣。 中。 洛 也,未有引他 方知有程、朱之學,自復始。 太極 1.發揮, 師友 以 復 以 書院,立 垂 圖,以寓 以 世 周 程 標其宗旨。 立 人 教 樞 以伐 周子 而 世祖 旣 私 後 周、程、 退隱蘇門,乃卽復傳其學,由是許衡 淑 其 祠,以二程、張、楊、游、朱六 吾父母者。」 之志。 在 朱子門人, .潛邸,嘗召見,問曰:「我欲取宋,卿 書廣博, 張、 叉 朱氏 取 學者未 世 伊 所 祖 散 尹 以 悦,因 顏 在 能 發 四 明紹 淵言行 方, 貫通,乃原 不 强之仕。 則 續 君 以 者,作傳道圖 ,作希賢錄 子 見諸登載 配 羲、農、堯、 食,選 惟中 可導之乎? 崩 ,使 與 取 劉因 復 2學者 舜 遺 得 而 論議,始 書 諸 以 所 書 知 傳 以 八千 繼 對 所 聞 目

列傳第七十六 儒學一

南 類若 歸 也,復 復爲人,樂易而耿介,雖居燕,不忘故土。 此。 贈之言,以博溺心、末喪本爲戒,以自修讀易求文王、孔子之用 復家江漢之上,以江漢自號,學者稱之日江漢先生。 與人交,尤篤分誼。 元好問文名擅一時,其 心爲勉。其愛人以

嘗論 能 道於台之上蔡書院,墾從而受業焉。 及之。 定者,靡不潛心玩索,究極根柢。 張 **墾字達善,其先蜀之導江人。** 自六經、語、孟傳註,以及周、程、張氏之微言,朱子所 蜀亡,僑寓江左。 用功旣專,久而不懈,所學益弘深微密,南北之士,鮮 金華王柏,得朱熹三傳之學,嘗講

敢 字 不忘 呼,而稱 四書者,皆遣從盨游,或闢私塾迎之。 至元 中,行臺中丞吳曼慶聞其名,延致江寧學官,俾子弟受業,中州士大夫欲淑子弟以 日 導江先生。 大臣 [薦諸朝,特命爲孔、顏、孟三氏教授,鄒、魯之人,服誦遺訓] 其在 維揚,來學者尤衆,遠近翕然,尊爲碩 師,不

博,貫穿縱橫,嚴然新 多 夾谷之奇、楊剛中尤 **墾氣宇端** 重,音吐洪亮,講說特精詳,子弟從之者,詵詵如 安朱氏 顯。 之尸祝也。 **墾無子。** 有經說及文集行世。 至正 中, 眞州守臣以盨及郝經、吳澄皆嘗留儀眞, 吳澄序其書,以爲議 也。 其高第弟子知名者甚 論 正,援據

作祠宇祀之,日三賢祠。

從曾祖景文,當宋建炎、紹興間, 金履祥字吉父,婺之蘭溪人。 以孝行著稱, 其先本劉氏,後避吳越錢武肅王嫌名, 其父母疾, 齋禱于天, 而靈 更爲 應隨 至。 金氏。 事

朝,爲改所居鄉曰純孝。

則 兵謀、陰陽、律曆之書,靡不畢究。 學于黃榦,而榦親承朱熹之傳者也。 履祥幼而敏睿,父兄稍授之書,即能記誦。 及壯、知向濂、洛之學、事同郡王柏、從登何基 自是講貫益密,造詣益邃。 比長、益自策勵、凡天文、地形、禮樂、田 之門。

可據以行。 裹樊之師,將不攻而自解。 樊之師日急,宋人坐視而不敢救,履祥因進牽制擣虛之策,請以重兵由海道直趨燕、薊, 時宋之國事已不可爲,履祥遂絕意進取。 宋終莫能用。 及後朱瑄、張淸獻海運之利,而所由海道,視履祥先所上書,咫尺 且備敍海舶所經,凡州郡縣邑,下至巨洋別隝,難易遠近,歷歷 然負其經濟之略,亦未忍遽忘斯世也。 會襄 則

無異者,然後人服其精確。

兵燹稍息,則上下巖谷,追逐雲月,寄情嘯咏,視世故泊如也。 德 祐 初, 以迪 功郎 、史館編校起之,辭弗就。 宋將改物,所在盜起,履祥 平居獨處,終日儼然;至與物 屏 居 金華 14

傳第七十六 儒學一

列

基 相 接 、王柏 知者 則 盎 + 之喪, 然 年 和 懌。 履祥 履祥 訓 傾貲營購 率 迪 其 後 同 (學,諄 門 卒贖 之士,以義 切 以完; 無 倦 が一面 制 其子 尤篤 服, 後貴 觀者始 於分 履祥 義。 知師 有故 終不 弟子之繫 自言 人子 坐事 於常 相 見 • 勞 倫 母 問 也 子 辛 分 書 配 而 爲 隸, 不 何

(論 術 {通 損 氏 史 家 中 未 表 ''; 之 ·發 。 鑑 所 以 語 益 說 之前 作 Ŀ 立 折 記 背 其 是非 祥 一或闕 ·春秋 旣 衷,一 子 法 嘗謂 、書于 集註 成, , 勒 亂 ", 王 以尚書 診於 以 政, 或 爲 ※考證 朝 司 授門 朝 誣 馬文 亦 聖 書,二十卷,名曰 列 凡 後 人許謙 爲主,下 國 人,不足 七卷, E 此 王所當戒, 之事 類皆 公光 書表注 非 曰:「二帝三王之盛, 作資 及(詩、 以 不 傳信 得 有 }治 則是編 以 玉 通鑑前 、禮、春秋 四卷 通 帛 辟 之使, · 鑑 經 自帝堯以前 謙 一秘書 不 爲 編 可以 旁 解。 爲 則 益 採舊· 魯史不 丞劉 凡所 乃用 不著 加 其 不 校定,皆傳于 微言 引 恕 史諸子,表 也。」 邵氏 爲 書,輒 得 經 I 懿 行, 夫子 外紀 而 皇極 他所著書: 書, 加 所定, 年繁事 非聖 訓 以 宜 經 學者。 釋,以 *世 記 後 {曆 王 人 前 固 日大學章 筆削 所當 斷斷 事 野 裁 胡 天 不 而 曆 氏 IE 自 法 之所 難 其 唐堯 本於 初 皇王大紀 戦 質, 句疏 義 廉 加 經,而 國 以下,接于 然訪使 多儒 夫子 也。 義 申、 之例, 商之 先所 況 因 信 魯 百

志 以 定其本,志 初 履祥 旣 立 見 乎 王 柏 事 首 物 之表, 問 爲 學之方,柏 敬 行 乎 事 物 告以 之內, 必 先立 此爲學之大方 志,且 舉 ·先儒 也。 之言:居敬 及 見 何 基 以持其 基 謂 志,立

實似尹和靜,柏之高明剛正似謝上蔡,履祥則親得之二氏,而並充於己者也。 「會之屢言賢者之賢,理欲之分,便當自今始。」會之,蓋柏字也。 當時議者以爲基之淸介純

士,移書學官,祠履祥于鄕學。 履祥居仁山之下,學者因稱爲仁山先生。大德中卒。元統初,里人吳師道爲國子博 至正中,賜諡文安。

以歿。 終始者也。 之子曰洸、曰洞,洞由進士起家,以文章政事知名于時。洸之子寔,事海陵胡瑗,能以 許謙字益之,其先京兆人。 由平江徙婺之金華,至謙五世,爲金華人。 九世祖延壽,宋刑部尚書。八世祖仲容,太子洗馬。 父觥,登淳祐七年進士第,仕未顯 師法

羨語,皆不敢忽。 無以感發子耶」謙聞之,惕然。 之爲學, 若五 立程以自課, 謙生數歲而孤,甫能言,世母陶氏口授孝經、論語,自己入耳輒不忘。 一味之在和,醯醬旣加,則酸醎頓異。子來見我已三日,而猶夫人也,豈吾之學 取四部書分晝夜讀之,雖疾恙不廢。旣乃受業金履祥之門,履祥語之曰:「士 有不可通,則不敢强,於先儒之說,有所未安,亦不苟同 居數年,盡得其所傳之奧。於書無不讀,窮探聖微,雖殘文 也 稍長,肆力於學,

讀四書章句集註,有叢說二十卷,謂學者曰:「學以聖人爲準的,然必得聖人之心,而後

傳第七十六 儒學一

列

歲 而 年 其 易 可 **%**原其 經 逸 心 書孔子卒之義,以致其意焉 學聖人之事。 求 義,旁采遠援,而以己意終之。 國 緯之法,起太皞氏,迄宋元祐元年秋九月尚書左僕射 之乎」讀詩集傳,有名物鈔八卷,正其音釋,考其 興亡,著其善惡,蓋以爲光卒,則 聖賢之心,具在四書,而四書之義,備於朱子,顧其辭約意廣,讀者安可 讀書集傳, 中國之治不可復興,誠理亂之幾也。 有叢說六卷。 、名物 司馬光卒,備其 度數,以補先儒 其觀· 史,有治忽幾微 、世數, 之未備, 故附於續經 倣 總 仍存 史家 其年 以

表而 叉嘗. 露 制 一, 所 度、食貨、刑 見之。 句讀九經、儀禮及春秋三傳,於其宏綱要領,錯簡 叉 爲詩文,非扶翼經義,張維 學者 有自省編 其後吳師道購得呂祖 孰 法 不日 ,畫之所爲,夜必書之,其不可書者,則不爲也。 、字學、音韻 關異端,苟不深探其隱,而識 、醫經、術數之說,亦靡 世教,則 謙點校儀禮,視謙所定,不 未嘗輕筆之書也 其所以然,能辨其同 不該貫,旁 行文,悉別 同者十有三條 而 以 其他若天文、 釋、老之言,亦洞究其蘊 鉛黄 異,別其 朱墨,意有所 而 是非 地理、典章、 謙不喜矜 也幾希。」 .明,則

揚、 知 吳、越 延 豈不 祐 初 ,皆不憚百舍來受業焉。 快哉 謙 」。或 居東陽 有 八 所問難,而 華 Щ, 學者翕然從之。 其教 詞不能 人也,至誠諄悉,內外殫盡,嘗曰:「己有 自達, 則爲之言其所欲言,而 尋開 門講學,遠而 栩 冀、 解 其所惑。 齊、魯,近而 知,使 討論講 人亦

焉。 俗。 之, 之文 拘 終 授 或 不 ,者開 日 訪 出 人,曰:「此 不 以 里 ·倦,攝 之,放者約 閭 典 禮 者四十 政 其 義、利之所由 事 粗 · |謙 之。 疏, 年,四方之士,以 觀 入 及門之士,著錄者千餘 其 於密微。 會 分也。」謙篤 通 一,而 聞者方傾耳 爲之折 不及門為 於孝友,有絕 夷,聞 恥,縉 ·聽受, 人, 者 隨 無不 紳 而其出愈 其 先 人之行。 材 厭 生 分, 一之過 服 咸有 眞切。 其 其處世不 鄕 所 邦者 得。 惰者 膠於古, 必卽 然 作 獨 之, 其 不 家 銳 不 以 存 者 流 科 問 抑 於 舉

數 劉 問 自 之 重 號 + 庭 日 一,遠 上 直 大德 世 豈食不足邪?」 副 而 稱 近 中 學者 使趙宏偉,皆中州 郡 爲 ,熒惑入南斗句已 白 復 以遺 雲先生。 ,以其身之安否,爲斯道 逸 謙 應詔;鄉 曰:「今公私匱竭 朝 廷 雅 賜 而 闡 望,於謙深 諡 行,謙 大比,請 文懿 以 之隆 爲 道 加 司 災在吳、楚,竊深憂之。 替焉。 推 其 殣相望, 吾能獨 文衡。 服 論 至元三年卒,年六十八。 薦于朝,中外 皆莫能 飽 致。 邪 _! 至其 名臣 其處 是歲 晚節 列 心 大侵,謙貌 其行 蓋 獨 嘗 如 義者 以 以 此。 白雲 身 前 加瘠 任 廉 Щ IE 後 訪 學 使

朱熹之世 先是, 適 何 基 江 浙 王 柏 行 中 及 金履 書省爲請于朝, 祥 殁, 其 學猶 建 四賢 未 大顯,至 (書院) 以 謙 而其道 奉 洞 事 益著,故 而 列于 學官 學者推 原統緒,以爲

同 郡 朱震亨, 字彦修, 謙之高第弟子也。 其淸修苦節, 絕 類古篤行之士, 所至 人多

化之。

陳爍字壽翁,徽之休寧人。 櫟生三歲,祖母吳氏 口授孝經、論語,輒成誦。 五歲入小

學,卽涉獵經史。七歲通進士業。十五,鄉人皆師之。

※疏 聖 則引而 門者, 宋亡, 禮記集義等書,亡慮數十萬言,凡諸儒之說,有畔於朱氏者,刊而去之,其微辭隱義, 伸之"而其所未備 莫若朱熹氏, 科舉廢,櫟慨然發憤, **熹沒未** 者,復爲說以補其闕。 **人** 而諸家之說,往往亂其本眞,乃著四書發明、書〔集〕傳纂 致力於聖 人之學,涵濡玩索, 於是朱熹之說大明 貫穿古今。 於世 嘗以謂有功於

遣 遷。 家 而 ,不出門戶者數十年。 歸櫟。 善誘 延祐 初,詔 學者,諄諄不倦。 櫟所居堂日定字,學者因以定字先生稱之。 以科 舉取 性孝友,尤剛正,日用之間,動 士,櫟不欲就 臨 Ш 吳澄,嘗稱櫟有功於朱氏爲多,凡江東 試,有司 强之, 試鄉闈中選, 中禮法。 元統二年卒,年八十三。 與 遂不復赴禮部。 人交,不以勢合,不以利 人來受業於澄者 教授於

書之行,天下乃能知之。 之,故其道遠 揭 徯 斯誌其墓,乃與吳澄並稱,曰:「澄居通都大邑,又數登用于朝, 而章,尊而明。 及其行也,亦莫之禦,是可謂豪傑之士矣。」世以爲知言。 櫟居萬 山間,與木石俱,而足跡未嘗出鄕里, 天下學者,四 故其學必待其 面 而

興沈貴寶 胡 桂 ,受易於董夢程,夢程受朱熹之易於黃榦, 字庭芳,徽州婺源人。 **父**方平。 一桂生而穎悟,好讀書,尤精於易。 m 一桂之父方平及從貴寶、夢程學,嘗 初,饒州德

著易學啓蒙通釋。 桂之學,出於方平,得朱熹氏源委之正。

所著書有周易本義附錄纂疏、本義啓蒙翼傳、「『一朱子詩傳附錄纂疏、十七史纂,並行 餘干饒魯之學,本出於朱熹,而其爲說,多與熹牴牾,炳文深正其非,作四書通,凡辭異而理 雲峰先生。 同者,合而一之,辭同而指異者,析而辨之,往往發其未盡之蘊。 其同郡胡炳文,字仲虎,亦以易名家,作易本義通釋,而於朱熹所著四書,用力尤深。 宋景定甲子,一桂年十八,遂領鄉薦,試禮部不第,退而講學,遠近師之,號雙湖先生 炳文嘗用薦者,署明經書院山長,再調蘭溪州學正。 東南學者,因其所自號,稱 于世

播、揆, 初,延節爲大理評事, 黄澤字楚望,其先長安人。 同年登進士第,蜀人榮之。 兼監察御史, 唐末,舒藝知資州內江縣,卒,葬焉,子孫遂爲資州人。 父儀可,累舉不第,隨兄驥子官九江,蜀亂, 累贈金紫光祿大夫,澤十一 世祖也。 五世 祖拂,與二兄 不能歸,因 宋

澤生有異質,慨然以明經學道爲志,好爲苦思,屢以成疾,疾止復思,久之,如有所見,

家焉。

顏 淵仰高鑽堅論。 蜀 人治經,必先古注疏,澤於名物度數,考覈精審,而義理一宗程、朱,

作易春秋二經解、二禮祭祀述略。

作

授所 洪 言聖人德容之盛 之 較六經, 東湖書院,受學者益 大德中,江西行省相 字畫 ,上達於文王、周公。 一如新, 衆。 由是深有感發,始悟所解經多徇舊說爲非是,乃作思古吟十章,極 臣聞其名,授江州景星書院山長,使食其祿以施敎。又爲山長於 始澤嘗夢見夫子,以爲適然,旣而屢夢見之,最後乃夢夫子 秩滿. 卽歸 ,

閉門授徒以養親,不復言仕。 手

原,載 餘條 於春秋以明 及其 多 言,上求 末,皆若身在 一,而 久 嘗 籍 以示 經旨 凡 也,則 낋 所 文王、周公之意爲主,而 數十 爲 學者。 不 愈晦 書 去聖 豁 能 其 年苦思而 法為主, 其大要則 間 具 然 ;必積誠研精,有所悟入,然後可以窺見聖人之本眞。 **久遠,經籍殘闕,傳注** 而 者,皆昭若 無不 旣乃盡悟失傳之旨。 目 貫 未 擊 通。 通者,皆渙然冰釋, 其 事 發蒙,如示 自 者。 天 在考覈三傳,以求向上之功,而脈 其機枯,則盡 地定位、人物未生已前,沿而下之,凡邃古之初,萬化之 於是易、春秋傳注之失,詩、書未決之疑,周禮 家率多傅會,近世 諸掌。 自言每於幽閒寂寞、顚沛流離、疾病無聊之際得之, 在十翼,作十翼 各就 然後由 條 理。 [伏羲、神農、五帝、三王,以及 儒者,又各以才 故於易以明 舉要、忘象辯、 絡盡在左傳,作三傳義例 乃揭六經中疑義 象爲先, 識求之,故議論 · 黎略、 以 因 非 辯同 孔子之 春秋 聖 千有 論 書 之 雖

列

傅

之

無益

※考、 船考、周 計削本旨 爾太廟單祭合食說,作丘甲辯,凡如是者十餘通,以明古今禮俗不同,見虛 又作元年春王正月辯、諸侯娶女立子通考、魯隱公不書卽位義、殷周諸侯禘 辭 說經

淺,作 似 (翼 以 易 祖之所 [經罪言。 證 學濫觴、 茍 其 嘗言:「 通其 禮經復古正言。 自出 非。 春秋指 一,則 近代覃思之學,推澤爲第 學者必悟經旨廢失之由, ,以始祖配之,而不及羣 其辯釋諸經 可)要, 觸 機 示人以求端用力之方。 如王肅混郊丘廢五天帝,併崑崙、神州 要旨,則有六經補注 而悟矣。」又懼學者得 廟之主,胡宏家學不信周禮,以社 然後聖人本意可見, ,詆排百家異義,則取杜牧不當言而言之義,作 於創聞,不復致思,故所著多引 其於禮 學,則謂鄭氏深而 若易黎與春秋書法廢失大略相 爲 <u>~</u> 趙伯循言 爲祭地 未完,王 之類, 而 王者 不 肅 發 皆引經 旈 明 其始 乃 而 作 實

之徒 如 艱苦之餘,乃能 此,寧無不傳之懼。]澤曰:「聖經興廢,上關天運,子以爲區區人力所致耶」 經,且 也,楚望眞其 吳澄 將 嘗 經紀 觀其書,以爲平 **其家,澤謝曰:「以君之才,何經不可明,然** 有見,吾非邵子,不敢以二十年林下期君也。」泗歎息 人乎」然澤雅自慎 ·生所 見明經士,未有能及之者,謂人曰:「能言距楊、墨者,聖人 重,未嘗輕與人言。 亦不 李泂使過九江、請北面 過筆授其 而 去。 義而已。 或問澤「自國 稱弟 若余則於 子,受

世者十二三。門人惟新安趙汸爲高第,得其春秋之學爲多。 意,惟以聖人之心不明,而經學失傳,若己有罪爲大戚。 至正六年卒,年八十七。 其書存于 澤家甚窶貧,且年老,不復能教授,經歲大侵,家人采木實草根以療饑,晏然曾不動其

鄉人有自城中暮歸者,遇寇,欲加害,詭言「我蕭先生也」,寇驚愕釋去。 之,謂曰:「殊無他人,獨翁居後耳。」」鄭令隨至門,取家釵以償,其婦後得所遺釵,愧謝還之。 年,惟蕭惟斗爲識字人。學者及其門受業者甚衆。嘗出,遇一婦人,失金釵道旁,疑昗拾 其榻,玩誦不少置,於是博極羣書,天文、地理、律曆、算數,靡不研究。侯均謂元有天下百 稍出爲府史,上官語不合,卽引退,讀書南山者三十年。製一革衣,由身半以下,及臥,輒倚 蕭與字惟斗,其先北海人。父仕秦中,遂爲奉元人。與性至孝,自爲兒時,翹楚不凡。

爲獻,以朝廷時尙酒故也。尋以病力請去職,人問其故,則曰:「在禮,東宮東面,師傅西面 業,改集賢侍讀學士,皆不赴。大德十一年,拜太子右諭德,扶病至京師,入覲東宮,書酒誥 馬,卽應之不拒,及冠帶迎賓,從史見鹹,有懼色,鹹殊不爲意。後累授集賢直學士、國子司 大臣卽其家具宴爲賀,使一從史先詣興舍,與方汲水灌園,從史至,不知其爲興也,使飮其 世祖分藩在秦,辟嘝與楊恭懿、韓擇侍秦邸,嘝以疾辭,授陝西儒學提舉,不赴。 省憲

列傳

此 禮 今可行乎。」俄除集賢學士、國子祭酒,依前右諭德,疾作,固辭而歸。卒年七十八,賜

諡貞敏。

題駁論、九州志,及勤齋文集,行于世。 泗爲本,濂、洛、考亭爲據,關輔之士,翕然宗之,稱爲一代醇儒。所著有三禮說、小學標 喇 制行甚高,眞履實踐,其敎人,必自小學始。爲文辭,立意精深,言近而指遠,一以

乎。」擇尤邃禮學,有質問者,口講指畫無倦容。士大夫游宦過秦中,必往見擇,莫不虛往而 學等書始。或疑爲陵節勤苦,則曰:「人不知學,白首童心,且童蒙所當知,而皓首不知,可 實歸焉。 韓擇者,字從善,亦奉元人。天資超異,信道不惑,其敎學者,雖中歲以後,亦必使自小 世祖嘗召之赴京,疾,不果行。其卒也,門人爲服緦麻者百餘

博士,後以上疏忤時相意,不待報可,卽歸休田里。 己無益。」故其答諸生所問,窮索極探,如取諸篋笥,名振關中,學者宗之。用薦者起爲太常 百 氏,無不淹貫,旁通釋、老外典。每讀書,必熟誦乃已。嘗言:「人讀書不至千編,終於 侯均者,字伯仁,亦奉元人。父母蚤亡,獨與繼母居,賣薪以給奉養。積學四十年,羣

曉者,莫不隨問而答,世咸服其博聞 **|均貌魁梧,而氣剛正,人多嚴憚之,及其應接之際,則和易款洽。雖方言古語,世所未** 列傳第七十六 儒學

同 恕字寬甫,其先太原人。 五世祖遷秦中,遂爲奉元人。 祖昇。 父繼先,博學能文,康

希憲宣撫陝 右 ,辟掌庫鑰。 家世 1業儒,同居二百口,無間言。

宗繼統,以疾歸。 業,階儒林郞,使三召,不起。 間, 太子左贊善召,入見東宮,賜酒慰問。 教事,制可之。 朝廷始分六部,選名士爲吏屬,關陝以恕貢禮曹,辭不行。仁宗踐阼,卽其 恕安靜端疑,覊丱如成 先後來學者殆千數。延祐設科,再主鄉試,人服其公。六年,以奉議大夫、 致和元年,拜集賢侍讀學士,以老疾辭 人,從鄉先生學,日記數千言。年十三,以書經魁鄉校。 陝西行臺侍御史趙世延,請卽奉元置魯齋書院, 繼而獻書,歷陳古誼,盡開悟涵養之道。 (家拜國 明年春,英 中書奏恕領 子司

外無適莫,而中有繩尺。 性整潔,平居雖大暑,不去冠帶。 家,士論 石之儲 齌 瀬詳 恕之學,由程、朱上遡孔、 而 稱之日 聚 嘗曰:「養生有不備,事猶可復,追遠有不誠,是誣神也, 書 數萬 蕭 同 卷,扁所居曰榘菴。 里人借騾而死,償其直,不受,曰:「物之數也,何以 孟,務貫浹事理,以利於行。 母張夫人卒,事異母如事 時蕭魁居南山下,亦以道高當世,入城府,必主恕 所生。 教人曲爲開導,使得趣向 父喪, 哀毁致 可逭罪乎 償爲 _! 與 目疾,時祀 」家無儋 人交,雖 之正。

七十八。制贈翰林直學士,封京兆郡侯,諡文貞。其所著曰榘菴集,二十卷。 恕 自京還,家居十三年,縉紳望之若景星麟鳳,鄉里稱爲先生而不姓。至順二年卒,年

與議易名之禮,私諡之曰靜安先生。 里高 而 學徒滿門。其宏度雅量,能容人所不能容。嘗行田間,遇有竊其桑者,居仁輒避之。鄉 .其行義,率多化服。作字必楷整,遊其門者,不惟學明,而行加修焉。 卒之日,門人相 恕弟子第五居仁,字士安,幼師蕭熈,弱冠從恕受學。博通經史,躬率子弟致力農畝,

謂善學朱氏者。 性。循循有序,發軔聖途,以存諸心,以行諸己,以及於物,以化於鄉。」其用功平實切密,可 行之,故其敎人,必尊朱氏。然因之爲人,高明堅勇,其進莫遏。熙則簡靚和易,務爲下學 方將造其門,而因已歿,乃從因門人鳥叔備問其緒說。蓋自因得宋儒朱熹之書,即尊信力 劉因之學,心向慕焉。熙家與因所居相去數百里,因亦聞熙力於爲己之學,深許與之。 安熙字敬仲,真定藁城人。祖滔,父松,皆以學行淑其鄉人。熙旣承其家學,及聞保定 其告先聖文有曰:「追憶舊聞,卒究前業。 灑掃應對,謹行信言。餘力學文,窮理盡 熙

熙遭時承平,不屑仕進,家居教授垂數十年,四方之來學者,多所成就。 旣殁,鄉人為

立祠於藁城之西亮鎭。 其門人蘇天爵,爲輯其遺文,而虞集序之曰:「使熙得見劉氏,廓之

以高明,厲之以奮發,則劉氏之學,當益昌大於時矣。」

校勘記

世母陶氏 <u>| 考異云:「案黃溍撰墓誌云:考諱觥,無子,以從父兄貢士日宣之次子嗣,即先生也。</u>

先生甫能言,貢士君之夫人陶氏授以孝經、論語。 則陶氏實謙之本生母。 傳云世母者, 考之未

審爾。」

書〔集〕傳纂疏 按此書今存,題尚書集傳纂疏。

自序稱,是書之作

旨在纂疏蔡沈書集傳。此處脫「集」字,今補。

本義啓蒙翼傳 按此書今存,題易學啓蒙翼傳。 **千頃堂書目作周易啓蒙翼傳。** 自序稱其父胡

方平嘗作啓蒙通釋以釋易,胡一桂「復爲本義附錄纂疏」,「又成翼傳四篇」。此處「本義」當涉前

文衍誤,實應作「周易」。

元史卷一百九十

列傳第七十七

儒學二

之辟,兼總領湖廣軍馬錢糧所僉廳,與高彭、李湜、梅應春等,號南中八士。 川宣撫參議官,長孺從之入蜀,銓試第一名,授迪功郎、監重慶府酒務。俄用制置使朱禩 氏,名、墨、縱橫,旁行敷落,律令章程,無不包羅而揆序之。咸淳中,外舅徐道隆爲荆湖四 未進士、知台州軍州事、文辭政事、亦絕出於四方。至長孺,其學益大振、九經、諸史、下逮百 自以爲不可及。其在江西幕府,平赣州之難於指顧之頃,全活數十萬人。父居仁,淳祐 之。祖巖,起嘉定甲戌進士,知福州閩縣事,卓行危論,奇文瑰句,端平、嘉定間,士大夫皆 者十人,持節分符,先後相望。會祖奧,欽州司法參軍,脫略豪雋,輕貲急施,人以鄭莊稱 胡長孺字汲仲,婺州永康人。當唐之季,其先自天台來徙。 宋南渡後,以進士科發身 已而復拜福寧

第七十七 儒學二

列

傳

州倅之命,會宋亡,退棲永康山中。

方貴顯,其家氣焰薰灼,卽違法,人不敢何問,其樹外門,侵官道,長孺亟命撤之。 年,轉台州路寧海縣主簿,階將仕佐郎。 修撰,與宰相議不合,改教授揚州。元貞元年,移建昌,適錄事闕官,檄長孺攝之。 至元二十五年,韶下求賢,有司强起之,至京師,待詔集賢院。 旣而召見內殿,拜集賢 至大元 程文海

長孺爲衣商人服,令蒼頭負貨以從,陰戒騶卒十人躡其後。長孺至,巖中人突出要之,長孺 徵也。」脫歡察雖怒,不敢問。縣有銅巖,惡少年狙伺其間,恒出鈔道,爲過客患,官不能禁。 右潛偵之,向抶者過焉,戟手稱快,執詣所隸,杖而償其器。 偶觸軍卒衣,卒抶傷民,且碎器而去,竟不知主名。民來訴,長孺陽怒其誣,械于市,俾左 方遜辭以謝,騶卒俄集,皆成擒,俾盡(通)[逮]其黨置於法,[] 夜行無虞。 民荷溺器糞田, 何所受命,而敢無忌若此!」長孺曰:「民一日不食,當有死者,誠不及以聞,然官書具在,可 悉散於民。閱月再至,索其錢,長孺抱成案進曰:「錢在是矣。」脫歡察怒曰:「汝膽如山耶 人錢一百五十萬給之,至縣,以餘錢二十五萬屬長孺藏去,乃行旁州。長孺察其有乾沒意, 嫗失其衣,適長孺出鄉,嫗訟之。 大德丁未,浙東大侵,戊申,復無麥,民相枕死。 長孺以牟麥置羣嫗合掌中,命繞佛誦書如初,長孺閉目 宣慰同知脫歡察議行賑荒之令,斂富 羣嫗聚浮屠庵,誦佛書爲禳祈,

之,乃弟所質者。」趣持至驗之,呼其弟示曰:「得非爾家物乎。」弟曰:「然。」遂歸焉。 其行事 步搖爲贓,逮兄赴官,力辨數弗置,長孺曰:「爾家信有是,何謂誣耶」兄倉皇曰:「有固有 吏嚾 多類此,不能盡載。 之,還所 叩 東西楹,空縣而出,庭無一人。姦者相謂曰:「事至此,死亦無承,行將自解矣。」語畢,案下 下,黎明,出姦者訊之,辭愈堅,長孺佯謂令長曰:「頗聞國家有詔,盍迎之。」叱隸 了)屢訟不獲直,往告長孺,長孺曰:「爾非吾民也。」叱之去。 未幾,治盜,長孺嗾盜 齒,作集神狀,且曰:「吾使神監之矣,盜衣者行數周,麥當芽。」一嫗屢開掌視,長孺指縛 而 出,姦者驚,咸叩頭服罪。 竊衣。 長孺白事帥府歸,吏言有姦事屢問弗伏者,長孺曰:「此易易爾。」夜伏 永嘉民有弟質珠步搖於兄者,贖焉,兄妻愛之,紿以亡於 卒縛 誣兄受 更案

延祐 元年,轉兩浙都轉運鹽使司長山場鹽司丞,階將仕郎,未上,以病辭,不復仕,隱杭

之虎林山以終。

熹弟子也。 不倦,一時學者慕之,有如饑渴之於食飲。方嶽大臣與郡二千石,聘致庠序,敷繹經義,環 自得,故其爲人,光明宏偉,專務明本心之學,慨然以孟子自許。 長 孺 初師青田余學古,學古師王夢松,夢松亦青田人,傳龍泉葉味道之學,味道則朱 淵源旣正,長孺益行四方,訪求其旨趣,始信涵養用敬爲最切,默存靜觀,超然 唯恐斯道之失其傳,誘引

列

苟非其人,雖一金易一字,毅然不與。.鄕闈取士,屢司文衡,貴實賤華,文風爲之一變。 聽者數百人。 爲辭章有精魄,金春玉撞,壹發其和平之音,海內來求者,如購拱璧,碑版焜煌,照耀四裔, 長孺爲言:「人雖最靈,與物同產,初無二本。」皆躍躍然興起,至有太息者。

寧海漫抄、顏樂齋藁行于世。 夜半,喘忽止,其子駒排戶視之,則正衣冠坐逝矣。年七十五。所著書有瓦缶編、南昌集、 者,問曰:「先生精神不衰,何爲遽欲觀化乎。」長孺曰:「精神與死生,初無相涉也。」就寢,至 晚寓武林,病喘上氣者頗久。一旦具酒食,與比鄰別,云將返故鄉,門人有識其微意

言獨造其妙,惜其書不傳。 人稱之爲三胡云。 其從兄之綱、之純,皆以經術文學名。之綱字仍仲,嘗被薦書。 之純字穆仲,咸淳甲戌進士,踐履如古獨行者,文尤明潔可誦。 其於聲音字畫之說,自

熊朋來字與可,豫章人。 宋咸淳甲戌,登進士第第四人,授從仕郎、寶慶府僉書判官廳

公事、未上而宋亡。

龍澤爲江南行臺監察御史。 世祖初得江南,盡求宋之遺士而用之,尤重進士,以故相留夢炎爲尚書,召甲戌狀元王 朋來,龍澤榜下進士,而聲名不在龍澤下,然不肯表襮苟進,隱

第七十七 儒學二

列傳

處州里間,生徒受學者,常百數十人。取朱子小學書,提其要領以示之,學者家傳其書,幾 使,尤加禮敬。,朋來和而不肆,介而不狷,與羣賢講論經義無虛日,儒者咸倚以爲重焉。 以賓禮延見。廉希憲之子惇爲參知政事,以師禮事朋來,終身稱門人。 下。 豫章爲江西會府,行中書省、提刑按察司皆在焉,凡居是官者,多朝廷名公卿,皆 劉宣爲提刑按察

聞人。 號,稱爲天慵先生。每燕居,鼓瑟而歌以自樂。嘗著瑟賦二篇,學者爭傳誦之。門人歸之 者日盛,旁近舍皆滿,至不能容,朋來懇懇爲說經旨文義,老益不倦。得其所指授者,多爲 以常格調建安縣主簿,不赴。晚以福清州判官致仕,朋來視之,漠如也。四方學者,因其所自 所至,考古篆籀文字,調律呂,協歌詩,以興雅樂,制器定辭,必則古式,學者化焉。旣滿考, 舉儒學官,使者報聞,而朝廷以東南儒學之士唯福建、廬陵最盛,特起朋來連爲兩郡教授。 會朝廷遣治書侍御史王構銓外選于江西,於是參政徐琰、李世安,列薦朋來爲閩海提

試者十九及吾門,不可。」其後江浙、湖廣,皆卑詞致禮,請爲主文,朋來屢往應之。及對大 官主其事者,諮問於朋來,動中軌度,因以申請,四方得遵用之。及請爲考試官,則曰:「應 廷,其所選士居天下三之一焉。 延祐初,詔以進士科取士,時科舉廢已久,有司咸不知其典故,以不稱明詔爲懼,行省

御衮冕祠太廟,銳意於制禮作樂之事,翰林學士元明善,颺言于朝,以朋來爲薦,未及召而 **朋來之學,諸經中三禮尤深,是以當世言禮學者,咸推宗之。至治中,英宗始采用古禮,親** 初 ,朋來以周禮首薦鄉郡,而元制,周官不與設科,治戴記者又鮮,朋來屢以爲言。 蓋

乎禮樂之事,關於世教,其餘若天文、地理、方技、名物、度數,靡不精究。 |朋來動止有常,喜怒不形於色,接賓客,人人各自以得其意。 有家集三十卷,其大者明

子太古,鄉貢進士。

卒,年七十八。

詞賦 教授建(寧) [康] 府。[三]後遷臨安教授,行戶部掌故,皆不就。 ,輒棄不肯爲。 戴表元字帥初,一字曾伯,慶元奉化州人。七歲,學古詩文,多奇語。 咸淳中,入太學,以三舍法陞內舍生,旣而試禮部第十人,登進士乙科, 稍長,從里師習

化陳腐爲神奇,蓄而始發,問事摹畫,而隅角不露,施於人者多,尤自秘重,不妄許與。 應麟、天台舒岳祥並以文學師表一代,表元皆從而受業焉。 初,表元閔宋季文章氣萎薾而辭骩骳,骳弊已甚,慨然以振起斯文爲己任。 大德八年,表元年已六十餘,執政者薦于朝,起家拜信州教授,再調教授婺州,以疾辭。 故其學博而 肆,其文清深雅 時四 明王 至

當處以高第。」應龍拒之不見,及對策,具言上下內外之情不通、國勢危急之狀,考官不敢置 上第。 大理 也。」沿海制置司辟爲屬,以疾辭不仕,而宋亡矣。 而擢咸淳進士第。時賈似道當國,自儗伊、周,謂馬廷鸞曰:「君故與淸忠游,其孫幸見之, 元、大德間,東南以文章大家名重一時者,唯表元而已。 一少卿。 應龍幼警敏過人,日記數千言,文章有渾厚之氣。應龍當以世賞補京官,盡讓諸從弟, <u>牟應龍字伯成,其先蜀人,後徙居吳興。祖子才仕</u>宋,贈光祿大夫,諡淸忠。父巘,爲 當表元時,有四明任士林者,亦以文章知名云。 表元晚年,翰林集賢以修撰、博士二職論薦,而老疾不可起,年六十七卒。 其門人最知名者曰袁桷,桷之文,其體裁議論,一取法於表元者也。 調光州定城尉,應龍曰:「昔吾祖對策,以直言忤史彌遠,得洪雅尉,今固當爾,無愧

有剡源集行

起家教授溧陽州,晚以上元縣主簿致仕。 故相留夢炎事世祖,爲吏部尙書,以書招之,曰:「苟至,翰林可得也。」應龍不答。 已而

七 十七七 儒

列

傅 第

初,宋亡時,大理卿已退不任事,一門父子,自爲師友,討論經學,以義理相切磨,於諸

經皆有成說,惟五經音考盛行於世。

山蘇氏父子,而學者因應龍所自號,稱之曰隆山先生。泰定元年卒,年七十八。 應龍爲文,長於敍事,時人求其文者,車轍交於門,以文章大家稱於東南,人儗之爲眉

鄭滁孫字景歐,處州人。宋景定間,登進士第,知溫州樂淸縣,累歷宗正丞、禮部郎官。 至元三十年,有以滁孫名薦者,世祖召見,授集賢直學士。尋陞侍講學士,叉陞學士

乞致仕,歸田里。

矣。」終不書,世祖嘉之。陞應奉翰林文字,後出爲江西儒學提舉。 編修官,會纂修國史至朱德祐末年事,陶孫曰:「臣嘗仕宋,宋是年亡,義不忍書,書之非義 弟陶孫,字景潛,亦登進士第,監西嶽祠。 先,陶孫徵至闕,奏對稱旨,授翰林國 史院

賜,人以爲異遇焉。 際孫兄弟在當時,最號博洽,儒學之士翕然推之。 滁孫所著,有大易法象通贊、周易記玩等書。陶孫有文集若干卷。 隆福宮以其兄弟前朝士,乃製衣親

陳孚字剛中,台州臨海人。 幼淸峻穎悟,讀書過目輒成誦,終身不忘。 至元中,学以布

列傳第七十七 館學二

衣上大一統賦,江浙行省爲轉聞于朝,署上蔡書院山長,考滿,謁選京師

帝方欲置之要地,而廷臣以孚南人,且尚氣,頗嫉忌之,遂除建德路總管府治中,再遷治中 壯,皆字筆也。其所贈,字悉卻之。詳見梁曾傳中。使還,除翰林待制,兼國史院編修官 衢州,所至多著善政。 以不庭之罪,且責日燒當出郊迎詔,及講新朝尙右之禮,往復三書,宣布天子威德,辭直氣 南,世子陳日燇以憂制不出郊,遣陪臣來迎,又不由陽明中門入,曾與字回館,致書詰日燇 林國史院編修官,攝禮部郎中,爲會副。陛辭,賜五品服,佩金符以行。 二十九年,世祖命梁曾以吏部尚書再使安南,選南士爲介,朝臣薦字博學有 秩滿,復請爲鄉郡,特授奉直大夫、台州路總管府治中。 三十年正月,至安 氣節,調翰

罪,命有司亟發倉賑饑,民賴以全活者衆,而学亦以此致疾,卒于家,年六十四。 脫歡察兒發粟賑濟,而脫歡察兒怙勢立威,不卹民隱,驅脅有司,動置重刑。 日至荢死不救者,脫歡察兒也。」遂詣宣撫使,愬其不法蠹民事一十九條,宣撫使按實,坐其 大德七年,詔遣奉使宣撫循行諸道。時台州旱,民饑,道殣相望,江浙行省檄浙東 字曰:「使吾民 元帥

字天材過人,性任俠不覊,其爲詩文,大抵任意卽成,不事雕斵,有文集行于世。

母也,末嬀,適同 子遘,江浙行省左右司員外郎,致仕。 里韓戒之,行樞密院經歷諫之母也。俱有貞節,朝廷旌表其門閭 女長嬀,適藁城董士楷,太常禮儀院太祝守緝之

記。 盡。 當 雖 攸 州 事 其 料醲郁,美如簇錦,律之法度,未免乖刺,人亦以此少之。 爲 馮子振,其豪俊與孚略同,孚極敬畏之,自以爲不可及。 文也),酒酣耳熱,命侍史二三人,潤筆以俟,子振 據案疾書,隨紙數多寡,頃刻輒 子振於天下之書,無所不

也。 然 故 十六年, 不 不 其 朴 赴。 心 與之校。 董朴字太初,順德人。 朴 家近龍岡,學者因稱之曰龍岡先生云。 所自得,往往有融貫之妙。 所 用 爲學,自六經及孔、孟微言,與凡先儒所以開端闡幽者,莫不研極其旨而會通之, 皇慶初,朴年已踰八十,韶以翰林修撰致仕。 提刑 中山王結曰:「朴之學,造詣旣深,充養交至,其爲人,清而通,和而介,君子人 按察使薦,起家爲陝西知法官,未幾,以親老 自幼强記,比冠,師事樂舜咨、劉道濟,幡然有求道之志。 其事親孝,與人交,智愚貴賤,一待以誠,或有犯之者,夷 延祐三年,無疾而終,年八十有五。 歸養。 尋召爲太史院主事,復

領 年 係官海船萬戶府照磨,兼提控案牘。 四十,不仕,戶部賈國英數薦于朝,以布衣召爲翰林國史院編修官,與修武宗實錄,調管 楊 載 字仲弘,其先,居建之浦城,後徙杭,因爲杭人。少孤, 博涉羣書,爲文有跌宕氣。

延祐初,仁宗以科目取士,載首應詔,遂登進士第,授承務郎、饒州路同知浮梁州

儒林郎、寧國路總管府推官以卒。

述, 法,[三] 嘗語學者曰:「詩當取材於漢、魏,而音節則以唐爲宗。」自其詩出,一洗宋季之陋 人多傳誦之。 初,吳興 (趙孟頫· 其文章一以氣爲主,博而 在翰林,得載所爲文,極推重之。 敏,直而 不肆,自成一家言。 由是載之文名,隱然動京師,凡所撰 而 於 詩(文) 尤 有

其爲 文,奇奧簡澀,動法古人,而不屑爲世俗平凡語。 建康之上元有楊剛中,字志行,自幼厲 一志操,及爲江東憲府照磨,風采凜凜,有足稱者。 元明善極嘆異之。 仕至翰林待制 而

卒。有霜月集行于世。

豐潤,學者多傳之。 其甥李桓,字晉仲,同郡人,由鄉貢進士,累遷江浙儒學副提舉。 載與剛中同輩行,而桓則稍後云。 亦以文鳴江東,紆餘

之文,蔚然有老成 自居,教學者有法 劉詵字桂翁,吉安之廬陵人。 ,聲譽日隆。 氣象,宋之遺老鉅公一見卽以斯文之任期之。 江南 性穎悟,幼失父,知自樹立。 行御 史臺屢以教官館職 、遺逸薦,皆不報 年十二,作爲科場律 旣冠,重厚醇雅,素以 賦 師 論 道 策

問為文,根柢六經,職際諸 子百家, 融液今古,而不露其踔厲風發之狀。 四方求文者,

列傳

第

七十

七

儒學

H 至于門。 其所爲詩文,日桂隱集。 桂隱,詵所號也。 至正十年卒,年八十三。

尤奇逸流麗,所著周易[集傳]多發前儒之(之)所未發。[閏] 同 郡 龍仁夫,字觀復。 劉岳申,字高仲。 其文學皆與詵齊名,有集行世。 岳申用薦者爲遼陽儒 而仁夫之文 學副提舉,

仁夫江

浙儒

學副提舉,皆不就。

韓性字明善,紹興人。 其先家安陽,宋司徒兼侍中魏忠獻王琦,其八世祖也。 高祖左

司郎中膺冑,扈從南渡,家于越。

蒼古,老生宿學,皆稱異焉。 方學者,受業其門,戶外之屨,至無所容。 柢,而於儒先性理之說,尤深造其閩域。 性天資警敏,七歲讀書,數行俱下,日記萬言。 及長,博綜羣籍,自經史至諸子百氏,靡不極其津涯, 其爲文辭,博達儁偉,變化不測,自成一家言。 九歲通小戴禮,作大義,操筆立就,文意 究其根 四

爲甚高論而義理自勝,不期文之工而不能不工,以應有司之求,亦未始不合其繩尺也。 矣,顧行 貢舉之文,不知<u>朱氏之學,可乎。四書、六經,千載不傳之學,自程氏至朱氏</u>, 延祐初,詔以科舉取士, 何如耳。 有德者必有言,施之場屋,直其末事,豈有他法哉」、凡經其口 學者多以文法爲請,性語之曰:「今之貢舉,悉本朱熹私議,爲 發明無餘 授指畫,不 蘊

有 一善,必爲之延譽不已,及辨析是非,則毅然有不可犯之色。

先生 書砥 之良二千石政事有所未達,輒往咨訪,性從容開導,洞中肯綮,裨益者多。 行, 、韓先生」云。 性 田 無愧古人足矣,祿仕非所願也。」受而不赴。 無輿馬僕御,所過,負者息肩,行者避道。 憲府嘗舉爲教官,謝曰:「幸有先 巷夫街叟,至於童穉厮役,咸稱之曰「韓 人之敝廬可庇風雨, 暮年愈自韜 晦,然未嘗忘情於斯世,郡 薄田 可具饘粥, 讀

節先 卒矣。 生。 天曆 年七十有六。 其所著有禮記說四卷,詩音釋一 中,趙世延以性名上聞。後十年,門人李齊爲南臺監察御史,力舉其行義,而性已 卒後,南臺御史中丞月魯不花,嘗學於性,言性法當得諡 卷,書辨疑一卷,郡志八卷,至文集十二卷。 ,朝廷賜諡莊

卿游 郡邑校官,爲學者式。 {經 ,曉析大義。 '', 以 當性 傳朱氏明體 時,慶元有程端禮、端學兄弟者。 慶元自宋季皆尊尙陸九淵氏之學,而朱熹氏學不行於慶元。 (適)[達]用之指,[ミ゙]學者及門甚衆。 仕爲 衢州路儒學教授。 端禮,字敬叔,幼穎悟純篤, 卒年七十五。 所著有讀書工程,國子監 十五歲,能記 端禮獨從 以 頒示 史蒙 誦法

所著 學者以 有 端學, 春 秋 其 字時叔,通春秋,登至治辛酉進士第,印授優居 本義 剛 嚴方正,咸嚴憚之。 三十卷,三傳辨疑二十卷,春秋或問十卷。 遷太常博士,命未下而卒。 縣 丞, 尋改國子助教。 後以子徐貴、贈禮部尚書。 動有師

深,大抵務在發揮義理,而以闢異端爲先務。 以持敬致(和)[知]之說質于同郡許謙,[公]謙復之以理一分殊之旨,由是心志益廣,造履益 清麗俊逸。 吳師道字正傳,婺州蘭溪人。自覊丱知學,卽善記覽。 弱冠,因讀宋儒 真德秀遺書,乃幡然有志於爲己之學,刮摩淬礪,日 工詞章,才思涌溢, 長 發爲歌詩, 月益,嘗

郡學有田七百畝,爲豪民所占,郡下其事建德,俾師道究治之,卽爲按其圖籍,悉以歸於學。 轉聞於朝,得粟四萬石、鈔三萬八千四百錠賑之,三十餘萬人賴以存活。 建德素少茶,而榷稅尤重,民以爲病,即爲極言于所司,榷稅爲減。 饑民仰食于官者三十三萬口,師道勸大家得粟三萬七千六百石,以賑饑民;又言于部使者, 登至治元年進士第,授高郵縣丞,明達文法,東不敢欺。 再調寧國路錄事,會歲大旱, 遷池州建德縣 尹,

部郎中致仕,終于家。所著有易詩書雜說、 朱熹之旨, 中書左丞呂思誠、 而遵許衡之成法,六館諸生,人人自以爲得師。 侍御史孔思立列薦之, 召爲國子助教, 尋陞博士。 春秋胡傳附辨、 戰國策校註、 丁內憂而歸, 敬鄉錄, 以奉 其爲教,一 議 大夫、禮 及文集

師道同郡又有王餘慶,字叔善,仕爲江南行臺監察御史,亦以儒學名重當世云。

二十卷

文、地理、律曆、醫藥、算數之學。宋咸淳初,文圭年十八,以春秋中鄉選。宋亡,隱居城東, 陸文圭字子方,江陰人。幼而穎悟,讀書過目成誦,終身不忘。博通經史百家,及天

學者稱之曰牆東先生。

延祐設科,有司强之就試,凡一再中鄕舉。文圭爲文,融會經傳,縱橫變化,莫測其涯

際,東南學者,皆宗師之。朝廷數遣使馳幣聘之,以老疾,不果行。卒年八十五。

代、建炎、吾死、當葬不食之地、勿封勿樹、使人不知吾墓、庶無暴骨之患。」其後江陰之亂, 能默記,如指諸掌。先屬纊一日,語門人曰:「以數考之,吾州二十年後必有兵變,慘於五 文圭爲人,剛明超邁,以奇氣自負。於地理考覈甚詳,凡天下郡縣沿革、人物土產,悉

冢墓盡發,人乃服其先知。有牆東類藁二十卷。

益所著書,有三山藁、詩緒餘、史傳姓氏纂,又有詩傳旁通,發揮朱熹氏之學爲精。年五十 質爲先務,學徒不遠千里從之。自文圭旣卒,浙以西稱學術醇正、爲世師表者,惟益而已。 文圭同里有梁益者,字友直,其先福州人。博洽經史,而工於文辭。其敎人,以變化氣

蔡書院、 敬孫 爲 文章。 嘗 周仁榮字本心,台州臨海人。 敬孫 著易象占、尚書補遺、春秋類例。 用薦者署美化書院 與同郡楊珏、陳天瑞 山長,美化 、車若水、黄超 父敬孫,宋太學生。 在處州萬山中,人鮮知學,仁榮舉行鄉飲酒禮,士俗 仁榮承其家學,又師珏、天瑞 然、 朱致中、薛松年師事之, 初,金華王柏,以朱熹之學主台之上 ,治易、禮、春秋 受性理之旨。 而 工

撰,陞集賢待制,奉旨代祀嶽瀆,至會稽,以疾作,不復還朝。 後辟江浙行省掾史,省臣皆呼先生,不以吏遇之。 泰定初,召拜國子博士,遷翰林修 卒,年六十有一。 其所 教弟子

爲變。

多爲名人,而泰不華實爲進士第一。

兄

俱 其弟! 以文學名。 仔肩 ,字本道,以春秋登延祐五年進士第,終奉議大夫、惠州路總管府判官。 與其

體 認 精 仁榮同 切 務 郡有孟夢恂者,字長文,黃巖人。與仁榮同師事楊珏、陳天瑞。 見行事,四方游從者皆服焉。 部使者薦其行義,署本郡學錄。 夢恂講解經旨,

七十四。 至 正十三年,以設策禦寇救鄉郡有功,授登仕郎、常州路宜興州判官,未受命而卒,年 朝廷賜 諡 號曰康靖先生。 所著有性理本旨、四書辨疑、漢唐會要、七政疑解,及筆

}海

雑錄

五十卷。

第七十七 儒學二

列

僔

陵,從鄉 源 委,撫 陳旅字衆仲,與化莆田人。 先 而 生傅古直游,聲名日著。 教之, 旅 得所依,不以生業爲務,惟篤志於學, 先世素以儒學稱。 用薦者爲閩海儒學官,適御 旅幼孤,資禀穎異,其外大父趙氏學有 於書無所不 史中 丞馬雍古祖常使泉南, 讀。 稍長,負笈至溫

見奇之,謂旅

曰:「子,館閣器也,胡爲留滯于此」」因相勉遊京師。

滿 以 奉 刨 翰林文字。 諸 爲旅博學多聞,宜居師範之選,中書平章政事趙世延又力薦之,除國子助教。 延 至館中,朝夕以道義學問相講習, 旣 生不忍其去, 請于朝, 至,翰林侍講學士虞集見其所爲文, 慨然歎曰:「此所謂我老將休, 付子斯文者矣。」 至正元年,遷國子監丞,階文林郎。 再任焉。 元統二年,出爲江浙儒學副提舉。 自謂得旅之助爲多。 叉二年卒,年五十有六。 與祖常交口游譽於諸公間,咸 至元 四年, 居三年,考 入為應

不 徒以 旅 徇世好 於文,自先秦以來,至唐、宋諸 而已。 有文集十四卷。 大家,無所 不究,故其文典雅峻潔,必求合於古作者,

于臨川。 于行省參 旅 平生於 集 知 感 政 其來,留 事孛朮 師友之義尤篤,每感虞集爲知己。 魯翀,親奉書幣,請集主文鄉闈,欲爲問候計,乃衝冒炎暑,千里訪集 旬日 而別,惓惓以斯文相勉,慘然若將永訣焉。 其在浙江時,集歸田已數載,歲且大比,請 集毎與 學者語,必以

旅爲平生益 友也。 日 ,夢臉舉杯相向曰:「臉甚思公,亦知公之不忘臉也,但不得見爾。**」**

旣而聞旅卒,集深悼之。

同 時有程文、陳繹曾者,皆名士。 文字以文,徽州人,仕至禮部員外郎。 作文明潔而精

深,集亦多稱之。

博,其氣燁如也。 釋曾字伯敷, 官至國子助敎。 處州人。爲人雖口吃,而精敏異常,諸經註疏, 論者謂二人皆與旅相伯仲云。 多能成誦。 文辭汪洋浩

李孝光字季和,溫州樂淸人。少博學,篤志復古,隱居雁蕩山五峯下,四方之士,遠來

受學,名譽日聞,泰不華以師事之,南行臺監察御史闔辭屢薦居館閣。

見帝于宣文閣,進孝經圖說,帝大悅,賜上尊。 至正七年,韶徵隱士,以秘書監著作郎召,與完者圖、執禮哈琅、董立,同應詔赴京師, 明年,陞文林郎、秘書監丞。 卒于官,年五

十三。

孝光以文章負名當世,其文一取法古人,而不趨世尚,非先秦、兩漢語,弗以措辭。 有

文集二十卷。

宇文公諒字子貞,其先,成都人,父挺祖,徙吳興,今爲吳興人。 嘉興富民延爲子弟 師 ,夜將半, 聞 有 叩門者, 問之,乃一婦人, 公諒 通 經史百氏言,弱 公諒厲聲叱去

之, 冠 「有操行。 翌日 卽 以 他事 辭歸,終不 ·告以 其故

松江 事 國 諒 知 ', 以 出 制 語, 兼 助教 海 禱 至順 疾 輒 塗 請 日日 應 田 四 老 國 公諒 歲 年, 與諸 史院編 以 登進士第,授徽 生辯 以朝 有年,民頌之,以爲別 修官,以病得告。 析諸經,六館之士,資其陶甄者往往出爲名臣。 沙不常,後必貽患,請一 州 路 同 後召爲國子監丞,除江浙儒 駕雨。 知 婺源州事。 槪 攝會稽縣, **免科,省臣從之。** 丁內艱,改同知餘姚州事,夏不雨,公 申 明 冤滯, 所活者衆。 學提舉,改愈嶺南 遷高郵府推官,未幾,除 調 應奉翰林文字、同 省檄察實 廉 就訪司

辟水集、 其不 可 公諒 書, 平居,雖暗室,必正衣冠端坐,嘗挾手記一册,識其編首曰:「晝有所爲,暮則書之, 齋 卽 詩藁、 亦 敢為,天地鬼 玉堂漫藁、越中行藁,凡若干卷。 神,實聞斯言。」其檢飭 之嚴如此。 門人私諡 日純節先 所著述,有折桂集、 觀光集

歲 常以指 伯 畫 名師聖, 字宗道, 哈剌魯氏, 地 或三或六,若爲卦者。 六歲,從里儒授孝經、論語 隸軍籍蒙古萬戶府,世居開州濮陽縣。 卽 成 誦 蚤 喪父,其兄 伯顏

所 而 子 曲 自 說 從 出 非 游 得 具 諸 買 者 毎 在 生 經 可 出於言意之表 歸 傳 益 比。 而 等 衆 求 書以 因 之 可 命 資之, 也。 以 顏 伯 日夜 鄉之學者,來 爲 顏 氏 誦 自弱 , 且 名 而 不 輟。 冠, 相 字 卽 稍長, 、之焉。 質 以 難, 斯 文爲已任, 受業宋 隨 久之, 坦 問 隨辨, 進士 辭 其於 建安黄坦 咸解其 日:「余不 大經 惑。 大 能 法, 坦 於是 爲 日 粲 爾 此此 中原 然 師 季 有 子 之士, 覩 經 穎 ", 而 有 悟 聞 朱 渦

踐, 徒,亦往往 訪 僉 不屑 事 至 IF. 事 數 四 棄 舉 月, 年 其 子 學 以 以 詞 而 病 隱 章 學焉 士徴 発。 , 而 至京 必 及還,四方之來 期措諸實 師,授翰 用。 林待 學者, 士 制 出 預 至千 其門,不 修 金史。 餘 人。 問 知其爲伯顏氏 蓋 旣 其 畢 解 爲 學 歸。 專 事 已而 學者; 講解 復 起 至於異 而 爲 務 江 眞 知 西

之

力

廉

日

富 顏 貴 乃 一伯顏 渡 十 漳 八 年 北 に関不 河 邦 屈 南 引 賊蔓延 人從之者數 頸 受刃,與 河北,伯顏 十萬· 妻子 家 言於省臣,將結 俱 死 至 磁 之,年六十 與 賊 遇 贼 其鄉民爲什伍 有 知伯 四 顏名士, 以 自保, 生 劫 之以 而 賊兵 見 賊 大至, 將 誘 伯 以

城守 中 覆 論 旣死, 牆而 之, 伯顏無城守之責 揜 人或剖 之。 其腹 有 司 Ŀ 見其 其 而 事 ì 死 , 數 贈 可 奉 孔 與 議 日 江 大 :「古稱聖 州 夫、 守李黼 愈 太常 人 禮儀 1 律 有 以 院 1 竅, 風 事 紀論 諡 此 文節 非 之, 賢 伯顏無在官之責 士 太常 乎 __! 乃納 諡 議 日 心 其 而 以 腹

死 可可 與西臺御史張桓並駕。 以平生有用之學,成臨義不奪之節,乃古之所謂君子人者。」

時 以爲 確論。 伯顏平生,修輯六經,多所著述,皆燬于兵。

膽思字得之,其先大食國人。國旣內附,大父魯坤,乃東遷豐州。 太宗時, 以材授眞

定、 濟南等路監権 課稅使,因家眞定。 **父斡直,始從儒先生問學,輕財重義,不干仕進。**

贍思 生九歲, 日記古經傳至千言。 比弱冠,以所業就正于翰林學士承旨王思廉之門,

由 是博極羣籍,汪洋茂衍,見諸踐履,皆篤實之學,故其年雖少,已爲鄉邦所 推 重

延 祐 初,詔 以科第取士,有勸其就試者,贈思笑而不應。 旣而侍御 史郭 思貞、翰林學士

承旨劉 眷遇 優渥。 賡、 一多知政事王士熙, 交章論薦之。 時倒刺沙柄國,西域人多附焉,贍思獨不往見,倒刺沙屢使人招致之,卽以養親 泰定三年,詔以遺逸徵至上都,見帝于龍虎臺,

例 歸 。

之,贍思堅以 著帝王心法,文宗稱善。 天曆三年,召入爲應奉翰林文字,賜對奎章閣,文宗問曰:「卿有所著述否。」明日,進所 母老辭,遂賜幣遣之。 韶預 修經世大典,以論議 復命集傳旨曰:「卿且暫還,行召卿矣。」至順四年,除國 不合求去, 命奎章閣侍書學士虞集 諭

列傳第七十七 儒學二

子博士,丁內艱,不赴。

思所言 其 私 一有 ,惜名器, 後 執 政 至元二年,拜陝西行臺監察御史,即上封事十條,曰:法祖宗, ,皆一時羣臣所不敢言者。 及分巡雲南,按省臣之不法者,其人卽解印以去,遠藩爲之震悚。 陝西行省者,恣爲非道,贍思發其罪而按之,輒棄職夜遁,會有詔 開言路,復科 舉,罷數軍,一刑章,寬禁網。時姦臣 侍御史趙承慶見之, 嘆曰:「御史言及此, 天下福 一變亂成憲,帝方虛己以 攬權 綱,敦宗室, 勿逮問,然猶杖 也。」戚 聽, 勳

爲 卒,贍思 邊患,宜設官府以撫定之。」詔卽其地置紹熙宣撫司。 襄、 乃擒其魁,而釋其黨。復上言:「紹熙土饒利厚,流戶日增,若以其人散還本籍,恐 漢流民,聚居宋之紹熙府故地,至數千戶,私開鹽井, 自相部署,往往劫囚徒,殺巡

常倫,隱徭役,使民力日耗,契勘嘉興一路,爲數已二千七百,乃建議請勒歸本族,俾供王 浙右 賦,庶以少寬民力。 那縣,無敢爲貪墨者。復以浙古諸僧寺,私蔽猾民,有所謂道人、道民、行童者,類皆瀆 三年,除愈渐西肅政廉訪司事,卽按問都轉運鹽使、海道都萬戶、行宣政院等官贓罪, 朝廷是之,即著以爲令。 四年,改愈浙東肅政廉訪司 事,以病発歸

以 : 「張子文行且殺之。」明日,夫果死,跡盜數日, 娥始以 張子文告其姑, 五府官以爲非共 市 私恩。 贍 思歷官臺憲,所至以理寃澤物爲己任,平反大辟之獄,先後甚衆,然未嘗故出人罪, 嘗與五府官決獄咸寧,有婦宋娥者,與鄰人通,鄰人謂娥曰:「我將殺而夫。」娥

勿執 娥 殺,且旣經赦宥,宜釋之,膽思曰:「張子文以爲娥固許之矣。 與 常常 |張 法 同 。」贍思曰:「是謂故出 謀,度不能終隱,故發之也,豈赦 人罪,非平反 可 釋哉? 也。 且 一公欲 樞 密判官 種陰德於生者,奈死 日三 且娥夫死及 平反活 旬, 人,陰德也。 者 乃始言之, 何 اّ_ا 乃 御 獨 是 上 史

Ŀ 年,卒于家,年七十有四。 輕車都尉,追封恒山郡侯,諡 至 正 四年,除江 東肅 政 二十五年,皇太子 廉訪 日文孝。 副使。 十年,召爲秘書少監,議治河事,皆辭疾不赴。 撫軍冀寧,承制封拜, 贈嘉議大夫、禮部 尚書、

議

刑

部,卒正娥罪。

其審刑當罪多類

此

記、正大 消息圖、老莊精詣、鎭陽 家貧 贍 思 八諸臣 邀於 館粥或]列傳、審聽要訣,及文集三十卷,藏于家。 經,而易學尤深,至於天文、地理、 不繼 ,其考訂經傳,常自樂也。 風 土記、續東陽志、重訂河防通議 鍾律、 所著述有四書闕疑 算數、 西 國 水利,旁及外國之書,皆究極 圖經 西域 五經 異人傳 思問、 奇偶 金泉宗 陰 |陽

校勘記

俾 盡 (通)[逮]其黨置於法 據宋文憲集卷一〇 胡長 孺 傳改。

= 敎 授 建(寧)[康]府 據 清容集卷二八戴表元墓誌銘改。 同集卷三三先君子師友淵源錄作「金陵

列

体

第

七

+

七

校

教授」。按戴表元任建康教授,與福建建寧無涉。

[三] 於詩(文)尤有法 從道光本删。

29 _ 所著周易〔集傳〕多發前儒之(之)所未發 從道光本補、删。 按四庫提要引吉安府志,稱龍仁夫

著周易集傳十八卷,存八卷。

万五山 詩音釋至郡志 按黃金華集卷三二韓性墓誌銘,詩音釋作詩釋音,郡志作續郡志,疑此處「音

釋」二字誤倒了郡志」上脫「續」字。

[六]明體(適)[達]用據黃金華集卷三三程端禮墓誌銘改。

類編已校。

登至治辛酉進士第 考異云:「案端學以泰定甲子登第,見歐陽原功所譔墓志。 史誤。」

據吳禮部集附吳師道墓表改。類編已校。

持敬致(和)[知]

(中)

元史卷一百九十一

列傳第七十八

良吏一

興,與民休息,凡事簡易,禁罔疏闊,以寬厚淸靜爲天下先,故文、景以後,循吏輩出。」其言 自古國家上有寬厚之君,然後爲政者得以盡其愛民之術,而良吏興焉。 班固 有曰:「漢

蓋識當時之治體矣。

其事蹟之可取者,作良吏傳。 故當是時,良吏班班可見,亦寬厚之效也。 元初風氣質實,與漢初相似。 世祖始立各道勸農使,又用五事課守令,以勸農繫其銜。 然自中世以後,循良之政,史氏缺於紀載。今據

譚澄字彦清,[] 德興懷來人。父資榮,至五金末爲交城令。 國兵下河朔,乃以縣來附,

傅第七十八 良吏一

列

賜 金符, 為元 帥 左都監,仍兼交城令。 未幾,賜虎符,行元帥府事,從攻汴有功。 年四十,移

病,舉弟資用自代。資用卒,澄襲職。

取 民 以 者 倍 無以償。澄入覲,因中書耶律楚材,面 法治之。 累歲,莫能直 ,赋以時集。 而 澄 止,亡民能歸者,復三年。 幼穎敏,爲交城令時年十九。 歲乙未,籍民戶,有司多以浮客占籍,及征賦,逃竄殆盡,官爲稱貸,積息 , 澄折以理, 令決水, 均其利於民。 韶下,公私便之。 有文谷水, 陳其害,太宗惻然,爲発其逋,其私負者,年雖多,息 分概交城田,文陽郭帥專其利而堰之,訟 豪民有持吏短長爲奸者,察得 壬子,復大籍其民,澄盡削交城之不土 其主名,皆 心數倍,

藍答兒往 令。 (三) 時世 甲寅,世祖還自大理,澄進見,留藩府,凡遣使,必以澄偕,而以其弟山〔阜〕爲交城 京 兆,大集官吏,置計局百四十二條以考覈之,罪者甚衆,世祖每遣左丞闆闆,與 祖以皇弟開藩京兆,總天下兵。歲丁巳,有間 之者,憲宗疑之,遂解兵柄。 遣阿

水 以漑田 入爲司農少卿,俄出爲京兆總管。居一年,改陝西四川道提刑按察使,建言:「不孝有 中 統 ,民用不饑。 元年,世 祖卽位,擢懷孟路總管,俄賜金符,換金虎符。 教之種植,地無遺利。 至元二年,遷河南路總管,改平灤路總管。 歲旱,令民鑿唐溫渠,引沁

澄

周旋其間,以

、彌縫其缺,及親入朝,事乃釋。

列傳第七十八 良吏一

三,無後爲大。宜令民年四十無子聽取妾,以爲宗祀計。」朝廷從之,遂著爲令。

修焚室,賑饑貧,集逋亡,民心稍安。會西南夷羅羅斯內附,帝以撫新國宜擇文武全才,遂 四川 愈省嚴忠範守成都,為宋將昝萬壽所敗,退保子城,世祖命澄代之。至則葬暴骸,

以澄爲副都元帥,同知宣慰使司事。 比至,以疾卒,年五十八。

世祖嘗與太保劉秉忠論一時牧守、秉忠曰:「若邢之張耕,懷之譚澄,何憂不治哉」游

顯宣撫大名,嘗爲諸路總管求虎符宣麻,澄至中書辭曰:「皇上不識譚澄耶。乃爲顯所舉!」

中書特爲去之。其介如此。

子克修、歷湖北、河南、陝西三道提刑按察使。

朝廷聞其事,方欲用之而卒,年四十四。子殷。 無雪,父老言于繼順曰:「冬無雪,民多疾,奈何!」繼順曰:「吾當爲爾禱。」已而雪深三尺。 虎爲害,維禛默禱于神祠,一虎去,一虎死祠前。境內旱蝗,維禛禱而雨,蝗亦息。 許維禎字周卿,遂州人。至元十五年,爲淮安總管府判官。屬縣鹽城及丁溪場,有二 是年冬,

許楫字公度,太原忻州人。 幼從元裕學,年十五,以儒生中詞賦選,河東宣撫司又舉揖

賢良方正孝廉。楫至京師,平章王文統命爲中書省掾,以不任簿書辭,改知印。 左丞許衡深器重之。一日,從省臣立殿下,世祖見其美髯魁偉,問曰:「汝秀才耶?」楫頓首 曰:「臣學秀才耳,未敢自謂秀才也。」帝善其對,授中書省架閣庫管勾,兼承發司事 丞相安童、

從之。三年,屯成,果獲其利。尋佩金符,爲陜西道勸農使。 西,荒野數千頃,宋、金皆嘗置屯,如募民立屯田,歲可得穀,給王府之需。」挺以其言入奏, 未幾,立大司農司,以楫爲勸農副使。時商挺爲安西王相,遇於途,楫因言:「京兆之

楫審得其情,釋佃者,繫富民,人服其明。改江西道提刑按察副使,行省命招討郭昂討叛賊 **董旗,兵士俘掠甚衆,楫詢究得良民六百口,遣還鄕里。** 嶺北湖南提刑按察副使,武岡富民有毆死出征軍人者,陰以家財之半誘其佃者,代己款伏, 老輿金帛求見,楫曰:「汝等已爲大元民矣,今置吏以撫字汝輩,奚用金帛以求見」」明年,擢 至元十三年,宋平,帝命平章廉希憲行中書於荆南府,以楫爲左右司員外郎。 荆南父

徽之績溪、歙縣民柯三八、汪千十等,因歲饑阻險爲寇。行省右丞教化以兵捕之,相拒七 尚書王巨濟,倚勢刻剝,遣吏徵徽州民鈔,多輸二千錠,巨濟怒其少,欲更益千錠,楫詣巨濟 曰:「公欲百姓死耶、生耶。如欲其死,雖萬錠可徵也。」巨濟怒解,徽州賴以免。 楫考滿去。 二十三年,授中議大夫、徽州總管。桑哥立尙書,會計天下錢糧,參知政事忻都、戶部

月, 楫 單 乃使 騎 趜 人諭之。 賊 三八等日:「但得許總管來, 我等皆降矣。」行省爲驛召楫至, **私化**, 請退 軍 命往! 一舍, 招之。 聽

其 、來降。 不 聽。 會以參政高興代教化,楫復以 前言告之,興從 其 計,賊果降。

二十四年 · ,授太中大夫、東平總管,謝 事二年卒,壽七十。 十一子:餘慶,重慶,崇慶,餘

失

八其名。

察御 之。」詔從其言。 史。 田 滋字樂甫,開封 十三年,朱平,滋 遂超拜行御史臺侍御史。 建言:「江南 至元二年,由汴梁路總管府知事,入爲御史臺掾。十二年,拜 新附 歷 ,民情未安, 兩淮 .鹽運 使、河南路總管。 加以 官 吏侵漁 ,宜立行御史臺以 鎭 監

彧 其 日 滋 得釋。 人耶。」,視之,果然,明日,指憲司詰成等,不服。 以爲疑,明日齋沐, 曩有王成等五人,同 大德二年,遷浙西廉訪使。 詣城 持誓狀 隍祠 到 禱 有縣尹張彧者,被誣以贓,獄 曰:「張彧 祠焚禱 · 火未盡 坐事 有寃狀, 因出 面 去之,燼中得其 所得火中誓狀示之,皆驚愕伏辜 願 神 成,滋審之,但俛首泣 相滋 , 、遺藁, 明其 誣。」守 今藏於 廟道 壁間 而 不語。 士進 豊

十年,改 濟南路 總管,專拜陝西行省參知政事。 時陝西不 雨三年, 道過 西嶽, 因 禱

列

傳

第

七

+

八

良

吏

官,果 幾,以疾卒于位。贈通奉大夫、河南行省參知政事,追封開封郡公,諡莊 滋 奉命來參省 大雨。 滋卽開倉,以麥五千餘石給小民之無種者,俾來歲收成以償官,民大悅。 事,而安西不雨者三年,民饑而死,滋將何歸!願神降甘澤,以福黎庶。」到 未

統 民 兵二千戶,陞真定路管民萬戶。憲宗六年,籍河北民徙河南者三千餘人,俾專領之,遂 F 天璋字君璋,洛陽人。父世昌,仕金爲河南孔目官。憲宗南征,率衆款附,授鎭撫,

掾,有侍御史倚勢貪財,御史發其贓,天璋主文牘,未及奏,顧爲所譖,俱拘內廷,御史對食 提控,事有可否必力辯,他相怒,

天障言不置,

王竟從其議,

且曰:「掾能如是,

吾復何憂」」 「死職,義也,奈何爲兒女子泣耶」御史慚謝。俄見原免。丞相順德王當國,擢掾 悲 其渡,國實從之,遂以無事。 一哽,天璋問故,御史曰:「吾老,唯一女,心憐之,聞吾繫,不食數日矣,是以悲耳。」天璋曰: 集河上欲南徙,有詔令民復業,勿渡,衆洶洶不肯還。天璋慮其生變,勸總管張 天璋幼穎悟,長負直氣,讀書史,識成敗大體。至元中,爲南京府史。時河北饑民數萬 大德四年,爲工部主事。 河南按察副使程思廉察其賢,辟爲憲史,聲聞益著。 蔚州有劉帥者,豪奪民產,東不敢決,省檄天璋往訊之,帥服, 後 中書,爲 爲中臺 國寶聽

列傳第七十八 良吏一 校勘記

以扈從勞,加奉訓大夫,賜侍燕服二襲。 田 意歸民。大德五年,以樞密大臣誾伯薦,授都事,贊其府。引見,賜錦衣、鞍轡、弓刀。 秩滿當代,樞密臣奏留之,特以其代爲增 後

帝顧左右曰:「君璋,廉愼人也,必得其情。」天璋承命,獄賴不寃。 勿怠!即以中書刑部印章付之。旣視事,入覲,賜酒隆福宮,及錦衣三襲。 曰:「臣不才,誤蒙擢用。」帝曰:「先朝以謝仲和爲尙書,卿爲郎中,皆朕親薦也。 曰:「此不貪賄卜天璋也。」因問今何官,天璋對曰:「臣待罪刑部郎中。」復問誰所薦者,對 軌者,敕天璋訊正之,賞賚優渥。尚書省臣得罪,仁宗召天璋入見,時興聖太后在座,帝指 青衣巾,以別民伍。 天璋曰:「赭衣塞路,秦弊也,尚足法耶!」相悟而止。 武宗時,遷宗正府郎中。尚書省立,遷刑部郎中。適盜賊充斥,時議犯者幷家屬咸服 有告諸侯王謀不 後被命治反獄, 汝宜奉職

不以累諸君也。」竟發藏以賑之,民賴全活。 賑之,僚佐持不可,天璋曰:「民饑如是,必俟得請而後賑,民且死矣。 爭賂之,覬免譴,饒獨無有,省臣銜之,將中以危法,求其罪無所得。縣以饑告,天璋卽發廪 總管,天璋旣至,聽民自實,事無苛擾,民大悅,版籍爲清。時省臣董田事,妄作威福,郡縣 璋擒百數人,悉磔以徇,盜爲止息。陞浙西道廉訪副使,到任閱月,以更田制,改授饒州路 皇慶初,天璋爲歸德知府,劭農興學,復河渠,河患遂弭。時羣盜據要津,商旅不通,天 其臨事無所顧慮若此。 火延饒之東門,天璋具 失申之實、吾獨任之,

廉訪使。先是,豪民瀕海堰,四專商舶以射利,累政以賂置不問,天璋至,發卒決去之。 衣冠,向火拜,勢遂熄。 鳴山 有虎爲暴,天璋移文山神,立捕獲之。 以治行第 聞。 陞廣東

南地素無冰,天璋至,始有冰,人謂天璋政化所致云。

尋乞致事。

萬餘言,目之日中興濟治策,皆中時病。 錢不輸于臺,留用賑饑,御史至,民遮道稱頌。 時,穀價翔湧,乃下令勿損穀價,聽民自便,於是舟車爭集,米價頓減。 天璋處之,晏如也。 方艱,吾年八十,恒懼弗獲死所耳,敢避難乎!」遂行。 天曆二年,蜀兵起,荆楚大震,復拜 至順二年卒。 贈通議大夫、禮部尚書、上輕車都尉、河南郡侯,諡 山南廉訪使。 因自引去。 會詔三品官言時政得失,因列上二十事,凡 既歸汴,以餘祿施其族黨,家無甔儲 至則厲風紀,清東治, 人謂公老,必不行矣。 復止 州郡 憲 天璋曰:「國步 司 |贓罰 肅 然。 庫網 是

校勘記

- 一〕譚澄 疑「譚」當作「覃」,見卷一六七校勘記(10)。
- 父資榮 來證云:「案資榮自有傳,此贅。」譚資榮傳見卷一六七。
- = 其弟山口 息 道光本與本書卷一六七譚資榮傳及牧庵集卷二四譚澄神道碑合,從補
- [B] 瀕海堰 此處當有脫文,道光本從類編作「瀕海築堰」。

元史卷一百九十二

列傳第七十九

良吏二

耶律伯堅字壽之,桓州人。氣豪俠,喜與名士游。 用薦舉入官,爲工部主事。 至元九

年,轉保定路凊苑縣尹。

也、地勢不利、果導之、則清苑被其害、而水亦必反故道爲災。 大司農司官及郡守行視可否,事遂得已。 初,安肅州苦徐水之害,訴於大司農司,大司農司欲奪水故道,導水使東。 伯堅陳其形勢,圖其利害,要 東則清苑境

田,許以溉田之餘月,乃得堰水置磑。仍以其事聞于省部,著爲 縣西有塘水,溉民田甚廣,勢家據以爲磑,民以失利來訴。怕堅命毀磑,決其水而注之 定制

縣居南北之衝,歲爲親王大官治供帳於縣西,限以十月成,至明年復撤而新之,吏得並

列傳第七十九 良吏二

緣 **侵漁**, 其費不貲。 伯堅命築公館,以代供帳,其弊遂絕。 凡郡府賦役,於縣有重於他縣

輒 曰:「寧得罪於上,不可得罪於下。」必詣府力爭之。

.清苑四年,民親戴之如父母,比去而猶思之,立石頌其德焉。 擢為恩州同 知。

軍。 屬,結壘自保。 其後論功行賞,分土世守,命直 段直 [字正卿,澤州晉城人。至元十一年,[]河北、河東、山東盗賊充斥,直聚其鄉黨族 世祖 命大將略地晉城,回直以其衆歸之,幕府承制,署直潞州元帥府 佩金符,爲澤州長官。 右監

逃民聞之,多來還者,命歸其田廬如約,民得安業。 澤民多避兵未還者,直命籍其田廬於親戚鄰人之戶, 素無產者,則出粟賑之;爲他郡所 且約曰:「俟業主至,當析而歸

俘掠者,出財購之,以兵死而暴露者,收而瘞之。

廷 來學者,不五六年,學之士子,以通經被選者,百二十有二人。在官二十年,多有惠政。 時命提舉本州學校事,未拜而卒。 未幾,澤爲樂土。 大修孔子廟,割田千畝,置書萬卷,迎儒士李俊民為師,以招延四方 朝

語都刺字瑞芝, 凱烈氏。 祖阿思蘭,嘗從大將阿朮伐宋,仕至冀寧路達魯花赤,子孫因

其名蘭,遂以蘭爲氏。

令,除遼州達魯花赤,以最聞,賜上尊名幣,除集賢直學士。 此,眞難得也。」事乃止。 王 |添力聖旨,諳都剌曰:「此旨非惟 語都**刺通經史**,兼習諸國語。 尋授應奉翰林文字,凡蒙古傳記,多所校正。 有虧 成宗時,爲翰林院札爾里赤, 國體, 行且爲民殃矣。」帝聞之,謂近臣曰:「小吏如 職書制誥。 陞待制。 會有旨命書藩 時方選守

無虞。 開其生路耶」旣又養粥以食之,所活數萬人。又城臨漢水,歲有水患,爲築堤城外,遂以 刺 驗其良民,輒聽其度關,吏曰:「得無違上命乎。」諳都剌曰:「吾防姦耳,非仇良民也,可不 至順元年,遷襄陽路達魯花赤。 山西大饑,河南行省恐流民入境爲變,檄守武關, 諳都

都剌裁抑之,民以無擾。 復被獲,乃盡輸其情,而諳都刺之誣始白,俾再任一考。 **畫劫人,久不能捕,諳都刺生擒之,其黨賂宣慰使羅鍋,誣以枉勘,縱其賊,已而賊** 元統二年,除益都路總管。 至正六年卒,年七十。 俗頗悍點,而諳都刺務興學校,以平易治之。 親王買奴鎭益都,其府屬病民,諳 有上馬賊白 劫 河間,

子變徹堅,同知新喩州事,以孝稱。

以 不 代茅茨、民始免於疾癘火災。 知井飲,汲 楊景行字賢可,吉安太和州 于河流,故多疾癘 不知 人。 豪民十人,號十虎,干政害民,悉捕置之法。 登延祐二年進士第,授贛州路會昌州判官。 陶瓦,以茅覆屋,故多火災。 景行教民穿井 乃創學舍, 以 會昌民素 飲, 陶瓦

磨 ,轉撫州路宜黃縣 調 永新州 , 判官,奉郡府命,覈民田 尹,理白冤獄之不決者數十事 租,除剗宿弊,奸欺不容, 細民賴焉。 改江西行省照

師

儒

,勸民斥腴田

以饍

士,弦誦

之聲遂盛。

州 之,不聽 百 縣 里外。 路歸安縣 長 (吏罷 陞 撫州路總管府推官,發擿奸伏,郡無寃獄。 , 乃 賂 當 道 者 , 以 危 語 揻 之 , 一 不 顧 , 卒 治 之 如 法 。 是去之,由是官吏畏其人,不敢詰治,陶遂暴横於一郡。 金溪豪僧雲住,發人冢墓取財物,事覺,官吏受賄,緩其獄,景行急按之,僧以 尹,奉行省命,理荒田租,民無欺弊。 金溪縣民陶甲,厚積而兇險,嘗屢誣陷其 由是豪猾屛迹, 景行至,以法痛繩之, 良民獲安。 徙五 轉湖 賄 動

景行 所歷州縣,皆有惠政,所去,民皆立石頌之。 以翰林待制、朝列大夫致仕,年七十

林 興祖字宗起,福州羅源人。 至治二年,日至進士第,授承事郎、同知黃巖州事,三遷 第七十九 良吏二

列

傳

偽 除,何以牧民」即張牓禁僞造者,且立賞募民首告,俄有告者至,佯以不實斥去, 籍甚。 者 殺 而 百餘 造二 人甚 悍鵹 知鉛 山州。 一衆,奪人妻女十一人爲妾,民罹其害,銜寃不敢訴者十餘年。 、因偽 人幷贓者,乃鞫之,款成。 江浙行省丞相別兒怯不花薦諸朝,陞南陽知府,改建德路同知,俱未任。 人,擇其重罪一二事鞫之,獄立具,逮捕其黨二百餘人,悉置之法。民害旣去,政聲 造致富,乃分遣惡少四五十人,爲吏於有司,伺有欲告之者,輒先事戕之,前後 鉛山素多造偽鈔者,豪民吳友文爲之魁,遠至江淮、燕薊,莫不行使。 友文自至官、爲之營救、興祖命併執之、須臾、來訴友文 興祖 至官,曰:「此害不 又有告獲 友文奸

賊計。 興祖 害,興祖 課,以道州爲最。 商,貸鈔五千錠,且取郡樓舊桐板爲盾,日中皆備。哈剌帖木兒得鈔、盾,大喜,遂留,爲禦 曰:「明 使哈剌帖木兒屯兵城外,聞賊至,以乏軍需,欲退兵,興祖聞,即夜詣說留之。哈剌帖木兒 爲文禱之,大雨三日,蟲死而 至 正 賊聞新總管至,一日具五百盾,以爲大軍且至,中夕遁去。 永明縣洞徭屢竊發爲民 日得鈔五千錠、桐盾五百,乃可破賊。」興祖許之,明日甫入城視事,卽以恩信勸 以手牓諭之。皆曰:「林總管廉而愛民,不可犯也。」三年不入境。 |八年,特旨遷爲道州路總管,行至城外,撞賊已迫其後,相去僅二十里。 以年老致仕,終于家。 麥稔。 已而罷興作,賑貧乏,輕徭薄斂,郡中大治,憲司考 春旱,蟲食麥苗, 時湖南副 諭 鹽

府。 廉 觀 音 明 奴字志能,唐兀人氏,居新州。 剛 斷,發擿 如神。 民有 **銜寃不直者,雖數十年前事,皆千里奔走來訴,觀音奴** 登泰定四年進士第。 由戶部主事,再轉而 知歸德 立為

決,

旬

日悉清

氏, 匿 吏,亦預 其實、吾亦得賂,敢以首。」於是罪任商而釋孫妾。 獄,呼府胥語之曰:「吾爲文具香幣, 若爲吾以||郡事禱諸城隍神, 孫訴于官,官吏納任賄,謂郄非傷死,反抵孫罪,置之獄。 彰德富商任甲,抵睢陽,驢斃,令郄乙剖之,任以怒毆郄,經宿而死。 |郄事, 畏觀音奴嚴明, 且懼神顯其事, 乃以任所賂鈔陳首曰: 「郄實傷死,任賂上下 王 來訴冤,觀音奴立破械出孫 令神顯於吾。」有睢陽小 **郄有妻王氏、妾孫**

王田 妻挽楊、 質之,果無所顯明。 妻還,則田爲楊據矣。 ,幸神勿泄也。 寧陵豪民楊甲,夙嗜王乙田三頃, ,同就崔 府君神祠質之,楊懼神之靈,先期以羊酒浼巫囑神勿泄其事,及王 』」觀音奴因訊得其實,坐楊罪,歸其田王氏,責神而撤 觀音奴疑之,召巫詰問,巫吐其實曰:「楊以羊酒浼我囑神曰:『 王妻訴之官,楊行賄,偽作文憑,曰:「王在時已售我。」觀音奴令王 不能得。值王以饑攜其妻就食淮南,而王得疾死, 其祠 與楊詣祠 我實據

亳州有蝗食民禾,觀音奴以事至亳,民以蝗訴,立取蝗向天祝之,以水研碎而飲,是歲

西洞 !徭反,自强往見徭酋,說以禍福,中其要害,徭酋立爲罷兵,貢方物,納款請命。 周自强字剛善,臨江路新喻州人。好學能文,練於更事,以文法推擇爲吏。 泰定間,廣 事聞于

朝,特旨超授廣西兩江道宣慰司都事。

治大行,聲譽籍甚。部使者數以廉能舉于朝,選授撫州路金溪縣尹,階奉議大夫,政績愈 於是賦役平均,貧富樂業。 息。 訴于庭者,一見卽能知其曲直,然未遽加以刑責,必取經典中語,反覆開譬之,令其 若能悔悟首實,則原其罪,若迷謬怙惡不悛,然後繩之以法不少貸。民畏且愛,獄訟頓 以亞中大夫、江州路總管致仕。 民間田稅之籍多失實,以故差徭不平,自强出令履畝覈之,民不能欺,文簿井井可考, 轉饒州路經歷,遷婺州路義烏縣尹。 其聽訟決獄,物無遁情,點吏欲以片言欺惑之不可得。 周知民情,而性度寬厚,不爲刻深。 民有以爭訟 由是政 誦 讀講

陽府尹,奏最于朝,特授衢州路總管。 白景亮字明甫,南陽人。 明法律,善書算。 由征東行省譯史有勞,超遷南恩知州,陞沔

列傅

人弛,從祀諸賢無塑像,諸生無廪饍,祭服樂器有缺,景亮皆爲備之,儒風大振,縉紳稱 之多寡,大小家各使得宜,咸便安之,由是民不勞而事易集,他郡邑皆取以爲法。郡學之政 而貧弱不能勝者,多至破產失業。景亮深知其弊,乃始覈驗田畝以均之,役之輕重,一視田 先是,爲郡者於民間徭役,不盡校田畝以爲則,吏得並緣高下其手,富民或優有餘力,

美,賜以宮錦,改授台州路總管。卒于官。 景亮性廉介勤苦,自奉甚薄,妻尤儉約,惟以脫粟對飯而已。部使者嘗上其事,特詔褒

官。 復立諸市舶司,艮從省官至泉州,建言:「若買舊有之船以付舶商,則費省而工易集,且可絕 爲書吏,遷淮西。會例革南士,就爲吏於兩淮都轉運鹽使司,以歲月及格,授廬州錄事判 東侵欺掊克之弊。」中書省報如艮言。凡爲船六綜,省官錢五十餘萬緡 淮東宣慰司辟爲令史,以廉能稱。 王艮字止善,紹興諸暨人。尚氣節,讀書務明理以致用,不苟事言說。 再調峽州總管府知事,又辟江浙行省掾史。會朝廷 淮東廉訪司辟

於行省,未報,而克敬爲轉運使,集議欲稍損其額,以紓民力。沮之者以爲有成籍不可改, 歷建德縣尹,除兩浙都轉運鹽使司經歷。 紹興路總管王克敬,以計口食鹽不便,嘗言

艮毅然曰:「民實寡而强賦多民之錢,今死、徙已衆矣,顧重改(民)[成]籍而輕棄民命乎![四] 減 且 浙 興食鹽五千六百引。尋有復排前議者,艮欲辭職去,丞相聞之,亟遣留艮,而議遂定。 右之郡,商賈輻輳,未嘗以口計也。移其所賦,散於商旅之所聚,實爲良法。」於是議歲

實除其數,移文往返,連數歲不絕,艮取吏牘披閱,卽除其糧五萬二千八百石、三鈔二百五 十萬緡,運戶乃冤於破家。 民船以備短送, 吏胥得並緣以虐民, 及至海次, 主運者又不卽受, 有折缺之患。 艮執言曰: 運戶 遷 、旣有官賦之直,何復爲是紛紛也!」乃責運戶自載糧入運船。運船爲風所敗者,當覈 海道漕運都萬戶府經歷。紹興之官糧入海運者十萬石,城距海十八里,歲令有司拘

松江,條陳曲折,以破其誑妄,言其「不過欲竦朝廷之聽而報宿怨,且冀創立衙門,爲徼名爵 鈔 計耳。萬一民心動搖,患生不測,豈國家培養根本之策哉」。艮言上,事遂寢。 百餘萬緡;宜立官府糾察收追之。中書移行省議,遣官驗視,而松江獨當十九。艮至 遷江浙行省檢校官。有詣中書訴松江富民包隱田土,爲糧一百七十餘萬石,沙蕩,爲

家,前後數十年,株連至千家,行省數遣官按問,吏已伏其虛誑,而有司喜功生事者,復勒其 報合徵糧六百餘石,憲司援詔條革去,終莫能止。艮到官,首言:「是州之糧,比元經理已

除江西行省左右司員外郎。吉之安福有小吏,誣民欺隱詭寄田租九千餘石,初止八

列傳第七十九

歲 增一千一百餘石,豈復有欺隱詭寄者乎?准憲司所擬可也。」行省用艮言,悉蠲之。 餘,以中憲大夫、淮東道宣慰副使致仕。卒年七十一。 艮在任

止横斂,均賦役,減口鹽一百餘引,蠲包銀權鐵之無徵者。 盧琦字希韓,惠安人,登至正二年進士第。十二年,稍遷至永春縣尹。 已而訟息民安,乃新學宮,延師 始至,賑饑饉,

儒

課子弟,月書季考,文風翕然。

自新,琦許之,酋至,琦械送帥府,自是威惠行於境外。 之大乎!吾邑長乃以暴毒驅我,故至此耳。」琦因立馬喻以禍福,衆皆投刃槊,請縛其酋以 鄰邑仙遊盜發,琦適在邑境,盜遙見之,迎拜曰:「此永春大夫也。爲大夫百姓者,何幸

大家使食之,所存活不可勝計。 十三年,泉郡大饑,死者相枕籍。其能行者,皆老幼扶攜,就食永春。琦命分諸浮屠及

邪 以 則 **[為憂。]因踴躍爭奮,琦率以攻賊,大破之。明日,賊復傾巢而至,又破之。大小三十餘** ! 我當獨死之爾。」衆皆感憤,曰:「使君何言也!使君父母,我民赤子,其忍以父母畀賊 且彼寇方將虜掠我妻子,焚毁我室廬,乃一邑深仇也。今日之事,有進無退,使君其勿 十四年,安溪寇數萬人,來襲永春。 琦聞,召邑民喻之曰:「汝等能戰,則與之戰,不能, 傳第七十九 良吏二

列

戰,斬獲一千二百餘 人,而邑民無死傷者,賊大衂,遂遁去。 時兵革四起,列郡皆洶洶不寧,

獨永春晏然,無異承平時。

十六年,改調寧德縣尹而去。

方最。 家,而 +, 籍 可辭 五 一十大家之役,故貧者受役旬日, 而 五十 分計 鄒 合一千石。 伯 田 都之田 少 從,有糧 顏字從吉,高唐人。 者稱其所出而無倖免。 上送官者,爲糧六千石。 一石者,受一石之役,有糧升斗者 大家之田 ,連跨數都,而 爲建寧崇安縣尹。 而家已破。 貧困無告之民, 其大家 細 民之糧 伯顏 以五 崇安之爲邑, 日:「貧弱 ,受升斗之役。 ,或僅升合。 始得以休息。 十餘家, 之受困, 而 區別其土田, 名之日都者五 有司 兼 **崇安賦役之均,** 田 五 多者受數都 常以 千石; 一至此乎」 四 細民 百之細 之役 以 乃取其糧 遂爲四 民,配 四 而 百 不 餘

累石 以爲 邑有宋趙抃所鑿溝,溉民田數千畝。 固 ,溝悉復抃遺跡,而田爲常稔,民賴 歲久,溝湮 其利 而田廢。 伯顏修長溝十里,繞楓樹陂,

肆虐。 安慶 伯顏)路嘗得造僞鈔者,遣卒械其囚至崇安,求其黨而 捕 寣 得其狀,卽 執而 歸諸安慶, 自是偽造之連逮無濫及崇安者。 、執之,囚與卒結謀,望風 於是行省 入良民家 帥

府、御史憲府咸舉其能。選調漳州路判官。

劉秉直字清臣,大都武清人。 至正八年,來爲衞輝路總管,平徭役,興敎化, 敦四民之

業,崇五土之利,養鰥寡,恤孤獨。

所,忽有村民阿蓮者,戰怖仆地, 具言賊之姓名及所在, 乃命尉襲之, 果得賊于汴, 遂正 賊劫汲縣民張聚鈔一千二百錠而殺之,賊不獲,秉直具詞致禱城隍祠,而使人伺于死

太行之蒼峪神祠,具詞祈祝,有靑蛇蜿蜒而出,觀者異之,辭神而還,行及數里,雷雨大至。 直出俸米,倡富民分栗,餒者食之,病者與藥,死者與棺以葬。 天不雨,禾且槁,秉直詣城北 秩滿,以親老,去官侍養。 秋七月,蟲螟生,民患之,秉直禱于八蜡祠,蟲皆自死。歲大饑,人相食,死者過半,秉

許義夫,碭山人。 爲夏邑縣尹,每親詣鄉社,敎民稼穡。 見民勤謹者, 出已俸賞之,怠

惰者罰之。三年之間,境內豐足。

後爲封丘縣尹,值至正四年大饑,盗賊羣起,抄掠州縣。 義夫聞賊至近境,乃單馬出郊

愿款,賊遂他往。」封丘之民,得発於難。 十里外迎之,見賊數百人,義夫力言:「封丘縣小民貧,皆已驚惶逃竄,幸無入吾境也。」言辭

校勘記

至元十一年 考異云:「今澤州鳳臺縣有劉因所撰直墓碑、」「傳所書年代,與碑大相刺謬。碑

云甲戌之秋,南北分裂,河北、河東、山東郡縣盡廢。甲戌者,元太祖之九年,金貞祐二年也。」

「而傳乃云至元十一年,河北、河東、山東盜賊充斥,以其歲亦在甲戌也。曾不思至元之初,境 內寧謐,河北諸路安有寇盜充斥之患乎。」「蓋由史臣不學,誤仞甲戌爲至元之甲戌,相差一甲

子而不悟也。」

世祖命大將略地晉城 考異云:「碑又云:天子命太師以王爵領諸將來略地,公遂以衆歸之。謂

太師,國王木華黎承制時也。而傳乃云世祖命大將略地晉城。曾不思世祖時晉城久入版圖,安

得有命將略地之事乎。碑作于世祖朝,其文云:今上在潛邸,命提舉本州學校,未拜而卒。 然則

直卒于憲宗朝、未嘗事世祖矣。」

- 選舉志有「至治元年春三月廷試進士」,此云「二年」,有誤。 至治二年 考異云:「案至治二年壬戌,非科舉之歲,當有誤。」按元制,三年一舉。本書卷八一
- 列傳第七十九 校勘記

五萬二千八百石 顧重改(民)[成]籍而輕棄民命乎 據黃金華集卷三四王艮墓誌銘改。按上文有「成籍不可改」。 按黃金華集卷三四王艮墓誌銘作「二十五萬二千八百餘石」。此處疑有脫文。

兀史卷一百九十三

列傳第八十

忠義一

利,當以死報國。吾弟已被執,我不可再辱,汝等宜自逃生。」士卒皆猶豫不忍去,伯溫即拔 劍殺家屬,投井中,以刃植柱,刺心而死。 去,李成開水門導敵入,伯溫登堞樓,謂左右曰:「吾兄弟仗節擁麾,受方面之寄,今不幸失 甲戌,錦州張致叛,國王木華黎命擊之,大戰城北,伯通死焉。 龍堡,專任東征。 李伯溫,守賢之孫,彀之子也。〔〕長兄惟則,懷遠大將軍、平陽征行萬戶,次伯通。 知平陽已陷,弟守忠被執,選驍勇拒守,久之,金人盡銳來攻,守卒夜多遁 金人登樓,見伯溫抱柱如生,無不嗟歎 伯溫行平陽元帥府 事 ", 鎭 歲

東南路兵馬都元 子守正,「三」自幼時嘗質於木華黎,後爲平陽守,活俘虜甚衆,以功授銀青榮祿大夫、河 帥。 歲庚寅、上黨、晉陽合兵攻汾州,將陷,守正以義赴援,回衆寡不敵,

列傳第八

+

忠義

四三七七

瘡戰歿。 兵擒之。 别 曰:「幸公完是州,德甚大,願奉是州以從。」關中兵屯吉州,
曾領楊鐵槍以數千人叛,守正出 遣老弱百人,曳薪揚塵,多張旗幟,敵懼,遂解去。汾人持牛酒迎犒者,道不絕,且泣 大帥以其兄守忠代之。 軒成據隰州,守正往擊之,中矢傷足,及歸,瘡甚,會金人完顏合達攻平陽,守正裹

戰, 汴,誘以高爵,使降,守(中)[忠]駡之,四語惡,金人怒,置守忠鐵籠中,火炙死。 之,會於高梁,師潰入城。平陽副帥夾谷常德潛獻東門以納金兵,城遂陷。金人執守忠至 Щ 以青龍堡降。 復之。 守忠官至銀青榮祿大夫、河東南路兵馬都元帥,兼知平陽府事。壬午冬,平陽公胡景 丁亥夏四月,金紇石烈眞襲擊平陽行營招討使權國王按察兒於洪洞,守忠出援 嘗從攻益都,北還,軍將彭智孫,乘間據義州叛,守忠聞之,長驅抵城下, 上,力

都統、李霸王兵於龜蒙山。 會宋賈涉誘殺(連)[漣]水忠義軍統轄季先,[六]人情不安,衆迎珪爲帥,呼爲太尉 人,倜儻不覊。 石 達,泰安新泰人,宋徂徠先生守道之裔孫也,世以讀書力田爲業。體貌魁偉,膂力過 金貞祐南渡,兵戈四起,珪率少壯,負險自保,與滕陽陳敬宗聚兵山東,破張 宋將鄭元龍以兵迎敵,珪敗之於亳陽,至遂乘勝引兵入盱眙。

歲戊寅,太祖使葛萬不罕與宋議和。己卯,珪令麾下劉順直抵尋斯干城,入覲,太祖慰

八傳第八十 忠義一

子。」珪不顧,宋將沉珪妻子於淮。遂率順及李溫,因孛里海歸木華黎。木華黎悅之,謂曰: 思降。庚辰、宋果渝盟、珪棄其妻孔氏、子金山、杖劍渡淮、宋將追之曰:「太尉迴、完汝妻 勞順,且敕珪曰:「如宋和議不成,吾與爾永結一家,吾必榮汝。」順還告珪, 珪心感服,日夜

「若得東平、南京,授汝判之。」

如故。」 **珪棄妻子,提兵歸順,戰勝攻取,加授金紫光祿大夫、東平兵馬都總管、山東諸路都元帥,餘** 便宜從事。後金棄東平,珪與嚴實分據,收輯濟、兖、沂、滕、單諸州。癸未,太祖詔曰:「石 辛巳,木華黎承制授珪光祿大夫、濟兖單三州兵馬都總管、山東路行元帥,佩金虎符,

其麾下立社兖州祀焉。 祿,復能受封他國耶!假我一朝,當縛爾以獻。」。金主大怒,蒸殺于市,珪怡然就死,色不變。 陣馬仆被擒。囚至汴,金主壯其爲人,誘以名爵,欲使揖,珪憤然曰:「吾身事大朝,官至光 秋七月,珪領兵破曹州,與金將鄭從宜連戰數畫夜,糧絕,援兵不至,軍無叛意,珪臨

至,出保高州富庶寨,射獵以食。屢奪大營孳畜,又射死其追者。國王木華黎率兵攻寨,寨 攸哈刺拔都,渤海人。初名興哥,世農家,善射,以武斷鄉井。 金末,避地大寧。 國兵

破, 奇男子,吾 諸將怒,欲殺之,木華黎曰:「壯士也,留之爲吾用。」俾隸麾下。 高 1州,國 寧忍斷汝首以獻,汝其往降乎!不然,吾一 |兵圍 [城,下令曰:「能斬攸興哥首以降,則城中居民皆獲生。」守者召謂曰:「汝 城生靈,無噍類矣。」 興哥乃折矢出

華黎略地燕南,爲先鋒,至大名,金將徒單登城督戰,哈剌拔都射之,中左目 奔,追殺 都 命 興 元帥,鎭太原 一哥恣取之,興哥獨取良馬三,以賞兵士。木華黎以其功聞太祖,賜名哈剌拔都。 從木華黎攻通州 將盡。 論 功,賜金符,充隨營監察。戊寅,授金虎符、龍虎衞上將軍、河東北路兵馬 ·

獻計,一夕造砲三十、雲梯數十,附城,州將懼,出寶貨以降。 ,其部將開門南 木華黎 從木

何! 梁 知府 歸。 明 時 立 日,下令軍中,凡俘獲有親者聽贖,無貲者官爲贖之,民得完聚者衆。 嘗微服夜出,聞民間語曰:「吾屬父母子女相失矣,死者不可復生,生者無以爲贖,奈 太 一西風寨,奪居民耕牛,民羣訴之,哈剌拔都領數騎,追殺梁知府, 原新破,哈剌(刺)拔都修城池,[刊]繕兵甲,招降屬邑,市肆不改,遠近聞之,皆相率 梟首西門,驅耕 庚辰二月,金

攻壽陽縣王胡莊,垂破,時左右裨將各分兵守險,城中見卒不滿百,哈刺拔都夜半引甲騎十 木 華黎由葭州渡河西行,哈剌拔都迎之,道破隰州及懸窯、地洞諸寨。辛巳三月,金兵

餘人救之,道三交,見金兵舉烽東、西兩山,哈剌拔都趨之,大戰。天將明,金兵遁去,擣太

原之虛,由西門俘獲哈剌拔都家屬。哈剌拔都聞之,徑趨西山,復奪以還。

之,衆潰,其酋長走石家昂,遂平陵井寨。乙酉二月,淸泉寨酋長王殼降,石家昂亦降。 將輕騎衝其陣,伏發,大敗之。時太原諸邑皆平,唯石家昂及盂州陵井寨、忻州淸泉寨爲唇 齒,皆未下。甲申十月,將兵至陵井,遣卒叩寨門,詐曰納糧芻,守者弗悟,門啓,徑入,蹂踐 國兵三萬至矣。」金兵懼,潰去。癸未,金馬武京來攻太谷縣桑梓寨,哈剌拔都設伏于險, 五月、金趙權府率兵三萬圍太原、哈刺拔都將騎三十、出西門、令騎曳柴揚塵、聲言曰:

矣,我又棄太原,將何面目見主上及國王乎!家屬任公等所俘,哈剌拔都誓與城同存亡。」 遂歿于陣。 外呼曰:「攸哈剌拔都,汝當出」哈剌拔都曰:「真定史天倪,平陽李守忠,隰州田雄,皆失守 丁亥五月,姦人夜獻太原東門于武仙,仙引兵入,哈剌拔都鏖戰。仙兵大至,諸將自城

太祖以其子幼,命其表弟王七十復立太原。己丑,攻鳳翔府,中砲死。哈剌拔都長子

忙兀台,嗣鎭太原。

任志,潞州人。 歲戊寅、太師、國王木華黎略地至潞州、志首迎降,國王授以虎符,俾充

降 元 .則死。」志曰:「我爲大朝之帥,豈愛一子」親射其子殪之。 帥 、收輯 山寨。 數與金兵戰,比有功。 金嘗擒其長子如山以招之,曰:「降則爾子得

長 司 子 存襲。 而還授之。 原給,仍賜第以居之。十一月,以存父子死事,子立尚幼,先官其姪成爲潞州長官,待立 木華黎嘗召諸將議事,志亦預徵,道經武安,其縣已反爲金,志死之。 庚寅歲,金將武仙攻潞州,存戰死。辛卯正月,有**旨潞州**元帥 成卒,授立潞州長官,佩金符。 後歷澤州尹,遷陳州,卒。 任存妻孥家屬,令有 國王閔之,令其

招討使,從元帥史天倪略趙州平棘、欒城、元氏、柏鄉、贊皇、臨城等縣,籍其民五千餘,置吏 授忒末都統。 安輯焉。 耶律忒末,契丹人。父丑哥仕遼爲都統,遼亡,不屈節,夫婦俱死焉。 歲甲戌,國兵至,金徙于汴,忒末及子天祐率衆三萬內附,授帥府 金主憫其忠義 監軍,天祐

臨澤潞, 磁、相、懷、孟,招花馬劉 歲辛巳,太師木華黎統領諸道兵馬,承制加忒末洺州等路征行元帥, 降其民六千餘戶,以功遷河北西路安撫使, 元帥,有功。 木華黎又承制授忒末真定路安撫使、洛州 兼澤潞元帥府事。 壬午,致仕, 與天祐略邢 元 帥,

眞定。

金 鹽 Щ 天 祐 衞 鎭 襲職,從天倪攻取益都諸城,略滄、棣,得戶 鹽場 未下 天祐 以 計 克 之, 歲運 2鹽四 千席,以佐 七千 · , 兼滄、棣州達魯花赤,佩 軍 儲。 甲申 ٠, 攻 大名, 拔 金符。時 之。

澤還 金 降將 北 京 武 遇 仙 諸 據眞定 滿 城, 以叛 合蒙古諸軍 殺守將史天倪。 與賊戰,走武 忒末父子 山仙, 復 夜踰 眞定。 城 而 出 將 天澤襲兄 以 聞 會 天倪弟

祐 鎭 趙 州

自

南

朝

廷

以

爵

面

以

復 兵屢 祐 以 盡烹之。」述 仙 且 **心**收散 忠孝 元 乃 賊 遣 書示 帥 趨 挫 其 明 卒圍 還 難 僕 年 兼趙 監軍 ', |仙 趙 劉 天 兩 攬兒 城。 壁, 澤。 末密令攬兒語 全, 州 復犯 張林密構 安撫使。 率衆殊 汝能 天澤 持 1 眞定, 亥, 書誘天祐曰:「汝能 固守,不失 日二 賊 死戰,仙 仙 天澤潛師出藁城, 棄 以傷憊致仕,居趙,卒。 黨,啓關 王 天祐 城 陵 走,追 國 怒,盡殺 之事,照耀 曰:「仙賊狡猾,汝所 納 家大計, 至 賊 藁 能 誅 趙 州 沈 天祐 城, 末 史册 我 忒末與其妻石抹氏, 會 家 視 倉皇巷戰,手 汝能 天澤兵 官 刀鋸 十八人。 孫 吏以降,當 世世,朝列大夫、江西権 知 遵 甘 、夾擊, 也, 交 如 命。忠 蜜 册 殺 戰 矣。」 以 活 殺 數 于 我 林。 汝 欒城 誠許 十人,身被 及家孥在真定者, 天祐 故, 父 母, 加 、元氏 國 墮其機 慟 奉 仍授 哭承 功不 或 十餘瘡 高邑、 L 茶都 笲 汝 在 命 一將軍 元 王 馳 以 轉運使。 帥 一,斬關 陵下。」天 柏 皆陷 虧 洛州 鄉, 藁 忠 不 城, 節 爾, 征

兒。 國, 誓相親好,旣而敗盟,與其子先髠潛謀,欲襲太祖,因遣使通問,許以女妻太祖弟合撒 父脫倫闍里必, 扈從太祖征西域, 累立奇功。 至期,太祖欲往,明里也赤哥疑其詐,諫止之。王可罕知謀泄,遂謀入寇,後爲太祖所 八、(兒)[晃]合丹氏。(公)祖明里也赤哥,嘗隸太祖帳下。初,怯列王可罕與太祖 爲鄰

昔列 以報君父之讎,今力窮被執,從汝所爲!逼令跪,不屈,以鐵撾碎其膝,終不跪,與弟不闌奚 同被害。 曰:「我待汝厚甚,而汝反爲此耶!」八剌曰:「汝背叛君上,害我父,掠我親屬,我誓欲殺汝, 遣騎追之,至一河,八刺馬驚,不能渡,回拒之,射中數人,力窮,兄弟就擒。脫鐵木兒賣之 侍也里伯秃,謀報父仇,後爲也伯里禿家人泄其謀。八剌知事不成,將家族南奔,脫鐵木兒 吉、脫鐵木兒叛,日至奔海都。伯八以聞,且願提兵往討之,未得命,爲彼所襲,死焉。 脫鐵木兒虜其二子八刺、不蘭奚,分置左右,居歲餘,待之頗厚。八刺陰結脫鐵木兒近 世 |祖卽位,以伯八舊臣子孫,擢爲萬戶,命領諸部軍馬屯守欠欠州。 至元十二年,親王 幼子何都兀赤,江口官至河北河南道肅政廉訪使。

者乎一、父時以斷事官建牙保定,合刺普華往白其志。父奇之,俾習畏兀書及經史,記誦精 合 刺普華,岳璘帖木爾子也。幼侍母奧敦氏居益都,嘗歎曰:「幼而不學,有不墮吾宗

敏,出於天性。李璮畔,其母攜季子脫烈普華避地登、萊問,音問隔絕,號泣徹晝夜。 繼從

從叔父撒吉思平賊山東,卒奉其母以歸。

幣,卻貢獻,以厚生民之本。」又言:「江南新附,宜招舊族,力穡通商,弛征薄入,以撫馴其 民,不然,恐尙煩宵旰之慮。」帝多采用其言。 以存國家之體。興學校,獎名節,以勵天下之士。正名分,嚴考課,以定百官之法。通泉 興,被選爲行都漕運使,帥諸翼兵萬五千人,從事飛輓。江南平,上疏言:「親肺腑,禮大臣, 廣興、商山二冶,以勞授金符,爲商山鐵冶都提舉,未及代,以職讓其弟。時兵南伐,餽運繁 撒吉思深加器重,自謂其才不及,言於世祖,召給宿衞。 嘗以事至益都,於四脚山下置

為寧海路達魯花赤,後遷江(南)[西]宣慰使,自己未至官,改廣東都轉運鹽使,兼領諸番市舶。 罄其家,不足以償,苟朝廷必不任虧損,臣獨當其辜。」詔勿治。阿合馬憤之,乃出合剌普華 政,責償舟人。合刺普華伏闕抗言:「量之踦贏,出於元降,而水道之虞,非人力所及。且彼雖 屬漕米二十萬,繇邦溝達于河,舟覆,損十之一,而又每斛視都斛虧三升。時阿合馬專

|蠻討捕之,先驅斬渠魁,以訊馘告,躬抵賊巢,招誘餘黨復業,仍條言鹽法之不便者,悉除其 按察使脫歡大爲姦利,遂奏罷之。羣盜歐南喜僭王號,僞署丞相、招討,衆號十萬。 因

時盜梗鹽法,陳良臣扇東莞、香山、惠州負販之徒萬人爲亂,江西行省命與招討使答失

圖 守信等,分兵捡之。 <u>J-</u> 其 Щ ĴΪ 形勢, 及攻取之策三十餘條,遂與都元帥課兒伯海牙、宣慰都元帥白佐、

賊歐 軍 妻希(召)[台]特勒氏,[三夢其來告曰:「吾死矣。」知事張德、 數十人,勇氣益厲,以衆寡不敵,爲所執。 ·中往往見其乘雕督戰云。 、鍾等,橫絕石灣,其鋒銳甚。 未幾,右丞唆都督兵征占城、交阯,屬護餉道。(兆〔比〕至東莞、博羅二界中,口三遇劇 後贈戶部尚書、守忠全節功臣,諡忠愍。 合刺普華身先士卒,且戰且行,矢竭馬創, 賊欲奉之爲主,不屈,遂遇害于中心岡。 劉閏亦夢之,二人相繼死。 徒步 格關, 是夕 イ,其 殺 而

之報云。 進士。 遜,善著子正宗、阿兒思蘭,皆相繼登第。 追封雲中郡侯,謚忠襄。子(六)[五]人,[12]偰玉立、偰直堅、偰哲篤、偰朝吾、 子二人:偰文質,越倫質。 偰哲篤官至江西行省右丞, 以文學政事 **偰文質官至吉安路達魯花赤,贈宣惠安遠功臣、** 門世科之盛,當時所希有,君子蓋以爲其忠義 稱于時。 越倫質子善著,偰哲篤子偰 **楔列**箎, 禮部尙書, 百僚 皆第

劉 天学字裕民,大名人。 由中書譯史爲東平總管府判官,改都漕運司判官,知冠州,再

知許州

,所至有治績。

列傳第八十 忠義一

時檢核屯田,臨潁鄧艾口民稻田三百頃,有欲害之者,指爲古屯,陳于中書,請復築之。

中書下天字按實,天字爲辨其非,章數上,乃止。

縣令有貪污者,妄徙石於北二里,誣其民食私鹽,繫治百餘家。 兩縣關(辨)〔辯〕、[1三葉縣倚 襄城與葉縣接壤,其南爲湛河,襄城民食滄鹽,葉縣民食解鹽,刻石河南岸以爲界。 葉

陝漕勢以凌襄城。中書遣官察其實,天孚爲考其元界,移石故處,而葉縣令被罪去。

青蟲如蟊,食麥,人無可奈何,忽生大華蟲,盡嚼之。許人立碑頌焉。 歲大旱,天子禱卽雨。野有蝗,天子令民出捕,俄羣烏來,啄蝗爲盡。 明年麥熟時,有

關津口,盡收船舫東岸。令判官孫伯帖木兒守汾陰,推官程謙守禹門,河東縣尹王文義守 只趨晉寧告亂,天字日夜治戰守具,選丁壯,分守要害。令河東縣達魯花赤脫因都守大慶 風陵等渡。 河 中府,視事始兩月,陝西行省丞相阿思罕爲亂,舉兵至河中。時事起不虞,達魯花赤朶兒 轉萬億寶源庫同提舉,遷江西行省左右司郎中,以母老不赴。 俄丁母憂。 服除,起知

中人偪,乃詣阿思罕軍,阿思罕囚之,而斂船濟兵。兵旣入城,阿思罕以扼河渡、鎖舟楫爲 日,阿思罕縛栰河上,欲縱火屠城,同知府事鐵哥,與河東廉訪副使明安答見事急,且患城 阿思罕軍列栅河西岸,使來索舟,天孚度不能拒,凡八遣人至晉寧乞援兵,不報。 居七

爲國語若祝謝者,再拜已,脫衣帽岸滸,乃投水中。 於阿思罕之手,吾寧蹈河以死。」遂拂衣出。 從善等曰:「吾家本微賤,荷朝命至此,今不幸遭大變,吾何忍從之,而負上恩哉!且與其辱 天孚罪,欲脅使附己。方坐府治,號令諸軍,天孚佩刀直前,衆遏之,不得進。 時天寒,河冰方堅,天字拔所佩刀斫冰開,北望 阿思罕大怒,籍其家。 郡人咸哀痛之。 退謂幕僚王

道宣慰使、護軍、彭城郡侯、諡忠毅。 事平,詔其弟天惠,給驛以歸其柩,葬于大名。 贈推誠秉節功臣、中奉大夫、河東山西

蕭景茂,漳州龍溪人也。性剛直孝友。家貧力農。

賊遂以刀決其口,至耳傍,景茂駡不絕聲而死。 險, 鬼,豈從汝爲逆耶「層洲,其所居里也。 與賊戰。 重改至元四年,南勝縣民李智甫作亂,掠龍溪。景茂與兄佑集鄕丁拒之, 衆敗,景茂被執。 賊脅使從己,景茂罵曰:「狗盜!我生爲大元民,死作隔洲 賊怒,縛景茂於樹,臠其肉,使自啖。 有司上其事,朝廷命褒表之,仍給錢以葬。 景茂益憤駡, 據觀音山橋

校勘記

李伯溫守賢之孫穀之子也 類編云:「按李守賢傳云:金大安初,守賢暨兄庭植,弟守正、

從兄伯通、伯溫、歸款於木華黎。」「是伯溫與守賢、守正皆兄弟。而本傳云伯溫爲守賢之孫、彀

之子,且以守正爲伯溫之子,舛謬實甚。即其年與事考之,有不待辨而自明者。」

子字正 見本卷校記[]]。

歲庚寅上黨晉陽合兵攻汾州將陷守正以義赴援 考異云:「案守忠死於丁亥四月,而守正之戰

殁,更在其前。 庚寅在丁亥後四年,守正死已久矣。 此事有誤。或云當爲庚辰之譌。」

守(中)(忠)罵之 從北監本改。按前後文作「忠」。

ト 新 し 亳陽

按本書卷五九地理志, 亳州命名始於北周,隋、 唐以降,無「亳陽」之稱。 蒙史改作

[六] (連) [漣] 水忠義軍統轄季先

按朱史卷四七六李全傳,

季先所統忠義軍駐漣水,

據改。

類編

亳州」。

哈剌(刺)拔都 從殿本删。

[八](兒)[晃]合丹氏 族爲晃合壇氏,丹、壇聲相近,則兒乃晃字之譌。」從改。 考異云:「元祕史載蒙力克額赤格事甚詳,卽此傳之明里也赤哥也。 秘史謂其

九九 列吉叛,遣人誘脅之,牙忽都不從」。雙溪醉隱集卷二後凱歌詞自序有「至元丙子冬,西北藩王弄 至元十二年親王昔列吉脫鐵木兒叛 疑「二」當作「三」。本書卷一一七牙忽都傳有「十三年,失

列

傳

邊。 明年春, 韶大將征之」。 丙子, 卽至元十三年, 與牙忽都傳合。 世祖紀與伯顏傳此事繫於

十四年,蓋伯顏出師時追述其原委。蒙史有考。

- 何都兀赤 「何」當作「阿」。 「阿都兀赤」蒙語,義爲「掌馬羣者」。 錢大昕元史氏族表已校。
- 江(南)(西)宣慰使 據主齋集卷一一高昌偰氏家傳、 黃金華集卷二五合剌普華神道碑、至正集

卷五四合刺普華墓志銘改。

[1三](北)[比]至東莞博羅二界中 據文義改。

希(召)[台]特勒氏 據圭齋集卷一一高昌偰氏家傳、黃金華集卷二五合剌普華神道碑、 至正集

卷五四合剌普華墓志銘改。

子(六)(五)人 金華集卷二五合刺普華神道碑、至正集卷五四合刺普華墓志銘列舉其子之名,其數亦皆五 據圭齋集卷一一 高昌偰氏家傳改。 按下文列舉偰文質子之名,其數爲五人。 }元 }黄

書已校。

二吾 兩縣鬭(辨)〔辯〕 道光本與元文類卷一七字术魯翀知許州劉侯民愛銘合,從改。

